


# Kuhane Bible



The New Testament in the Kuhane language of Botswana and  
Namibia

# **Kuhane Bible**

## **The New Testament in the Kuhane language of Botswana and Namibia**

copyright © 2020 Door 43 International Mission Community

Language: Chikuahane (Kuhane)

Translation by: Door 43 International Mission Community

Contributor: Aldrian Mubu, Alexandre, BENJAMIN SINVULA KACHANA , CORNELIA NSALA MUTUMBA, Candy Mwitumwa, Charles Ndeni, Christine N. Matomola, Chuma KASHUWA, Clarina Likokoto, Cornelia Nsala Mutumba, Erestina Simubali, Francinah Simana, Grace N Sinvula, Iuze Kasale, Jeffrey Kolokwe, Jeke samunzala, John Wood, Joseph, Larry Versaw, Leon M Musilizo, MANYANDO R LUNZA, Mary, Matongo Rosemary, Mbala Raphael, Mbala Raphael Mbala, Memory Nzila Saisai, Mondele Kpanga, Moses Musukubili M, Nixon, Norah Namasiku Mwanamwali, Rose Lunza, Rosemary Matongo, Rosina Iuze Musialike, SIMANA FRANCINAH, Silishebo Lindah, Simwanza Patricia Sepiso, Siseho Dominic Sikopo, alexandre, benjamin sinvula kachana, cornelia, erestinah, fred waluka, iuze kasale, john k streeter, mary chiteta, stewardd, tebogo Tshenyego, winnie Muhosho

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2020-08-17

---

PDF generated using Haiola and XeLaTeX on 25 Nov 2022 from source files dated 18 Aug 2020  
c4515960-0a9d-5ab2-8ffe-52f395a41fc8

## Contents

|                          |     |
|--------------------------|-----|
| Mateu . . . . .          | 1   |
| Mareka . . . . .         | 41  |
| Luka . . . . .           | 66  |
| Johani . . . . .         | 108 |
| Mitendo . . . . .        | 139 |
| Maroma . . . . .         | 181 |
| 1 Va Korinte . . . . .   | 198 |
| 2 Makorinte: . . . . .   | 214 |
| Agalatiya . . . . .      | 225 |
| Maefese . . . . .        | 231 |
| Vafilipi . . . . .       | 237 |
| Makolose . . . . .       | 242 |
| 1 Matesolonika . . . . . | 246 |
| 2 Mateselonika . . . . . | 250 |
| 1 Timotea 1 . . . . .    | 252 |
| 2 Timotea . . . . .      | 257 |
| Tite . . . . .           | 261 |
| Filimoni . . . . .       | 263 |
| Maheberu . . . . .       | 264 |
| Jakovo . . . . .         | 277 |
| 1 Petorosi . . . . .     | 281 |
| 2 Pitolosi . . . . .     | 286 |
| 1 Johani . . . . .       | 289 |
| 2 Johani . . . . .       | 293 |
| 3 Johana . . . . .       | 294 |
| Juda . . . . .           | 295 |
| Insinulo . . . . .       | 297 |

## Mateu

<sup>1</sup> Imbuka ya luzuvo lwa Jesu Kereste mwana wa Daafita mwana wa Abrahamama. <sup>2</sup> Abrahamama a vali nji si wa Isaka, ni Isaka isi wa Jakobo, ni Jakobo isi wa Juda ni vance. <sup>3</sup> Juda a vali njisi wa Perezi ni Zera cha Tama, Perezi isi wa Hezironi, ni Hezironi isi wa Ramu. <sup>4</sup> Ramu a vali njisi wa Amminadab, Amminadab isi wa Nahshoni, ni Nahshoni isi wa Salumoni. <sup>5</sup> Salumoni ivali nji si wa Boazi cha Rahaba, Boazi isi wa Obedi cha Ruti, Obedi isi wa Jesse, <sup>6</sup> Jesse a vali nji si wa Daafita simwine. Daafita a vali njisi Solomoni cha mwihiyavwe wa Uriya. <sup>7</sup> Solomoni a vali nji si wa Rehoboamu, Rehoboamu isi wa Abijah, Abijah isi wa Asa. <sup>8</sup> Asa a vali njisi wa Josafati, Josafati isi wa Joram, ni Joram isi wa Uzziyah. <sup>9</sup> Uzziyah a vali njisi wa Jotamu, Jotamu isi wa Ahazi, Ahazi isi wa Hezekiya. <sup>10</sup> Hezekiya a vali njisi wa Manasseh, Manasseh isi wa Amoni, ni Amoni isi wa Josiyah. <sup>11</sup> Josiyah a vali njisi wa Jekoniya ni vanche he nako i vavaka luwitwe kwa Babilona. <sup>12</sup> Mi kuzwa ha kuka luwiwa kwa Babilona, Jekoniya a vali njisi wa Salatiele, Salatiele a vali muzimu wa Zerubabele. <sup>13</sup> Zerubabele a vali njisi wa Abiudi, Abiudi isi wa Eliyakimu, ni Eliyakimu isi wa Azoro. <sup>14</sup> Azoro a vali njisi wa Zadoki, Zadoki isi wa Akimu, ni Akimu isi wa Eliudu. <sup>15</sup> Eliudu a vali nji si wa Eliyazere, Eliyazere isi wa Matani, ni Matani isi wa Jakobo. <sup>16</sup> Jakobo a vali nji si wa Josefa mwihiyabwe wa Maria, kakwe Jesu na zalwa, yo sumpwa Keresite. <sup>17</sup> Mahasi onse ku zwa kwa Abrahamama ku ya kwa Daafita a vali mahasi ena ikumi lyonke ni one, kuzwa kwa Daafita kuya ha vaka luwiwa kwa Babilona ku leta kwa Keresite a vali masika ena ikumi lyonke ni one. <sup>18</sup> Ku zalwa kwa Jesu Keresite kuva chitahali mu nzila i chilila. Inyina, Maria, ava veelezwe kuti a seswe kwa Josefa, kono pili ni vaseni kwiza hamwina, ava waniki ha menzi mahya cha Luhuhu lu Jolola. <sup>19</sup> Mwihiyavwe, Josefa, a vali mukwane yo shiyeme, kono kana a vali kusaka ku shuvulisa mwihiyabve ifandaleza. Cwale cha nahana ku manisa che nkunutu ku li veezeza kwaakwe naye. <sup>20</sup> Havali kusi nahana cezi zintu, Ineloi lya Ireza ni lya livonisa kwali mu chiloto, liti, “Josefa, mwana wa Daafita, kanji u tiyi to hinda Maria kuva muhwenu, kakuli yo lihinditwe kwali a vali ku lihindwa cha Luhuhu lu Jolola. <sup>21</sup> Mwa zale mwana' mushisu, mi momu ulike izina lya Jesu, mukuti ka puluse vantu vakwe ku zivi zavo.” <sup>22</sup> Izo zonse zi va pangahali kwi zuziliza chiva wambiwa kwa Simwine cha muporofita, nati, <sup>23</sup> “ Mu vone, mwalyango mwave ha menzi mahya, mi mwa zale mwana' shwisu, mi mu va mu sumpe izina lyakwe Imanuere”- i talusa, “Ireza wina neswe.” <sup>24</sup> Josefa ha vuka ku ifonzi zakwe ni ku chita ka kuya ke Ineloi lya Simwine muli va mu laeli mi ca mu hinda kuva mwihiyavwe. <sup>25</sup> Kono kana aba lali naye konji ha zala mwana' mushisu. Mi ava mu sumpisi izina lya Jesu.

## Ikauhanyo 2

<sup>1</sup> Jesu hamana kuzalwa mwa Betelehema ya Judea mwi nako za simwine Heroda, vakwame valitutite vazwa kuvuzwe zuba civeza mwa Jerusalema, <sup>2</sup> “Wina kuhi yava zalwa simwine wa Majuda?”

kakuti twavona inkani yakwe kuvuzwe bwe zuva, twakeza kukumu fukamina”.<sup>3</sup> Simwine Heroda hazuwa catiya ahulu mane nivantu vamwa Jerusalema vonse.<sup>4</sup> Heroda ca supa ma Purisita vonse ni vañoli va mulao mi cava vuza nati, “Kriste uswanela kuzalilwa kuhi?”<sup>5</sup> Civamuco kuti Mwa Bethelahoma wa Judea, kakuti muvava ñoleli va porofita,<sup>6</sup> Iwe, Bethelahoma, mwinkanda ya Juda, kana umunini kuvayendisi va Juda, mukuzwe muyendisi yete a alise cisi ca Isilaele”.<sup>7</sup> Cwale Heroda ca sumpila va litutite kumbali nikuva vuza kuti inkani yavoneka inakonzi luli.<sup>8</sup> Cavatuma kwa Bethelahoma nikuvata kuti “muyende mukasakisise ce ntokomero muhwile, cimwaka muwana, zemuniizibise name zeniyende nikamu fukamine.”<sup>9</sup> Havamana kuzuwa kwa simwine, civaliyendeza mi inkani ivava voni kuvuzwezuvu ciyava yenda kuvusu nikuka zimaninina hewulu lye civaka mwa vali kwikere mucice.<sup>10</sup> Hava vona inkani civa sanga ahulu cokuhitiriza.<sup>11</sup> Habenjila mwinzuvo civa vona mucice nena ni Maria nyina. Civa fukama nikumu laperu. Civavungununa cifumu civo nikumuha impo ze gauda, ni insense, ni mira.<sup>12</sup> Ireza cava kalimera muciloto kuti sanzi vaboli kwa Heroda, mi civavola kwi nkanda yavo cenzila ingi.<sup>13</sup> Hava yenda, iñiroi lye Ireza cilye zira Josefa kwi ñonzi mi cilyati, “vuke uhinde mucice niva nyina, mutirire kwa Egepita, muke kale kwateni kusikira hete nini kuwambile, kakuti Heroda mwasake mucice kuti a mwi haye.”<sup>14</sup> A o masiku Josefa cavuka nikuhinda muhwire niva nyina niku tilira kwa Egepita.<sup>15</sup> ava kekali kwa Egepita kusikira he fu lya Heroda. Ici ci be zuzilizi civa wambwa nji Ireza camu porofita, “kuzwa mwa Egepita niva sumpi mwangu wo muswisu.”<sup>16</sup> Cwale Heroda havona kuti vakwame va litutite vavamucengi, cavenga ahulu. avatumini vantu kuti vake haye vahwile vonse veciswisu mwa Bethelahoma, mane nimucilalo conse civehaya vahwile ve zilimo zo vere kuzwa hakuzalwa kuvuza hansi, cokuya ce inako yava lakalezi kuzwa havava mu wambilili va kwame va litutite.<sup>17</sup> Mi cikwalizuziliza civa wambiwa ca muporofita Jeremia,<sup>18</sup> “Linzwi li vazuweki mwa Rammah, cililo ni kuvokolola kukando, Rahele ulilira vana vakwe ukana mane nikutontozwa kakuti kavasikwina.”<sup>19</sup> Hafwa Heroda, Ingiloi lya Ireza cilyeza kuvoneka kwa Josefa muciloto mwa Egepita ni kumuta,<sup>20</sup> Vuke hinde mwana niva nyina mi uyende kwi nkanda ya Isilaele, kakuti vavali kusaka kwi haya mucice ci vavafwi.”<sup>21</sup> Josefa ca vuka ni kuhinda muhwire niva nyina civeza mwinkanda ya Isilaele.<sup>22</sup> kono hazuwa kuti Arkelausi avali ku vusa mwa Judea ha cipula cesi Heroda, ava tiyi kuya kwateni. mi Ireza camukalimera muciloto, cayenda kwi nkanda ya Galileya<sup>23</sup> mi cayenda mi cakakala mucivaka cisupwa Nazareta. I ci cibezuzilizi civawambiwa cava Porofita, kuti mwa supwe mu Nazareta.

### **Ikauhanyo 3**

<sup>1</sup> Ku mazuba ao Joani mukolobezi chakeza na kutaza mwi halaupa ya Judea nata kuti,<sup>2</sup> “Mubake ka kuli mubuso we renza wina ha fuhi.”<sup>3</sup> Ka kuli linzwi ni lya wambwa ngi mupolofita Isaya, halili, “Linzwi yo zumwi li huweleza mwi halaupa, 'mulukise enzila ye renza, mupange enzila zi wotolokete.’”<sup>4</sup> Yahanu Joani u zabala cizabalo zo boza bwe ka mele ni lutunga lwe ndalo mwi muunda. Zilyo za kwe baili epasu ni

buchi bo mwi munkanda. <sup>5</sup> Cwale Jelusalema, Judeya yose ni nkanda yose bo mumukulela wa lwizwi lwa Joludani ci bayenda kwali <sup>6</sup> Cibeza ku kolobezwa kwali mu lwizwi lwa Joludani, a bo ni baliwaba zibi za boo. <sup>7</sup> Kono ha bona bungu bwa bafalisi ni masaduki ba keza kwali kwi i nkolobezo, ca ba wambila, “Enwe bana be nzoka zina cifanu, aba mulwili kutiya bukali bwe renza bu keza njeni?” <sup>8</sup> Cwale mubike zihantu zi bonisa kubaka. <sup>9</sup> Cwale musiye kuzeza kuli wanbila mukati kenu, ‘Twina Abulahama ishetu.’ Cwale ni milwila kuti irenza uo wola kukatwila Abrahamama bahwile ha aa mabwe. <sup>10</sup> Hanu imbezo izimene ku mihisi ya masamu. Cikuni conse ci sabiki zihantu zilotu mu citemwene hansi ni ku sohelwa mu mulilo. <sup>11</sup> Ni mi mikolobeza ni mezi kubonisa kubaka. Kono iye u kezite mu masule angu mukando kwa ngu, ka ni swaneli nanga ku nyemuna insangu zakwe. Mwa mi kolozebe ni luhuhu lu jolola ni mulilo. <sup>12</sup> Itundu lyakwe lina mwi yanza lya kwe; mwa fiyele cihoto cakwe, a ku kunganye mahila akwe mu cishete cakwe. Luungu ulu, a luhise mu mulilo u sa zimi. <sup>13</sup> Cwale Jesu ha zwa mwa Galilela ku ya ku lwizi mwa joludani ku ku kolobezwa kwa Joani. <sup>14</sup> Kono Joani ca tundamena kumu kanina, nati, “Njeme ni swanela ku kolobezwa kwa ko, ukeza kwa ngu?” <sup>15</sup> Jesu ca mwi taba, “Uni zuminine hanu ci lukite kwetu kwizuziliza ku luka konse.” Cwale Joani ca mizuminina. <sup>16</sup> Ha mana ku kolobezwa, Jesu ca zwa haho hahomumenzi, haho i wulu cilye yalukila ha kwe. Ca bona luhuhu lwe renza lu keza hansi luswana sina inkwilimba ni kwi za ku munikila hewulu lwakwe. <sup>17</sup> Haho, liinzwi cilya zwa muwulu li ta kuti, “Uzo nji Mwanangu yo sakiwa, u ni katwa.”

## Ikauhanyo 4

<sup>1</sup> Lyahanu Jesu ca kashiwa ku luhuhu lu jolola kuya mwi halaupa ku ku likiwa kwa Jabulusi. <sup>2</sup> Halinyima zilyo mazuva ena makumi one ni masiku ena makumi one, ca fwa inzala. <sup>3</sup> Muliki neza kuwamba kwali, “Haiva u mwana we Ireza, u laele aa mabwe a sanduke zilyo” <sup>4</sup> Mi Jesu ne tava cati kwali, “ku ñoletwe, ‘Muntu kete na hale ca zilyo vulyo, kono ni ca liinzwi li zwa mukaholo ka Ireza” <sup>5</sup> Linu Javulisi ca mu hinda kumu twala he wulu lwa muzako ujolola uva ketiwa we nkereke mulelele, <sup>6</sup> Ni ku mu wamvila kuti, “Haiva njewe u mwana wa Ireza, uwile hansi kakuli ku ñoletwe, ka laele mañeloi akwe mu aku vavalele, mu aku nyamune mu mayanza nji kuti itende lyako kanji li gunkiwa ibwe <sup>7</sup> Jesu nati kwali, “Hape u ñoletwe, Kanji u liki infumwako Ireza. <sup>8</sup> “Hape Javulusi na mu hinda kumu twala he lundu lilumbite, ni kumu tondeza mileneñi ina munkanda yonse ni nkanya yayo. <sup>9</sup> Nati kwali, “Zonse izi zintu kani zikuhe, ci wa wila hansi ca mazwi. uni fukamine uni lapele” <sup>10</sup> Linu Jesu ca muta, “U zwe aha Javulusi! kakuli ku ñoletwe, “U fukamine Ireza i nfunwako, imi u seveleze iye yeke” <sup>11</sup> Javulusi ca musiya; mi mañeloi ci eza kwa Jesu, ci a mu seveleza. <sup>12</sup> Haho linu Jesu ca zuwa kuti Joani avva suminwa, na vola kwa Galilea; <sup>13</sup> Ca kuula kwa Nazareta ku ka zaka kwa Kapenauma, i wanika kumbali ni wate lya Galilea, mu cilalo ca Zevuloni ni Nafitali. <sup>14</sup> Izi ziva pangahali kwi zuziliza ci polofita ca Isaya ha vati, <sup>15</sup> “Inkanda ya Zavuloni ni nkanda ya Nafitali i vambene ni wate, mwi shilwa lwa Jodani, Galilea ya vantu vasena vavezi Ireza; <sup>16</sup> Vantu va vena mwififi, va va voni iseli ikando; linu

va vena munkanda yefu ni mumu nzunde walyo, vava ñaatwilwa iseli”<sup>17</sup> Kuzwa iyo nako Jesu na tanga ku kutaza nati, “Mu vake, mukuti mubuso wa kwiwulu ci wina hafuhi”<sup>18</sup> Havali kwa vwenda ku mbali ye wate lwa Galilea, ca vona vakwame vovele vana va muntu yenke, Simone yo sumpwa Pitolosi, ni Andriyasi mwacakwe, ci va sohela tunyandi twavo mwi wate, kakuli vavali vandui.<sup>19</sup> Jesu cati ku vali, “mwize, municilile, imi muni mi pange vayamvi va vantu”<sup>20</sup> Haho niva siya tunyandi twavo, kumwi cilila.<sup>21</sup> Jesu hvvali kwa vu yenda vulyo ca vona vovele vamwi, Jakovo mwana wa Zebediya, ni Joani mwacakwe, va vena mu cisepe ni Zevediya ishavo, ni va onga tunyandi twavo. ca va sumpwa;<sup>22</sup> Haho civa siya cisepe ni shavo, kumwi cilila.<sup>23</sup> Jesu na yenda mwa Galilea yonse, na ka ruta vantu mumasinagoge avo, nava wambila ivangeli ya muvuso, na hoza matuku onse ni vuhole vonse vuvena ku vantu.<sup>24</sup> Intava zakwe ci za ka zuweka kwa Siriya yonse; ni kwa letwa kwali valwala vonse malwalo a cincana cincana, ni va katazehete, ni va vena inhuho imbi, ni vava li ku liwa kuzuminina, ni vava li ku zuminina luñañali; Jesu ca va hoza.<sup>25</sup> Vungi vwavo vu a kuzwa kwa Galilea, ni kwa Dekapolisi, ni kwa Jelusalema, ni kwa Judeya, ni mwishilwa lya Joludani, ci vwa mwi cilila.

## Ikauhanyo 5

<sup>1</sup> Cwale Jesu ha vona bantu, ca kambama he lundu. cwale he kala hansi, Valutiwa bakwe cibeza kwali.<sup>2</sup> Ca zasumuka ni kubaluta. Ca wamba kuti,<sup>3</sup> “Imbuyoti ya vana va vontana mu luhuhu, kakuti cavo mubuso we Wulu.<sup>4</sup> Imbuyoti ya bana ba Lila, kakuti muva ntontozwe.<sup>5</sup> Va fuyaulitwe bali Tobohete, kakuti mu ba yole inkanda.<sup>6</sup> Va fuyauletwe abo ba fwa inzala yo ku shiyama ni nyota yo Kushiyama, kakuli mu be kute.<sup>7</sup> Imbuyoti ya vaana ve Cishemo, kakuti kava tambule cishemo.<sup>8</sup> Va fuyauletwe vena Inkulo zi jolola, ka va vone Ireza.<sup>9</sup> Va fuyaulitwe va leta Inkozo, kaba supwe vana ve Ireza,<sup>10</sup> Va fuyaulitwe va nyandisiwa ce baka lyo kuluka’, kakuti cavo mubuso we Wulu.<sup>11</sup> Imbuyoti zenu vantu ciba mi tukola ni kuminyandisa, kapa kuwamba zibilala zonse ca mapa cevaka lyangu.<sup>12</sup> mutabe mi musange, kakuti itifo yenu inkando kwi Wulu. Kakuti vantu mubaba nyandisezi maporofita vavali kwina kwa teni ni museni ku zalwa.<sup>13</sup> Inwe mwi Sautu lye kanda, kono i Sautu hali sampuka, muli lungiswe cinzi? kalisina buzole, konji kusohera fera hanze ni kulyatolwa ca matende.<sup>14</sup> inwe mwi seli lye kanda. munzi uzakitwe he lundu ka u oli ku wungulwa.<sup>15</sup> ka kwina vantu va munika ilambi ni kuli bwika mwi nguvo, kono ulivika ha voneka, mi a tondeze vena mwi nzuvo vonse iseli.<sup>16</sup> Iseli lyenu livenye havusu bwa vantu vonse kuti va vone mitendo yenu yi shiyeme mi muva tembe ishenu wina kwi wulu.<sup>17</sup> musiye kuhupula kuti ni va kezi kumanisa mulao kapa vaporofita. Kena ni va kezi kuku zimanisa, kono ku i zuziriza.<sup>18</sup> kakuti ni mi wambira buniti kwanda Iwulu ni nkanda cinza mana, ka kwina yonke i taku yo Mulao, yetene ni imane mbwita zintu zonse hete ni zi mane.<sup>19</sup> Cwale yense yo cola mulao kuti kawina butokwa ni kuluta vamwi vo vulyo milao ka supiwe kuti munini mu mubuso wo kwi Wulu. Kono yo imamera ni kuiruta ka supiwe kuti mukando mumu

buso wo kwi Wulu. <sup>20</sup> ceniti ni mi wambira nita kuti ku luka kwenu haiba ka ku hitirili kuluka kwa bañoli ni kwa bafalisi, ka sane ni mwi njire mubuso we Wula. <sup>21</sup> muba zuwi kuba wambwa kuba ikale kuti, usiye kwi haya, mi we haya u swaneri ku hewa mulandu, <sup>22</sup> kono ni miwambira mutu zuhi kamba zuhi yo bengera mu kwakwe, mwa swanere ku atuliwa. Mi hape yo wambira mu kwakwe kuti “u ci hole” u swanela ku atuliwa mwi khuta, mi yo mu wamba kuti, I we yasanambene, u mwabe mubu kabo bo muliro we here. <sup>23</sup> Cwale he co neula i mpo zako he aletare, ho sika hateni wiza kuhupula kuti wina mulandu ni mukwako, <sup>24</sup> siye i mpo za ko habusu bwa katala, u yende muka ambo lisane ni ku zumizana ni mukwako, njo so keze ku tambika i mpo yako cwale. <sup>25</sup> U litahanere ku zumi zana naye yo kuzekisa ni musina mwi nzira, mwendi yo zo, yo kuzekisa mpohona ca ka ku twale ku muatuli mi muatuli mwa ka kutambike mu manza o mu hikana yasa ka ku atule, ya sa ku sohere mwi intorongo, <sup>26</sup> Ka maniti ni mi wambira, kosono zwe mwa teni kwanda hete no mane kuliha mulando ca mali onse o kwete. <sup>27</sup> Muba zuwi kuti kuba tewa kuti, usiye ku panga buhule. <sup>28</sup> kono i me ni mi wambira kuti, yense yo lola mwanakazi cwo ku mu lakamina, ca mulala mwi nkulo ya kwe. <sup>29</sup> linso lyako lye cilyo haiba li ku sitatalisa, u li nyukule mo, mi u linzindire kule nawe, ka kuti ci lotu kwa ko, zi lama ca ko conke ha cifwa cocona, mi mubiri wa ko onse kanji u zindirwa mumulilo we Here. <sup>30</sup> I yanza lyako lye chilyo haiba ni liku sitatalisa, u likosole kwa teni, mi u liso here kule nawe, kakuli ci lotu kwa ko cilama conke ha ci fwa co nke isiñi mubiri onse ha u nzindirwa mumuliro we Here. <sup>31</sup> ku ba wambiwa hape kuti, muntu ha tanda mwi hyabwe, a mu tambike i mpampili lye kauhano. <sup>32</sup> kono i me ni mi wambira kuti muntu zuhi kamba zuhi yo hindika mwi hyabwe, kwanda o mulandu wo bushahi, u mupanga bushahi. Mi yense yasana musese kuzwa ha kukanwa kaibe i hule naye. <sup>33</sup> Hape, muba zuwi mu wambiro ku batu ba kwa ikale kuti, 'kanji u nkonkii ca vulisumino bwa mapa kwa Simwine, kono wi zuzirise vulisumino kwe Ireza ko bali sumini cabo. <sup>34</sup> Kono ni mi wambira kuti kanji muku nkonka, kamba niheba ce Wulu, ka kuli ji kwina cipula he kere Ireza, <sup>35</sup> kamba ce nkanda, kakuli nji malyatiro a matende a kwe; kamba ca Jerusalema kakuli muleneñi wa Simwine. <sup>36</sup> Hape musiyeye ku nkonka ce mitwi yenu, sina ha musa woli ku sandula lusuki lonke kusiha kapa kutuba, <sup>37</sup> Ci muswanera kuwamba co bufuhi kuta kuti eni eni kapa Ne ne, cihini ne chihi ci hitilira izi cicizwa kumutu mu bilala. <sup>38</sup> Mubazuwi kuti kuba wambiwa kuti, 'Linso ce Linso, mi lino ce Lino, <sup>39</sup> Kono ni mi wambira kuti, kanji mu kanini mutu mubilala. Haiba, yense u ku bakula kwi tama lyo bulyo, muntezekere ni kuyimwi mbali nayo a bakule koo. <sup>40</sup> Mi haiba zumwi u saka kumi suninisa ni kuhinda ci zwato canko, muherere ni ngubo yanko, <sup>41</sup> ha iba muntu u kuhambiriza kumu sindikiza cibima conke, u musindikize zibima zo bere. <sup>42</sup> U he ku muntu yense yo kukumbira, mi kanji u ka nini muntu yo saka ku kalima kwako. <sup>43</sup> Mubazuwi kuti kuba wambitwe kuti, u sake yo wikala naye he mbali mi u toye cila ca nko. <sup>44</sup> 'Kono ni mi wambira kuti, musake zila zenu mi mulaperele bana ba mi nyandisa, <sup>45</sup> Jokuta kuti mube baana be shenu wina kwi Wulu, yo ñatulisa i zuba lyakwe ku bantu va vii mane bulyo ni ba Lukite, mi u tumina i bula ha ba shiyeme ni ba fosahere. <sup>46</sup> Haiba kuti



musaka bulyo ba misaka, mupuzo inzi wete ni muka tambule?, esi ni batelisi bo mutero bapanga bulyo? <sup>47</sup> Mi haiba kuti mu lumerisa bulyo ba kwenu, zintu nzi zi mupanga zi hitilira zi bamwi? esi ni basezi Ireza nabo bapanga bulyo? <sup>48</sup> Mu be hande he, sina ishenu wina kwi Wulu ha shiyeme.

## Ikauhanyo 6

<sup>1</sup> Mu mamele kuti kanji mu citi inkezo zo vulotu vweni havusu vwa vantu kuti mu voniwe ku vali, heva njovulyo kete mu wane mupuzo kwe shenu wina kwi wulu. <sup>2</sup> Cwale ha muha intuso, kanji mu lizi mpeta ha vusu vweni mu va citila ba lihele muma sinagoge ni makululu, kuti va lumbiwe ku vantu. Ca buniti ni mi wambila, ci vava tambuli mupuzo wavo. <sup>3</sup> Kono ho ha intuso, kanji u zuminini iyanza lwako lya cimonso kwi ziva cili panga iyanza lyako lya cilyo, <sup>4</sup> njikuti i intuso yako yoha i hewe vulipatite. Cwale Iso yo vona zi patitwe mwa ku vozekeze. <sup>5</sup> Mi hamu lapera, kanji mu swani uvu va lihele, va saka kuzimana ni ku lapera mu masinagoge ni mu ma cailo a migwagwa, kuti va voniwe vantu. Luli ni mi wambila niti; ci va va tambili mipuzo yabo. <sup>6</sup> Kono iwe, co lapera, wi njile mu malivela, imi ci we yala ciyazo, u lapere kweso wina ku mbali; imi Iso yo vona ku mbali, mwa ku vozekeze. <sup>7</sup> Ci mu lapera, kanji mu boleli boleli zi sena intuso uvu mu ba citila va sa zumini; va nahana kuti va wola ku zuwiwa caku wamba wamba ahulu kwabo. <sup>8</sup> Hakuva vulyo, kanji mu swani na vo; kakuli Ishenu wizi zi mu vulite, ni mu seni ku mu kumbila. <sup>9</sup> Ci kwina vulyo mu lapele vuti, 'Ishetu wina mwi wulu' ku lumbiwe izina lyako. vu simwine vwako vwize. <sup>10</sup> Ci sakiwa kwako ci tendahale hansi mu ci nani mwi wulu. <sup>11</sup> Tuhe sunu zilyo ze zuva ni zuva. <sup>12</sup> U kwatile milandu yetu, uvu naswe mu tu ba kwatili va vatu fosezi. <sup>13</sup> Hape kanji utu twali mu muliko, kono utu lukulule ku muntu muvi. <sup>14</sup> Mi ho kwatila vantu zi va ku fosekeza, ni Iso mwi wulu naye mwaku kwatile. <sup>15</sup> Kono ho sa kwatili vamwi zi vaku fosekeza, niheli Iso kete na kukwatile zo mu fosekeza. <sup>16</sup> Imi, hape ho li nyima zilyo, kanji u linyanisi cifateho cako, ubu mu vacitila va lihele, va linyanisa zifateho njikuti va voneke ku vantu kuti vena ha ku linyima zilyo. Faa ni ku rwira, ci va va tambuli mipuzo yavo. <sup>17</sup> Kono iwe ho lilinyima zilyo, uli singe mafuta ku mutwi ni ku samba ku cifateho caku. <sup>18</sup> Nji kuti kanji u vonahali ku vantu kuti wina ha kuli nyima zilyo, kono konji kweso wina kumbali. Mi iso yo vona kumbali, mwaku vozekeze. <sup>19</sup> Kanji uli kunganyizi cifumu ca hansi, hena mafele ni mafumi a wola kuci lya, ni hena vasa va wola kutulula mwateni ni ku iva. <sup>20</sup> Kono, u likunganyize cifumu umwine kwi wulu ku sena mafele ni mafumi alya hateni, hasena ni vasa va wola ku tulula ni ku iva. <sup>21</sup> Kakuli hena cifumu cako nji hena inkulo yako. <sup>22</sup> Linso nji lambi lya muvili. Cikwina vulyo, heva linso lyako li vona hande, muvili wako onse mu uve mwiseli. <sup>23</sup> Heva linso lyako li towele, ni muvili wako wonse wina mucinzime. Cikwina vulyo, heva iseli lina kwako lina luli mucinzime, cikando vule ico cinzime! <sup>24</sup> Kakwina muntu yete na tendele vasimwine vovele, hesi ka toye yenke ni ku saka zumwi, kamba mwa kuteke yenke ni ku shwaula zumwi. Koti co wola ku tendela Ireza ni cifumu. <sup>25</sup> Ci kwina vulyo ni ku wambila, kanji u vilaeli

ni za vuhalo vwako, cete ulye ni cete uñwe, kambe kaza mubili wako, cete u zwate. njikuti vuhalo kavu hiti zilyo, ni muvili kuhita zizwato? <sup>26</sup> Mu lole zizuni za mwibyumbiyulu. Kazi vyali kazi sinzi kamba ku vika zi kutulwa mu ciduli; kono Ishenu wina kwi wulu uzi lela. Aho inwe kana muva tokwa ahulu ku zi zamba? <sup>27</sup> Njeni kwenu yo wola ku vulaela ku ekeza ku vuhalo vwakwe? Cwale cinzi hamu vilela ni za kuzwata? <sup>28</sup> Mu hupule nanga ziyangayanga za mu mawa, mu zi menena. Kazi tendi, kazi hosi vwanda. <sup>29</sup> Kono ni mi wambila niti, nanga Salumoni munkanya yakwe kana ava zwati niheva ku likana ni lyoke lyao. <sup>30</sup> Heva Ireza u zwatika lyani lya mumawa, lihala sunu ni zona lici li sohelwa mwi ziko, ku woleka vule ku zwatika inwe, inwe muve ntumelo inini? <sup>31</sup> Ni ha kwina vulyo kanji mu vileli ni muti, 'Mu tulye nzi?' kamba 'Mutu ñywe nzi?' kamba 'Mutu zwate zizwato nzi?' <sup>32</sup> Vantu vasa zimini nji va saka izi zintu, imi ishenu wa kwiwulu wizi kale zimu saka. <sup>33</sup> Kono pili musake vusimwine ni ku shiyama kwabo imi zintu zonse ka muzihewe. <sup>34</sup> Cikwina bulyo, kanji mu vileli ni ze zona, mukuti izona li vilela ni zalyo. Izuva limwi ni limwi lilikenwe vuvi vwalyo.

## Ikauhanyo 7

<sup>1</sup> Sanzi uatuli, ni we kete u atulwe. <sup>2</sup> Mo atwira nawe mwete utwirwe, Mi mulikaniso wo likanisa, ni wee mukulikaniswe. <sup>3</sup> Chinzi holola chitoweze muliso lyo mukwenu, kono ko lemuhi chikutoweze muliso ya ko? <sup>4</sup> U wola bule kuwamba kumukwenu, kuti nisaka kuku zwisa chimutoweze muliso, kono mu liso lya ko kwina chikutowenze na wee? <sup>5</sup> Iwe ulihele! tange u zwise chikutoweze muliso lyako, linu mobone site ni ku wola kuzwisa chitoweze mukwako muliso. <sup>6</sup> Musiye kuha zilyo zi njolola ku ba mbwa, mu siye ku sohela mabwe abutokwa habusu bwe zingulube. Ha kuba bulyo zi wola ku a lyatola cha matende, mi ni kubola kwiza ku kuñatola hakati. <sup>7</sup> Kubile, ko hewe. Sake, mo wane. Ngongote, mo wi lyalulwe <sup>8</sup> Mi yese ukubila u hewa, mi yese usaka, uwana. Mi mutu u ngongota, we wulilwa. <sup>9</sup> Kapa kwina mutu mukati kenu, kuti mwana nkwe ha mukubila inkoko, linu umu ha ibwe? <sup>10</sup> kapa ha kubila inswi, amu muhe inzoka? <sup>11</sup> chikwina bulyo, haiba iwe u muvi winzi kuha i mpo kubana bako, ku wo leka bule kwe ishenu wina kwiwulu kumuha zitu zilotu ku ba mukubila? <sup>12</sup> Linu, zitu zose zosaka kuti vatu vaku chitire, ni we u swanela kuba kuva chitira zonse, ici nji mulawo ni ma polofita. <sup>13</sup> Njile mwi nzila i ñuñu. Mulyango u zaseme ahulu ni kwiyaluka ahulu ulotele ku kufwa, Mi batu ba bangi ba yenda mwayo. <sup>14</sup> Mulyango muñuñu ni nzila iñuñu zitwala kubu halo, mi bache baiwana. <sup>15</sup> Mutiye maporofita ba mapa, ba keza kwenu ni chizwato chengu kono buniti ba tuhu bafile zala. <sup>16</sup> Kezihatu zabo mobezebe. Kana batu ba kunganya zichelatu ze waine ku chisamu cha miya kapa i efenga kuzwa kwi inkoma? <sup>17</sup> Mwi nzila iswana, cose ci samu cilotu ciha zi chelatu zilotu, kono cisamu cibi ciha zichelatu zivi. <sup>18</sup> Chisamu chilotu kachi woli kuha zihatu zivi, ni chisamu chivi kachiwoli kuha zihatu zilotu. <sup>19</sup> Chose chisamu chisa biki zihatu zilotu chikankwa ni kusohelwa mulilo. <sup>20</sup> ha kuva bulyo, mu mu bezibe cha zihatu zabo. <sup>21</sup> Kana vantu vonse va sumpa kwa ngu kuti, "simwine, simwine," va sejile mu chisi chewulu, kono konji yense utenda chiva saka va ndanda vena kwi wulu. <sup>22</sup> Vungi bwa vantu kava

cho kwangu ilyo izuba, “simwine, simwine, kana tuva polofiti mwizina yako, mwizina tuva hidiki madimona, hape mwinzina lyako tubapangi imakazo zikando?” <sup>23</sup> Linu kani va lwire halukanda, “kena niva mizi! muzwe kwangu, inwe vantu vavi!” <sup>24</sup> linu, yese uzuwa mazwi angu ni ku e chilila u swana sina muntu yozaka inzumbo yakwe he bwe. <sup>25</sup> Invula haisoka, muunda ukeza, ni huhu likeza ziza kundama he nzubo, kono kaiwiri hasi, kakuti ibazakwa he bwe. <sup>26</sup> Chi kwina bulyo yese uzuwa mazwi angu kono ka e chilili u swana sina mutu we chihole uzaka izubo yakwe he seke seke. <sup>27</sup> Invula ikeza hansi, muunda ukeza, ni luhuwo luhunga ni kundama izumbo, cwale iwa, ni kushinyeha tota.” <sup>28</sup> Ha kuvakuti Jesu chamana kuwamba mazwi aa, vungi bwa vantu chiva komoka ituto ya kwe, <sup>29</sup> cwale chaba luta sina wina mata, isinyi sina vanoli ba mulawo.

## Ikauhanyo 8

<sup>1</sup> Cwale Jesu hasuka helundu, vantu vangi civamwi cilila. <sup>2</sup> Micwale we imbingwa ca keza kwali, cheza kumufukamina, niku wamba, “Simwine, haiva usaka, uwola kuni cenisa.” <sup>3</sup> Jesu chaotolola iyanza ni kumukwata, nikuwamba, “Ni saka. Ucene.” Hahofera ca cenisiwa kwi imbwingwa yakwe. <sup>4</sup> Jesu camuwambila, “Uvone kuti kowambi cimwi u zumwi muntu. Yende mwi nzila yako, mi ukalivonahaze ku mupurisita ni kukaha impo ina Mushe yavalaeli, kuti ikabe vupaki kuvali.” <sup>5</sup> Jesu hace njile mwa kapenaumu, mulauli avakezi kwali ni kumuvuza, <sup>6</sup> cawamba, “Simwine, muhikana wangu ulele mwinzuvo uzuminine luñañali mi usasa mwinwe lilu.” <sup>7</sup> Jesu chwamba kwali, “Munize ni muhoze.” <sup>8</sup> Mulauli chetava ni kuwamba, “Simwine, kaniswaneli kuti winjile mwi nzuvo yangu, uwambe vulyo inzi, mi muhikana wangu kahole. <sup>9</sup> Kakuti ime ni muntu ubikitwe mwikonde lya muvuso, mi nina masole vena mwikonde lyangu. Niwambila uzu, 'Yende,' mi uyenda, ni kuzumwi, 'Wize' mi ukeza, ni kumuhikana wangu, 'Pange ici,' mi ucipanga.” <sup>10</sup> Cwale Jesu hazuwa izi, avakomokwa mi avawambili avovava kumwichilile, “Ceniti nimiwambila, kanini kuwana kale we ina intumelo mwa Isilaele. <sup>11</sup> Nimi wambila, vungi kavazwile kwa upa ni kwa wiko, mi muve kale he tanfule ni Abrahamana, ni Isaka, ni Jacobo, mumuvuso wa kwiulu. <sup>12</sup> Kono vana vamu muvuso kava sohelwe kwi fifi lyahanze, kwina kulila ni kukwecameno.” <sup>13</sup> Jesu cawambila mulauli we nkondo, “Yende! vulyo moco vazumininni, ili kuti kucitahale vulyo kwako.” Mi muhikana cahola yeyo inako. <sup>14</sup> Jesu habakwina mwi nzuvo ya Petorosi, cavona mukwenyani wa Petorosi nalele a valwalite ifiva. <sup>15</sup> Jesu a vamukwati he yanza, mi ifiva ci lyamusiya. cavuka ni kutanga kumuseveleza. <sup>16</sup> Cwale hakuva Citengu, vantu civaletela Jesu vantu vangi vavakuyendiswa madimona. Avahindikiki inuhu ce inzwi nikuhoza vavakulwala vonse vava kulwala. <sup>17</sup> Mwei inzila kuvezuzilizwa civawambwa ku mupolofita Isaya, nawamba, “Iye mwine Avalihindiki matuku etu ni mifokolo yetu. <sup>18</sup> Jesu havona inyangela ci imuzumbulukite, caha itaelo kuti vayende kuimwi imbali ye wate lya Galileya. <sup>19</sup> Cwale Muñoli ca keza kwali ni wamba, “Muluti, munikwi cilile konse kwete uyende.” <sup>20</sup> Jesu cawamba kwali, “Valuwawa vena malindi, ni zizuni zamwi ulu zina zizumbo,

kono Mwana Muntu kena hete a shamike mutwi wakwe.”<sup>21</sup> Zumwi kuvalutiwa vakwe cawamba kwali, “Ireeza, ni zuminine pili nikaunge vandanda.”<sup>22</sup> Kono Jesu ca muwambila, “Niicilele, mi usiye vafwile vaunge vafwile kuninavo.”<sup>23</sup> Jesu hecila mucisepe, valutiwa vakwe ci va mwicilila mucili.<sup>24</sup> Micwale, cikweza inwungwa ikando mwiwate, micisepe ciceza kuumbwa mandinda. Kono Jesu abalele.<sup>25</sup> Valutiwa bakwe civeza kumuvusa, ni vawamba, “Tutuse, Simwine, citwina hafuhi ni kufwa!”<sup>26</sup> Jesu cawamba kubali, “Cinzi hamutiyyite, inwe be intumelo inini?” Cazima ni kukalimela luhuho ni liwate. Haho cikwa tontola ahulu.<sup>27</sup> Vantu civakomokwa ni kuwamba, “Muntu wina bule uzu, yo kutekiwa niheva luhuho ni wate?”<sup>28</sup> Jesu hakeza kwimbali imwi ni kwi nkanda ya Magadarena, bakwame VoVele vava kuyendiswa madimona civamukatana. Vavakuzwa mumavita mi vavali kutiza hahulu, mi mane kakwina muyenzi yava kuwola kukosaza ce inzila iyo.<sup>29</sup> Micwale, civalila ca kuwongoza ni vawamba, “Cinzi citulukela kupanga nawe, Mwana Ireeza? Weza kunu kwiza kutu kataza inako niseni kusika?”<sup>30</sup> Mukunyi wa ziguluve zingi uva kwete kifulila kule kanini navo.<sup>31</sup> Madimona azwili havusu ni kukataza Jesu ni awamba, “Haiba motuhindike, tutumine kuna kawuna mukunyi waziguluve.”<sup>32</sup> Jesu cawamba kubali, “Muyende!” Madimona ciazwa ni kuyenda muzigulube. Micwale, mukunyi wonse chiwa tilila hekomwe nikuli wisikiza mwiwate micizafwila mumenzi.<sup>33</sup> Vakwame vavaku lisa zigulube civatiya. Mi ha vayenda mwitolo po civakaviha zintu zonse, sihulu civapangahali kuva kwame vava kuyendiswa madimona.<sup>34</sup> Micwale, itolopo yonse civazwa kukakatana ni Jesu. Ha vamuvona, civamukumbila kuti azwe mwinkanda yavo.

## Ikauhanyo 9

<sup>1</sup> Jesu e njila mu chisepe, cha luuta, kwiza muitolopo yakwe.  
<sup>2</sup> Micwale, va valeti muntu yo zuminine luñañali na lele ha vulo. Cha vona intumelo ya bo, Jesu chawambila ya va kuzuminine luñañali. “Mwanangu u be u muntu yotavite. Zivi zako zi va wondelwa.”  
<sup>3</sup> Micwale, vamwi ku bañoli chi baliwambila a bo bene, “Uzu muntu u nyefula.”  
<sup>4</sup> Jesu abezi mihupulo yabo mi ni chati, “Chinzi hamuzeza bubi mwimunkulo zenu?”  
<sup>5</sup> chihuva nje chihi kuku chiwamba, ‘Zibi zako za wondelwa,’ kapa kuwamba. ‘Zimane mi u yende?’  
<sup>6</sup> Kono wizive kuti Mwana Muntu wina maata hanu hansi akuswalela zibi,” Chawamba kuyo zuminine luñañali, “Vuke, zalule vulo bwako mi uyende kwinzuvo yako.”  
<sup>7</sup> Haho muntu cha katuka ni kuyenda kunzubo yakwe.  
<sup>8</sup> Cwale vungi bwavantu ha babona izo, chiba komokwa mi chiva vavaza Ireeza, ya vahi maata ena vulyo ku bantu.  
<sup>9</sup> Jesu haka kosola kuzwa uko, cha vona muntu we zina lya Mateu, ya va kuikele ha chivaka chi lihisezwa mutelo. Ni cha muwambila. “Ni ichilile.” Cha zimana ni kumuichilila.  
<sup>10</sup> Jesu heza kwikala kuti alye mwinzubo, micwale, vuñata bwa vatelisi ni vantu vavaezalibi chiveza kulya ni Jesu ni valutiwa vakwe.  
<sup>11</sup> Cwale bafalisi ha va vona vulyo, chi vawamba kuvalutiwa vakwe, “Chinzi muluti wenu halya ni batelisi ni vantu va vaezalivi?”  
<sup>12</sup> Jesu hazuwa izi, cha wamba, “Vantu vakolete mumuvili kavalili iñanga, haisi vana valwala.”  
<sup>13</sup> Muswanela kuyende mukalitute ziitalusa, ‘Nitavela chishemo insinyi chitavelo.’ Njaho hanikeza, insinyi kusumpa valukite kukulinyansa, kono vaezalibi.”

<sup>14</sup> Haho valutiwa va Joani chi veeza kwali chivawamba, “Chinzi iswe ni bafalisi hañata hatulinyima zilyo, kono balutiwa bako kavalinyimi zilyo?” <sup>15</sup> Jesu chawamba kuvali, “Kana valikani vayoseswa vawola kulizuwa kusatava haiva munyaliwa nachina navo? Kono mazuva mueze munyaliwa hese nakahindwe kuvali, mi cwale kavalinyime zilyo. <sup>16</sup> Ka kwina muntu ya vika chikamba chiha ha chizwato chakale, kokuti chikamba echo mo chi ñatuke ku chizwato, mi hafwile mohañatuke ahulu. <sup>17</sup> Nanga vantu kete vavike iwaine ihya mwi dalo lye waine lya kale. Ha va chita vulyo, idalo kaliñatuke, mi iwaine moitike mi na lyo idalo lye iwaine kalisinyehe. Kaho muvavike iwaine ihya mu madalo mahya e waine, mi zonse kazivikwe nenza.” <sup>18</sup> Jesu na kwete kuwamba izo zintu kuvali, micwale muvusisi cha keza ni kwiza kufukama kwali. Chawamba, “Mwanangu wa mukazana hahanu cwa fwa, kono wize, zo u bike iyanza lya ko hali, mi kahale.” <sup>19</sup> Haho Jesu chazima kumwichelele, ni valutiwa vakwe. <sup>20</sup> Micwale, mwanakazi ya va kukatazwa vutuku bwa malaha ka zilimo zina ikumi ka zovele, chakeza kwisule lya Jesu, ni ku kwata ku mamaninizo echizavalo chaakwe. <sup>21</sup> Ni chaliwambila i ye mwine, “Ha chinakwata vulyo kuchizavalo chakwe, monibe hande.” <sup>22</sup> Kono Jesu a muchevuka chamuvona, ni cha wamba, “Mwanagu wa mukazana, koze inkulo. Intumelo ya ko chi ya kuhoza.” Mi mwanakazi cha hola pohonaho. <sup>23</sup> Jesu he njila munzubo yo muvusisi, cha bona balizi be mpeta ni vantu bangi va panga hahulu ilata. <sup>24</sup> Chawamba, “Muzwee, kakuti mukazana kafwile, kono u lele.” Kono va museka ni kumusheununa. <sup>25</sup> Cwale vantu vangi ha vahindikilwa hanze, che njila mwinzuvo ni kumukwata kuiyanza, mi mukazana cha vuuka. <sup>26</sup> Makande chiahasana chikiliti yonse. <sup>27</sup> Jesu ha kosoza ku zwauko, zibofu zovele za muichilila. Ne zi kwete kumuhuwa ni ziwamba, “Tuzuwele vutuku, Mwana a Daafita” <sup>28</sup> Jesu ha keza mwinzubo, zivofu zo vele chizakeza kwali. Jesu cwamba kuvali, “Muzumina kuti ni wola kumihoza?” chibawamba kwali, “Eeni Simwine.” <sup>29</sup> Mi Jesu cha vaonda ha menso, mi chati, “Musiye kupangahale bulyo kuya che intumelo yenu.” <sup>30</sup> Mi menso a bo chi eyaluka. Mi Jusu cha abakalimela ahulu nikuwamba, “Muvone kuti ka kwina muntu u swanela kuiziba kuamana nezi.” <sup>31</sup> Kono vakwame vo vele vayenda ni kukahasanya indava iyo muchikiliti chonse. <sup>32</sup> A vo vakwame vo vele ha chivakaya, micwale mukwame wa chimumu wina madimona avaletwa kwa jesu. <sup>33</sup> Cwale madimona ha hindikiwa, muntu wa chimumu chawamba. Inyangela chi ya komokwa mi chi ya ti, “Izi kazini kuvonwa kale mwa Isilaele. <sup>34</sup> Kono Bafalisi va va kuwamba, “Cha mulao wa madimona, u tanda madimona.” <sup>35</sup> Jesu ava yendi konse mumileneñi ni muminzi. A ba zwilile havusu ni kuluta mu masinagoge a vo, kukutaza inzwi lya mubuso, Ni kuholiza onse malwalila ni matuku onse a shutana. <sup>36</sup> Ha vona inyangela, cha ba fwila makeke, kakuli va va kukatazehete ni kuzwafa. Va va kuswana sina ingu zi sena mulisana. <sup>37</sup> Chawamba ku valutiwa bakwe, “Inkutulo yi ngi, kono vaveleki vache. <sup>38</sup> Kacwalo mulapele cheputako kwa Simwiine we inkutulo, ilikuti a tumine vabeleki mu inkutulo ya kwe.”

## Ikauhanyo 10

<sup>1</sup> Jesu hasupa balutwana vakwe bonse vena ikumi ni vovele, mi cha vaha ziho za ku kalimela ihuhu imbi, ni kuzi laela kuzwa, ni ku hoza matuku, ni mi fokolo yose. <sup>2</sup> Lyahanu mazina a valutwana vena ikumi ni vovele nji: We ntanzi, Sayimoni yo sumpwa Pitorosi, ni mwachakwe Andreyasi; Jakovo mwan'a Zevediya, ni mwachakwe Joani; <sup>3</sup> Filipi, ni Vartolome; Tomasi, ni Mateu mulihisi wa mitelo; Jakovo mwan'a Alufeya, ni Tadeya; <sup>4</sup> Sayimoni yo kanana, ni Judasi Isikariyote, muwuzi wa Jesu. <sup>5</sup> Aava vena ikumi ni vo vele Jesu cha va tuma. Cha va layela kuti, "Sanzi va yendi kuzivaka za Machava, mi sanzi mwi njili mwi Tolopo ihi ya Masamariya; <sup>6</sup> Kono muyende kwi Ngu zi zovete ze zunvo ya Isilaele. <sup>7</sup> Mi chi muyenda, mukutaze ni muuti, "Mubuso wa kwiwulu chiwina hafuhi." <sup>8</sup> Mu hoze valwele, mu vuuse vafwile, mu hooze imbingwa, mu hindike madimona. Mu vahewa bulyo, muhe vulyo. <sup>9</sup> Sanzi mu hindi gauda, ni silivera, kapa mashelenyi mu mikotana yenu; <sup>10</sup> Sanzi muhindi mikotana ya zizwato mu misipil yenu, kapa zimwi zizwato, kapa isangu, kapa inkoli, kakuti muveleki u swanelwa zilyo zakwe. <sup>11</sup> Muleneñi uhi no uhi kapa munzi u mwi njila mwateni, mu buuze yo swanela mwikale mwateni; mwi kale mwateni konji chi mwa funduka. <sup>12</sup> Chi mwi njila muzuvo, mu ilumelise. <sup>13</sup> Heva inzuvo iiswanela, musiye inkozo yenu ishale mwateni; kono heva kayi swaneli, musiye inkozo yenu i voole kwenu. <sup>14</sup> Kwabo vasena vava mitambuli kapa kutekeleza liinzwi lyenu, ha mu nyamuka kuzwa muzuvo ya vo kapa mu Muleneñi, mu kunkumune imbundu ya ku matende yenu. <sup>15</sup> Che niti ni ta kwenu: Mu ve ni chisemo chihitilize mwi Nkanda ya Sodomani ni Gomora mwi zuva lye nkatulo kuhita lyowo muleneñi. <sup>16</sup> Mu vone, ni mi tuma sina Ngu zina mukati ka Valuwawa, muve vena maano sina nzoka mi mu ve sina va sena maano sina Nkwilimba. <sup>17</sup> Mu tokomele Vantu! Mu va mitwale havusu bwa va zekisi, mi ka va mishupe mu zivaka za malapelelo avo. <sup>18</sup> Mi ka muletwe ha vuusu bwa Mangambela ni va Simwine vakeni changu, kuti mu ve ni vupaki kuvali ni ku Machava. <sup>19</sup> Chini vati chiva mi kwatisa, sanzi ni mu katazehi kuti ka mu wambe inzi, kakuti cheti ni mu wambe ka mu chihewa mwe yeyeyo inako. <sup>20</sup> Ka kuti keti niyi kuvele unwe mu wamba mi kayi kuvele Luhuhu lwe Shenu lweti ni lu ku waamba mweenu. <sup>21</sup> Muntu mwa kwatise mukwakwe kwifu, mi muzazi a kwatise mwan'a kwe. Vaana mubalwise vazazi va vo, mi va va letele kufwa. <sup>22</sup> Mu va mitoye vakeñi che zina lyangu. Mi yata sike ku ma manimani, uzo muuntu mwa puluswe. <sup>23</sup> Chi va minyandise bulyo mu Muleneñi, muyende ku mwi ku Muleneñi, Initi ni wamba kuti, ke se mu mane Mileneñi yoose ye Isilaele pili Mwana Muntu na seni kusika. <sup>24</sup> Mulutwana kahiti Muluti wa kwe, kapa mutanga kuhita Nfumwe. <sup>25</sup> Ku swanela kuti mulutwana a swane ni muluti wa kwe, ni mutanga ni Nfumwe. Heba vasumpa mukulwana we nzuvo Beelzebule, ka kuve vule venzuvo ya kwe chi va nyasilizwa! <sup>26</sup> Linu sanzi mu va tiyi; kakuti kakwina chifupikitwe chi se chi shale ni chi fupikitwe mi ka kwina chipatitwe chi se chipale kwi zibwa. <sup>27</sup> Chi ni mi wambila mwififi, mu chi wambe mwiseli; mi chi muzuwa mu matwi yenu, mu chi wambe mpatalaza ku Vantu. <sup>28</sup> Sanzi mu tiyi Vantu ve haya muvili; kono ka va woli kwi haya luhuhu. Insini, mu

tiye ve haya zoose luhuhu ni muvili mwi hele. <sup>29</sup> Heva, tutiti to vele twina heteko ye peene yoke? Kanti ka kwina katiti, niheva konke, ka wila hansi Ireeza wenu na se zivi. <sup>30</sup> Ni heva nsuki za ku mitwi yenu zibalitwe zoose. <sup>31</sup> Sanzi mutiyi. Mu va vu tokwa kuhita tutiti tungi. <sup>32</sup> Muntu ye se yo wamba nzina lyangu ku Vantu, name kani muwambi kwa Tayo wina kwiwulu. <sup>33</sup> Kono yo ni sampula ku vantu, name, kani mu sampule kwa Tayo wina kwiwulu. <sup>34</sup> Sanzi muhupuli kuti ni valete inkozo mwi kaanda. Kena ni va leti inkozo, kono mulinga. <sup>35</sup> Cwale ni va kezi kwiza kufapanya muntu ni veesi, mi mwnakana ni nyiina, mi mukwenyani wa mwana kazana ni nyinazaala. <sup>36</sup> Muntu zilazakwe, mu va ve, venzubo yakwe. <sup>37</sup> I ye yo saka Sii kapa Nyina kuhitiliza mwani sakila, ka ni swaneli. Mi yo saka mwan'akwame kapa mwan'akazana kuhitiliza kani swaneli. <sup>38</sup> I ye ya sa hindi chifapano cha kwe ni ku ni chilila ka ni swaneli. Yo tokomela vuhalo bwa kwe mwa vu sinyehelwe. <sup>39</sup> Kono yo sinyehelwa vuhalo vwa kwe vakeñi cangu, mwa vuwane. <sup>40</sup> Yo mi tambula, u tambula ime, mi yoni tambula ime u tambula yoni tumite. <sup>41</sup> I ye yo tambula mupolofita kakuti mupolofita ka wane mpo ya vupolofita. Mi yo tambula muntu yo shiyeme vakeñi cha kuta kuti muntu yo shiyeme ka wane mpo ya kushiyama. <sup>42</sup> Ye nse yoha ku muntu munini menzi a kuñwa a tontola, chevaka lya kuwamba kuti mulutwana, ni mi wambila kuti, ka kwina mwi se na kangilwe ku wana mpo ya kwe.”

## Ikauhanyo 11

<sup>1</sup> I, nako hayisika mu kumana Jesu a va layi Valutwana vakwe vene nkumi ni vovele, cha yenda kuzwaho ni kutanga kuluta ni ku kutaza mu mileneñi yabo. <sup>2</sup> Linu Joani na nga zuwa mwi ntolongo inkenzo za Kereste, cha tumina ifusa ni valutwana vakwe <sup>3</sup> mi chi va wamba kwali, “Kana njiwe yo Keza, kapa kwina zumwi muntu utu swanela kulola?” <sup>4</sup> Jesu ave tabi mi cha wamba kuvali, “Mu yende mi mukavihe kwa Joani zi mwa vona ni kuzuwa. <sup>5</sup> Zivofu va tambula kuvona, zihole zi yenda, ve mbingwa ba jolola, va sa zuwi va zuwe, va fwile va vukile vuhalo, mi vantu va saka ku zuwa linzwi va kutazwe. <sup>6</sup> Imbuyoti yi ve kwa vo, vasa nya nsilizi linzwi.” <sup>7</sup> A va vakwame ha va yenda nzila yabo, Kereste cha tanga ku wambila chi chaba ka za Joani, “Zile muyendele nzi mwi Halaupa ku kalwela mpe zi hungiswa luhuhu? <sup>8</sup> Linu zile muyendelezi ku kavona - muntu yo zavele zizwato zi huva? Initi, avo vazwata zizwato zi huvilila vahale muzubo ya simwine. <sup>9</sup> Chi nzi chi muyendela kuka bona, mupolofita? Ee, ni wamba kwenu, mi hahulu kuhita mupolofita. <sup>10</sup> Nji yena za kwe, zi ñoleletwe, 'Mu vone, ni tumina muhikana wangu havusu vweni, ye se a lukise inzila yenu, havusu bwenu.' <sup>11</sup> Ni wamba kwenu, che niti, kwa vo, vava pepwa ku vanakazi, kakwina mukando kwa Joani Mukolobezi. Linu munini mu mubuso we Reeza, kwiwulu njo mukando. <sup>12</sup> Ku zwa muma zuva a Joani Mukolobezi ku sika sunu, mubuso we Reeza uhindwa chamata mi vakwame vakali va u hinda cha kunyanga. <sup>13</sup> Vapolofita vonse ni mulao, vava polofiti konji kusika kwa Joani Mukolobazi. <sup>14</sup> Heba no tavela kutambula, uzu Elia, iye yo swanela kukeza. <sup>15</sup> Uzo, wina matwi akuzuwa, mu musiye atekeleze. <sup>16</sup> Kani, vamba nye, ni chinzi kolu lusika? Kuswana sina vahwile, va kwete kuzanina ama wuzikizo

a musika, vekele ni vali sumpa, <sup>17</sup> ni bati, 'twa miliizikize mpeeta kono kana mwa zana. Twa silisa, kono kana mwa donsa zinsozi.' <sup>18</sup> Kana Joani kana vezi kuku lya chinkwa, kapa kuñywa i waine, mi ni vata kuti wina, 'Madimona.' <sup>19</sup> Mwana'Muntu, abezi ku lya, ni kuñywa, ni vata kuti, 'Mu vwene, mukwame mulyabi, ni vudakwa, mulikana va telisi va mutelo, ni batenda zibi!' Kono vutali vu vwene kete chi vu tendwa." <sup>20</sup> Kuzwa aho, Jesu cha tanga ku kalimela minzi yonse ya vatendi I makazo mwa teni, kakuti kena vava vaki, <sup>21</sup> "Wina bumayi iwe Koranizini! Wina bumayi iwe Betsaida! Heva zikando ziva tendwa mu minzi ya Tire ni Sidoni ziba tendwa inwe ni ziva voleli kale za kuzwata masaka ni kulivumbeka mufuse. <sup>22</sup> Kono kakuve kuhuva kwi koto ye katulo ya Tire ni Sidoni kuhita yenu. <sup>23</sup> I we, Kapenauma, uzeza kuti mo yende kwiwulu? Nanta, mo bozwe mwi Hele. Sina mwa Sodoma muva tendelwe zikando ni kwenu, ni ziba shali bulyo kusikila lya sunu. <sup>24</sup> Kono, niti kwenu, ka ku huvahale munkanda ya Sodoma che nako ye nkatulo, kuhita kwenu." <sup>25</sup> Che nako iyo Jesu avati, "Ni lumbeka Tayo Ireeza, Simwine wewulu ne nkanda, kakuti aba humbili vatali, ku zuwisisa ni kwi zivahaza kwavo, va sali tutite, sina vahwile, <sup>26</sup> Ee, che niti, Tayo, kutendwe intanto yako. <sup>27</sup> Zintu zonse zi va tendwa cha Ngu kuzwila kwa Tayo, Mi kakwina nanga unwina wizi mwana konji Tayo, mi kakwina umwina wizi Tayo konji Mwana, mi kuzumwi sina Mwana' yo lakeze kulitondeza kwali. <sup>28</sup> Mwize kwa ngu, mwense mu lemenwe ni ku suntika, mi kani mihe mpumulo. <sup>29</sup> Muhinde i jokwe lya ngu mulikulike mi mulitute kwangu, kakuti nina chisemo ni nkulo indotu, mi ka muwanine inhuho zenu impumulo. <sup>30</sup> Kakuti i jokwe lyangu ihuva mi muziyo wangu muhuva."

## Ikauhanyo 12

<sup>1</sup> Mu mazuva awo Kereste ava kuhita mu mawa mwi zuva lye Pumulo. Balutwana bakwe vava fwile izaala mi chi vatanga ku totola zikunku, ni kulya. <sup>2</sup> Kono linu Vafalisi hava vona kuti; Chi va cho kuti kwa Kereste, "Voone, valutwana va ko kwete kuchola mulawo mwi zuva lye Pumulo." <sup>3</sup> Kono Kereste cha wamba ku vali, "Kana ka mwini kuvala za vapangi Daafita, ha vali kufwile inzala, mi vakwame va vali kwina naye? <sup>4</sup> Mwa vayendeli mwi zuuvo ye Reeza mi chalya chinkwa chivena kwateni, kena avala cha mulawo kuti alye, hape kena chivali cha mulawo kwavo va vena naye, mi ku vali mulawo ku vali valuti? <sup>5</sup> Kana kena mu va vali mu mulawo, kuti mwi zuva lye Pumulo valuti mwi tempele va cholanga mulawo we Pumulo mi ka vena mulandu? <sup>6</sup> Kono ni cho kwenu kuti mu kulwana yo hita kereke zonse kwena. <sup>7</sup> Kambe chi muvali kwizi, 'Ni lakaza chisemo mi isinyi chitavelo,' ni musena mu va nyansi va sa foseze. <sup>8</sup> Chokuti Mwan'a Muntu nji Kereste we Pumulo." <sup>9</sup> Linu Kereste cha funduka ku yenda mi cha yenda mu zivaka zavo za malapelelo. Mu lindile, kuvena mukwame ya va zuminine yianza. <sup>10</sup> Vafalisi chi va vuuzza Jesu, chi vati, "Kana ku swanela kuhoza lye Pumulo?" kuti va wanine ha teni inzila yi cho kuti wa tenda chivi. <sup>11</sup> Jesu na cho ku vali, "Muntu mwi ve njeni kwenu kuti ave ni ngu yi mwina, mi heva kuti iyi ngu iwila mwilindi mwi zuva lye Pumulo, ke se wi tuse ni kwi zwiisa? <sup>12</sup> Mu ku ve vule ni vutokwa kuti muntu ahite ngu! Ni hakuvavulyo kulukela ku va



mulawo wa kutenda vulotu mwi zuva lye Pumulo.”<sup>13</sup> Linu Jesu cha ti ku mukwamwe, “Wolole yanza lyanko.” Cha li wolola, mi cha vo zekezwa makete, sina nji limwi yi yanza.<sup>14</sup> Kono va Falisi chi vazwa hanze mi chi va ka muveteka. Va vali ku ka vulola nzila mwe se va mwi hayile.<sup>15</sup> Kono Jesu heziva, cho volela mu masule. Vungi bwe nyangela vu va mwi chilile, mi cha va honza bonse.<sup>16</sup> Cho va layela kuti sanzi va mwi zi vahazi ku va mwi,<sup>17</sup> iyo iwoleka ku va niti, ku wamana ni chi va wambwa kwa Isaya wa mupolofita, ku cho,<sup>18</sup> “Vone, Iwe mutang'a ngu uni va keti; yini suuni, yiye kwali luhuhu lwangu lu va mushukelyi. Ka ni vike kwali Luhuhu lwangu, mi ka huweleze inkatulo ku Machava.<sup>19</sup> Keti na hondane kamba ku huweleza hahulu; mane nangati zumwi vulyo kuti azuwe linzwi lyakwe mu makululu.<sup>20</sup> Ke se na chole impee yitengeme; ke se na zimise mu muni usa zwise vuusi, konji pili cha tumina inkatulo kuti nje yikome.”<sup>21</sup> Mi va Machava konji chi va kolwisisa mwi ziina lyakwe.”<sup>22</sup> Linu zumwi yo fwile menso ni chimumu, wi nji hilwe madimona, ava letwa kwa Kereste. Cha mu haza, che kalavo yi cho kuti chimumu chiwambe ni ku vonna.<sup>23</sup> Inyangela yonse chi ya komokwa mi chi ya ti, “Kana kuti uzu muntu mwan'a Daafita?”<sup>24</sup> Kono linu va Falisi ha va zuwa imakazo, chi vati, “Uzu muntu ka hindiki madimona konji cha Veelzebub, mu kulwana wa madimona”<sup>25</sup> Kono Jesu ave zivi milelo yavo mi cha ti ku vaali, “Umwi ni umwi muvuso ukawuhene hakati uwo wi ne ka wu wanike kuti u shinyiwa, mi muleneñi ni muleneñi kapa izuuvo yi ka wuhene hakati yiyo yine ke se ni zimane hamwina.”<sup>26</sup> Heva Javulusi na hindika Javulusi, U li ka wuhenye hakati eye mwine. Kana uwo muuso ka wu kuzimane vule?<sup>27</sup> Mi heva ni hindika madimona cha Veelzevule, cwale nji mwi zina lyani valutwana mu va hindikila? Vakeñi che zi, ka va ve vaatuli venu.<sup>28</sup> Kono heva Ni tanda madimona cha Luhuhu Iwa Simwine Reeza, linu muvuso we Reeza wize hewulu lyenu.<sup>29</sup> Mi kwiza vule kuti zumwi wi njila muzuvo ya muntu wina ziiho mi wiiva zibya za mwi zuuvo na sa sumini mukwame yo kolete lye tanzi? Linu cwale mweve zibya za kwe mwi zuuvo.<sup>30</sup> Yiye ya sa zimene name uni toyete, mi yiye ya sa likopanyi name u hasana.<sup>31</sup> Kuzwaho Ni cho kwenu niti, chivi chonse ni ku nyasilizwa ka zi swalelwe bantu, kono nyefulo zonse ku wamana ni Luhuhu ke se ni kuve ni swalelo.<sup>32</sup> Mi vonse va wamba linzwi lifusahele ku Mwan'a Muntu, ka va swalelwe kwali. Kono vonse va wamba kunyasiliza Luhuhu lu Njolola, ke se ni va swalelwe, ni heva munu mwifasi, ni heva mwifasi likeza.<sup>33</sup> U wola kutenda isamu vulotu ni zichelantu za teni kapa isamu kufwa ni zichelantu za teni kufwa, kakuti isamu lizivahala cha zi chelantu za teni.<sup>34</sup> Yinwe vaana va zihili, kuzwaho mwina vuuvi, mu woola vule ku wamba zilotu? Kakuti ku zwililila kunkulo kaholo kawamba.<sup>35</sup> Muntu yo shiyeme u zwiisa chimbule chilotu kuzwililila kunkulo, mi muntu u fosahele u zwiisa chimbule chi fosahele ku zwililila kwikulo yakwe.<sup>36</sup> Mi ni milwilite kuti mwi zuva lwe katulo bantu ka va ve ni bwikalavelo ku linzwi ni linzwi li va va wamba.<sup>37</sup> Cho kuti cha maanzwi yenu ka mu wane ku shemuviwa, mi cha manzwi yenu ka mu hewe mulandu.”<sup>38</sup> Linu va mwi vañoli ni va Falisi chi vetava Jesu mi chi vaati, “Muluti, tu likumbuta ku vona chisupo chi zwa kwako.”<sup>39</sup> Kono Jesu che tava naati kuvali, “Mu vilala ni lusika lusangu lu lola vulyo chisupo. Kono ka kwina chisupo chense

chi vonwe konji chisupo cha Joonā wa mupolofita. <sup>40</sup> Chokuti Joonā ave kali mazuva otatwe ni masiku otatwe mwi vuumo lye inswi yikulite, mi na ye Mwan'a Muntu mwe kale mazuva otatwe ni masiku otatwe mwi kulo ye faasi. <sup>41</sup> Vaanakwame va munzi wa Nenive ka va zimane kwi katulo ni lusika lunu lwa suunu mi ka lunyanswe. Chokuti mu va sikuluhi chekutazo ya Joonā, mi voone, zumwi mukulana kwa Joonā kwena hanu. <sup>42</sup> Simwine wa mukulwakazi yo zwa kwa Mbowela ka zimane ni lusika lunu lwa suunu ni ku watulwa. U kazwila ku mā mani mani ye kanda ku keza kwi za kuzuwa za vutali bya Solomoni, mi voone, zumwi mukulwana kwa Solomoni kwena hanu. <sup>43</sup> Linu cwale luhuho luvilala haluzwa ku muntu ku yenda, lu yenda muzivaka zi sena menzi mi lu lola chi vaka cha ku pumula kono ka chi waniki. <sup>44</sup> Linu lu wamba kuti, 'Mu ni vole kuzuvo yangu ku ni vali kuhala.' Ha lu voola, lu ka wana kuti inzuvo yikulitwe hande mi ni ku vikwa hande. <sup>45</sup> Linu luyenda ni ku ka hinda zimwi yihuho zi kwanisa yiyaza ni tovele ku hita lyetanzi, mi yonse ni yenza kuhala mwateni. Linu mayemo a muntu ava mavilala kuhita lye tanzi. Mu ku ve vulyo vu vilala ni ku lusika lunu lwa sunu." <sup>46</sup> Haho Jesu na si kwete ku wamba ku chilundwamanje, muvone, vanyina ni vanche va va zimene hanze ni va saka ku wamba kwali. <sup>47</sup> Zuumwi chati kwali, "Voone, va nyoko ni va chanko va zimene hanze, va sa ka ku wamba kwako." <sup>48</sup> Linu Jesu che tava mi naati kwali ya va mu wambili, "Njeni Mayo? Mi nji vaani va chevangu?" <sup>49</sup> Linu cha wolola yi yanza lya kwe ku va lutwana mi cha ti, "Voone, ava nji va mayo ni va chevangu!" <sup>50</sup> Chokuti yense wi chilila intato ya Taayo wina kwiwulu, uzo muntu mwa changu, mi nji nchizyangu mi nji maayo."

## Ikauhanyo 13

<sup>1</sup> Helyo izuva Jesu avayendi hanze yenzuoo ni kukala kwimbali ye wate. <sup>2</sup> Inyangela inkando iva kopene kumuzimbuluka, chechila mu chisepe ni kwikala mwateni. Inyangela yonse iva zimene helizo. <sup>3</sup> Linu Jesu chawamba zintu zingi kuvali mwi nguli. Chati, "Muvone, mubyali avayendi kukubyila. <sup>4</sup> Haba kukavubyala vulyo, imwi umbuto chiyawila kwimbali yenzila, mi zizuni chizakeza chizeza kuilya. <sup>5</sup> Imwi imbuto iba wili mwivu lya mabwe, uko kuisena iva wani ivu ilingi. Haho fele chiya mena, kakuti ivu kena livatungite. <sup>6</sup> Kono izuva hali tanta, zivamenete chiza letuka kakuli kena zivena mihisi, mi chizazuma. <sup>7</sup> Imwi imbuko iva wili mu kati kezi samu. Masamu amwiya chia kula ni kuzi puputiza, <sup>8</sup> Imwi imbuto iba wili mwivu lina hande mi ziva biki vuheke, amwi makumi e kumi nikuhitilila, amwi makumi amana iyanza ni limwina, amwi makumi otatwe. <sup>9</sup> Eye yo zuwa, mumusiye atekeleze. <sup>10</sup> Valutwana chivakeza ni chivati kwa Jesu, "Chinzi howamba kwi nyangela mwinguli?" <sup>11</sup> Jesu chetava ni chati kuvali, "Muvahewa inswenelo yaku zuwisisa inkunutu zamuvuso wa kwiulu, kono kuvali kena kevava hewa. <sup>12</sup> Kakuti yense yo wina, kwali kahewe zingi, mi kakwi zule kwali. Kono yense ya sena, kwali kanyangwe ni chakwete. <sup>13</sup> Cwale niwamba kubali che nguli, kakuti ni haikve vavona, kava vonisisi. Mi nihava zuwa vulyo, kavazuwi, mikava zuwisisi. <sup>14</sup> Kuvali chipolofita cha Isaya chivezuzilizwa, chita kuti, 'Chotekeleze uzuwa kono kete uzuwisise, cholotele uvona, kono

kete uvonisise. <sup>15</sup> kakuti vantu inkulo zavo chiza nuna, mi vakukutu kuzuwa, mi vave yali menso avo, ili kiti senzi vavoni ni menso avo, kapa kuzuwa chatatwi avo, kapa kuzuwisisa che nkulo zavo, ili kuti vasandumuke hape, mi nini vavahozi.' <sup>16</sup> Kono chi tonofezwe menso enu, kuti avone; ni matwi enu, kuti azuwe. <sup>17</sup> Cheniti ni miwambila kuti vungu bwa vapolofita ni vantu valukite vatavela kuvona zintu zimuvona, mi kana vavaziboni. Vatabela kuzuwa zintu zimuzuwa, mi kana vavazizuwi. <sup>18</sup> Muteke kwi nguli ya mubyali. <sup>19</sup> Linu yense muntu hazuwa linzwi lya muvuso kono kali zuwisisi, haho vantu vavi vakeza kwiza kuhinda cha byalite mwi nkulo yakwe. Iyi nji mbuto iva byaliwe kwimbali ye nzila. <sup>20</sup> Iye yava byalwa hevu lya mabwe njo zuwa linzwi ni kulitambula cho kusanga haho. <sup>21</sup> Mi kena mihisi iye mwine kono ukwata vulyo inako zana. Linu manyando kapa kwihaiwa chikwava kwateni chevaka lye nzi, ka sitatale njiho haho. <sup>22</sup> Yavabyila mukati ke zisamu zamiya, uzu njiyena yozuwa linzi, kono kuvilelela ifasi nikusaka ahulu chifuma zi sina linzwi ni kusaha miselo. <sup>23</sup> Yavabyilwa he ivu ilotu, uzu njo zuwa linzwi nikuli zuwisisa. Uzu njo vikava miselo, ni yoilima; imwi makumi a kumi nikuhitilila, imwi mashumi akwanisa iyanza ni lyonke, imwi makumi otatwe. <sup>24</sup> Jesu chavaha imwi inguli. Chati. "Musu wa kwiwuulu ukola sina ili muntu yabyali intanga zilotu mwiwa lyakwe. <sup>25</sup> Kono vantu nivalele, zila zakwe nazo chizakeza kubya mumukula mukati ka vuloto ni kuyenda. <sup>26</sup> Linu vuloto havukula mena ni kuvika miselo mukula nawo chiwavoneka. <sup>27</sup> Valeki vamwine waluwa chivakeza chivati kwali, 'Unkoshangu, kena uvabyali intanga zina hande muluwa lwako? Chinzi hachikuwanika mukula?' <sup>28</sup> Chati kuvali, 'Yonitoyete nja vapangi vulyo,' Vatanga vakwe chivati kwali, 'Cwale usaka kuti tuka zinyukule mwateni?' <sup>29</sup> Mwina luwa chati, 'Nee, kakuti chi mwakanyukula mwateni mukula, pona chimuka nyukulilila ni vuloto. <sup>30</sup> Muzisiye zikulille hamwina kulindila inkutulo. He nako ye nkutulo kaniwambe kuva kutuli, "Chentanzi munyukolo mukula ni kuisumina mañata kuti uhisiwe, kono mukunganye vuloto muzishete zangu.'" <sup>31</sup> Jesu chawamba imwi inguli kuvali, chati, "Muvuso wa kwiul ukola sina intanga ya masitete iyo muntu yavahindi ni kubyala muluwa lwakwe. <sup>32</sup> Iyi imbuto inini kwimbuto zonse. Kono haiva ya byalwa hande, inkando kuzi chalano za muluwa. Ikula iva isamu, mi zizuni ze wulu zikeza kuzaka zizumbo kumitayi yalyo. <sup>33</sup> Jesu linu chawawambila imwi inguli. "Muvuso wakwiulu ukola ili chivilisa icho mwanakazi avahindi ni kukopanya ni ntikanyo zo tatwe za busu konji hakufunduluka." <sup>34</sup> Zonse inzi zintu Jesu avaziwambi kwinyangela mwinguli. Mi kwanda yenguli kakwina chawawambi kuvali. <sup>35</sup> Iyi ivavi intaelo kuti chonse chiva vawambwa chamupolofita chiwola kuba init. Haho chati, "kaniyalule kaholo kangu mwinguli. Kani wambe zintu zibapatitwe kuzwa kumatangizo inkanda. <sup>36</sup> Linu Jesu chasiya chichava nikuya mwinzuvo. Valutwana bakwe chivakeza kwali mi chivati, "Tutolokele inguli ya mufuka mwiwa." <sup>37</sup> Jesu chetaba chati, "Yababyali intanga zina hande Mwana wa Mulimu. <sup>38</sup> Luwa inkanda; Mi intanga zina hande, izi vana va mubuso, mufuka vana va satani. <sup>39</sup> Mi chila chivazibyalu nji diavulusi. Inkutulo njimamanmani e nkanda, bakutuli mañilo. <sup>40</sup> Hakuva vulyo, mukula kaukunganye nikuhiswa chamulilo, njete

kuve njimanimani e nkanda. <sup>41</sup> Mwana muntu ka tumine mañiloi akwe, mikava kunganyeze hanze ya mvuso zintu zonse zileta chivi, niva vapanga vulilala. <sup>42</sup> Kavava sohele mwilyanga lilo, uko kavakalile nikukwecha meeno. <sup>43</sup> Linu bantu balukite kavavenye sina izuva mumubuso weshevo. Iye yowina matwi, musiye atekeleze. <sup>44</sup> Muvuso wa kwiulu ukola ili ibwe lya butokwa lipatitwe muluwa. Muntu abaliwan mi chalipata. Mwintavo ya kwe chayenda, ku uza zintu zonse zvakwete, nikuula ulu luwa. <sup>45</sup> Hape mvuso wa Mulimu ukola ili muntu yo patehete kukavulola mabwe abutokwa. <sup>46</sup> Hawana ibwe lina maemo ena hande, avayendi nikukauza zintu zakwe zonse zava kwete nikuliula. <sup>47</sup> Hape, mvuso wa kwiulu ukola ili kanyandi kavasohelwa mwi wate, kavachesi mufutafuta ye zintu. <sup>48</sup> Linu hakezula, muyambi chaka kwitila hamutunda. Linu chivekala hansi ni ku kunganya zintu zilotu muchiseye, mi zintu zivi zivasohelwa kwimbali. <sup>49</sup> Mukuve mweyi inzila kumanimani inkanda. Mañiloi muakeze kukauhanya vavi mukati ka vantu valukite. <sup>50</sup> Kavava sohele mwi bimbililo lya mulilo, kwete vakahye niku kwecha meeno. <sup>51</sup> Mwazizuwisisa nzose izi zintu?" Valutwana chivati kwali, "Eni, " <sup>52</sup> Linu Jesu chati kuvali, "Hakuva vulyo vañoli vonse vavavi valutwana ku mvuso weulu vaswa ili nji muntu yeli mwine we nzuvo. Yozwisa zakale ni zintu zihya muchifumu chakwe." <sup>53</sup> Linu nichiya keza kuva vulyo Jesu hamana izi inguli, cha katuka kuzwa mwe chochivaka. <sup>54</sup> Linu Jesu che njila muchi kiliti chakwe ni kuluta vantu mumasinagoge avo. Inkalavo ivali kukomokwa ni kuti, "Kanti uzu mutu uwana kuhi vutali ne zi imakazo kuhi? <sup>55</sup> Uzu muntu kena mwana wa muvezi? Kena vanyina nji Maria? Ni vanche kena nji Jamusi, Josefa, Simone ni Judasi? <sup>56</sup> Ni vanchizya kwe kavakwina mukati ketu? Cwale uzu muntu uwana kuhi zonse izi zintu?" <sup>57</sup> Vava vengwiswa kwali. Kono Jesu chati kuvali, "Mupolofita uswanela kukutekiwa kuunde mwinkanda yakwe ni kuvaluhasi lwakwe. <sup>58</sup> Mi kena ava pangi imakazo zingi kwateni chevaka lyakuvula intumelo.

## Ikauhanyo 14

<sup>1</sup> Che yo inako, Heroda munyandisi a zuwa za kavuvo ka Jesu. <sup>2</sup> Ni chawamba ku vahikana vakwe, cha ti, "U zu nji Joani Mukolovezi, a vakavuki kuvafwile. Ni hakuva vulyo aa maata a chikwete kuseveza kwali." <sup>3</sup> Chokuti Heroda a vakwete Joani, ni ku musumina, ni kumuvika muitolongo chevaka lya Herodiasi, muihabwe wa Filipi mwanche wakwe. <sup>4</sup> Chokuti Joani a vati kwali, "Kahena mulao kuti u ve naye nali mwihenu." <sup>5</sup> Heroda ava kuswanela kumwihaya, kono a vatiyi vantu, chokuti va va kumuhinda kuti mupolofita. <sup>6</sup> Kono izuva lya kupepwa kwa Heroda halisika, mwana wa Hedodiasi wa mukazana ava zani mukati mi chatavisa Heroda. <sup>7</sup> Chakutava, cha sepisa cha kukonka kumuha chonse chete akumbile. <sup>8</sup> Hamana kuhewa mulao kuvanyina, chati, "U nihe hahanu, mukasuva, mutwi wa Joani Mukolovezi." <sup>9</sup> Simwine ni cha filikanywa hahulu chekupo yakwe, kono che vaka lya kukonka, ni chalivaka lya vo vavakulya naye, ni cha laula kuti kutendahale vulyo. <sup>10</sup> A ba tumini ni ku kakosala Joani mwintolongo. <sup>11</sup> Mi mutwi wakwe wa letwa mukasuva ni kuhewa ku mukazana mi cha utwalila va nyina. <sup>12</sup> Valutwana va kwe ni chivakeza,

ni kuhinda chitupu, ni ku chizika. Ha vamaana kuchita ezo, chi va yenda ku ka wambila Jesu. <sup>13</sup> Hohwaho Jesu ha zuwa izo, a zwa muchivake echo ni chisepe ku ya kuchivaka chilikawile. Inyangela ha i zizuwa, chiya mwichilila chatatende kuzwa mwitolopo. <sup>14</sup> Linu Jesu chakeza kubusu bwabo mi ni chabona inyangela. Cha vafwila mañeke ni ku hoza vakuli va vo. <sup>15</sup> Chiminemine chezuba ha chisika, valutiwa vakwe chi bekeza kwali chibati, “Chinu chibaka kachina vantu, mi izuva chilyemina. Hasanye inyangela, ilikuti bayende mumenzi ni kukaliwulila zilyo.” <sup>16</sup> Kono Jesu chawamba kuvali, “Kavena intuso ya kuya kule. Inwe muvahe chimwi chakulya.” <sup>17</sup> Chivati, “Twina hanu zinkwa bulyo zi kwanisa iyanza ni nswi zovele.” <sup>18</sup> Jesu chati, “Muzilete kwangu.” <sup>19</sup> Cwale Jesu a laula inyangela kuikala halyani. Chahinda zinkwa zi kwanisa iyanza ni nswi zovele. Na lolete kwiulu, chatoholofaza ni kucholola zinkwa ni kuziha valutwana. Valutwana chi vaziha inyangela. <sup>20</sup> Vavali ni kuikuta. Linu chibahinda vungululwa -vuvezuli zitanda zi na ikumi ni zobe. <sup>21</sup> Vonse va valyi, va va kusaka kusika kuvakwame va zikiti zi zikwanisa iyanza, kuzwisa vanakazi ni vahwile. <sup>22</sup> Hohwaho vulyo chawambila valutwana vakwe kukwela muchisepe balitangize kwali kwimwi mbali, mikuti iye mwine ha situmina inyangela kule. <sup>23</sup> Ha mana kuboza bungi bwabantu, chayenda heulu lyelundu yenke kukalapela. Linu chitengu ha chikolela a bena uko yenke. <sup>24</sup> Kono chisepe icho chi chivena hakati kewate, chi chivakupala kuyendiswa chevaka la mandinda, chokuti luhuho lu va kuchikanisa. <sup>25</sup> Mwinako ya bune ya masiku Jesu cha chuutila kubali, na yenda hewate. <sup>26</sup> Valutwana ha va muvona na yenda hewate, va vatiyi hahulu, ni chi bati, “Isaku,” mi chi vahuwa hahulu chakutiya. <sup>27</sup> Kono Jesu cha wamba kuvali haho ni chati, “Mukole! Njeme! Kanji mutiyi.” <sup>28</sup> Pitorosi cha mwitava chati, “Simwine, haiva nje we, ni laele ni niize kwako hamenzi. <sup>29</sup> Jesu chati, “Wize.” Cwale Pitorosi cha suka muchisepe ni kuyenda ha menzi kuya kwa Jesu. <sup>30</sup> Kono Pitorosi ha vona luhuho, chatiya. Hakalisa bulyo kumina, cha huwa ahulu chati, “Simwine, nihaze!” <sup>31</sup> Jesu haho vulyo cha otolola iyanza lyakwe, cha kwata Pitorosi, mi ni chamulwila kuti, “Iwe we ntumelo inini, chinzi hohonona?” <sup>32</sup> Linu cwale Jesu ni Pitorosi chiba yenda muchisepe, luhuho chilwa siya kuhunga. <sup>33</sup> Cwale valutwana muchisepe chiva lapela Jesu chibati, “Cheniti u Mwana Mulimu.” <sup>34</sup> Ha chiva lutite, chi venjila munkanda ya Genezareta. <sup>35</sup> Linu vantu mwechina chibaka chivalemuha Jesu, chivatumina mañusa monse muzivaka zimbulukite chilalanda, mi chivamuletela vonse vavakulwala. <sup>36</sup> Chibamukumbila kuti vakwate vulyo kumungundo we chizwato chakwe, mi vungi vu vakwati kwateni chibwahola.

## Ikauhanyo 15

<sup>1</sup> Linu Vafalisi ni bañoli bamwi babezi kwa Jesu kuzwa Jerusalema. Nivati, <sup>2</sup> “Chinzi varutwana bako havaluta chisiyakulu chabatanzi? Mukuti kabashanji mayanza avo habalya.” <sup>3</sup> Jesu abetavi mi navawambila kuti, linu inwe - hamurwisa idaezo ze Reeza ivaka lyachisiyakulu chenu chinzi? <sup>4</sup> Mukuti Ireeza avati, ‘Uhe ikute kweso ni nyoko,’ mi ‘Iye yowamba bubilala kwesi ni nyina, ikumbya kafwe.’ <sup>5</sup> Kono

mute kuti, 'Yense yeti nati kubesi ni banyina, "Ituso yonse yimubali kuyebele kuwana kwangu linu chili impo iya kweReeza,"<sup>6</sup> uzo muntu kayebele kukuteka besi. Chinzila yina bulyo wazimbuluka inzwi lye Reeza chevaka lachisayakulu chenu.<sup>7</sup> Inwe balihele, Isaya avapolofiti chakusima kazenu havati,<sup>8</sup> Aba bantu banikuteka chatuholo twavo, kono inkulo zabo zina kule name.<sup>9</sup> Banilapela ni basawani chimwi, kakuli itumelo ivaruta izimene hetaelo zamuntu."<sup>10</sup> Linu chalisupila ikunga ni kuliwambila kuti, "Mutekeleze ni kuzuwisisa -<sup>11</sup> Kakwina chinjila mukaholo chiizuza muntu ikwe. Muchibaka chobulyo, chizwa mukaholo, njecho chiizuza muntu ikwe."<sup>12</sup> Linu barutwana babezi ni kuwambila Jesu, "Kana wizi kuti bafalisi babanyelwa habazuwa ichi chiwambo?"<sup>13</sup> Jesu avetavi mi nati, "Chimenantu chonse chasanaavabyali Tayo wakwiwulu kachinyukulwe ni kusohelwa kunze. Mubasiye bobona, bahitili bazihofu.<sup>14</sup> Mi heva muhofu nahitila muhofu kunine, vonse kabawile mwilindi."<sup>15</sup> Pitorosi avetabi mi nati kwa Jesu, "Tutolokele iyi nguli."<sup>16</sup> Jesu nati, "nanwe muchiikele nimusena inkutwisiso?"<sup>17</sup> Inwe kamuboni kuti chonse chiinjila mukaholo chihita kuya mwibumu mi linu chikazwa kuya muchimbuzi?"<sup>18</sup> Kono zintu zizwa mukaholo zizwa kunkulo. Nji zintu ziizuza muntu ikwe.<sup>19</sup> Kakuli munkulo kuzwa mihupulo mibilala, vwihai, bubuki, zakusomana, busa, kupaka zamapa, ni kutukana.<sup>20</sup> Ezi nji zintu ziizuza muntu ikwe. Kono kulya ni mayanza asasambite kakwiizuzi muntu ikwe."<sup>21</sup> Linu Jesu chayenda kuzwa mwecho chibaka kulikungula ni kuya muzikiliti zamilefi iba Tire ni Sidoni.<sup>22</sup> Mi hamulole, mwanakazi wa Mukanana abezi kuzwa mwechina chikiliti. Mi chahuweleza mi nichati, "Nifwile inse, Simwine, mwana a Daafita, mwanangu wamukazana ukatezwe madimona."<sup>23</sup> Kono Jesu kana abamwitabi nanga inzwi. Barutwana bakwe babezi ni kumukumbila, ni bati, "Muhindikile kuna, kakuli utuchitala ilata."<sup>24</sup> Kono Jesu abetabi mi nati, "Kana nibatumwa kozuhi nozuhi kunze yembelele izobete munzuvo ya Isilaele."<sup>25</sup> Kono iye neza nikwiza kufukama habusu bwakwe, nati, "Simwine, unituse."<sup>26</sup> Netaba nati, "Kakuyebele kuhinda chinkwa chabahwile ni kuchihha tumbwazana."<sup>27</sup> Mwanakazi nati, "Eni Simwine, kono nanga tumbwazana tulyanga ziwanga kumilomo hetafule ibafumwa to."<sup>28</sup> Linu Jesu abetavi mi abati kwali, "Mwanakazi, itumelo yako inkando. Usiye kutendahale kwako sina mosakila." Mi mwanakwe abaholi chehola iswana.<sup>29</sup> Jesu abasiyi icho chibaka mi nayenda kumbali ni Iwate la Galileya. Kuzwaho abatanti kuya helunduzana ni kukekala hateni.<sup>30</sup> Ikunga ikando nilyeza kwali. Nibaleta bachukuta, bahofu, basatambi, ni basayendi, ni bamwi babali kulwala. Ni babaleta hamatende a Jesu, mi nabahoza bonse.<sup>31</sup> Chobulyo ikunga nilyamakala chabukando hababona basatambi kuti chibawamba, bachukuta chibaba nenza, basayendi chibayenda, ni bahofu chibabona. Niba lumba Ereeza wa Isilaele.<sup>32</sup> Jesu abasupi barutwana bakwe mi nati, "Nifwila ikunga inse, mukuti chibabekali name mazuba otatwe mi kakwina chibabali. Kanisuni kubalukulula ni basalile, kokuma sanzi bazuminini munzila."<sup>33</sup> Barutwana nibawamba kwali ni bati, "Katuwane kuhi mañende azinkwa mwihalaupa likena buti kuti tufepe ikunga ikando buti?"<sup>34</sup> Jesu nabawambila kuti, "Mwina mañende ongahi?" Babetabi kuti, "Amana iyanza ni obele, ni tunswi tulikene."<sup>35</sup> Linu Jesu nalaela

ikunga kwikala hansi. <sup>36</sup> Nichahinda mañende amana iyanza ni obele ni nswi, mi hamana kulitumela, ni changamona mañende ni kwaha kubarutwana bakwe. Barutwana nibaha mañende kwikunga. <sup>37</sup> Bantu bonse nibalya ni kuikuta. Mi nibakunganya zilyo zibashali zibangamoki tukoto, zitanda zimana iyanza ni zobele ni zezula. <sup>38</sup> Babali ibali balule bone, kuzwisa kwatefi banakazi ni bahwile. <sup>39</sup> Linu Jesu chalukulula ikunga mi nenjila muchikepe ni kuya muchikiliti cha Magadani.

## Ikauhanyo 16

<sup>1</sup> Mafalisi ni Masadduki chibeza ni kulika Jesu ka kumubuza kuti aba tondeze chisupo chizwa kwiwuli. <sup>2</sup> Mi na betaba kuti “chiminemine chezuba ha chisika mu wamba kuti bwikalo bwe wulu mubube hande, kakuti iwulu chili subilile. <sup>3</sup> Imi chimeneko mu wamba kuti, “Mazimo ewulu mwabe mabi kakuti kwiwulu busubile.” Mwizi kutoloka zintu zitondezwa mwiwulu, kono ka mwizi kutalusa zitondeza inako. <sup>4</sup> Mulahi wa chive ni busangu u saka chitondeza, mi kakwina chitondeza konji Joani.” Linu Jesu cha katuka ku yenda ni kuba siya. <sup>5</sup> Balutwana chibakeza kwi ishilya limwi, kono chibazibala kuhinda zinkwe. <sup>6</sup> Jesu cha wamba kuti, “mu mamele mulungo wa Mafalisi ni Masadduki”. <sup>7</sup> Balutwana chiba kopanya mihupulo ni ku wamba kuti, “kakuti kena tweza ni zinkwa”. <sup>8</sup> Jesu chaba lemuhite zoose mi chawamba kuti “Inwe be ntumelo inini, cinzi hazeza bulyo mukati kanu ni kutakuti kakuti kena mwahinda zinkwa? <sup>9</sup> Kana muzeza za zinkwa zibali kupanga iyanza, zibakwani bantu bena 5.000, mi zitanda zongayi zi mube zuzi? <sup>10</sup> Kapa zinkwa zibena iyanza ni zobele ku bantu ba bena 4.000, mi zongayi zitanda zi mu bahindi? <sup>11</sup> Ha mu sazuwisisi chinzi kuti kani wamba nanwe za zinkwa? Mukole ni ku mamela za mulungo wa Mafalisi ni Masadduki.” <sup>12</sup> Linu chiba muzuwisisa kuti kena a talusa za mulungo, kono kumamela intuto ya Mafasi ni Masadduki. <sup>13</sup> Haho Jesu cha keza ku munzi umwi wa Chaesarea Filipi, chabuza balutwana bakwe, kuti, “Njzohi bantu u bata kuti nji Mwan'a Muntu?” <sup>14</sup> Chibe taba kuti, “bamwi ba wamba kuti njeye Joani yokolobeza, bamwi nji Elija, mi bamwi bati nji Jeremia, kapa zumwi wa baplofita.” <sup>15</sup> Chati ku bali, “Chwale inwe muti Njemeni?” <sup>16</sup> Chikwe taba Simone Pitrosi cati, “Njewe Keresite, mwan' a we Reza yohala.” <sup>17</sup> Jesu chetaba ni ku muta kuti, “Intohonolo nji yako Simone mwan' a a Joana, kakuti kena inyama kapa malaha, za ku cheniseza, kono nji Tayo wa kwiwulu. <sup>18</sup> Imi name niti njeye Pitorosi, ibwe hente nizake inkeleke yangu. Milyango ya bafwile kente ni iizunde. <sup>19</sup> Ka ni kuhe inkiyi za mubuso wa kwiwulu. Chonse cho sumina hansi ni kwiwulu kaci suminwe, hape chonse cho sumununa hansi ni kwiwulu muchi sumununwe.” <sup>20</sup> Linu Jesu chalaela balutwana bakwe kuti kana bawambili ni haike muntu umwina kuti njeye Keresite. <sup>21</sup> Kuzwa heyo inako Jesu, chatanga ku wambila balutwana bakwe kuti cho kutameha kuyenda kwa Jerusalema, mi kusukuluka kakube kungi mu manza a bentanzi, bañoli, ni bakulwana ba mapulisita, kwi haiwe, ni kubuswa kubola ku kuhala mwizuba lya butatu. <sup>22</sup> Linu Pitorosi na mukungwila kwimbali na munyasa nati, “Tchi chintu chibe kule nawe, Simwine, sanzi chitendahali kwako”. <sup>23</sup> Kono Jesu cha chebuka ni kuta Pitorosi, kuti “zwe kwangu, Satani!

U chi sitataliso kwangu. Iwe kobilaela ni zintu ze Reeza, kono zintu za buntu.”<sup>24</sup> Linu Jesu cha wamba ku balutwana bakwe, “Heba kwina usaka kuni chilila, uswanela ku lisungula, a hinde chifapano chakwe, ni kuni chilila.”<sup>25</sup> Muntu yense usaka buhalo bwakwe mwa bu mayiba, kono yo sinyehelwa buhalo bwakwe ke baka lyangu mwa buwane.<sup>26</sup> Ka chi muhenzi muntu kuti a mune inkanda yonse kono umaninwa buhalo bwakwe? Chinzi muntu cawola kuha kuti a wane buhalo bwa kwe? <sup>27</sup> Mwan' a Muntu mwe ze mwinkanya Yesi ni mañilozi a kwe. Linu njente ahe muntu ni muntu impo kakuya ka zintu za batendi.<sup>28</sup> Ikumbya ni mi wambile buniti, kwina bamwi bazimene hanu, kense ni ba bone bakane lufu konji chi ba bona Mwan'a Muntu neza mu mubuso wakwe.

## Ikauhanyo 17

<sup>1</sup> Mazuba a mana iyanza ni limwina chinga amana Jesu chahinda Pitorosi ni Jakobo, ni Joani mwa chakwe, mi caba ntwala he lundu li nyemukite abo bene. <sup>2</sup> Ca sanduka ha hasu bwabo. Vuluvi bwakwe cibwa sanduka ku benya sina izuba, zizwato zakwe cizasanduka sina iboni. <sup>3</sup> Mubone cikwa boneka Mushe ni Eliia niba wambola naye. <sup>4</sup> Pitorosi ce taba, kwa Jesu. “Simwine, kambe kuwolekaa. Nitwe kala ha hanu halotu kuhitiliza. Haiba usaka, linu ime nina zaka zitomba zo tatwe chimwi cibe cako, chimwi ca Mushe, ni chimwi ca Eliia.” <sup>5</sup> Ha ba kwete kusi wamba, hamulole, muzunde we kope licena ciweza kuba wumba cikwa zwa izwi libali kuzwila mwikope ci, lyati. “Uzu nji Mwanangu inisuni kuhitiliza, ini kantwa, Mu muzuwe.” <sup>6</sup> Balutwana bazuwa, ciba suha nikuwa ca bulubi. <sup>7</sup> Linu Jesu ceza ni kuba kwata cati, “Mubuke musiye kutiya.” <sup>8</sup> Linu ci ba buka kono kena baba boni mutu konji Jesu yeke. <sup>9</sup> Haba suka hasi kuzwa he lundu, Jesu caba laya “kuti kanji ba wambili mutu mane nanga yeke ziba bona konji Mwana Muntu caka buka kuva fwile.” <sup>10</sup> Balutwana ciba buza “cizi bañoli havati kuti Eliia eze lwe tazi?” <sup>11</sup> Jesu cetava niku wamba kuti, kuwamba vuniti, “Elia mweze za boze zintu muzi be kalile. <sup>12</sup> Kono nimi ta kuti, Elia ca vezite kale, kono kana vava mwizivi civa panga zose zivava kusaka. Mwi zila iswana, Mwana Muntu mwa nyandiswe mu mayaza avo”. <sup>13</sup> Valutwana vakwe civa lemaha kuti uwamba Joani yo koloveza. <sup>14</sup> Cinga vasika hakunganine batu, muntu ceza kwali, ca fukama havusu vwakwe, naco kuti, <sup>15</sup> “Simwine, fwile mwanangu inse, ulwala vutuku vwa kuzuminina unyanda maswe. Hamwi uwilinga mu mulilo kapa mu mezi. <sup>16</sup> Niva muletete kuva lutwana vako, niva kangwa ku muhoza.” <sup>17</sup> Jesu cetava cati, “Murahi usa zumini utenda zi fosahela, Kani kale nanwe inako ikumahi? Mulete kunu kwangu.” <sup>18</sup> Jesu cakalimela luhuhu lubilala. Muhwile cahola mwi nako yeyo. <sup>19</sup> Balutwana ba Jesu chiveza kaku liwungula ku vamwi niku vuza, “cizi hatwa kangwa ku zwisa luhuhu luvilala?” <sup>20</sup> Jesu ca wamba kuvali, “kakuli mwina itumelo inini. Ni mi wambila vuniti vwizwile, hamuva nitumelo sina itanga yamasitete, muwola kuwambila ilundu, “zwaho uyende kuna,” muliyende ka kwina cense cili kanise. <sup>21</sup> Kono ulu luhuhu lubilala kalu zwi feela haisi ca kulapela wa kuli nyima zilyo.” <sup>22</sup> Niva sina mwa Galilea, Jesu ca wambila va lutwana vakwe, “Mwana muntu mwa tambikwe muma yaza abatu. <sup>23</sup> Mi muva mwi



haye, mi mwi zuba lyabutatu mwa vuswe kuba fwile.” Mi ikulo zaba lutwana vakwe ciza coka luli. <sup>24</sup> Chinga vasikna mwa Kapenauma, mukwame yo bona zamutelo nicha buza Pitorosi mane muruti wenu mane ulihanga mutelo? <sup>25</sup> Chatu, “Eni” ulihanga. Kono Pitorosi cha yenda muzubo, Jesu cha wamba lwetanzi, “iwe uhupula vule Simoni? Masimwine be kanda va tambula mitelo izwa kubani? Kubazwa kule kamba kubatu bave kala navo?” <sup>26</sup> Pitorosi chinge taba kuti, kubatu “bazwakule,” Jesu cha mucho kuti “batu be chinsi kaba zumininwe kuliha mutelo. <sup>27</sup> Kanji tuleteli yo lola zamitelo chivi, Yende kwi wate, kasohela kashuto kako mu mezi, Hinde iswi ye tazi wi yalule mulomo wayo mowane isheleni, uka itambike yobona zamitelo muchisa changu ni chako.”

## Ikauhanyo 18

<sup>1</sup> Mwinako iswana. Jesu “abawambi kubaluti bakwe njeni mukando mwiulu.” <sup>2</sup> Jesu casumpa muhwire nikumubika mukati kabo, <sup>3</sup> “ikumbya ni wamba kwenu Konji hosanduka niku swana sina bahwile banini, kakwina mowolela kwi njirira mumubuso wa kwi ulu. <sup>4</sup> Cwale muntu uliboza mwi konde Sina Muhwile Munini, muntu yoswana nji mukando mumubuso wa kwiulu. <sup>5</sup> Yense yotambula muhwire munini mwi zina lyangu watambula ime. <sup>6</sup> Yense yoletisa kuti aba bahwire bachite bubi, kwina butuka kuti asuminwe ibwe ikando mwinsingo, nikumusohela mubuliba bwe wate. <sup>7</sup> Bumai kwinkanda kakuli inako celi za kucuncula! Ka kuli kwina butokwa kuti izo inako zikeza! Kono bumai kacozo muntu izi inako kazize cakwe! <sup>8</sup> Haiba iiyanza lyako kapa itende lyako likuletela kuwa, likosole kwateni ni kulisohela kule nawe. Kwina butuka kwako kwi njila mubuso wakwilu ni uli cihole kwanda kuuti usohelwe mumulilo usazimi ni wina onse mayanza ni matende. <sup>9</sup> Haiba linso lyako likuleteza kufosai, lizwise mo ulisohela kule nawe. Kushiyeme kwako kwi njila mubuso wakwilu nilinso lyonke kuzamba kusohelwa mulyangalilo niwina menso obele. <sup>10</sup> Ubone kuti kanzi unyangalizi zumwi waba bahwile. Nimiwambila kuti mwiwulu mangeloi abo inako yonse a lolete habusu bubaTayo bena kwiwulu. <sup>11</sup> Kakuti mwana muntu a vakezi kukuhaza cizovete. <sup>12</sup> Muhupula nzi? Muntu wina imbelele zicita mwanda, cikwazoba hateni yonke, ketico siya zimwi zicita makumi acita iyanza ni zone zibaka zama luundu ni kukagana imwiina yazoba? <sup>13</sup> mi haiwana, ikumbya ni miwambila, kasangalala cayo kuhita izo zina makumi a cita iyanza ni toone ni yanza ni toone zisana za zooba. <sup>14</sup> Mwinzila iswana kahena kusuna kwe Tayo wina kwiwulu kuti imwina kazenini i zenengehe. <sup>15</sup> Haiba mukwako wakufosekeza, yende, mu tondeze mulandu wakwe mukati kaako naye. Haiba naa kutekeleza ciwa muwola mwaako. <sup>16</sup> Kono haiba nasateeki kwako, uhinde ipaki imwina kapa zobeke zimwi, njo kuti tuholo twabantu bobeele nandi botaatwe kuba ipaki lenzwi ni inzwi. <sup>17</sup> Linu haiba na kaana kutekeleza kubali, wambe i ndaba Kwi nkeleke. Haiba naakana kuzuwa kwi nkeleke, muhinde sina mulicaba ni mutelisi. <sup>18</sup> Chabusakusima ni kuwambila, chonse chintu chisuminwe hansi ni kwiwulu chisuminwe. Chonse chisumuninwe hansi ni kwiwulu kachisumuninwe. <sup>19</sup> Kwekeza henzo nimiwambila kuti, haiba mububeli bwenu muzuminzene hansi kuamana ni chimwi ni chimwi chonse chimukumbila, chintu ni chintu chibakumbila,

kabachitendelwe ne Tayo wina kwiwulu. <sup>20</sup> Mukuti konse kwina bobele kapa botatwe bakopene hamwina mwizina lyangu, ime kanibe mukati kabo.” <sup>21</sup> Linu Pitorosi chabuza Jesu, “Simwine, tongai mwaangu twa wola kuni fosekeza mu kuti nimu swalele? Kwanda twina iyanza nito beele?” <sup>22</sup> Jesu na muti, “kaniku wambili twe iyanza ni to beele, kono makumi eyanza ni obeelee makumi. hape. <sup>23</sup> Cheyo inzila ipuso yekwiwulu ibambanywa ni simwine zumwi yaba sake namanise chikoloti ni muhikana kwe. <sup>24</sup> Habati batangise za kushiamisa, muhikana umwina abaletwa kwali yabali kumukolota italenta zichita zikiti zina ikumi. <sup>25</sup> Kono ibaka lakuti kanabena mwawola kuitabila, mfumwakwe chalaela kuti awuzwe, hamwina ni mwihyabwe ni bahwile ni zonse zabena naze, ibaka le ntifo i tendwe. <sup>26</sup> Linu muhikana chawila hansi, ni kukubama habusu bwakwe, mi nati, 'Mfumwangu, munifwile inse, mi kanikulihe zonse.' <sup>27</sup> Chobulyo mfumu wamuhikana, kakuli ababi ni nse, abamulukululi nikuswalela chikoloti chakwe. <sup>28</sup> Muhikana uzo na yenda kunze mi naka wana ba mwaakwe, ya bali kumu kolota ikumi lwa mali na mu fwañata. Ni kumu kwatila mumumino, mi nati, 'ni life co kolota.' <sup>29</sup> Kono mwaakwe wo mutanga na wila hansi ni kumu kumbila, nati, 'U ni kwatile, mi munikulihe.' <sup>30</sup> Linu muhikana wa matangizo nakana. Kwanda bulyo, nayenda ni kumusohela mwi ntolongo, kusikila hete namulihe zonse zo kolota. <sup>31</sup> Linu ba mwi batanga haba boona cibattendahali, baba bengi maswe. Nikwiza kuwambila mfumwe ziba chitahali. <sup>32</sup> Linu ifumwe wamuhikana na musumpa, namuti, 'iwe mutanga yo fosaheele, ni baku wondeli mulandu wako kakuli ubani kumbili. <sup>33</sup> Kete no babi ni nse nawe kwa mwaako, ubu muni ba ku kwatili nawe?' <sup>34</sup> Simwine wakwe nabenga mi namuha mu mayanza aba nyandisi kusikila hete namane kuliha zonse za mukolwete. <sup>35</sup> Njekuti Tayo wakuwulu naye mwa tende mu kuswana, haiba zumwi ni zumwi wenu kate awasalele mwaakwe mwi nkulo.”

## Ikauhanyo 19

<sup>1</sup> Linu chikwa sika inako Jesu ha mana awo mazwi, ni cha zwa mwa Galilea, linu choya ku museto wa Judea uvena mwi shila lya lwizi lwa Jorodani. <sup>2</sup> Ikunga lya batu bangi niba mwichilile, linu chaka va hozeza kwatani. <sup>3</sup> Mafalisi ni chibeza kwali, kwiza kumulika, “kana ku woleka kuti mukwame akauhane ni mwihyabwe kabu kavo bonse?” <sup>4</sup> Jesu nabe tava kuti, “kana mubavali iye mwine yaba vapangi kuzwa ku matangilo aba vapangi mukwame ni mwakazi? <sup>5</sup> Mukuti iye yaba vapangi avati kuti, 'chebaka mukwame mwa siye chivaka chibesi ni ba nyina aka kopane ni mwihyavwe?’ <sup>6</sup> Linu boveree muvabe muntu umwina mwi nyama. Linu chava kopanyi Ireeza hamwina, kanji nikuvi niyete nachi kauhanye.” <sup>7</sup> Chiva wamba kwali, “chizi Mushe hava tulayi kuti uswanela ku hewa ifnolo lye kauhano niku muhindika?” <sup>8</sup> Nicha betava kuti, “bakenyi chaku kukutuhala kwe kulo zenu Mushe aba mizuminini ku kawuhana ni bamwi hyenwanwe kono kuzwa kumatangilo keena ivali nji zila iyo. <sup>9</sup> Ikumbya nimi wambila buniti, yense yo kana mwihyavwe isi ka mulandu wabu sangu, nikusesa wungi mwakazi upanga bushahi. Hape mukwame yosensa mwanakazi yava kanwa upanga bushahi.” <sup>10</sup> Balutwana chiva

ti kwa Jesu, “Haiva mukwi kalille mona buloyu bulotu bakwame ni banakazi kanji basesi ni kuseswa.” <sup>11</sup> Jesu nicha wamba kuvali nati, kahena muntu yese yo wola kuzumina zinu zikwetwe kurutwa, kono haisi avo va zumina kutambula icho. <sup>12</sup> Kakuti kwina ba shalondo bava zalwa bovulyo kuzwa mu mavumu ava nyinavo. Imi vamwi ba shalondo bava pangwa ni vantu vamwi. Imi vamwi chevaka lyamusevezi wa muvuso we wulu. Iye yoo wola kutambula ituto atambule” <sup>13</sup> Linu vahwile zana nicha va letwa kwali ili kuti aviike mayaza akwe hewulu lyavo niku valapelela. Kono balutwana vakwe nicha babakalimela. <sup>14</sup> Kono Jesu nati kuti, “kanji muva kanisa kwiza kwangu, kakuti muuso we wulu wa vantu va swana navo.” <sup>15</sup> Kuzwaho ni chava vika maza, ni chazwa havali. <sup>16</sup> Mubone, mukwame wumwi cheza kwa Jesu ni chata kuti, “Muruti, chizi chilotu chini lukela ku tenda ili kuti niwane buhalo busamani?” <sup>17</sup> Jesu chata kwali, “chizi hotenda kuti uni buza zintu zilukite? Yeke muntu njolukite, kono haiva usaka kwinjila mukati ka vuhalo, zwile habusu kubika itayelo.” <sup>18</sup> Mukwame chamu vuza ni chati, “Njezihi itaelo?” Jesu ni chati, “Kanji wi hayii, kanji uvukii, kanji wivii, kanji upaki indaba za mapa, <sup>19</sup> uhe ikute venso niva nyoko, usake yo vambene naye sina moli molisakila.” <sup>20</sup> Mutangana nata kwali, “Zose izo zintu niba zikuteki. Hape muni sakezi?” <sup>21</sup> Jesu ni chati, “haiva usaka kuva yo maninize, yende, kauze zose zo kwete, uka zihe ba sukulukite, mi iwe move ni chifumu kwi wulu, kuzwaho zoni chilile,” <sup>22</sup> Mutngana chinga zuwa buloyu kwa Jesu, nayenda na swavite ahulu, kakuti abali nji zumwi ba vena mazimo achifumu. <sup>23</sup> Jesu ni chata kuva Lutwana vakwe, “ikumbya nimi wambila, ku kukutu ahulu ku muntu yo fumite kwi njila mu mubuso we wulu. <sup>24</sup> Hape nimi wambila bu sakusima kuti, kuhuva Inkamele kwi njila che linso lye naliti kuhita mufumi kuti enjile mu mubuso we Ireeza.” <sup>25</sup> Linu valutwana ha zuwa buloyu, Linu chiva makala tota hava zuwa buloyu niku ta kuti, “Nji vani bente niva hazwe?” <sup>26</sup> Jesu nicha ba lola niku ta kuti, “ku vantu kazi woleki, kwe Reeza zintu zonse ziwoleka.” <sup>27</sup> Linu Pitorosi niche tava nati, “mubone, tuva siyi zintu zose nitwa kwichilila. Linu kuzwaho mutu wane chituzi?” <sup>28</sup> Jesu nawamba ku vali nati, “Ikumbya nimi wambila, inwe muva chilili ime, muku zalwa chiha mwana mutu chake kala ha chihuna che kanya yakwe, nanwe buloyu mumu kekale hazi huna zina ikumi nizo vele, mukava vaatuli baka atula mishovo ina ikumi ni yovere ba mushobo wama Isilaele. <sup>29</sup> Wumwi ni wumwi yava siyi mazuvo, mizwale, bachizye, vesi, banyina, bana vakwe, mane ni mawa ke vaka lyangu, ka tambule zilukela kuva mwanda wi zwile niku wola buhalo busa mani. <sup>30</sup> Kono bangi bena kumatangilo muvave kuma maninizo, hape bangi vena kuma maninizo muvave ku matangilo.

## Ikauhanyo 20

<sup>1</sup> Kakuti muuso wa kuwulu uswana sina mwine webu yaba zwiili kuhanze kamapakela kukahira ba beleki ba muluwa lwakwe lwa muwomba. <sup>2</sup> Kuzaho cha zuminzana ni ba beleki kaku sebeleza i sheleni lyonke mwi zuba, chaba tumina mwiwa lyakwe lya muwomba. <sup>3</sup> Cho yenda hanze hape munako ilikana ihola zotatwe mi cha bona bamwi ba beleki bauzimene ni kusena ziba bali kutende mu chibaka cha musika. <sup>4</sup> Kubali na bacho, 'Inwe nanwe mu yende mwiwa lya

muwomba, kanimihe chi lukite'. Haho chi ba yenda kuku vereka. <sup>5</sup> Hape cho yende kuhanze mwi ihola zibali kukwana iyanza lyonke ni iimwina, mi hape zimwi zibali kupanga iyanza ni zone ni kupanga kakuswana. <sup>6</sup> Hape ni hape mwihola yekumi ni yonke cha yenda hanze cha kawana bamwi niba zimene ni basena zi ba bali kutende. Cho ba wambila kuti, 'Chinzi hamu zimena bolyo hanu ni kusena zimutende mane izuba lyonse?' <sup>7</sup> Chi ba mwitaba kuti, 'kakuti ka kwina wa tuhira.' 'Linu cho wamba kubali nati, 'Nanwe muyende mwiwalya muwomba'. <sup>8</sup> Linu chitengwena, nfumwe wewa lya mawomba cho supa muhikana wakwe. 'Sumpe ba beleki njo ba luwera, ukalele kuwa manimani kukasika ku wentanzi.' <sup>9</sup> Linu ba beleki ba bahirwa ke nako yehola ichita ikumi ni yonke ha chiba sika, umwi ni wumwi na hora isheleni limwina. <sup>10</sup> Linu ba beleki babezi intanzi nabo chiba keza, ba bali kuzeza kuti muba lihiwe mangi, kono nabo chaba wana isheleni limwina. <sup>11</sup> Ha chiba tambula ituwelo zabo, niba bilela kaza nfumwe webu. <sup>12</sup> Chiba wamba kuti, 'bana babeleki bama manimani ba babeleka bulyo ihola imwina, kono wabaliha iswana niyetu, iswe twa beleka ni kulemenwa izuba lyonse kamwi ni kahisite.' <sup>13</sup> Kono nfumwe wewa cho wamba kuzumwi wabo bantu chati, 'Mulikani kakwina buvi buna ku chita. Kena kuti wa zuminzana name ka kuku liha isheleni liimwina? <sup>14</sup> Kohinde bulyo chako zwehateni uli yendeze mwinzila yako. Na lika kuliha ba beleki ba hirwa manainizo sina bulyo mukwi kalile kwako. <sup>15</sup> Kana kakuni yelele kuti ni tende muni sakila ku chita ni ziluwantu zangu? Kapa liinso lyako linifwila muuna kakuli ni lukisa zangu?' <sup>16</sup> Cho bulyo bama manimani kababe be ntanzi mi bentanzi kababe bama manimani." <sup>17</sup> Aho Jesu ha bali kukaya kwa Jerusalema, cho hinda ba bena ikumi ni bobele kwimbali, imi munzila cho wamba kubali nati, <sup>18</sup> "Mu bwene, tukaya kwa Jerusalema, imi Mwan'a Muntu mwa hewe mumanza aba kulwana ba mapulisita ni ba ñoli. Ka ba muatwile ifu <sup>19</sup> imi ka hewe kubantu feela kuti ba mushubule, ba mushupe, ni ku mukokotela. Kono mwi zuba lya butatu mwa buswe. <sup>20</sup> Linu inyina wa bana ba mitangana ba Zebediya chowiza nabo kwa Jesu. Cho fukama habusu bwakwe ni ku mukumbila chimwi chintu. <sup>21</sup> Jesu choti kwali, "Chinzi cho suni?" Chato kwali, "Layele kuti aba bana bangu bobele ba bamitangana bekale, umwina abe kwi yanza lyako lye chilyo imi zumwi kwiyanza lyako lye chi nzohoto mu muuso wako." <sup>22</sup> Kono Jesu cho mwitaba ni kuwamba kuti, "Kawizi cho kwete ku kumbila. Kana u yelega kunywina muchi nywinso chente ni nywine hahanu?" Chi ba mwitaba kuti, "tuwola." Cho wamba kuti, "Ikumbya inkomoki yangu mu munywine mo. <sup>23</sup> Kono za kwikala kwiyanza lyangu lya chilyo ni yanza lyangu lye chinzohoto kahena njeme yo yelega ku kuziha, kono ka zibe njiza bana balukisezwe kuba Tayo." <sup>24</sup> Linu bamwi balutwana ba bena ikumi habazuwa bulyo, chiba nyelwala muntu ni mwanche. <sup>25</sup> Kono Jesu choba sumpila kumbali yakwe, ni kuba wambila kuti, "Mwizi kuti bayendisi be chichaba ba sebelisa ku lyatilila bamwi imi mane bantu bamazimo ba lyatilila tota. <sup>26</sup> Kono sanzi kubi mweyo inzila mukati kanu. Ni ha mubonabulyo, yense yo lakaza kuba mukando mukati kanu abe muhikana wenu. <sup>27</sup> Hape yense yo lakaza kuba wentanzi abe muhikana wenu, <sup>28</sup> Sina hakwina kuti Mwan a Muntu kena abezili ku sebezwa, kono kusebeza, kono nikuha buhalo

bwakwe chitabelo ku bantu bonse.”<sup>29</sup> Habali kuzwa kwa Jerico, ikunga ikando ni chi lyamwi chilila.<sup>30</sup> Imi kubena bakwame bobele babali ku fwile meenso ba bekele kwi mbali yamukwakwa. Linu haba zuwa kuti Jesu abali kuhita, chi batabeleza kaku huweleza, “Simwine, Mwan'a Daafita, utufwile inse.”<sup>31</sup> Ikunga chilyaba nyaza ni ku bawambila kuti batontole, kono abo nji balila cha kuhuweleza kuti “Simwine, Mwan'a Daafita, utufwile inse.”<sup>32</sup> Linu Jesu, cho zimana nasa nyanganyi ni ku basumpa ni kuta kuti, “Chinzi chi mulakaza kuti ni mitendele?”<sup>33</sup> Chi ba wamba kuti, “Simwine, kuti meenso eetu eyaluke.”<sup>34</sup> Linu Jesu, cho bafwila inse, cho bawonda ha meenso abo. Pona haho chiba bone ni ku mwichilila.

## Ikauhanyo 21

<sup>1</sup> Sina Jesu ni barutwana bakwe ha ba chunina Jelusalema ni kwiza kwa Patepaje, he Lundu la Olive, linu Jesu a ba tumini barutwana ba kwe bobele,<sup>2</sup> na ba cho, “Muyende mu munzi wi chilila, mi ka pili ka mu kawane i ndonki i suminwe mwateni, ni kaana kayo. Mu zi sumunune mi mu zi lete kwa ngu.”<sup>3</sup> Haiba muntu zumwi u wamba chi mwi ka zateni, mute kuti, “Simwine uzi saka; mi zuna mutu ka zitumine nanwe.”<sup>4</sup> Linu i chi chi ba chiteki kuti icho chi ba wambwa mupolofita chi zuzilizwe.<sup>5</sup> Nati, “wambile mwana wa mukazana wa zione, 'Bone, simwine wako ukezite kwako, Cha kuli boozha hansi na tantite he donki, Ni ha kana kayo, ka na mani ke donki.”<sup>6</sup> Linu barutwana ba ba yendi ni ku ka tenda bo bulyo mwa ba ba laeleli Jesu.<sup>7</sup> Ba ba kaleti i donki ni mwana ni ku bika zizabalo za bo ha zili, mi Jesu a be kali ha zizwato.<sup>8</sup> Bungi bwa bantu ba bazali zizabalo za bo mu i nzila, ba mwi ba batemi mi tayi ya zisamu ni ku i zala mu inzila.<sup>9</sup> Linu ikunga ibayendi Jesu naseni kuyenda ne ikunga ibechilili, na huweleza nati, “Hosana kumwana Daafita! Utonolofezwe ukeza mwinzina lya simwine! Hosana kuwina mwiwulu!”<sup>10</sup> Linu Jesu heti chasika mwa Jelusalema, muleneñi wonse uba nyungani nibati, “Nyeni uzo?”<sup>11</sup> Ibetabi, chiyati, “uzu nji Jesu uzwa mwa Nazaleta ina mwa Galileya.”<sup>12</sup> Linu Jesu chenjila mwi tempele. Abahindiki babali kuwuzikiza mwi tempele, ni kuzulika intafule zamashelēni ni zipula zonse zibabauzi hamwina.<sup>13</sup> Abawambi kubali, “kuñoletwe kuti, 'Inzubo yangu kaisupwe kuti inzubo yetapelo,' kono inwe chimwaisandula chikunganino chabasa.”<sup>14</sup> Linu zihofu ni zihole zibakezi kwali mwi tempele, mi nabahoza.<sup>15</sup> Mukulwana wamapulisita ni bañoli bababoni zintu zikomokisa zabantendi, mi singa bazuwa bahuweleza mwitempele ni bati, “Hosana kumwana a Daafita,” babanjilwa bukali.<sup>16</sup> Babati kwali, “Mane uzuwile zibakwete kuwamba aba bantu?” Jesu chati kubali, “Eni! Kono mane chimubabalite, 'Mutuholo twabachiche ni bapamba kuzwa milumbeko ihitiliza kukuluka?’”<sup>17</sup> Linu Jesu na basiya ni kuya kumuleneñi wa Bethani mi abakalali kwateni.<sup>18</sup> Linu kakusasa chabola kumuleneñi, aba fwile inzala.<sup>19</sup> Kakubona chisamu chamuchaba kumbali ni nzila, abayendi kuchili mi abawani kuti kakwina chibikitwe kwateñi kunze yamakoba. Abawambi kuchili, “Kuzwa sunu kanzi nikube ni chichalantu kwako hape.” Imi kapilipili chisamu chamuchaba nichazuma.<sup>20</sup> Linu balutwana haba boni bulyo

ni ba komokwa ni bati, “ku iza bule kuti i samu lwa muchaba hohwaho lizume?”<sup>21</sup> Jesu ne taaba na ba cho, “cho kusa kusima ni kucho, haiba ni mwina i ntumelo mi ka mubi ni mi hupulo yobehe, kete mutende fela chiba tendwa kweli isamu lya muchaba. 'Kono ka muole kuwamba kwe chi chi wuulu,' u katulwe mui uulu mi u sohelwe mu iwate,'<sup>22</sup> Mi mu ku chitahale. Chonse chi u kumbila che ntapelo, cha ku zumina, mo u tumbule.”<sup>23</sup> Linu Jesu heza mwiitempele, muprisita mukulwana ni bakulwana babantu ni beeza kwali ha bali kuruta mi nacho, “chamaata ani ochita izi zintu? Mi wa akuha a amaata njeni?”<sup>24</sup> Jesu chobetaaba mi nabacho, “Ime name munimibuze impuzo imwina. Haiba nimuniwambila, name munimiwambile kuti chamaata nzi anichitisa izi zintu.”<sup>25</sup> Inkolobezo ya Joani- ibazwi kuhi? Kuzwiila kwiwulu kamba kubantu?” Babali kuwambola mukati kaabo, ni bati, “Haiba nituti, 'Kuzwa kwiwulu,' mwati kwetu, 'Chizi linu hamusana mubamuzumini?’<sup>26</sup> Kono haiba nituti, 'Kuzwa kubantu,' tutiya ikunga, kakuli bonse babona Joani kuba mupolofita.”<sup>27</sup> Linu babetabi Jesu nibati, “Katwiizi,” Imi naye nabetaba nati, “Nanga ime keti chinimiwambila kuti nji ani maata anichita chawo izi zintu.”<sup>28</sup> Kono iwe uzeza buti? Mukwame abena banaswisu bobele. Abayendi kuwetanzi mi nati, 'Mwanangu, kwiya ukasebeze muluwa lwe veine sunu.’<sup>29</sup> Mwana abetabi nati, 'kani woli,' kono mumasulezana nachincha muhupulo wakwe mi nayenda.<sup>30</sup> Imi mukwame nayenda kumwanaa kwe wabubeli mi nawamba chintu chiswana. Mwanaa kwe netaba nati, 'Kaniyende, sha,' kono kanabayendi.<sup>31</sup> Kubana bobele yabachiti intato yeshabo?” Babati, “Wetanzi” Jesu nabacho, “Chabusakusima ni micho, bateliisi bamali ni mahuule mubakenjile mumubuso we Ireeza inwe nimuseni.”<sup>32</sup> Mukuti Joani abezi kwenu chenzila ilukite, kono kanamubamuzumini, kono bateliisi bamali ni mahuule babamuzumini. Imi inwe, hamubona izo nizitendahala, kana mubakeli zibe zenu kumamanamani kuti mumuzumine.<sup>33</sup> Mutekeleze kwinguli imwi. Kubena mukwame, yabali sichibaka, Ababyalite iwa lyamuwoomba, nikubika lukwakwa kuz- imbulusa, abashi chilubilo mwateni, abazaki ni ngalani yakubonena kulee, imi abaikalimi kubalimi bakalimite. Linu abayendi kuimwi inkanda.<sup>34</sup> Imi inako yenkutulo yazichelantu haichunina, abatumi bahikana balikene kubabyali bamuwoomba kukahinda zichelantu zakwe.<sup>35</sup> Kono bakalimite mawa babahindi bahikana bakwe, kudama umwina, kwihaya zumwi, ni kugoboola zumwi ni mabwe.<sup>36</sup> Imi hape, siluwa abatumi bamwi bahikana, kuhita bamatangilo, kono babyali bamawa bababachiti chenzila iswana.<sup>37</sup> Kuzwaho, mwine siluwa abatumi mwanaa kwe kubali, nikucho, 'Kakakuteke mwanangu.’<sup>38</sup> Kono balimi bamuwoomba hababona mwana, chibaliwambila kuti, uzu nji swana. 'Mwize, tumwihaye tuyole chifumu.’<sup>39</sup> Linu chibamuhinda, chibamusohela hanze yaluwa lwamuwoomba, mi chiva mwihaya.<sup>40</sup> Linu siluiwa heti nasike, kachite inzi kubalimi bewa lyamuwoomba?”<sup>41</sup> Babawambi kwali nibacho, “Kasinyasinye abo bakwame bafosahale chenzila yachituhu chikando, mi kuzwaho mwakalime mawa amuwoomba kubamwi balimi bamuwoomba, bakwame bawola kulaha mowoomba haubuzwa.”<sup>42</sup> Jesu nabati, “Kana mubeni kubala mumañolo, 'Musumo Ubabakani bazaki Ubatendwa Musumo wamwikona. Ichi chibali kuzwila kwa Simwine, mi chitabisa

mumenso etu'? <sup>43</sup> Chobulyo nimicho, mubuso we Ireeza kauzwiswe kwenu mi kauhewe kuchisi chilichitila zichelatu icho chine. <sup>44</sup> Yense yeti nawile heli ibwe mwachokoke bwemba. Kono iyemwine heti niliwile, kagazubuke." <sup>45</sup> Bakulwana bavapurista ni vafarisi habazuwa iyi inguli, babalemuhi kuti uwamba abo. <sup>46</sup> Chakusaka kumusumina, babalikutiya ikunga, mukuti bantu babali kumuhinda kuti mupolofita.

## Ikauhanyo 22

<sup>1</sup> Jeeso cheza kuwamba nabo hape che nguli, chati', <sup>2</sup> "Muvuso we wulu uswana uvu zumwi simwine ya va lukisi mukiti we seso lya mwanakwe wa mwanaswisu, <sup>3</sup> Chatuma va hikana vakwe ku ka sumpa avo va valayezwe, kono kena vaveza. <sup>4</sup> Hape simwine neza ku tuma vamwi vahikana, nati, 'Mukava wambile valayezwa, "Vone, china lukisa mulalilo wangu. Mapulu ne tunamani twangu tununine chi ze haiwa, mi zintu zonse zi shiyeme. Muize ku mukiti we seso." <sup>5</sup> Kono avo kena va vatekerezi cho ku tokomera nanga kanini chivaliyendeza kwabo, zumwi kwiwa lyakwe, naye zumwi ku zimpangaliko zakwe. <sup>6</sup> Vungi bwavo chiva hindeka vahikana va simwine nikuva fwisa insoni, mi ni kuvehaya. <sup>7</sup> Mi simwine na venga. Choku tumina chisole chakwe, ku ihaya vehayi mi choku ka sumika munzi mukando wavo. <sup>8</sup> Mi na wamba ku vahikana vakwe ku tewa, 'mukiti we iseso u lukite, kono va valalezwa kena va vaku swanere. <sup>9</sup> Mi paho, muyende munzira ziwukite mwishira mi muka meme vantu cho vungi ku mukiti we iseso mumu wolyera.' <sup>10</sup> Mi vahikana niva yenda kuya vu kunganyana vantu vava vaka wani, vonse va sa shiyeme ni va shiyeme. Lyinu chivaka cho mukiti ni che zuzwa ne vayezi. <sup>11</sup> Kono simwine inge za kulola vaezi, chavona mukwame yasena avazwete zi zwato za mukiti, <sup>12</sup> Simwine chati kwali, 'Mulikani, hape wenjira vule munu nosa zwete zizwato za mukiti we seso?' Mukwame chavula chiambo. <sup>13</sup> Lyinu simwine nawambira vahikana, 'Mu hambe uzu mukwame ku manza ni matende, mu musohela mukelima, uko kwina ku vokolola ne kulila inkunkuma.' <sup>14</sup> Kakuli vangi va sumpitwe kono va che va saliyitwa." <sup>15</sup> Lyinu va farasai chiveza kuzeza ni ku zuminzana muvawolela kumu teyera Jeeso kaswa mu ziambo zakwe. <sup>16</sup> Ni chi va mutuminiza valutwana vavo, ku kopanya vulyo ne maheroda. Choku wamba ne Jesu, "Muruti twizi kuti wina initi, mi uluta inzira ye Ireeza cho vusakusima. Ko tekerezi ku minahano yo muntu, mane kotondezi isobozi mukati ka vantu. <sup>17</sup> Lyinu tulwile, u zeza vulye? Cho mulao ku woleka ku liha mutelo kwa Kaishara kamba vule?" <sup>18</sup> Kono Jeeso na lemaha ku fosahala kwavo mi choku wamba kuti, "Chinzi ha mu nilika unwe, unwe va itimukanyi? <sup>19</sup> Mu ni tondeze vuwayawaya vo mutelo." Mi avo choku leta vuwayawaya kwali. <sup>20</sup> Jeeso na wamba kubalyi kuti, "Chiswaniso ne izina lyani izi?" <sup>21</sup> chi vati njiza Kaishara. "Jeeso cho ku wamba kuti, muhe Kaishara zintu za Kaishara, ne Ireeza zintu ze Ireeza. <sup>22</sup> Chinga va zuwa mu wambilo wakwe choku komokwa. Mi choku mu siya ni vakaya. <sup>23</sup> Cholo lu zuva vamwi va Vasadukayi, va valyi kucho kuti ka kwiina ku vuuka kwa vafu ni beza kwali. <sup>24</sup> Choku mu vuza kuti, "Muruti, Mushe ava wambi, 'Haiva mukwame wa fwa na sena vaana, mwanchakwe u lukele ku sesa mwi hyabwe choku zalila mukulwakwe vahwile. <sup>25</sup> Kuvana vanaswisu va va kumana iyanza

ni tovele. We ntazi a va sesi cho ku fwa, Cho ku siya muihabwe ku mwanche. <sup>26</sup> Mi mwanche yo mu ichilila cho ku panga chintu chi swana, ne wo vutatu mane ne ku twala ku woku mana iyanza ne tovele. <sup>27</sup> Chinga va mana ku fwa bonse, mukulwakazi naye choku fwa. <sup>28</sup> Lyinu ku inako yo ku vuka, kaave mukulwakazi wani kwava va vaanaswisu va mana iyanza ni tovele? Ka kuti vonse va va musesi?” <sup>29</sup> Mi Jeeso na ve taba nati, “Chingi mufosa, ka kuti ka mwizi mañolo kamba maata e Ireeza. <sup>30</sup> Ka kuti ku ku vuuka ka kwina ku sesa, kamba ku seswa. Mi vulyo ka va ku kola ili mañiloi miulu. <sup>31</sup> Kono kuya choku vuuka kwa vafwire, ka hena mu va vali ziva wambitwe kwenu ne Ireeza kuti <sup>32</sup> ‘Njeme Ireeza wa Abrahamu, Ireeza wa Isaka, Ireeza wa Jakobo?’ Ireeza ka hena wa vafwire kono ngua va hala.” <sup>33</sup> Mi vantu vangi chinga va zuwa izo, choku komokwerwa ituto yakwe. <sup>34</sup> Mi Vafarasayi chinga va zuwa kuti Jeeso cha tontoza Vasadukayi, cho kuli kopanya vonse. <sup>35</sup> Zumwi wabo, muruti wo mulao, cho ku vuza ipuzo ku mulika- <sup>36</sup> “Muluti, lyaho itaero inkando mu mulao nje ihi?” <sup>37</sup> Jeeso cho ku mu sandula ku tewa, “Sune Ireeza wako che inkulo yako vonse, ne luhuho lwako lonse, ne muhupulo wako wonse.” <sup>38</sup> Iyi nje itaelo inkando mu mulao. <sup>39</sup> Mi yo uvveli itaelo yi swana-‘U sune muzakinsani mo lisunine.’ <sup>40</sup> He zi itaelo zovele mpaha kolele mulao ne vapolofita.” <sup>41</sup> Choku hwela Vafarasayi ne vasi kungene, Jeeso choku va vuza ipuzo. <sup>42</sup> Nati munahana ku tinzi cha Kirisiti? Mwanaswisu wani?” Avo chokumu cho kuti, “Mwanaswisu wa Daafita.” <sup>43</sup> Jeeso choku va cho kuti, “Kwiza vule kuti Daafita chowina Muluhuho amusumpe Simwine, nati kuti. <sup>44</sup> Simwene na wamba kwa Simwine wangu, “Wi kalile kwiyanza lyangu lya malyo, mbwita china chita zira zako kapula ka matende ako?” <sup>45</sup> Lyinu haiva Daafita u musumpa Kirisiti ‘Simwine’, ku zwaho u va vule mwanaswisu wa Daafita?” <sup>46</sup> Mi ni kwa vuleka mane nangati u mwina ya va muitavi che linzwi, ku zwaho mane ni kwa vuleka muntu nangati umwina ku muvuza ipuzo ku zwa mwelyo izuva.

## Ikauhanyo 23

<sup>1</sup> Lyinu Jeeso na wamba ku bungi-bungi bwa bantu ne ku varutwana vakwe <sup>2</sup> kuti, “Vañoli ne Vafarasayi ve kala mu chimpura cha Mushe.” <sup>3</sup> Lyinu mupange zonse ziva mu lawiila, mu chite ne ku panga zonse inzi zintu, mi bulyo mu siye kuva ziya ziba panga. kakuti vawamba zitu choku sa zi pangahaza. <sup>4</sup> Eeye, va hinda choku puteereera choku sumina miputo mikando yi lyema choku vika ha maheta a vantu. Avo mane nanga chaka nwe kamwina kava liki kunyemuna. <sup>5</sup> Misevezi yaavo yiva woola ku panga vai pangira vulyo muma tembwa kuti va vonwe ku vantu. Vakandusa ahulu ziviko zaavo zo mulao mane choku kuza ahulu hape majira e zizwato zaavo. <sup>6</sup> Vasuni ahulu mekalo a vantu va kutekeha mu mikiti, ne zipula zi kalwa vantu va kutekeha mu Ikereke, <sup>7</sup> Ne ku rumereswa ahulu ku vantu mu mazira, neku supwa muruti. <sup>8</sup> Sanzi mu sumpwa kuti ‘Muruti’, kakuti mwina muruti u mwina bulyo, unwe mu bonse mu balikani. <sup>9</sup> Mi mane sanzi mu sumpi mutu kuti nje isheenu hansi hanu ka kuti isheenu wu mwina bulyo yo wina ku iwulu. <sup>10</sup> Hape sanzi u zuminini muntu kuti a ku sumpe kuti muruti, ka kuti mwina bulyo muruti u mwina iye kirisiti.



11 Mi iye mukando ahulu mukati kenu njo lukele kuba muhikana wenu. 12 Mi iyee yolyi nyemuna ka vikwa hasi, ku zwaho iye yeti naalyi vike hasi ka nyemunwa. 13 Mi ku maibite unwe mu Vañoli ne Vafarasayi, muva itimukanyi ka kuti mu iyalyira muvuso wo ku iwulu vantu, hape ku kwinjira ka mwinjiri mwa teni, va saka kwinjira navo hape muva kanisa. 14 Mu maibite unwe mu Vañoli neba Farasayi Va itimukanyi, mubwabwanga mazubo aba fwirwa 15 Mu maibite unwe mu Vañoli, Farasayi niba itimukanyi. Kakuti muyenda mu mawate ne inkanda kuti mu wole ku sandula muntu nangati wu mwina bulyo mi hakuti chimwa mu sandula, mumu chita kuti ave mwana wa satani kobebe. 16 Ku maivite unwe, va hitizi vasa voni, unwe mucho kuti, 'Zumwi ne zumwi muntu yo li kana che tempere ka hena chimwe. Mi lyinu zumwe ne zumwe muntu yo lyikana che ighawuda u suminwa ne kuli kana kwakwe.' 17 Unwe mu mahaafu a saa voni! Nje chihi chikando ku zaamba, ighawuda kamba itempere iiyo yi jololyekeza Ireeza ighawuda? 18 Kono, 'zumwi ne zumwi yo lyi konkka che iziko lye chitavero, ka hena chimwi bulyo hateni. Mi lyinu zumwi ni zumwi mutu yo likonka nce neo ina hateni, u suminwa ne kuli konkka kwakwe.' 19 Va hofu njoonwe! Nche chihi chikando a hulu, ineo kamba chitavero chi jololyekeza Ireeza ineo? 20 Mpaho lyinu, iye yo lyi koonka che chitavero cha teni mane ne chimwe ni chimwe china ha teni. 21 Mane naaye yo lyi koonka che itempere u lyi koonka chaayo ne chakwe yoo hala mwa teni. 22 Naye vulyo yo lyi koonka che iwulu u lyi koonka che chipura che Ireeza mane naaye yo wii keere ha chilyi. 23 Ku maivite unwe, mu Vañoli, ne Vafarasayi vaitimukanyi! Mu voza cho vuikumi cho minte, dilo ne kamene, Chovulyo, muka siite zintu zikando zo mulao ni musa pangaheza ku woloka ne chishemo ne tumelo. Mi izi nzi muva lukele kupangahaza chokusa litokolomosa zimwi. 24 Unwe muva hitizi vava hofu, mu mbatula ka gini, mi choku mina ikaamera! 25 Mu maibite unwe Vañoli ne Vafarasayi muva intimukanyi! Muhinda chipeto choku shanza inkomoki hanze mane ne impuleti, mi mukati kazo ni mwina ikwe lyisa wolyeki. 26 Unwe mu Vafarasayi vasa voni, mu shanze pili mukati ke inkomoki ne impulyeti ku chitila kuti ne hanze ku wole ku jolola. 27 Ku maibite, inwe mu Vañoli ne Vafarisayi vaitimukanyi! Ka kuti mu kola mane iri makumbu a tuva twaa, a voneka vulotu hanze tota, mi mukati ka teni ni ena zifuha za vantu va fwire mane ne imbolyeza ne chimwe ne chimwe chi saa jololyi. 28 Voovo vuti nanwe mumu loleka hanze lyenu ku vantu choku jolola mi mukati kenu mu izwile vuitumukanyi neku sa shiyama. 29 Ku maivite unwe, Vañoli ne Vafarasayi, vaitumukanyi! Kakuti muzaka makumbu ava polofita mane choku lotuhaza makumbu ava jolola. 30 Mu cho kuti, 'kali nitu vali kuhala mu inako zi ve ishetu nitu sana tuva bi ne chiyave muku itira malaha a Vapolofita'. 31 Chingi mu vone mane kete muha vupaki kuti mu vaana vaavo vave ihai va polofita. 32 Unwe nanwe mu izuziliize bulyo zintu zibe ishenu. 33 Unwe mu zonka, bana be zihiri, kamu wole ku loboka vule i katulo ye here? 34 Chingi mpaho, mubone, nimu tumiza va polofita, neva kwame va talifite, ne Vañoli. Mi mane vamwi vavo kamuve haye niku va vambula. Ku zwaaho mane vamwi vavo ka muve kuva shimeha neku va kava muma zubo enu e tuto, ne ku kaya mu vuva nyandisa, mu

munzi mukando ne mukando. <sup>35</sup> Ku chitila kuti mu wilwa mulandu wo kwi tila malaha a jolola ave tilwa mu inkaanda, ku tanga cha malaha a Avere kuya kwa a Zekaraya mwana wa Barakiya, u muve hairi hakati ke tempere ne iziko lye zitavero. <sup>36</sup> Choku izula ni mulwirite, zonse izi zintu ka ziize zimu pangahalile ulu luzuvo. <sup>37</sup> Jerusalema, Jerusalema, uwe yo wi haya va polofita mane neku govola cha mabwe vonse vaka tumitwa kwako! Mi ni saka vule kwi kala nini kuvukerereza vaana vako, mane iri inkunku kutu kukwana twayo chiyi tu bika mu mavava, mi ku zwaaho kamu suni! <sup>38</sup> Mubone, inzubo yenu muyi mu shalile cha matongo bulyo. <sup>39</sup> Aho ni mulwirite keti ni mu bolye muni bone hape, mbwita chini mwancho kuti, 'kwina mikonde kwali iye yo keza mu izina lye Ireeza.'

## Ikauhanyo 24

<sup>1</sup> Jeeso chaa vaalyi kuzwa mu itempere nna lyi yendeere. Varutwana vaakwe cho kuiiza kwaalyi choku taanga nni va mucho kuti mane u vweene muzaako we iyyi itempere. <sup>2</sup> Mmi iye nnaa ve itava nnaati, “mu weene zoonse iisi zintu? Aaho nni mulwiirite, ka kwiina ivwe lyeeti nnilyi waanike nni lyiina he iwulu lye lyimwe muku rutunuka.” <sup>3</sup> Mmi cho usii keere he iruundu lye ziteente, varutwana vaakwe choku iiza kwaalyi voonse cho kulyi kuungula nniva mu vuuzwa kuti, “Tu lwiire kuti zoonse iizi zintu kazi pangahalye vulye? Chishupo cho kuiiza kwaako ka yive iinzi mane nne mamanimani e inkaanda?” <sup>4</sup> Jeeso nna vee tava nnaati, “Mu tokomere kuti saanzi nni kuvi nne yeeti nna mu cheengerere. Ka kuti vaangi ka veeze mu izina lyaangu. <sup>5</sup> Mane kava kucho kuti, 'Njeeme Kirisiti,' mmi kava ziyeza- chengerere vantu vaangi choku va soha. <sup>6</sup> Mmi kamu zuwe inkoondo nne mahulyuhulyu aayo ku zwaaho mu vone kuti saanzi nni mukatezehi, ka kuti iizi zintu zoonse zi lukeere ku pangahala; mmi mamanimani keeti nni a ku sikite. <sup>7</sup> Mane inkaanda ka zilyi lwiisa nne mivuso ka yilyi saamdukire. Mmi ka kuve inzala nne ku nyanganya kwe inkaanda mu zivaka zi saa swani. <sup>8</sup> Mmi iizi zintu zoonse kazi ku veere mataangiro o ku sasama koku hwizumuka. <sup>9</sup> Lyiinu njeeti nni va mu swiisikize kuku katazwa nne ku ihayiwa. Kamu toyewa nne inkaanda zoonse che ivaka lye izina lyaangu. <sup>10</sup> Ku zwaaho vaangi kava chuunchune choku taanga nni valyi wuza nne kulyi toya. <sup>11</sup> Vaporofita vaangi va mapa ka vave kwa teni mmi choku soha vantu vaangi. <sup>12</sup> Ka kuti vuvilaala kavu ku injihite chisemo cha vantu vaangi ka chitoontolye. <sup>13</sup> Mmi iye yeeti nnalyi koza mbwiita ku mamanimani njeeti nna hazwa. <sup>14</sup> Uuwu mulayeza wo muvuso woku iwulu kawu kutazwa mu inkaanda yoonse kuva vupaki mu inkaanda yoonse, ku zwaaho mamanimani njeeti nni eeze. <sup>15</sup> Chiingi lyiinu, chini mwaa vona chiina ikwe chi zakununa, chaa waamba chaacho muporofita Danyeere, nni chi zimeene ha jolola (a yoo vala a lyemuhe), <sup>16</sup> A yo wiina mwa Judiya a ngombweere ku maruundu, <sup>17</sup> yo wiina he iwulu lye inzuvo saanzi a suuki he iwulu lyaayo kuti a ka hiinde chimwe mukati ka teni, <sup>18</sup> mane nnaaye yo wiina mu inkaanda saanzi a voolyi a ka hiindi chizwaato. <sup>19</sup> Mmi ku mayivite aavo ve mmiinsi nne vanyoonsa inkeke mwaawo mazuva! <sup>20</sup> Mu rapere kuti ku ngombola kweenu saanzi nni kuvi ha malyiha kamba lwe Nsavata.

21 Ka kuti ka ku kwiina manyaando makaando mwaawo mazuva a chita kuti inkaanda chiinga yi vaati yi kuva ka eeni kuva ha teni mane nne kuti keeti nni a voolye nni ave kwa teni hape. 22 Kwaanda kuti aawo mazuva a hunguzwa, nni ku sana ku vaavi muntu yeeti nna va hazwa. Mmi kuya cha va salyitwa a a mazuva ka a fwiiswa. 23 Mmi lyiinu haiva zumwe vulyo ka a kucho kuti Kirisiti zunuu hanu kamba zuna kuna, saanzi nno zumini. 24 Ka kuti va Kirisiti nne vaporofita va mapa ka veeze nni va panga imboniso inkaando mane nne zi komosa ziingi a hulu, kuti va woolye ku ziyeza, chiku woolyeka mane nne va salyitwa. 25 Mu vone nna mulwiira inako nni yi seeni ku sika. 26 Chiingi lyiinu, nnaangati kava mucho kuti, mu lolye u waanika ku chikwa, mane saanzi nni muyi kwa teni, Kamba mu vone wiina mu inzuvo, yo mukati, saanzi nni mu zumini. 27 Mmi siina mumini muwu minika ku vuzwa vwee zuva, mane choku ka voneka nne ku vuimino, nne ku iiza ko mwaana wo muntu naako mweeti nni kuve. 28 Ka kuti koonse ku waanika chituunta ko kooko makuuvi nku a kunganera. 29 Mmi vulyo hoo hwaaho ku mamanimani a masukuluka eeyo inako izuva keeti nni lyi kusii zwiisa iseri, nne mweezi nnaawo, inkaani nnaazo ka ziwe ku iwulu, mane nne ziho ze iwulu nnaazo ka zinyungooswa. 30 Lyiinu chishupo cho mwaana wo muntu njeeti nni chi voneke mu iwulu, ku zwaaho mishovo yoonse ya vantu ve inkaanda njeeti nni va lyire. Ka va vone mwaana wo muntu nna keeza mu makope e iwulu nne che ziho nne ku vereenga ku kaando. 31 Mmi kaa tume mangiloyi aakwe cho mulyumo mukaando we intorombita, mmi kava kunganya aavo va salyitwa mu zivaka zoone zo luhuhu ku mamanimani e iwulu kuya ku amwi. 32 Mulyi tute ituto ku ibola, ho hwaaho vulyo ibola chilyi taanga ku zwiisa tutavi nne makova mahiya, chipeto chi mwee ziva kuti imbumbi chi yiina ha fwihi. 33 Lyiinu he iwulu lyaaho chini mwaa vona iizi zintu zoonse, nni mu izive kuti cho wiina ha fwihi, heene vulyo ha mulyaango. 34 Aaho nni mulwiirite, iichi chivaka keeti nni chi hite mbwiita iizi zintu zoonse zi pangahalye. 35 Iwulu nne inkaanda kazi mane mmi manzwi aangu aawo keeti nni a mane. 36 Mmi kuya che iilyo izuva nne inako ka kwiina yo wiizi, mane nnaangati mangiloyi e iwulu, kamba mwaana, mbwiita Taayo vulyo. 37 Siina mu inako za Noah muku veena nne zo kuiiza ko mwaana wo muntu mweeti nni kuve. 38 Mmi siina mwaawo mazuva muunda chiwu seeni kuva ha teni va vaalyi kulyia nni va nywa, kusesa nne ku sesesa mbwiita Noah chiinga e nijra mu iyareka, 39 nni va vula kuiiziva chimwe vulyo mbwiita muunda chiinga weeza kuva hiinda voonse vulyo—mane nne kuiiza ko mwaana wo muntu mweeti nni kuve. 40 Lyiinu vakwaame voovere ka va kwiina mu luwa—wu mwiina kaa hiindwa wu mwiina choku shaala. 41 Vakulwaakazi voovere kava ku twa—wu mwiina kaa hiindwa wu mwiina kaa shaalye. 42 Chiingi lyiinu mu ikalye nni mu lyiisiiza ka kuti ka mwiizi kuti Simwiine weenu u keeza lyiiri. 43 Mmi mu izive iichi, kuti kalyi si inzuvo u woola ku iziva kuti musa mweeze ku yiva inako iinzi ya masiku, keeti choo siyirira musa kuti zaa yive mu inzuvo yaakwe nna sa yi lyiisi. 44 Chiingi nnaanwe mu lukeere ku ikala nni mu lyivereere, ka kuti ka mwiizi inako yo mwaana wo muntu yaa keeza chaayo. 45 Chiingi lyiinu njeeye iini iye muhikaana yoo sephala nne yoo kwanine yeeti nnaati simwiine waakwe haa mu siya he inzuvo yaakwe kaa he vahikaana vamwe zilyio che inako yi swaneezi? 46 Mmi

kwiina mikoonde kwaalyi iye muhikaana yeeti nna waanike nna kweete ku panga voovo vulyo. <sup>47</sup> Aaho nni mulwiirite uuzo simwiine kaa mu hiinde choku mu viika mu maziimo o ku vavalayera inzuvo yoonse vulyo. <sup>48</sup> Mmi lyiinu muhikaana yoo fosaheere kaa lyi lwiire mu inkulo yaakwe, 'simwiine waangu u ka lyiehete,' <sup>49</sup> mane choku taanga nna kava vamwe vahikaanakunine, cho kulyia nne kunywa nne vachaakolwa. <sup>50</sup> Mmi simwiine woozo muhikaana keeze che izuva nne inako yaa sa lyivereere. <sup>51</sup> Lyiinu simwiine waakwe njeeti nna mu kosolye ha kati, choku mu panga siina muva ihayirwa vaitimukanyi, kweeti nni ku kwiina ku boonda nne ku lyira inkuunkuma.

## Ikauhanyo 25

<sup>1</sup> Mubuso wo kwiwulu kawu swane ni ba kamwale basika hekumi ba hindite malambi abo cho ku yenda kuka tambula musesi. <sup>2</sup> Ba kamwale bakwanisa iyanza ba bali baholo mi bamwi bakwanisa iyanza ba bena ingana. <sup>3</sup> Mi ba kamwale baholo chinga bahinda kampalamba abo, cho kubula kulihindila mafuta amwi nabo. <sup>4</sup> Kono ba kamwale ba bena inga abo ba bahindite mafuta amwi mu zibiko ne malambi abo. <sup>5</sup> Mi linu musesi ha ba si lyehete, bonse co kutanga kusukula ne kulala. <sup>6</sup> Kono hakati ka masiku ni kwaba ni kusumpwilila, “Mu bone musesi! Mwende hanze mu ka mutambule.” <sup>7</sup> Mi linu ba kamwale bose mpu babukile cho ku munika tumpalamba twaabo. <sup>8</sup> Baholo ni ba cho bena inga kuti, “Mutuhuko ku mafuta kakuti malambi eetu chia zima.” <sup>9</sup> Mi bena inga ni be taba ni baati, “Ka kuti mafuta a likene bulyo uswe, lyaho unwe muyende ku musika muka liwulile kwateni mubene.” <sup>10</sup> Mi chi ba siyendete ku ku kawula, musesi chokusika, mi abo ba ba mulindile cho kwi njila naye mu mukiti we iseso, kuzwaho mulyango cho kwi yalwa. <sup>11</sup> Kumasule aho mpu ba kezilile ba na bamwi ba kamwale nibati kuti, “Simwine, simwine twiwulile.” <sup>12</sup> Kono iye na be taba nati, “Cho busa kusima ni mu lwilite, kani mwizi.” <sup>13</sup> Linu mpaho mwikale ni mulisize, kakuti ka mwizi izuba mane nangati inako. <sup>14</sup> Ka kuti kuswana mane ili muntu ya bali kusaka kuyenda ku kanda imwi. Yaa bati na sumpa bahikana bakwe cho kubaha buhumi bwakwe. <sup>15</sup> Zumwi cho kumuha italanta zimana iyanza, zumwi iye cho ku muha zobe, mi zumwi cho ku muha yi mwina italanta. Mi zumwi ni zumwi wabo na tambula kuya mwa bali ku wolela, kuzwaho uzo muntu cho kuli yendele mu lwendo lwaka. <sup>16</sup> Hohwaho bulyo zuna ya ba tambuli ineo zina ku mana iyanza cho ku zwa cho kuka zinjisa chezimwi hape zina ku mane iyanza. <sup>17</sup> Mu kuswana hape u zu ya ba tambuli zobe, cho kuka zizaza ce zimwi zoobe. <sup>18</sup> Kono muhikana ya ba tambwile imwina ineo na yenda, cho ku kaisila ilindi, cho kuwungula mwateni mali a simwine wakwe. <sup>19</sup> Cinga kwa hita inako inde, simwine wabo bahikana na ba sumpa kwiza ku lekula za ba basili. <sup>20</sup> Muhikana ya ba helwa ineo zina ku mane iyanza ne za ne zimwi hape zina kumane iyanza. Mi nati kuti, “Simwine u ba nihi ineo zina ku mana iyanza mi bone ni bakapangi zimwi hape zina ku mana iyanza.” <sup>21</sup> Simwine wakwe na mucu kuti, “U bapangi nenza muhikana mulotu ni yo sepahala! U ba sepahali kuzintu zinini. mi linu hanu muni kubike mu kulolelela zintu zingi. linu paho wi njile mukusanga kwa simwine wako.” <sup>22</sup> Muhikana

ya ba tambwile italenta zobeze cha keza ni kuwamba, “Simwine u ba ni hele italenta zobeze. Bone, ni bapangi zimwi zobeze hape.”<sup>23</sup> Simwine wakwe cha wamba kwali, “U bapangi nenza, muhikana mulatu ni yo sepahala! U ba sepahali hewulu lya zintu ziche ka ni kubike kuyendisa zintu zingi. Njile mukusanga kwa simwine wako.”<sup>24</sup> Mi linu, muhikana ya bahewa ineo yi mwina ne za nacho, “Simwine, nizi kuti u muntu u mukukutu. U sinza hosana u balimite, mane uhuhula hosana u bahasi.”<sup>25</sup> Mi cinga natiya puni yendele cho kuka yi zika mwi bu. Bone, nji chako icho cho banihele.”<sup>26</sup> Mi simwine wakwe na mwitaba na mucho kuti, “U we muhikana yo fosehele ne bukata, wizi bule kuti ni muntu yo sinza hasana a balimi kamba yo huhula hasana a balimi.”<sup>27</sup> Mi bone kali mali angu no baahi ba zaza mali, hanu ni ni bezi kuwana chimwi zana.”<sup>28</sup> Linu mu munyange iyo ineo yi mwina cho ku yiha muhikana yo kwete zina ikumi.”<sup>29</sup> Kakuti ku zumwe no zumwe yo kwete ka hewa zingi, mane ne ku zambiliza. Mi ku zumwe ni zumwe ye kusena chena nacho, mane nechina chichita kuti wina nacho ka chi nyangwa.”<sup>30</sup> Muhinde musohele muhikana uzu ya sena mutendo, mu musohele hanze ku kelima uko kwina kuwunzula ni kulila inkunkuma.”<sup>31</sup> Mi Mwana wo Muntu chi neza mu ku belenga kwa kwe ni mangilo ni onse naye, linu njete ne kale ha chipula chakwe cibelenga.”<sup>32</sup> Mi habusu bwakwe, ka kunganyeza mishobo yonse, mi njete na taule bantu mukati kabo, sina mulisini mwa tawila imbelele mu impene.”<sup>33</sup> Kaabike imbelele kwi yanza lya kwe lya malyo, kono impene izo cho kuzibika ku lya mamonso.”<sup>34</sup> Mi linu Simwine njete na wambe nabo bena kwi yanza lya kwe lya malyo, “Mwize, unwe mu helwa mikonde kwa Tayo, muswane mubuso u mu bikilwa kuzwa ku nkanda ni yi pangwa.”<sup>35</sup> Kakuti ni ba fwile inzala mi mwaniha zo kulya, ne nyotwa iba nikwete mi nimwani nywisika, mane ne buyenzi ne bali ni muyenzi mi ni mwani tambula.”<sup>36</sup> Hape ni ba kosokelwa mi ni mwani zwatika, kuzwaho hape chini lwala mubani tokomeli, ne mu intolongo mubeza kwangu.”<sup>37</sup> Linu bajolola njete ni be tabe ni bati, “Simwine, njilili ha tuba ku boni no fwile inzala ni twa kulisika? Kamba no fwile inyotwa mi ni twa kuha menzi?”<sup>38</sup> Hape njilili ni twa ku bona noli umwene mu ni twa kwinjilika mu mazubo etu? Kamba no wina mapunu ni twa ku zwatika?”<sup>39</sup> Hape mane njilili ni twa kubona no lwala kamba no wina mu intolongo ni twa ku potela?”<sup>40</sup> Mi Simwine njete na betabe cho kuti, cho busakusima ni milwila kuti chi mubachitile bobwabo ba nyanseha ba ba kwangu mu ba chini chiti.”<sup>41</sup> Linu njete na cho kwabo bena kwi yanza lyakwe lya ma monso muzwe kwangu, “Muzwe hangu unwe mukutitwa, muye ku mulilo u chitilwa jabulusi ne mangilo akwe,”<sup>42</sup> kakuti ni ba fwile nzala, kono kena mubanihi cho kulya, ni ba fwile inyotwa, kono kena mubanihi menzi.”<sup>43</sup> Ni bali ni muyenzi, kono kana mubani tambuli, ni ba kusokelwe, kono kena mu bani zwatiki, nibali kulwala ni kuba muntolongo, kono kahena mubani potela.”<sup>44</sup> Mi nabo njete ba mwi tabe cho ku mucho kuti, “Simwine, njilili ni twa kubona no fwile nzala, kamba nofwile inyotwa, kamba noli u muyenzi, kamba no kusokelwa, kamba no wina mu intolongo mi kahena tuba ku tendeli cimwi?”<sup>45</sup> Kuzwaho njete na be tabe cho kuti, “Cho busakusima ni mulwila, chimusana mu ba pangili a bo bantu ba nyanseha bo bwabo

kena mu ba chini chitili. <sup>46</sup> Mi aba ka bayende mu ikatulo yi sa mani, mi ba jolola abo ka bayende mu buhalo bu sa mani.”

## Ikauhanyo 26

<sup>1</sup> Kweza ku pangahala kuti Jesu ha mana a a manzwi onse, na wamba ne balutwana bakwe, <sup>2</sup> “Mwizi kuti mumazuba obele ku keeza ku zambuluka, mi mwana muntu iye ukeza ku zwisikizwa ku bambulwa.” <sup>3</sup> Ku zwaaho bapulisita ba kulwana ni ba kulwana ba ba bantu ni ba kunganela boonse mwi nzubo ya mupulisita mukulwana we zina lya Kayafasi. <sup>4</sup> Mi niba nahaninsana muba wola ku wonda Jesu mu chipili cho ku mu ihaya. <sup>5</sup> Ka kuti ba bali kucho kuti, “Isiñi mu inako yo mukiti, ku chitila kuti kanzi kubi ne munyunga mukati ka bantu.” <sup>6</sup> Mi linu Jesu co sina mwa Betani mwi nzubo ya Simoni we ci senda, <sup>7</sup> ca bali kwi kala he tafule, mukulwakaazi neza kwali nakahindite i nkooma ye zinunkisa bulootu zi dula, mi nazimwitila mu mutwi. <sup>8</sup> Kono balutawana bakwe cinga ba bona bulyo, ni beza kwaali co kunyelwa ni bati, “Ii baka nzi lileta ku zenenga ku ka sika aha? <sup>9</sup> A a mafuta niauziwa camali mangi cokuha ba humanehi.” <sup>10</sup> Kono Jesu, cho kwiziba ici, nabaco kuti, “Mu katalekeza inzi uuzu mukulwaakazi? Kakuli ime cani npangila buloti. <sup>11</sup> Mwina neba humanehi inako yoonse, kono kete mube name inako yonse. <sup>12</sup> Ka kuti ha nitila a a mafuta hamubili wangu, u ni bakanyeza ku ungwa kwangu. <sup>13</sup> Cho kwizula ni mu wambila kuti, “konso kwete mulaezo ni u kutazwe mu inkanda yonse, uzu mukulwaakazi chacha panga kachi wambwe choku mu kumbulukwa.” <sup>14</sup> Kuzwa aho zumwi wabe ikumi ne bobele, yabali kusumpwa Judasi Isikaliota, nayenda kuba prisita bakulwana cho ku <sup>15</sup> kacho kuti, “cimuwola kuniha chinzi kuti nimumihe?” Mi ni bamubalila i silivela ya buwayaya wa mali bulikana makumi otatwe cho ku a muha. <sup>16</sup> Kuzwa cheyeyo inako nekala nasaka kuwana chibaka cho kumubaha. <sup>17</sup> Linu mu izuba lye ntanzi lye chinkwe chi sa bili balutwana cho kuiiza kwa Jesu cho kucho kuti, “Njo kuhi kosaka kuti tuka ku bakanyeza zilyo zoku zambulukwa? <sup>18</sup> “I ye cho ku bacho kuti muyende mumuzi mo mu kawane mukwame kuzwa ho muka mucho kuti, “muluti uti, “Inako yangu chiyasika. muni kekaliile ku zambulukwa mu nzubo yako ime ne balutwana bangu. <sup>19</sup> “Mi Balutwana ni ba chita ka kuya ka Jesu mwa ba balati, mi niba ka bakanya zilyo zo ku zambulukwa. <sup>20</sup> Chitengwana chinga cha sika, ne kala hansi cho ku tanga kulya ne balutwana bakwe bena ikumi ne bobeele. <sup>21</sup> Chi ba kwete kulya eye cho ku cho kuti, “Cho busakusima ni mu lwilite u mwina mukati kenu mwani wuze. <sup>22</sup> Choku shala chiba zuwa butuku, mi zumwi ni zumwi wabo choku tanga ni ba mubuza ni bati, “Aa kahena ime mwendi simwine?” <sup>23</sup> Mi ne taba, “Iye mwine yete asunse name mukasuba njeye yeti ani wuze. <sup>24</sup> Mwana wo muntu mwa yende, sina mukuñoletwa cha kwe. kono kumaibite uzo muntu iye yete na uuze mwana muntu! ni kubabi neenza kati uzo muntu nasana a bazalwa.” <sup>25</sup> Judasi, ya ba kukeza ku ku mu wuza nacho kuti, “A njeme, muluti?” Iye cho ku mwitaba nati. “Chi wa wamba uwo umwine.” <sup>26</sup> Chi basi kwete kulya, Jesu choku hinda chinkwe, nachiha mikonde, cho kuchi gamuna. Nachiha balutwana cho kucho kuti, “Muhinde, mulye. nje nyama yangu iiji.” <sup>27</sup> Nahinda i nkomoki cho

kuli tumela, cho ku ibaha choku wamba kuti, “Mu iñwe, mubonse. ka kuti. <sup>28</sup> A a malaha angu o ku zuminzana ku hiya etililwa bungi bungi bwa bantu kuti ba wole ku wondelwa zibi zabo. <sup>29</sup> Kono ni mu cho kuti, keete nini boole hape ni nywe menzi e chihantu cho mu woomba, mbwita mwe lina izuba chi nina u nywa bu hiya na nwe mumu buso wa taayo.” <sup>30</sup> Mi chinga ba maana ku zimba luzimbo, niba tantukira he iwulu lye ruundu lye zitente. <sup>31</sup> Linu Jesu choku bacho kuti, “Mu boonse mu munitiyile masiku anu suunu che ibaka lyangu, ka kuti kuñoletwa, ‘Kani dame mulisani mi imbelele zo mulaka izo cho ku gaanuka.’” <sup>32</sup> Mi chi nina buswa, kani yende habusu bwenu kuya kwa Galilea.” <sup>33</sup> Kono Pitolosi na wamba naye, “Mane ngati bonse kaba ku tiile, Ime keeti chini ku tiila.” <sup>34</sup> Jesu na mucho kuti, “Chobusakusima ni kulwillite, mwaanu masiku muukombwe ni useni kulila mo ukuli sampwile ko tatwe.” <sup>35</sup> Pitolosi na mucho kuti, “Mi ime ni wola ku fwa nawe, keti chini ku li sampula.” Mi balutwana bonse nabo cho ku wamba indaba iswana. <sup>36</sup> Ku uzwaho Jesu nayenda nabo ku chibaka chi sumpwa Getesimane cho kucho balutwana bakwe,” Mu ikale aha chi nisi kaya haana kuku lapela.” <sup>37</sup> Mi na hinda Pitolosi ni baanaswisu bobele ba Zebedia mi na tanga ku wiilwa ne ku katazaha. <sup>38</sup> Ku zwaaho choku bacho kuti,” Luhuhu lwangu chi lwa sasaminwa, muniwola kufwa. Linu mu ikale hohwaha mu liise name.” <sup>39</sup> Mi na yenda ha busuzana bulyo, cho kuwa cho busu bwake, choku lapela. Naati, “Tayo, haiba ku wooleka, iyi inkomoki ini zambuluke. Mi, ni hakuba bulyo, sanzi ku pangahali kusuna kwangu, mi bulyo ku pangahale kwako.” <sup>40</sup> Mi neeza ku balutwana bakwe cho kuiiza kuba wana ba sukwiile, mi nacho Pitolosi,” Au mukangwa ku iiza name nangati inako imwina bulyo? <sup>41</sup> Mu liise choku lapela kuti sanzi mu injili mu muliko. Luhuhu lu suni, mi bulyo inyama iyo i kangwa.” <sup>42</sup> Mi na zwa cho kwenda hape lo bubeli cho kuka lapela, nati, “Ita, haiba i chi keti chichi hita mbwita ni chinwe, ku suna kwako ibe uko ku pangahala.” <sup>43</sup> Mi neeza hape cho kuiiza ku bawana ba sukwile ka kuti menso abo a bali ku lema ne ku lema. <sup>44</sup> Ku zwaaho hape cho kuba siya cho kuli yendela. Mi na lapela lo butatu hape na wamba manzwi a swana bulyo. <sup>45</sup> Ku zwaaho Jesu ne za ku balutwana cho ku bacho kuti, “Mu si lele ne kuli teeka? Mu bone, inako chiya sika, mi mwana Muntu chohewa mu ma yanza a ba fosahale. <sup>46</sup> Mu buuke, yutende. Mu bone, iye yoni wuza cho wina hafuhi.” <sup>47</sup> Mi haba si kwete ku wamba, Judasi, zumwi wa be ikumi ne bobele, neeza. Bungi-bungi bwa bantu cho kuiiza naye kuzwa ku mu prisita mukulwana ni ba kulwana ba bantu. Mi ne beza ne mafulo ne inkoli. <sup>48</sup> Linu muntu ya bali kuya ku ku wuza Jeeso naa baha chikuka, nati, “zumwe ne zumwe bulyo yete nikoote, njeye uzo. Mumu wonde.” <sup>49</sup> Hohwaho bulyo neeza kwa Jesu cho kucho kuti, “Lumele, Muluti!” Mane choku mu koota. <sup>50</sup> Jesu choku mucho kuti, “Mwangu, chite bulyo cho ke zilile ku panga.” Mi linu mpu bezilile mane cho ku wonda Jeeso chamayanza abo, cho kumusumina. <sup>51</sup> Mu bone, zumwi waba beena ne Jesu na zwisa iyanza, cho ku kwita kafulo, mi naa kanka muhikana wo muprisita mukulwana ahulu, cho ku kosola kutwi kwakwe. <sup>52</sup> Ku zwaaho Jesu namu cho kuti, “Booze kafulo kako mucu biko cateni, kakuti abo bete ni ba kwi kala ni ba zwisa kafulo ka bafwe cha kafulo. <sup>53</sup> A mi muzeza kuti ni kangwa ku wamba ni Tayo, ku zwaaho iye cho kuni tuminiza ma ñgiloi a zamba

mianda mianda ina ikumi ni yo beele? <sup>54</sup> Linu mbobule mañolo mu a wola ku izuzilizwa, haiba i chi ni chi sa pangahali?” <sup>55</sup> Cheyo inako Jesu na wamba ne bungu-bungu bwa bantu, “Mu ka ni ziilile ni mafulo ni inkoli kwiza kuni wonda mane sina ni musaa? Ni bali kui kala i zuba ni zuba mu itempele ni ni luta, mi ka hena mu bani wondi. <sup>56</sup> Mi zo nse izi chi za pangahali kuti zi ñoletwa ne bapolofita zi wo le kwi zuzilizwa.” ku zwaaho balutwana bonse ni ba musiya ni ku muñombwela. <sup>57</sup> Mi linu a bo ba ba wondi Jesu ni ba mutwala kwa Kayafasi muprisita mukulwana, uko bañoli ni ba kulwana ku ba ba kunganine. <sup>58</sup> Kono Pitolosi na be chilila mu isule ku ya kwi laapa lyo mupurisita mukulwana ahulu. Ne njila mukati cho ku ke kaala niba shangabila kuti a bone ma mani mani. <sup>59</sup> Mi linu maprisita ba kulwana ni ba yeelezi bonse ba li ku gana bupaki bwa mapaa bwa ku hambiliza Jesu, kuti ba mwi haila hateni. <sup>60</sup> Mi ni ba bula na ngati ci nini mu zonse zi ntu zi ba ba mu hambiliza, nangati ku beezi ha busu bapaki bangi ba mapa. Kono ku ma mani mani ni kweza bo bele ha busu <sup>61</sup> mi na cho, “U zu unkosi a ba cho kuti, Ni woola ku za ku nuna itempele ye Ireeza mane cho ku i zaaka mu ma zuba otatwe.” <sup>62</sup> Muprisita mukulwana ahulu mi na ziima choku mucho,” Ko wina cho wi taba hateni? Chinzi chi ba paka ku a mana nawe? <sup>63</sup> Kono Jesu a ba tontwele. Muluti mukulwana ahulu na mucu kuti,” Ni ku laula ce Ireeza yo u hala, tu lwile haiba njowe Kirisite mwaana we Ireeza.” <sup>64</sup> Jesu cho kumwi taaba,” Chi wa wamba iwe u mwine. Kono niku luiirite, ku zwa hanu ko bone mwana mu kwame neekele ku iyanza lya malyo lye ziho, na keeza mu makope e iwulu.” <sup>65</sup> Ku zwaho mupulisita mukulwana ahulu na halola zi zabalo zakwe cho kuti, “Cha waamba ku tukana! Tu sakila nzi ba paki! mu bone, linu hanu mwa li zuwila ma tuka. <sup>66</sup> Mu yi bona bule?” Abo nibe taaba ni bati, “U swanela ifu,” <sup>67</sup> Kuzwaho cho ku mu swila mate mu busu bwa kwe cho kumu kaba, cho ku i kala ni bamu woo pola che mpama <sup>68</sup> ni bati, “Tu polofitele, i we Kiresite. Njeni iye waku kaba?” <sup>69</sup> Hohwaho Pitolosi cho si keele hanze lye ilaapa, mi mu hikana wo mwana kazana cho kuiza kwali na mucho kuti, “Na we sa ka wina ni Jesu wa Galalea. <sup>70</sup> “Kono iye na kanana ha busu bwa bo bonse, nati, “Kanizi kuti u kwete u wamba kaha cinzi.” <sup>71</sup> Ha yenda hanze ku me njililo a mulyango, zumwi mukazanana wo muhikana na lwila a bo ba be na ha teni, “Uzu unkosi na ye wina ni Jesu wa Nazareta.” <sup>72</sup> Mi iye na kaanana cho kukonka nati, “uzo unkosi ka ni mwizi.” <sup>73</sup> Ka ba kazana bulyo kwa bo ba ba li zimanine ne be za kwa Pitolosi cho ku mucho kuti,” cho busakusima na we u umwi wa a bo, ka kuti ne lulimi lwako lu ku paka.” <sup>74</sup> Na tanga ku kuuta ni ku koonka. “Ka nizi uzo unkosi,” cho bufwihizana hohwaho mukombwe cho kulila. <sup>75</sup> Pitolosi na ku mbulukwa ma anzwi a ba wambi Jesu, “Pili mukombwe ni u seni ku lila mo kunili sampwile ko tatwe. “Ku zwaho mpwa zwilile hanze cho ku ka lila na boonda.

## Ikauhanyo 27

<sup>1</sup> Ka kusasani ha ku sika, bonse ba kulwana ba mapurisita ni ba kulwana ba bantu ba ba li kufumba muba wola kwi hayila Jesu. <sup>2</sup> Ni ba musumina, ni kumu zwisa hateni, ni ku mu twala kwa Pilato mubusi. <sup>3</sup> Linu ku zwaaho Judasi, ya ba muuzi, na bona Jesu cho nyanswa,



mi na baka ni ku boozza mali e ikumi ni to tatwe ku maprisita ba kulwana ni ba kulwana, <sup>4</sup> mi nati, “Ni ba pangi chibi ku uza malaha a sena mulandu. “Mi ni ba cho, “Chinzi icho kwetu? U bone kwa teni umwine.” <sup>5</sup> Ku zwaho na sohela hansi bu wayawaya bwa mali mu itempele, cho ku katuka, mi na yenda kunze cho ku kali sungilila. <sup>6</sup> Ba kulwana ba maprisita ne ba hinda buwayawaya vwa mali mi ni ba mucho, “Ka ku lukeli ku bika a a mali mu chibikilo ka kuti mali a malaha.” <sup>7</sup> Ni ba wambola che yo indaba ha mwina mi chawo mali ni ba wuula iwaa lyo ku bumbila tu hambwe mwete ba ku zikwa ma buu kwenda. <sup>8</sup> Cheli ibaka lina iwa lisi sumpwa, “Iwaa lya malaha” ne linu izuba buti. <sup>9</sup> Nji kuti chiba wambiwa ni mupolofita Jelemaya chi izuzilizwa, cho kuti, “Ba ba hindi makumi otatwe o buwayawaya, mu wulo u ba tomwa haakwe ni bantu ba Isilaele, <sup>10</sup> Mi ni baiha ku mwiine we iwa lyo ku bumbila tu hambwe, sina Ireeza mwa bani heli chikuka.” <sup>11</sup> Linu Jesu na zima ha busu bu muyendis, mi muyendis na mu buza, “Kana njowe simwine wa ma Juda?” Jesu cho mwi taaba, “Mu wa cho.” <sup>12</sup> Kono ha baali kunyanswa ni ba kulwana ba mapurisita ni ba mwi ba kulwana, na bula kwi taaba chimwi. <sup>13</sup> Ku zwaaho Pilato na mucho, “Ko zuwile yonse iyi milandu yo kwete u bikwa?” <sup>14</sup> Kono na bula kwi taaba ne haiba li mwina inzwi, ku chita kuti mubusi na shala u komoketwa ahulu. <sup>15</sup> Linu ha mukiti chi bali chizo cho mubusi ku zwise chifosi chi mwina cha salwa ne bantu bangi bangi. <sup>16</sup> Cheyo inako yi swana ku bena ibantiti li ba fosahela ahulu, lyi bali ku sumpwa Barabasi. <sup>17</sup> Mi ha baba ku kuunganele ha mwina, Pilato na ba cho, “Njeni wumu saka kuti ni mumu lukulwile? Barabasi, nandi Jesu yo sumpwa Kiristi?” <sup>18</sup> Kakuti a ba kuiizi kuti ba ba mu woondi bulyo cho muna. <sup>19</sup> Cho usii keere ha chipura choku watula, mu kaakwe na tumina linzwi kwaalyi nati, “Sanzi u pangi chimwi koozo muntu ya sena mulandu. Kakuti na nyanda ahulu maswe suunu mu chilooto che ibaka lyakwe.” <sup>20</sup> Ku zwaaho mapurisita bakulwana ne ba kulwana ni ba shongelekeza bungi bungi bwa bantu kuti ba kumbile Barabasi, ne kuti Jesu iye e ihayiwe. <sup>21</sup> Mubusi na ba buuza, “Njeni ku boobele wumu saka kuti nni mumu lukulwile?” Ne ba cho, “Barabasi.” <sup>22</sup> Pilato na ba cho, “Linu ni pange inzi cha Jeeso yoo sumpwa Kilisiti?” Bonse ni be taba, “A bambulwe.” <sup>23</sup> Mi na cho, “Ibaka, mulandu nzi waa ba pangi?” Mi a bo ni ba huwa ahulu hulu, “Mu mu bambule.” <sup>24</sup> Mi linu Pilato chinga bona kuti ka kwina cha wola ku panga, mane ni kuti chi kuba tangite mu nyunga, na hinda menzi, cho ku samba ku maanza ha busu bwa bantu bangi, cho kucho kuti, “Ka nina mu laandu cha malaha o zu muntu ya sena mulandu. Mu kuzwe kwenu kuti mu chita bule.” <sup>25</sup> Bantu bonse ni bati, “A malaha a kwe a be kweetu ne ku baana betu.” <sup>26</sup> Ku zwaaho na ba sumunwina Barabasi, kono na shimeha Jesu ni ku mu baha kuti a bambulwe. <sup>27</sup> Ku zwaaho masole bo mubusi neba leta Jesu ku chikota china mu meekalo a mubusi ni ku kunganya masole mangi. <sup>28</sup> Ni ba mu zabula cho ku mu bwika chizabalo chi subila. <sup>29</sup> Ku zwaaho ni ba panga i hwiisi yo miiya ne kuyi mu bika ha mutwi, choku mu bika inkoli mu iyanza lyakwe lya malyo. Ni ba fukama ha busu bwakwe neku musheunwina, niba cho, “Lumele, Simwine wa Majuda!” <sup>30</sup> Mi neba muswila, mi niba hinda inkoli cho kuyi mu kabisa mu mutwi. <sup>31</sup> Haba mana ku musheunwina, cho kumu zabula chizwato ku zwaaho cho kumu zabika zizabalo zaakwe, ne ku

mu twala kuku bambulwa. <sup>32</sup> Haba bati chiba zwila hanze, ni ba waana unkosi yo zwila kwa Sayirine yo sumpwa Sayimoni, u baba hambiliza kuti a yende naabo ne kuti a mu kulikile chifapano. <sup>33</sup> Ni beeza ku chibaka chi sumpwa Gologota, chi landununa kuti “Chibaka cha Kagoboli.” <sup>34</sup> Ni ba muha iwaine yiina shantukwe kuti a nywe. Mi chinga a yi soola, choku sayi nywa. <sup>35</sup> Haba mana kumu bambula, cho kuli kauhanyekeza zizabalo zakwe choku kaba indaula. <sup>36</sup> Ni be kala choku muliisa. <sup>37</sup> He iwulu lyo mutwi waakwe niba bika iñolo lyo mulandu, li baali ku balika kuti “Uzu nje Jesu, simwine wa Majuda.” <sup>38</sup> Basaa bobeele ni ba kokotelwa naye, zumwi ku malyo a kwe mi zumwi ku ma moonso. <sup>39</sup> Ba baali ku hita ni ba mu tukoola, ni ba nyunga mitwi yabo <sup>40</sup> ni bati, “Uwe yo bali kuti moo rutunune itempele choku izaka mu ma zuba o tatwe, lihaze umwine! Haiba u Mwana we Ireeza, suke ha chifapaano!” <sup>41</sup> Che nzila i swana bapurisita ba kulwana ba baali ku musheunwina, ha mwina ni ba ñoli ni ba kulwana, ni bati, <sup>42</sup> “A ba ku haza bamwi, kono ka woli ku li haza mwiine. Njeye Simwine wa Isilaele. A suuke ha chifapano, mi ku zwaaho linu njete tu zumine mwaali. <sup>43</sup> U sepa mwe Ireeza, A Ireeza a mulamulele hahanu buti haiba u saka, ka kuti a baco kuti, 'Njeme mwanaswisu we Ireeza.’” <sup>44</sup> Mi basaa ba bati ni ba bambwilwe na ye naabo niba wamba matuka kwali. <sup>45</sup> Linu ku zwaaho che inako yoku mana iyanza ne ka mwina kerima nika wumba inkanda yonse mbwita kuka sika ku inako yoku mana iyanza ne toone. <sup>46</sup> Che nako yoku mana iyanza ne toone Jesu na huwa che liinzwi ikando na cho, “Eli, Eli, La ma sabakatani?” yi landununwa kuti, “Ireeza wangu, Ireeza wangu, chinzi ho ni sohelele?” <sup>47</sup> Linu ba mwi ba ba zi meene ukochinga ba zuwa bulyo, ni bati, “U kwete ku sumpa Elija.” <sup>48</sup> Hohwaho bulyo zumwi waabo na tiya choku ka leta chi pongi, cho ku chi niika mwa shantukwe, ni ku chi bika ha luuhe, ni ku muha kuti a nywe. <sup>49</sup> Bungi bwabo ni bacho, “Mu mu siye yeyena. Tu bone kuti nandi Elija mweze a mu haaza.” <sup>50</sup> ku zwaaho Jesu hape na huwa che linzwi ikando cho kumana luuho. <sup>51</sup> Boone, i jira lyo mu itempele ni lya haluka ko beele ku zwila kwi uulu ku leta hansi. Mi inkanda ni ya nyanganya, ku zwaaho mabwe choku pwachuka hakati. <sup>52</sup> Ma kuumbu ni e wuka, mi mi bili ya bantu ba shiyeme ba ba lele ni ba buuka. <sup>53</sup> Ni baazwa mu makuumbu chinga a buuka ku bafu, nibe njila mu muzi mukando u jolola, mane niba boneka ku bantu bangi. <sup>54</sup> Mi musenchoriona na bo baba lolelele Jeeso ni ba boona kunyanganya kwe inkanda ni zintu zi bati niza pangahala, cho kuli kalililwa ahulu maswe ni bati, “Cho busakusima uzu ibali mwana we Ireeza.” <sup>55</sup> Bakulwakazi bangi baba ke ichilile Jeeso ku kazwa kwa Galalia cho kumu babalela ba ba zimene butabule ni ba lolelele. <sup>56</sup> Mukati kaabo ku bena Maria Magadalena, Maria nyina wa Jakobo ni Josefa, ni nyina wa baanaswisu ba Zebede. <sup>57</sup> Chinga yaba chitengwana, ni kweza unkosi wo muhumi yo zwa kwa Arimatea, we izina lya Josefa, iye naye ya bali mulutwana wa Jesu. <sup>58</sup> Na ya kwa Pilato mi na ka kumbila mubili wa Jesu. Pilato na laela kuti a wu hewe. <sup>59</sup> Josefa na hinda mubili, na wu bungila mu ijila li jolola, <sup>60</sup> mi choku kawu bika mu ikuumbu lyaakwe ihiyai lya ba hindi cho kuli beeza mu ibwe. Ku zwaaho na pindumwina ibwe ikando ha mulyango we ikuumbu mi nali yendela. <sup>61</sup> Maria

Magdalena ni zumwi Maria ku ba bena, ni be keele he shilya lye kuumbu. <sup>62</sup> Izuba li chilila, i bali izuba lya lo mugivero, Ma purisita ba kulwana ni Bafarisai neba kunganela ha mwiina kwa Pilato. <sup>63</sup> Cho kuti, “Unkosi, tu kumbulukwa kuti zuna shaamapa cho usii hala, a bati nati, 'Kani buuke mazuba otatwe haa hita.' <sup>64</sup> Chingi linu u lukele ku laula kuti ikumbu lika liiswa ahulu maswe mbwita luzuba lo butatu. Ni kusabi bulyo balutwana bakwe mu beeze ba muyibe ku zwaaho cho kucho bantu, 'Cha ba buuki kubafu.' Ka kuti ku chenga kwa mamani mani mu ku zambe kwe ntanzi.” <sup>65</sup> Pilato na bacho kuti, “Mu hinde shangabila. Muyende muka liliise hakando mu mu wolela monse.” <sup>66</sup> Mi niba yenda cho kuka siinka che ibwe, choku viika shangavira.

## Ikauhanyo 28

<sup>1</sup> Hwaho chitengwana cha lwe Sabata, ha chi libali ku ñatula kuti ibe luzuba lwe tanzi lwe Nsunda, Maria Magdalena ni Maria zumwi, ni beza ku kubona ikumbu. <sup>2</sup> Mubone, ni chii kweza ku nyanganya ku kulu, kakuti lingiloi lya Simwine li bazwile ku iwulu, kwiza ku pindumuna ibwe, kuzwaho ni kwi kala hateni. <sup>3</sup> Ciswano calyo libali kuswana ni mumuni we nvula, mi zizwato zalyo zibali kutuba sina kapuku. <sup>4</sup> Ba shangabila ni ba nyungeha ka kutiya mi ni ba ba sina bantu ba fwile. <sup>5</sup> Ingiloi chi lya wamba ku banakazi ni lya cho kubali, “Kanji mutiyi, kakuti nizi kuti musaka Jesu, ya ba kokotelwa. <sup>6</sup> Ka mwiina munu, kono ca buka sina mwa ba wambilile. Mwize za mubone za mwalele Simwine. <sup>7</sup> Muyende hahanu muka balwile balutwani bakwe, 'Wa buka ku bafwile. Mubwene, mwa litangize habusu bwenu ku kuya kwa Galilea. Wuko ka muka mubone.' Mubone, na mi wambila.” <sup>8</sup> Banakazi hwaho ni bazwa he ikumbu ni batite ni kusanga ahulu, mi chi batilila ku ku kalwila balutwani bakwe. <sup>9</sup> Mubone, Jesu cha bawana na cho, “Mulumele mubonse.” Banakazi ni beza, ne ku mukwata ku matende mi ne ba mufukamina. <sup>10</sup> Mi Jesu na cho kubali kuti, “Kanji mutiyi. Muyende mu kalwile bance bangu kuti ba zwe bayende kwa Galilea. Kwateni ime mu bakani bone.” <sup>11</sup> Mi hwaho banakazi ha baba kukaya, mubone, bamwi ba shangabila chi ba yenda mu munzi mukando ni ba wambila bapuritsa bakulwana zintu zonse za tendahala. <sup>12</sup> Mi bapuritsa ha kopana ni bakulwana ku wambola indaba na bo, ni baha mali mangi ku masole <sup>13</sup> ne ku balwila, “Muwambe ku bamwi kuti, balutwani bakwe Jesu bakeza masiku beza kwiba mubili wakwe chitu silele. <sup>14</sup> Haiba inu ndaba ni isika ku muyendes, katu mu suunde neku zwise intongosi kwenu.” <sup>15</sup> Mi masole ne ba hinda mali niku tenda mu baba wambililwa. Iyi indaba i ba hasani ahulu mukati ka Majuda mi mane ne suunu yisi zwilila habusu. <sup>16</sup> Kono balutwani bene ikumi ni wu mwina ni baaya kwa Galilea, ku iluundu ilyo Jesu lya baba wambile. <sup>17</sup> Mi haba mubona, chi ba mu kubamela, kono bamwi ni ba kangwa ku zumini. <sup>18</sup> Jesu neza kwabo ne ku wamba kubali ni kucho, “Mataa onse abahewa kwangu, a kwi ulu ni aa hansi. <sup>19</sup> Linu muyende, muka pange balutwani ba machaba onse. Mu ba kolobeze mwi ziina lya Tayo, lya Mwana mane ni lya Luhuhu lu Jolola. <sup>20</sup> Mu balute ku mamela zintu zonse zi ni ba mi laele. Mi mubwene, ka ni kale nanwe inako yonse, mane ku twala ku ma mani ni nizo e nkanda.”

## Mareka

<sup>1</sup> Aa nji matangilo e Ivangeli ya Jesu Kresite, mwana wa Ireeza, <sup>2</sup> Ubu muiñolele mwa Isaya muporofita, “mubone, nitumine mutumiwa wangu habusu vvenu, iye yeti navakanye inzila yenu. <sup>3</sup> Inzwi lya umwina litabeleza mwihalaupa, 'Mubakanye inzila ya Simwine; mutende mwahita kuoloke.’” <sup>4</sup> Johani abakezi, nakolobeza mwihalaupa ni kukutaza inkolobezo yo kubaka kuti zive ziwondelwe. <sup>5</sup> Inkanda yonse ya Judeya ni bantu bonse ba mwa Jerusalem babayendi kwali. Babakakolobezwa kwali mulwizi lwa Jorudani, ni baliwamba zive zabo. <sup>6</sup> Johani a balikuzwete ijansi lyabooza bwe Kamele ni lutunga lwedalo mumunda yakwe, mi abali kulyanga impaanse ni buchi bwamumuzuka. <sup>7</sup> Abaaruti, “Zumwi ukezite mumasule angu yokolete kunizamba, imi kaniyelele nanga kukotama kusumununa tukwele twensangu zakwe. <sup>8</sup> Nibamikolobezi chamenzi, kono iye kamikolobeze cha Luhuhu lujolola.” <sup>9</sup> Chibatendahali mwao mazuva kuti Jesu abakezi kuzwa Nazareta mwaGalileya, imi abakolobezwa kwa Johani mulwizi lwa Jorodani. <sup>10</sup> Jesu hazubuka bulyo mumenzi, a baboni iwulu niliyaluka ni Luhuhu nilusuukila hali ubu inkuba. <sup>11</sup> Imi liinzwi nilyazwa kwiwulu, “Umwanangu, inisaka kuhitiliza, nikon-detwe chako.” <sup>12</sup> Linu luhuhu chilumutumina kuyenda mwihalaupa. <sup>13</sup> Abena mwihalaupa mazuva ena makumi one, nakwete kulikwa kwaSatani. Abena ni zinyoloji zamunkanda, imi mangiloi abamuhazi. <sup>14</sup> Linu kuzwa hakusuminwa kwa Johani, Jesu nakeza mwaGalileya kukabuwamba Evangelo ya Ireeza, <sup>15</sup> nati, “Inako chiyelizuzilikizwa, imi mubuso wa Ireeza chiwina hafuhi. mubake ni kuzumina mwi Evangelo.” <sup>16</sup> Mukukabuyenda kumbali ye Wate lya Galileya, nabona Simoni ni Andulu mukulwe wa Simoni nibalaleka tunyandi twabo mwiwate, mukuti babali bayambi. <sup>17</sup> Jesu nawamba kubali, “Mwize, munichilile, mi kanimitende bayambi babantu.” <sup>18</sup> Mi haho bulyo nibasiya tunyandi ni kumwichilila. <sup>19</sup> Jesu habali kwabuyenda habusuzana, nabona Jakobo mwana Zebediya ni Johani mwanche; babena mubwato ni bawonga tunyandi twabo. <sup>20</sup> Naba sumpa mi babasiyi ishabo Zebediya mubwato ni bahikana babahilitwe, mi babamwichilili. <sup>21</sup> Mi habeza mwaKapenauma, mi Lensabata, Jesu nenjila mwi Sinangonge ni kuruta, <sup>22</sup> Babakomokiswa chamurutulo wakwe, mukuti abali kubaruta ubu njizumwi wina maata isifi mubekalile bañoli. <sup>23</sup> Hohwaho mukwame yabena luhuhu lusanjololi abahuwelezi, <sup>24</sup> naati, “Chinzi chituswanela kuchita nawe, Jesu wa Nazareta? Kana ubezi kukutusinya? Nizi kuti nguweni. “Nguwe yochena wa Ireeza!” <sup>25</sup> Jesu nakalimela idimona nati, “Tontole ni kuzwa mwali!” <sup>26</sup> Mi luhuhu lusajololi nilwamu sohela hansi ni lwazwa kwali ni lwabubokolola chaliinzwi ikando. <sup>27</sup> Mi bantu bonse babakomoketwe, ni kulibuza abobeene, “Chintunzi ichi? Murutulo munhya wina maata? U wola nanga kulayela luhuhu lusajololi mi lumuzuwa!” <sup>28</sup> Mi indaba kuamana naye haho nizayenda konsekonse muchilalo cha Galileya. <sup>29</sup> Mi mukuzwa mwisinagoge, nibeza munzubo ya Simoni ni Andulu, ni Jakobo ni Johani. <sup>30</sup> Lyahanu

mukwenyani wa Simoni wo mwanakazi abalele u lwalite ifibele, mi niba wambila Jesu chakwe. <sup>31</sup> Linu nakeza, kumuhinda cheyanza, ni kumuzimika mwiwulu; Ifivere niyamusiya, mi chatanga kubase-beleza. <sup>32</sup> Ichu chitengu, izuba halimana kwiimina, chibamuletela bonse babalikulwala kapa bena madimona. <sup>33</sup> Muleneñi wonse chiwakopenela hamulyango. <sup>34</sup> Abahozzi bangi babena malwalila asiyenesiyene ni kuhindika madimona mangi, kono kanabazuminini madimona kuwamba mukuti abamwizi. <sup>35</sup> Abalitanhaneli kubuka kakasani, ni kusisiha; abanyamuki ni kuyenda kuchibaka chitontwele mi uko abakalapeli. <sup>36</sup> Simoni ni babena nabo babali kumusakasaka. <sup>37</sup> Babamuwani ni kumuwambila, “Zumwi ni zumwi bakwete kukulolalola.” <sup>38</sup> Nati, “Tuyende kumwi ni kumwi, kuzwa mumatoropo azimbulukite, kokuma nikakutaze ko naako. Chobulyo nakeza kunu.” <sup>39</sup> Nayenda konsekonse mwaGalileya, nakabukutaza mumaSinangonge abo ni kuya buhindika madimona. <sup>40</sup> Sichisenda abakezi kwali. Abali kumukumbila; nakubama hansi imi namucho, “Chikuti usuni, uwola kunijoloza.” <sup>41</sup> Chokuba ni inse, Jesu chawolola iyanza lyakwe ni kumukwata, kumuwambila, “Ni suni, Jolole.” <sup>42</sup> Hohwaho chisenda nichamusiya, mi natendwa yojolola. <sup>43</sup> Jesu namukalimela chobukando mi namutumina kuti ayende. <sup>44</sup> Chati kwali, “utokomele kanji uwambi chimwi kumuntu, kono ukwiya, ukalitondeze kumuprisita, mi ukaneule chokujolozwa chabalayeli Mushe, bube bupaki kubali.” <sup>45</sup> Kono nayenda ni kukatanga kulwila zumwi ni zumwi ni kuhasanya liinzwi chabukando kuti Jesu kena abali kusiwola kuyenda nasumunikite mwitoropo. Linu nekala muchibaka chintontwele mi bantu babezi kwali kuzwila muzibaka zisiyenesiyene.

## Inkauhanyo 2

<sup>1</sup> Hakaboola kwaKapernauma kuzwa hamazubazana, kubazuweekete kuti abena kumunzi. <sup>2</sup> Chobulyo buungi bubakungene kwateni kuti mane kanakubasina ni chibaka, mane nanga hamulyango, mi Jesu nawamba liinzwi kubali. <sup>3</sup> Linu bakwame babezi kwali babaletete mukwame yabazuminine luñañali; bantu boone babamuyengete. <sup>4</sup> Habakangwa kusika hafuhi naye chebaka lyachisi, chibazwisa chituwa hewulu lyamwabalikwina. Chinga basha ilindi mwateni, ni bashulumuna bulo habalele yozuminine luñañali. <sup>5</sup> Chakubona intumelo yabo, Jesu chati kumuntu yozuminine luñañali, “Mwanangu, zive zako zawondelwa.” <sup>6</sup> Linu bamwi bañoli babekele mo, chibalichiu la munkulo zabo, <sup>7</sup> “Kwizabule kuti uzu muntu awambe cheyi nzila? Unyefula! Yowola kuswalela zive mbwiteri Ireeza yeyena?” <sup>8</sup> Mi Jesu hahobulyo neziba muluhuhu lwakwe zibabali kuzeza munkulo zabo. Nichati kubali, “Chinzi hamukwete kuzeza bulyo munkulo zenu?” <sup>9</sup> Njehihi chihuba kuwamba kuyozuminine luñañali, ‘Zive zako zawondelwa’ kamba kuwamba kuti, ‘Zime, hinde bulo bwako, mi uyende?’ <sup>10</sup> Imi kuti mwizibe kuti Mwana Muntu wina maata hansi okuwondela zive,” nawambila yozuminine luñañali, <sup>11</sup> “Niwamba kwako, zime, hinde bulo bwako, mi uyende kunzubo yako.” <sup>12</sup> Chazima mi hahobulyo nahinda bulo, ni kuzwa munzubo habusu bwazumwi ni zumwi, kokuti bonse babamakali mi nibaha intumbo kwa Ireeza, mi nibati, “Kana tubeeni kubona chintu chiswana

nechi.”<sup>13</sup> Nayenda hape kumbali yewate, mi chisi chonse nicheza kwali, mi na baruta.<sup>14</sup> Mukuhita kumbali, nabona Levi mwana wa Alufeya nekele hetente lya mutelisi, mi nati kwali, “Nichilile.” chazima ni kumwichilila.<sup>15</sup> Mi Jesu habali kulya zilyo munzuvo ya Levi, Batelisi baangi ni bantu bezwile zive babali kulya ni Jesu ni barutwana bakwe, mukuti babali baangi mi nibamwichilila.<sup>16</sup> Linu bañoli bamulao, babali baFalisi, hababona kuti Jesu ukwete kulya ni batendi bazive ni batelisi, nibawamba kubarutwana bakwe, “Chinzi halya ni batelisi ni bantu bezwile zive?”<sup>17</sup> Linu Jesu hazuwa bulyo nacho kubali, “Bantu bakolete mumubili kabasuni iñanga; mbwiteli balwala njibaisaka. Kananibakezi kukusumpa bantu bashiyeme, kono kubantu bezwile zive.”<sup>18</sup> Barutwana ba Johani ni baFalisi babali kulinyima zilyo. Imi bantu bamwi babezi kwali ni kumuti, “Chinzi barutwana ba Johani ni barutwana babaFalisi habalinyima zilyo, mi bako barutwana kabalinyimi zilyo?”<sup>19</sup> Jesu chacho kubali, “Kana kuwoleka kuti bantu bena hamukiti wamaseso balinyime zilyo musesi nasina nabo? Kubona bulyo musesi uchina nabo, kabawoli kulinyima zilyo.<sup>20</sup> Kono mazuba akezite akuti musesi nazwiswe kubali, mi mwao mazuva, kabalinyime zilyo.<sup>21</sup> Kakwina muntu yolukila kabbali kakajira kanhya hejira ikulukulu, kundeyobulyo chikamba chinhya muchihaluke ko, chinhya kuchikulukulu. Mi kakube muhalukilo mubilala.<sup>22</sup> Kakwina muntu yobika iwaine inhya muchibikilo chewaine chikulkulu chamadalo, kundeyobulyo iwaine muiñatule madalo, mi bubeli bwewaine ni madalo ewaine kazisinyehe. Chovulyo, mubike iwaine inhya mwidalo inhya lyewaine.”<sup>23</sup> Lensabata Jesu nichahita muluwa lwabuheke, mi barutwana bakwe nibatanga kutola mitwi yabuheke.<sup>24</sup> Mi bafalisi nibamucho, “Lole, chinzi habachita chintu chisali chamulao mwizuba Lensabata?”<sup>25</sup> Nacho kubali, “Kana chimubabalite chabachiti Dafita hababulite ni kufwa inzala—iye ni bakwame baabena nabo—<sup>26</sup> Mwabenjilili munzubu ya Ireeza Abbiyatare habali mupurisita yohanzi, mi abaali chinkwa chakubako, ili chisali chamulao kuti zuhi no zuhi alye kunde yamapurisita, mi mane naha kwateni amwi kwabana babena naye?”<sup>27</sup> Jesu nati, “Insabata ibalundilwa bantu, isinyi bantu kulundilwa Insabata.<sup>28</sup> Chobulyo, Mwana muntu Simwine, nanga weNsabata.”

### Inkauhanyo 3

<sup>1</sup> Imi hape chenjila mwisinagoge mi kubena mukwame weyanza lizuminine.<sup>2</sup> Bamwi bantu babamuteyete hafuhi kubona kamba mwamuhoze Lensabata kokuti bamunyansikize ho.<sup>3</sup> Jesu chati kumukwame weyanza lizuminine, “Katuke mi uzime aha mukati kabantu.”<sup>4</sup> Linu chati kubantu, “Kana kushiyeme kuchita bulotu mwizuba lya Lensabata, kamba kuholofaza; kupulusa buhalo, kamba kwihaya?” Kono babatontwele.<sup>5</sup> Ababaloli kubazimbuluka bonse chabukali, mi abaswabiswa bukukutu bwenkulo zabo, imi chati kumukwame, “Wolole iyanza lyako.” Chaliwolola, imi iyanza lyakwe chilya shiyamiswa.<sup>6</sup> Bafalisi habazwa hanze imi haho bulyo nibatanga kulelinsana ni maHeroda kamubati chiba mwihaila.<sup>7</sup> Linu Jesu, ni barutwana bakwe, babayendi kwiwate, imi chisi chikando chabantu niche chilila kuzwa Galileya ni kuzwa Judeya

<sup>8</sup> ni kuzwa Jerusalema ni kuzwa Idumeya ni mwishilya Iya Joludani ni kuzimbuluka Tire ni Sidoni. Habazuwa chazintu zabali kuchita, chisi chikando chibezi kwali. <sup>9</sup> Imi abakumbili barutwana bakwe kumubakanyiza chisepezana chebaka lyachisi, kokuti kanji bamuli-imbibi. <sup>10</sup> Mukuti abahozzi baangi, kokuti zumwi ni zumwi yabena malwalila alikoze kwiza kwali kuti amukwate. <sup>11</sup> Munako yonse muzibali kumubonena inhuho zisajolwele, zibali kuwila hansi habusu bwakwe ni kulililila, ni ziti, “Umwana wa Ireeza.” <sup>12</sup> “Chabusakusima nazikalimela kuti kanji zimwizibahazi. <sup>13</sup> Abayendi kwilundu, imi abasupi bana baabalikusuna, imi nibeza kwali. <sup>14</sup> Abaketi bena ikumi ni bobele, (baabasumpi barutwana), njokuti babenaye ni kuti pona chobatuma kutwala iñuwa yeñusa, <sup>15</sup> ni kuba ni maata akuhindika madimona. <sup>16</sup> Imi abaketi bena ikumi ni bobele: Simone, yabahi izina Pitorosi; <sup>17</sup> Jakobo mwana wa Zebediya, ni Johani mwance wa Jakobo, yabahi izina Boanergese, liti, bana bakupalakata, <sup>18</sup> ni Anduru, Filipi, Batolomiyu, Mateu, Tomasi, Jakobo mwana wa Alfeya, Tedyusi, Simone Mukakani, <sup>19</sup> ni Judasi Isikaliyote, yetena mubeteke. <sup>20</sup> Linu nayenda kumunzi, imi chisi chibaboleli kwiza hamwina, kokuti kanji bawoli nanga kulya chinkwa. <sup>21</sup> Luhasi lwakwe haluzuwa zateni, babayendi ni kukamuhitiza, mukuti nibati, “Uzwile mumaano akwe” <sup>22</sup> “Bañoli bamulao babakazwi kwa Jerusalema nibati, “Ukwetwe kwa Beluzebule,” imi, cha buyendisi bwa madimona u hindika madimona.” <sup>23</sup> Jesu ababasumpili kwali ni kucho kubali munguli, “Satani uwola bule kuhindika Satani? <sup>24</sup> Heba mubuso uli koswele kulisandukila iwowine, uwo mubuso kawuwoli kuzimana. <sup>25</sup> Heba inzuvo ili koswele kulisandukila iyoine, iyo inzubo kete niwole kuzima. <sup>26</sup> Heba Satani uzimana ni kulisandukila iye mwine ni kuliyaba, kawoli kuzimana, kono wizite kumamaninizo. <sup>27</sup> Kono kakwina yowola kwinjila munzubo ya mukwame yokolete ni kwiba zibya zakwe nasahambite mukwame yokolete tanzi, mi mwawole kututulula inzubo yakwe. <sup>28</sup> Chabusakusima nicho kwenu, zive zonse zabaana babantu kazikwatilwe, nanga zonse inyefulo zibawaamba, <sup>29</sup> kono yense yonyefula Luhuhu lu Jolola kete nawane kukwatilwa, kono wina mulandu wachive chakuyakuile.” <sup>30</sup> “Jesu abawambi chimukuti babali kucho, “Wina luhuhu lusa Jolwele.” <sup>31</sup> Linu banyina ni banche nibeza kuzimana hanze. Chibamutumina, kumusupa. <sup>32</sup> Mi buungi bubekele bumuzimbulukite, niba cho kwali, “Banyoko ni banche bako bena hanze, mi bakabukulola.” <sup>33</sup> Nabetaba, “Njibani bamayo ni bache bangu?” <sup>34</sup> Nalola mu mamabali kubabekele nibena muchikwenda nibamu zimbulukite ni kucho, “Mulole, aba nji bamayo ni banche bangu! <sup>35</sup> Mukuti yense yochita chisakiwa kwa Ireeza, uzo muntu nji mwanchangu, ni nchizyangu, ni bamayo.”

## Inkauhanyo 4

<sup>1</sup> Hape natanga kuruta kumbali yewate. Mi buungi bwachisi nibwakungana kumuzibuluka, linu nechila chikepe mwiwate, ni kwikala hansi. Chisi chonse chibena kumbali yewate hamutunda. <sup>2</sup> Mi chabaruta zintu zingi muunguli, mi nati kubali muntuto yakwe, <sup>3</sup> “Mutekeleze, mulimi abayendi kukubyala imbuto yakwe. <sup>4</sup> Choya bubyala, inwi imbuto niyawila munzila, imi zizuni nizeza kuitotola.

<sup>5</sup> Imwi imbuto niyawila mwibu lyamabwe, muisena ibabi ni ibu lingi. Hohwaho bulyo chiya mena, mukuti kena ibena ibu liya hanshi. <sup>6</sup> Kono izuba haliñatula, chizahiswa, mi chebaka lyakuti kanazibena muhisi, ziba zumi. <sup>7</sup> Imwi imbuto niyawila muzisamu zamiya. Zisamu zamiya nizakula ni kuzipuputiza, mi kana zibabiki nanga buheke. <sup>8</sup> Imwi imbuto niyawila mwibu ilotu ni kubika buheke muzaabukula ni zabuekeza, mi zimwi nizaleta chakuminihanya makumi otatwe kubungi, imi zimwi makumi amana iyanza ni kumi, mi zimwi mwanda.” <sup>9</sup> Mi chati, “Yese wina matwi akuzuwa, mumusiye azuwe!” <sup>10</sup> Jesus habena yeyena, babena hafuhi naye ni bena ikumi ni bobele babamubuzi kuamana ni nguli. <sup>11</sup> Chati kubali, “Kwenu kuhelwe ikunutu yomubuso wa Ireeza. Kono kubeena hanze zonse zina munguli, <sup>12</sup> Kokuti habalola, ee balola, kono kababoni, ni kuti habazuwa, ee bazuwa, kono kabazuwisisi, kamba hamwi pona chibasanduka mi Ireeza pona chobakwatila.” <sup>13</sup> Mi chati kubali, “Kamuzuwisisi iyi inguli? Mumuzuwisisi bule inguli zonse zimwi?” <sup>14</sup> Mulimi yobyala imbuto njeje yobyala iinzwi. <sup>15</sup> Bamwi njezina ziwila kumbali yamugwagwa, mulibabyalwa liinzwi. Mi habalizuwa, hahobulyo Satani ulizwisa mi uhinda liinzwi liba byalwa mubali. <sup>16</sup> Mi bamwi njabo babyalwa hebu lyamabwe, ili abo, habazuwa liinzwi, hahobulyo balitambula chakusaanga. <sup>17</sup> Mi kabena muhisi mubali beene, kono balikozakoza chenakozana. Linu bukabo ni kunyandiswa kwiza chebaka lyaliizwi, hahobulyo bachunchula. <sup>18</sup> Mi bamwi njabo babyalwa mukati kamiya. Bazuwa liinzwi, <sup>19</sup> kono babilela ni zenkanda, kuchengwa chifumu, ni ntakazo zazintu zimwi zinjila mo ni kwihaya liinzwi, mi liba lisabiiki zibikantu. <sup>20</sup> Linu kwina abo bababyalwa mwibu ilotu. Bazuwa liinzwi ni kulitambula ni kubika zihantu: zimwi makumi otatwe, mi zimwi makumi amana iyanza ni kumi, mi zimwi mwanda”. <sup>21</sup> Jesu nati kubali, “Muleta ilambi m unzubo ni kulibika mwikonde yechitanda, kamba mwikonde lyabulo? Mulileta mukati ni kulitula hachitulilo chelambi. <sup>22</sup> Mukuti kakwina chiuungilwa chiseti ni chizibahazwe, mi kakwina inkunutu yiseti niibe henkanza. <sup>23</sup> Heba zumwi wina matwi akuzuwa, mumusiye azuwe!” <sup>24</sup> Nati kubali, “Mutwalize kuchi muzuwa, intikanyezo imulikanisa, yete nimulikanyezwe chayo, mi muiwelwe kwenu. <sup>25</sup> Mukuti yense wina, kwali kakuwelwa ni kuhita, mi yense yasena, kwali mukuhindililwe ni zakwete.” <sup>26-27</sup> Mi nichati, “Mubuso wa Ireeza uswana sina muntu yobyala imbuto hanshi. Ulala masiku ni kubuka musihali, mi imbuto imena ni kukula, nanga kezibite kuti mbobule. <sup>28</sup> Ibu libika buheke ilyo liine: intanzi ituunga, linu chikunku, linu kwiza buheke bubuzwile kuchikunku. <sup>29</sup> Mi buheke habubuzwa hahobulyo utumina ijekisi hanze, mukuti inkutulo chiyasika”. <sup>30</sup> Mi nati, “Mubuso wa Ireeza tuwola kuubambanya ni chi, kamba inguli inzi ituwola tendisa kukuutoloka? <sup>31</sup> Ukola sina imbuto yamasitate iti, chiibyalitwe, nji iha nikuhita imbuto yahebu. <sup>32</sup> Mihe, chiibyalitwe, ikula ni kuba bukando kuzamba zonse zimenantu zoluwa, mi itenda mitavi mikando, kokuti zizuni zewulu ziwola kuchita zizumbo mumuzunde wayo.” <sup>33</sup> Chenguli zingi ziswana nezi nawamba liinzwi kubali, chabuungi kakuya kamubawolela kuzuwisisa, <sup>34</sup> imi kanaabawambi kubali nikusena inguli. Kono habali yeyena, abatoloki zintu zonse kubarutwana bakwe. <sup>35</sup> Mwelyo izuba, hakuba chitengu,



nati kubali, “Tulutile mulimwi ishilya.” <sup>36</sup> Linu nibasiya chisi, kuhinda ni Jesu, kakuti chabena kale muchikepe. Zimwi zikepe nazo zibena naye. <sup>37</sup> Mi ihuho likalihite ikando chilyabuka mi masuunda abali kwi njila muchikepe mukuti chikepe chichibezwile. <sup>38</sup> Kono Jesu iyemwine abeena muluheho lwachikepe, nalele hamushamo. Chibamubusa, nibacho, “Muruti, kobileli nihatusaka kufwa?” <sup>39</sup> Mi, haabuswa, na kalimela luhuho ni kucho kwiwate, “Inkozo, tukumane.” Mi ihuho nilya zimana, mi kubena kutontola kukando. <sup>40</sup> Mi nati kubali, “Chinzi hamutiite? Kamwini kuba ni intumelo?” <sup>41</sup> Babezuli kutiya kukando mi ni bawamba zumwi ku zumwi, “Linu njeni uzu, mukuti nanga ihuho ni wate zimuzuwa?”

## Inkauhanyo 5

<sup>1</sup> Babezi kwishilya limwi lyewate, kuchilalo cha Gerasenese. <sup>2</sup> Mi hahobulyo Jesu hazuka muchikepe, mukwame wina luhuho lusajololi abezi kwali kukazwa kumakumbu. <sup>3</sup> Mukwame abali kuhala mumakumbu. Kakwina ni uumwina yabakuti chowola kumukanisa, mane nangati ni ncheini. <sup>4</sup> Chaba suminwe inako ingi ingi ni nkwele ni ncheini. Abali kupusoola hakati incheini ni nkwele zakwe zibapusoowa. Kakwina ni umwina yabena ziho zokumu zuunda. <sup>5</sup> Masiku ni masiku ni musihali mumakumbu ni mumalundu, abali kubokolola ni kulifundola chamabwe makali. <sup>6</sup> Habona Jesu kulezana, natilila kwali ni kukafukama habusu bwakwe. <sup>7</sup> Chabokolola chamuhuwo mukando, “Chinzi chiniswanela kuchita nawe, Jesu, Mwana wa Ireeza waKiwuwulu? Nikukumbila cha Ireeza iye mwine, kanji unisukululi.” <sup>8</sup> Mukuti abali kuwamba kwali, “Zwe mumukwame, iwe luhuho lusajololi.” <sup>9</sup> Mi namubuza, “Nguweni izina lyako?” Mi namwitaba, “Izina lyangu nji Mpi, mukuti tubangi.” <sup>10</sup> Namukumbila chakubolelabolela kusaatumina kunze ye chilalo. <sup>11</sup> Haho mulaka mukando wezigulube ubena ho ni ufula hachiwulu, <sup>12</sup> mi niyamukumbila, niiti, “Tutumine muzingulube; twinjile muzili.” <sup>13</sup> Chobulyo chazizuminina; inhuho zisajolwele nizazwa ni kwinjila muzingulube, ni zashetumuka chakuhwelela hansi yachiwulu mwiwate, mi zibali kusaka kulikana impalo ya zikiti zobeze zingulube zibamini mwiwate. <sup>14</sup> Mi abo babali kulisika zingulube nibatiya ni kukabiha chibatendahali mumuleneñi ni kumbali yenkanda. Imi bantu bangi nibayenda hanze kukabona zibachitahali. <sup>15</sup> Linu nibeza kwa Jesu mi nibaabona mukwame yowina madimona—yabena iMpi—nekele hansi, nazwete, imi mumaano sakata akwe, mi babalikalilwe. <sup>16</sup> Bana bababoni chibachitahali kumukwame yokwetwe madimona nibaba wambila chiba chitahali kwali mane ni kuamana ni zingulube. <sup>17</sup> Mi chibatanga kumukumbila kusiya chilalo chabo. <sup>18</sup> Mi habali kwinjila mukepe, mukwame wamadimona na mukumbila kuti ayende naye. <sup>19</sup> Kono kana aba muzuminini, kono nacho kwali, “Yende kunzubo yanko ni kubantu bako, nikukaba wambila Ireeza chaba kupangili, ni chisemonzi chaba kuhi.” <sup>20</sup> Linu nayenda ni kukatanga kwi zibahaza zintu zikando Jesu zabamuchitili mwa Dekapolisi, mi bonse baba makali. <sup>21</sup> Mi Jesu hachalutila mwishilwa hape kuimwimbali yewate, muchisepe, chisi chikando nichakungana kumuzimbuluka, mukuti abena kumbali lyewate. <sup>22</sup> Mi zumwi kubayendisi besinangonge, wezina lya Jailusi, nakeza, mi hamubona, nawila hamantende akwe. <sup>23</sup> Namukumbila chakubolela

bolela, nati, “Mwanangu munini wamukazana chiwina hafuhi ni lufu. Nikukumbila, wize ubike mayanza ako hali kuti apangwe siinte ni kuhala.”<sup>24</sup> Linu nayenda naye, ni chisi chikando nichamwichilila ni kumukakatiize kumuzimbuluka.<sup>25</sup> Lyahanu kubena mwanakazi wamalaha abazwizi zilimo zina ikumi ni zobebe.<sup>26</sup> Abasukuluki chabukando mumpabalelo yefanga zingi mi abalitusisi zonse zabakwete, kono kunde yakuba butuka naya kungsi.<sup>27</sup> Chabazuwile indaba kuamana ni Jesu. Linu nakeza mumasule akwe habali kwabuyenda muchisi, ni chakwata chizabalo chakwe.<sup>28</sup> Chobulyo nati, “Heba ninikwata bulyo zizwato zakwe, munihozwe.”<sup>29</sup> Hachamuwonda, kuzwiza ni kwazimana, mi nalizuwa mumubili wakwe kuti chahozwa kumalwalila akwe.<sup>30</sup> Mi hahobulyo Jesu nalemuha mwalimwine kuti ziho chizazwa kwali. Mi nasandukila mubuungi bwa chisi ni kubuza, “Njeni wawonda zizwato zangu?”<sup>31</sup> Barutwana bakwe chibacho kwali, “Ubwene ichi chisi chikukakatize kukuzimbuluka, mi uwamba, “Njeni waniwonda?”<sup>32</sup> Kono Jesu nalolalola kubona yabapangi bulyo.<sup>33</sup> Mwanakazi, chokwiziba chiba pangahali kwali, nalikalilwa niku chachalika. Abakezi ni kuwila habusu bwakwe ni kumuwambila buhote bonse.<sup>34</sup> Nawamba kwali, “Mwanangu wechikazana, intumelo yako yakushiyamisa, Yende chenkozo mi uholele kuchilwalo chako.”<sup>35</sup> Habali kusiwamba, bamwi bantu nibeza kuzwa kumuyendisi we sinangonge, nibacho, “Mwanako wechikazana chafwa. Chinzi kuzwila habusu kukataza muruti?”<sup>36</sup> Mi linu Jesu chakuzuwa zibaba wambi, nati kumuyendisi we sinagoge, “Kanji utiyi. Zumine bulyo.”<sup>37</sup> Kana abazuminini nanga zuhi kumusindikiza, kunde aPitorosi, Jakobo, ni Johani, mwanche wa Jakobo.<sup>38</sup> Babakezi kunzuro yomuyendisi we sinagoge mi nabona ko bantuvangi nibachita ilata lingi lingi; babali kusilisa ni kubokolola chakutumusa.<sup>39</sup> Henjila munzubo, nati kubali, “Chinzi hamunyeletwe imi chinzi hamusilisa? Muhwile kafwile kono ulele,”<sup>40</sup> Nibamuseka. Kono nabazwisikiza hanze bonse niku hinda besi wamuhwile ni banyina ni babena naye, mi nenjila mwabena muhwile.<sup>41</sup> Nichahinda iyanza lyamuhwile ni kuti kwali, “Talita koum,” ili ita kuti, “Muhwile wamukazana, niti kwako, zime.”<sup>42</sup> Hahobulyo muhwile chazima ni kuyenda (kakuti abena zilimo zina ikumi ni zobebe kuchipepo). Mibabamakali ni kuhita.<sup>43</sup> Chenkalimelo nabalaela kuti kakwina nanga umwina yoswanela kwiziba kuamana ni chatendahala. Mi naba wambila kumuha chakulya.

## Ikauhanyo 6

<sup>1</sup> Imi nayenda kuzwa mwateni ni kwiza mwitoropo mumuzi wakwe, ni varutwana vakwe vavamwichilili. <sup>2</sup> Imi Mukivero hausika, avaruti mu maSinagoge. Vuungi vwa vaantu vuva muzuwi nivaziyeleha. Nivati, “Aba wani kuhi izi intuto?” “Maanonzi aa avahewa kwali?” “Imakazonzi izi zatenda chamayanza akwe?”<sup>3</sup> “Kanji muvezi, mwana Maria ni mukulwe wa Jakovo ni Jose ni Juda ni Simoni? Vanchizye kavahena hanu naswe?” Mi vavaziyezwe chaJesu. <sup>4</sup> Mi Jesu chati kuvali, “Muporofita kayelele kuvuzwa ikute, mbwiteli mwitoropo mwazwa ni muvakwakwe, ni vamunzubo yakwe.”<sup>5</sup> Ava kangwa kutenda mutendo ikolete, mbwiteli kuvika mayanza akwe havantu vache valwele ni kuvahoza. <sup>6</sup> Kusazumina kwavo kuva mukomokisi. Nicha yenda vuzimbuluka muminzi nakavuruta. <sup>7</sup> Ni chasumpa vena ikumi

limwiina nivovere ni kutanga kuvatuma kunze, vovere cha vovere, nikuvaha ziho he inhuho zisaJololi, <sup>8</sup> Ni kuba laera kuti kakwina chiva hinda mulwendo lwavo, mbwiteri inkoli vulyo: kakwina inkono, kakwina mukotana, imi kakwina mali mulutunga lwavo, <sup>9</sup> kono kuzwata insangu, nikusa livwika inguvo zovere. <sup>10</sup> Ni chati kuvali, “Monse mumwinjirira mwinzuvo, mwikale mo mbwita hete nimusiire icho chivaka. <sup>11</sup> Imi itoropo isete imitambule kamba kusamiteeka, hamusiya icho chivaka, muzukutule isuko kumatende enu ivevupaki kuvali.” <sup>12</sup> Vavayendi ni vava vuruta kuti vaantu vafutatile zivi zavo. <sup>13</sup> Niva zwise madimona maangi, ni kusinga vantu vangi valwala ioli ni kuvahoza. <sup>14</sup> Heroda hazuwa izi, kakuti izina lya Jesu livavuvaani. Vamwi vavali kucho, “Johani Mukolovezi ava kavuswa kuvafwile imi chovuti, izi ziho zina imakazo zitendete mwali.” <sup>15</sup> Vamwi ni vaati, “Nji Eliya”. Kono vamwi nivati, “Muporofita, uvu nji vumwi wavaporofita vamwi nako zentanzi.” <sup>16</sup> Kono linu Heroda hazuwa ichi nacho, “Johani, uni vakosoli mutwi avavuuksa.” <sup>17</sup> Mukuti Heroda avatumini kusuminwa kwa Johani niku muhakila muntolongo kaha mulandu wa Herodiasi (mwi hyabwe wa mwanchakwe Filipi), kakuti chava musesete. <sup>18</sup> Mukuti Johani avawambiri Heroda, “Kakuyelele kwako kuva ni mwihyabwe wa mwancako.” <sup>19</sup> “Kono Herodiyasi nakwatilila havuvengi kumulwisanisa, ni kusaka kumwihaya, kono kana avawoli, <sup>20</sup> Mukuti Heroda avatite Johani; avezi kuti ushiyeme imi mukwame yojolola, na muvika neenza. Muku tekeleza kwali nikwamuha kunyelwa kukando, imi namuzuwisisa chakusanga. <sup>21</sup> Linu nikwasika mukwa Heroda hava ni luzuva lwakuzalwa kakwe ni chatenda mulalilo ni manduna vakwe, ni vayendisi venkondo, nivakulwana vamwa Galileya. <sup>22</sup> Mwana a Herodiasi wa mukazana iyemwine neza ni kuvazanina, nicha sangisa Heroda niva vayenzi vakwe vavasumpwa. Simwine naati kumukazana, “Nikumbiire chimwi nichimwi chosaka imi municikuhe.” <sup>23</sup> Chakoonka kwali naati, “Chonse chete ukumbire kwangu, munichi kuhe, ku sika hakati kepuso yangu.” <sup>24</sup> Naya hanze nichakati kuvanyina, “Chinzi chete nimukumbiire?” Nacho, “Mutwi wa Johani Mukolovezi,” <sup>25</sup> Hohwaho nenjila chokuhwela kwa simwine ni kukumbiira, naati, “Nisaka kuti unihe hahanu, hakagwetere, mutwi wa Johani Mukolovezi”. <sup>26</sup> Nihakuva kuti ichi chiva sasamisi simwine, kana avali kuwola kumukanina chava kumbiiri kevaka lya kulikonka kwava tendi nicha veene vakwe. <sup>27</sup> Imi simwine cha tuma isole yozwa kuvaganteri ni kumulaera kumuletela mutwi wa Johani. Munganteri nayenda kuka mu kosola mutwi muntolongo. <sup>28</sup> Naaleta mutwi wakwe hakagwetere niku uha mukazana, mi mukazana chauha vanyina. <sup>29</sup> Mi varutwana vakwe, chokuzuwa ichi, chivakeza nikuhinda muviri ni kuka u uunga mwikuumbu. <sup>30</sup> Mi vapositola, chivakungana kuzimbuluka Jesu, ku muwambira zonse zivava kapangi ni kuruta. <sup>31</sup> Ni chata kuvali, “Mwize muzwe muvene muye muchivaka chisena vaantu ni kukapumula inakozana.” Mukuti vuungi vuvakwiza ni kuyenda, imi kena vavawani nanga inako yokulya. <sup>32</sup> Imi nivayenda muchikepe muchivaka chisena vaantu avoveene. <sup>33</sup> Kono vava vavoni havakatuka mi vuungi ni bwaveziva, nivatilila kwateni hamwiina chatatende kuzwa mwitoropo yonse, ni kukasika lwentanzi kwavo. <sup>34</sup> Havasika herizo, chavona chinavuungi imi chava niinse havali

kakuti vavali kukola sina imberere zisena mulisi. Nichatanga kuvaruta zintu zingi. <sup>35</sup> Chitengwaana, varutwana vakwe niveza kwali nikucho, “Ichi chivaka kachina vaantu nikuti cheli chitengu. <sup>36</sup> Uvatumine valiyeze munkanda zina havubbali ni mumenzi kuka liulila zakulya avoveene.” <sup>37</sup> Kono netava ni kucho kuvali, “Inwe muvahe zakulya.” Chiva cho kwali, “Tuwola kukawula inkoko ya mali a mianda yovere nikwiza kuvaha valye?” <sup>38</sup> Nacho kuvali, “Zongai ziinkwa zimukwete? Muyende mukavone.” Hava sakisisa, nivaati, “Ziinkwa zimana iyanza ninswi zovere.” <sup>39</sup> Chalaera vaantu vonse kwikala hansi halyani iteke. <sup>40</sup> Niveekala muzikwata; zikwata za myandanda ni makumi ahinda iyanza. <sup>41</sup> Chahinda ziikwa zimana iyanza ni nswi zovere, nalolele kwiwulu nafuyola niku gamoona ziinkwa nikuziha ku varutwana kuka zinzika havusu vwavaantu. Nicha yavelela inswi zovere mukati kavo voonse. <sup>42</sup> Voonse vavaali mbwita hvekuta. <sup>43</sup> Chivahinda vufwafwaali bwa ziinkwa, nikwizua ziseye zikwana ikumi nizovere, ni vufwafwali bwenswi. <sup>44</sup> Mi vavali vaantu vatenda lule luhinde yanza vavaali ziinkwa. <sup>45</sup> Hohwaho nachita kuti varutwana vakwe vechile muchikepe vahitile havusu vwake kuya kuimwi imbali, kwa Bethesaida, naatumina chinavuungi kuyenda. <sup>46</sup> Chinga vayenda, nayenda herundu kuku laperu. <sup>47</sup> Masiku nieza, imi chikepe chichivena hakati kewate, imi aveena yenke hamutunda. <sup>48</sup> Imi navona kuti vavakwina muvukukutu vukando havati chivaka zuhila kwina luhuhu luva kovalwisa. Munako ya vuune yakuiza neza kuvali, nakavuyenda hewate, imi asake nava hite silubbali. <sup>49</sup> Kono haba muvona ukavuyenda hewulu lyevate, niva zeza kuti isaku niva huwa, mane chiva tanga ku huwa, <sup>50</sup> kakuti vavamuboni mi vavasuhite. Imi hohyaho chawamba kuvali nikuvata kuti, “Mulikoze! Jeme! Kanji mutiyi!” <sup>51</sup> Nenjila muchikepe navo, imi luhuhu chilwa siya kuhunga. Imi nivakomokwa. <sup>52</sup> Mukuti kena vavazuwisisi kuti chiinkwa chitalusa nzi. Imi, inkulo zavo nizakukutuhazwa. <sup>53</sup> Hachiva luutila mwishilya, chiva sika muchivaka Genesereti ni vasiika chikepe. <sup>54</sup> Hava zuvuka muchikepe, hahobulyo niva mulemuha. <sup>55</sup> Nichiva tirira muchikiliti chonse nikutanga kukaleta valwele kwali hamasasa, konse kuvava kuzuwa kuti kwakezite. <sup>56</sup> Konse mwavali kwinjira mumenzi, kamba mileneñi, kamba munkanda, vava kuvikanga valwele muzibaka zamauzikizo, imi vavali kumu kumbira kuti avazuminine nanga kuwonda kumpera yachizwato chakwe. Imi vuungi vwavo vava kumu kwata vavahozwa.

## Inkauhanyo 7

<sup>1</sup> Vafalisi ni vamwi vavañoli vavali kukazwila kwa Jerusalema nivakuungana kumuzimbuluka. <sup>2</sup> Mi vavavoni kuti vamwi vavarutiwa vavali zilyo ni mayanza enekwe, awo, asasambite. <sup>3</sup> (Mukuti vafalisi ni vonse maJuda kavali mbwita havasamba kumayanza avo; mukuti vechilile chizo chavakulwana. <sup>4</sup> Cwale vafalisi havakazwa kuchivaka chamusika, kavali mbwita havasamba. Imi kwina milao mingi ivechilila chentokomelo, kukopanya ni kusambisa inkomoki, impoto, ni kahambwe ke nsipi i venya, mi mane nanga ni zikalo zivaliila.) <sup>5</sup> Mafalisi ni vañoli ni vavuuza Jesu, “Chinzi varutiwa vako havasayi ka chizo cha Vakulwana, mukuti vavaali zilyo ni mayanza asasambite?” <sup>6</sup> Kono nati kuvali, “Isaya avaporofiti neenza kuamana nanwe valihele,

ava ñoli, 'Ava vantu bani kuteka chamiromo yavo, kono inkulo zavo zinakule naame. <sup>7</sup> Kuteemba kusena intuso kuvaniha, kuruta milao yavantu kuva intuto yavo.' <sup>8</sup> Musiya intaero zaIreeza muya chamikwa ya chizo chavantu." <sup>9</sup> Mi a va co kuvali, "Mwizi neenza kukana intaero yaIreeza kuti mukuteke chizo chenu! <sup>10</sup> Mi Mushe nati, 'Ukuteke iso ni nyoko', ni, 'Iye yowamba vuvi kuvesi kamba vanyina luli kafwe.' <sup>11</sup> Kono inwe muti, 'Heba muntu uwambila vesi ni vanyina, "Cinzi ni chinzi intuso zimuvavatambuli kwangu Inkoombani," (nji kuta kuti, 'Kuva hewa Ireeza')- <sup>12</sup> linu kosiwoli kumuzuminina kutenda chimwi kuvesi ni vanyina. <sup>13</sup> Mu kwete ku panga mulao wa Ireeza kuvula intuso chachizo chenu chimu vatambiki hansi. Ni zingi zintu ziswana zimucita." <sup>14</sup> Cha sumpa chinavuungi hape ni kuwamba kuvali, "Muteke kwangu, muvonse, ni kuzuwisisa. <sup>15</sup> Kakwina chizwa hanze yomuntu icho cimusihisa hachinjila mwali. Nji chizwa hanze yomuntu icho cimusihisa." <sup>16</sup> (Wina matwi aku zuwa a zuwe). <sup>17</sup> Haho Jesu hasiya chinavuungi ni kwinjila munzubo, varutwana vakwe chivamuvuza kuamana ninguli. <sup>18</sup> Jesu nati, "Nenwe lyaho kamuzuwisisi? Kamuvoni kuti chonse chinjila kumuntu kuzwa hanze kachiwoli kumusihisa, <sup>19</sup> kakuti kachiwoli kwinjila munkulo, kono chiya mwivumo ni kukachizwisikiza mukalimba-limba?" Chowu muwambiro Jesu avapangi zilyo zonse chokujolola. <sup>20</sup> Chati, "Nji chizwa hanse yomuntu njichimusilafaza. Kakuli chizwa kumuntu, <sup>21</sup> kuzwa mu nkulo, kuzwa mumihupulo mivi, vusaangu, vusa, kwihaya, <sup>22</sup> vushyahi, kunuungwa, lunya, muna, mapa, kuchengelela, vuikuhumuso, vuholo, <sup>23</sup> zonse izi zivilala zizwilila mukati, mi nji zisihisa muuntu." <sup>24</sup> Chavuuka kuzwa aho ni kuyenda ku chikiliti chaTire ni Sidoni. Cheza munzubo mi kanavali kusaka kuti muntu zumwi ezive kuti kwa veena, kono kana avali kuwoleka ku patwa. <sup>25</sup> Kono hohwaho mukulwakazi, inyina wa mwana kazana yavena luhuhu lusajololi, chazuwa kuamana naye, cheza, ni kuwila hansi hamatende akwe. <sup>26</sup> Cwale mwanakazi avali Mugerike, waluzuvo lwa Ziropenia. Namukumbila kuhindika idimona ku mwana'kwe wa mukazana. <sup>27</sup> Nati kwali, "Musiyeh bahwile pili baleliwe. Sina hakusashiyeme kuhinda zilyo zabahwile nikuzi sohela vambwa." <sup>28</sup> Kono cha mwitava nikuta kwali, "Eee, Simwine, nanga vambwa mwi konde lye ntafule valya tufwafwali twavahwile." <sup>29</sup> Nati kwali, "Kakuli wawamba buti, ulukuluhite kuyenda. Idimona chilyaazwa kumwanako". <sup>30</sup> Chabola ku nzubo yakwe ni kukawana muhwile ulele hamumbeta, mi idimona livayendi. <sup>31</sup> Cwale chayenda hape kuzwa muchikiliti chaTire, nikuyenda cha Sidoni kuya kwiwate IyaGalileya konji kuchililiti cha Dekapolisi. <sup>32</sup> Ni chivaleta kwali zumwi yavafwile matwi ni bukavo kukuwamba, ni va mukumbila kubika iyanzahali. <sup>33</sup> Chamuhindila kumbali kuzwa munavuungi cha kuliuungula, mi chavika minwe yakwe mumatwi akwe, mi hamana kuswa, nakwata lulimi lwakwe. <sup>34</sup> Avaloli kwiwulu, hatuliza muhuza nikucho kwali, "Efafata" njikuti, "Yaluke!" <sup>35</sup> Mi haho kuzuwa kwakwe chikwe yaluka, mi chiva kwete lulimi lwakwe chiva shiywa mi chava kuwamba sinte. <sup>36</sup> Mi avava laeli kuti kanji vawambili muntu. Kono mwavali kuva laelelela, muvavali kuliwambila mane ni kuhita. <sup>37</sup> Vava komokiswa ahulu, ni vati, "Ava pangi zintu zonse siinte. Uwola nanga vasinkite

matwi kuti vazuwe ni zimumu ku wamba.”

## Inkauhanyo 8

<sup>1</sup> Mwaana mazuva, kuvali kwina hape chinavuungi chikando, mi kena vavena chimwi chokulya. Jesu cha sumpa varutwana vakwe ni kucho kuvali, <sup>2</sup> “Nina inse ku cinavuungi, kakuli vazwilile havusu kuva name cha mazuva o tatwe mi nivasena chivalya. <sup>3</sup> Heva ni nivatumina kuya kumunzi wavo nivasalile vawola kuzuminina munzira. Imi vamwi kuvali vakazwa mulyendo lule.” <sup>4</sup> Varutwana vakwe chiva mwitava, “Chokuhi kwete tuwane ziinkwa zilikeene mwechi chivaka chisena vaantu kutiveekute?” <sup>5</sup> Cha vavuzana, “Zongayi ziinkwa zimukwete?” Nichivati, “Iyanza ni tovere.” <sup>6</sup> Cha layera chinavuungi kwi kala hansi. Cha hinda zinkwa zimana iyanza nizovere, chali tumera, ni kuzi gamoona. Naziha kuvarutwana vakwe kuvika havusu bwavo, mi chivazikaa havusu vwa chinavuungi. <sup>7</sup> Mukuti navo vaavena inswi zilikene, imi hamana kuha buitumelo chavo, na laela varutwana kuziyava nazo. <sup>8</sup> Nivalya nikwikuta. Imi nivatotola vufwafwali vuvashale, ziseye zikando zimana iyaza nizo vere. <sup>9</sup> Vantu vavakusaka kulikana lule lone. Ni chava tumina kuyenda. <sup>10</sup> Hohwaho chechila muchikepe ni varutwana vakwe, niva yenda muchikiliti cha Dalumanuta. <sup>11</sup> varisi niveza kuzwa nikutanga kukanana naye. Niva muvuza chisupo chizwila kwiwulu kumulika. <sup>12</sup> Natuliza muhuza muluhuhu nikucho, “Chizi ulu lusika lwahanu halukumbila chisupo? Chabu niti kwenu, kakwina chisupo chete nichihewe kolu lusika.” <sup>13</sup> Linu chava siya, nechila muchikepe niku yenda kuyimwi imbali. <sup>14</sup> Lyahanu varutwana nivazivala kulihindila zilyo. Kena vavena nanga chikwa chihitilila chimwina muchikepe. <sup>15</sup> Navakalimela nati, mulole imi mugantele, “mulungo wa Mafarisi ni mulungo wa Heroda.” <sup>16</sup> Varutwana nichu vavuzana, “Kakuti katwina Chiinkwa.” <sup>17</sup> Jesu avakwizi zechi, ni chacho kuvali, “Chinzi hamuvuzana kazakusava ni chiinkwa? Kana nahanu kamu zuwi? Kamu zuwisisa? Inkulo zenu za sanduka kusa tekeleza?” <sup>18</sup> Mwina menso, kamuvoni? Mwina matwi, kamuzuwi? Kamuzezi? <sup>19</sup> Hani gamoona ziinkwa zimana iyanza mukati kavaantu vena lule vuhinda iyanza, zi seye zongayi zivezuli vufwalifwali vwa Chiikwa zimu vahindi?” Chivati kwali, “Ikumi lyonke nizovere.” <sup>20</sup> Imi hani gamoona ziinkwa zi hinda iyanza nizovere, mukati kavaantu vena lule luhinda minwe yoone, zitanda zongayi zivezuli zimuva hindi?” Chivacho kwali, “Zihinda iyanza nizovere.” <sup>21</sup> Chati, “Nahanu kamu zuwisisi?” <sup>22</sup> Niveza kwa Betisaida. Vaantu uko chiva leta kwali mukwame yasavoni ni kukumbira Jesu kuti a muwoonde. <sup>23</sup> Jesu chawoonda mukwame yasavoni kwi yanza, ni kumutwala kunze yo munzi. Hachaswira ha menso akwe ni kuvika mayanza akwe hali, Chamu vuza, “Kwina cho vona?” <sup>24</sup> Nichalola mwiwulu, ni kucho, “Ni vweene vantu vayenda ili zisamu.” <sup>25</sup> Linu cha muvika hape mayanza akwe hamenso akwe, imi mukwame che yalula menso akwe, chavozekezwa kuvona kwakwe, ni chavona zintu zonse neenza. <sup>26</sup> Jesu cha mutumina kunzuvu yakwe ni kucho, “Kanji winjili mwitoropo.” <sup>27</sup> Jesu a vayendi ni varutwana vakwe mumunzi ya Sizaria Filipi. Munzira cha vuza varutwana vakwe, “Vaantu vata kunti njeme ni?” <sup>28</sup> Chiva mwitava ni kucho, “Johani Mukolovezi.

Vamwi vacho, 'Eliya' imi vamwi, 'Zumwi wa kuvaporofita.'<sup>29</sup> Chava vuza, "Inwe mucho kuti njeme ni?" Pitorosi chati kwali, "Njewe Keresite."<sup>30</sup> Jesu chavakalimera kusa wambila nanga umwiina kakwe.<sup>31</sup> Imi chatanga kuvaruta kuti Mwana wa Muntu uyelele kusukuluka zintu zingi, imi mwa kanwa kuvakulwana ni vapurisita vakulwana ni vañoli, imi kehayiwe, imi hakumana mazuva otatwe kavuuke.<sup>32</sup> Nawamba ichi chokujoloza. Linu Pitolosi na muhindira ku bali ni kukatanga kumukalimera.<sup>33</sup> Kono Jesu nachevuka ni kulolelela kuvarutwana vakwe ni ku kalimera Pitorosi ni kucho, "Voole mwisule lyangu, Satani! Kovileli ni zintu za Ireeza, kono chanzintu zavaantu."<sup>34</sup> Linu cha sumpa chinavuungi ni varutwana vakwe hamwina, ni kucho kuvali, "heva zumwi usaka kunichilira, u swanera kulikana iye mwine, anyemune chifapano chakwe, ni kunichilira."<sup>35</sup> Kakuti yense yosaka kuhaza vuhalo vwakwe ka vusinyeherwe, imi yense yo sinyeherwa vuhalo vwakwe chevaka lyangu ni Iya Ivangeli, mwa vuhaze.<sup>36</sup> Chinzi chawana muntu, ku waana inkanda yonse, ni kusinyeherwa vuhalo bwakwe?<sup>37</sup> Chinzi muntu chawola kuha mu kuchinchana ni vuhalo vwakwe?<sup>38</sup> Yense yoni swavera ni maanzwi angu munu muchivi cha lusika, Mwaana o Muntu ka muswavere hakeza munkaanya Ivesi hamwina ni mailoi a jolola."

## Inkaushanyo 9

<sup>1</sup> Imi nacho kuvali; "chavusakusima ni milwirite, kwina vamwi kwenu inwe zimene hanu va sete nivasoole lufu ni vasesi kuvona muvuso wa Ireeza ciukeza ni ziho."<sup>2</sup> Imi mazuva ahinde iyaza nikamwiina hahita, Jesu nahinda Pitolosi, ni Jakobo ni Johani nakaya nabo hewulu lye ruundu, bonke bo bulyo. Linu cha chinja mazimo havusu bwabo.<sup>3</sup> Zizwato zakwe chiza taanga ku venya, kutuva kuhitiliza, kutuva kuhita zituviso zonze hansi muzi wola kutuvila.<sup>4</sup> Linu Eliya ni Mushe chiveza kuboneka kuvali, imi vava kuwamba ni Jesu.<sup>5</sup> Pitorosi chetava nikucho kwa Jesu, "Muruti, kwina neenza hatwina hanu, cwale niha kwina bulyo tuzaake zitoomba zotatwe, chimwiina chako, chimwiina cha Mushe ni chimwiina cha Eliya."<sup>6</sup> (Mukuti kena avezi choku wamba, mi chivavatiite.)<sup>7</sup> Ikope nilyeza ni kuva wumba. Linu liinzwi chilya zwa mwi kope, "Unzu mwanangu wa Muswisu uni suni, muteeke kwaali."<sup>8</sup> Haho bulyo, havazoolola, kena vavakusi bwene zumwi yavena navo kwanda Jesu.<sup>9</sup> Mukuka vusuuka iruundu, nichava laela kusa wambila muntu kazi vavona, hesi Mwana Muntu cha vuswa kuvafu.<sup>10</sup> Chiva ili bikira indaba mukati kavo, imi nivawambolisana mukati kavo cha "Ku vuuka kuvavuwire" chi iwola kutoloka.<sup>11</sup> Chiva muvuuzi "Chizi vañoli hava chokuti Eliya uswanela kwiza lwentanzi?"<sup>12</sup> Chacho kuvali, Eliya initi ukeza lwentaanzi kukuvoza zintu sonnse neenza. "Linu chinzi haku ñoletwe kuti Mwana Muuntu mwa sukuluke muzintu zingi nikuhindwa uvu kena chimwi?"<sup>13</sup> Kono nimilwira kuti Eliya chavakezi, mi vavapangi zonse zivava kusaka kwali, sina mañoli mu awamila ku amana naye."<sup>14</sup> Imi havakabola kuvarutwana, ni vona chinavuungi chiva zimbulukitwe ni vañoli vava ku kunana navo.<sup>15</sup> Imi hava muvona, chinavuungi chiva komokwa niku tilila kwali ku mulumelisa.<sup>16</sup> Navuuzi varutwana, "Chinzi chi mukwete ku kanana navo."<sup>17</sup> Zumwi mu chinavuungi namu mwitava. "Muruti, naleta

mwanangu waswingu kwako. Wina luhuhu lumukanisa kuwamba, 18 lumu hindeka, niku mudanseeka hansi nikuzwisa ifulo kumulomo, ni kusuma meeno akwe niku zuminina mubili. Na kumbira varutwai vako kulu zwise kono vakangwa.” 19 Navetava, “masika asa zumini, muku hinde inako ikuma kuhi ninikele nawe? Kanive nanwe inako ikumahi? Mumu lete kwangu.” 20 Ni valeta muswisu kwali. imi luhuhu haluvona Jesu, hohwaho chilwa kumu nyunga ni kumuwisa hansi. Muswisu nawila hansi niku zwa ifulo kumulomo. 21 Jesu cha vuza vesi wa muswisu, “Kuzwa lili nena vuti?” Vesi chivati, “kuzwa vunini bwake. 22 Lumu wisikizanga hamulimu kamba mu menzi ni kusaka kumusinya. Heva uwola kuchita cimwi, tufwire nse nikutu tusa.” 23 Jesu chati kwali, “Heva uwola? Zose zintu ziwoleka kozuna yo zumina.” 24 “Hohwaho insi wa muhwile chahuwa nikucho kuti, “Ni zumina! Tuse kusa zumina kwangu!” 25 Jesu havona cinavuungi nichu tilile kuvali, cha kalimela luhuhu zisa jololi nati: “Iwe luhuhu lokusa wamba nikusazuwa, niku laela, uzwe kwali, kanji novoleli kumwinjila.” 26 Chilwa lila ahulu nikunyunga muswisu ni kukumusiya. Muswisu navonahala ubu sakayofwiile, nji kuti vuungi nivwati “U fwiile.” 27 Kono Jesu chamuwonda kwiyaza niku muzimanika mwiwulu, imi muswisu chazimana mwiwulu. 28 Hacheza kwinjira muzuvo, varutwana vakwe ni vamuvuza kumbali, “Chinzi iswe hatusana twawola kuzizwisa?” 29 Nacho kuvali, “Zina vuti kaziwoli kuzwiswa mbwita chentapelo.” 30 Chiva kazwako ni kuhita cha Galileya. Kana avakusaka niumwina kwiziva kubena, 31 kakuti avakuruta varutwana vakwe: Nacho kuvali, “Mwana Muntu mwahewe mumanza avaantu, imi muvamwihaye. Imi chinivamwihaya, chikwahita mazuva wo tatwe ka vuuke.” 32 Kono kana vavazuwisisi iyi indava, imi vavatite kumuvuza. 33 Ni chibeza kwa Kapanauma. imi havena munzuvo chava vuza, “Saka muka wambolanzi mu nzila?” 34 Kono vava totwere. Mukuti vava kukavulikananisa munzila za kucho njeni mukulwana. 35 Nekala hansi nikusupa venekumi ni vovere hawiina, ni kucho kuvali, “Yosaka kuva wentanzi, ave wamamanmani kuvonse ni kuva muhikaana wavonse. 36 Chahinda muhwirezana ni ku muvika mukati kavo. namubika hamavoko akwe nikucho kuvali, 37 “Yese yo tambula muhwire winavuti mwizina lyangu, name uni tambula, imi heva umwi unitambula, katambuli ime memeena, kono ni yavanitumi.” 38 Johani nati kwali, “Muruti, tuva voni umwi yo zwise madimona mwizina lyako nitwa muziimika, mukuti katwi chilili.” 39 Imi Jesu chati, “Kanji mumu ziimiki, kakuti kakwina yete natende mutendo mukando mwizina lyangu ni kuzwahateni kusanduka kuwamba chintu chivilala changu. 40 Yense yasa tulwisi nji wetu. 41 Yese yo kuha inkomoki ya mezi akunywa kakuti uwila kwa Keresite, chovusakusima niti kwenu, kete naluze mupuzo wakwe. 42 Yense yetena letele umwi wava vahwilezana vazumina kwangu kuti awe, uyelele kusungwa ivwe ikando ni kusohelwa mwiwate. 43 Chi kuti iyaza lyako likuretera kuwa, linokole kwateni. Kulotu kwako kuwana vuhalo vusamaani, kuhita kuba ni mayaza ovele ni kuke njila mulihele, mumulilo usa zimiswa. 44 Musafwi isene ni mulilo usazimiswa. 45 Heva itende lyako likuletiseza kuwa, linokole kwateni. Kukuyelele kwinjila mubuhalo nochunkuta, kuhita kuva ni matende ovele ni kuka sohelwa mulihele. 46 Mu safwii isene mi nimulilo usa zimiswa. 47 Heva liinso lyako



li kuletela kuti uwe, li nongomone mwateni. Kuku yelele kwinjira mwipuso ya Ireeza ni liso limwiina, kuhita kuke njira mulihere ni meeso overe. <sup>48</sup> Uko masene avo kaafwi, ni mulilo usa zimiswa. <sup>49</sup> Mukuti umwi no umwi mwa luungwe sautu ni mulilo. <sup>50</sup> Isautu ilotu, kono heva isautu chilwa sampuka, uwoola vule kuli tenda isautu hape? Muve mwisautu mukati kenu, imi muve ni nkoozo niva mwenu.

## Inkauhanyo 10

<sup>1</sup> Jesu na asiya china chivaka ni kuyenda ku chikiriti cha Judeya niku chivaka mwishilya lyalwizi lwaJorodani, imi chinavuungi ni cheza kwaali hape. Ava kuvaluta hape, uvu hauvali mukwa wake. <sup>2</sup> Imi vafarisi chiveeza kwali kukumulika ni kuvuza, Kuyelegele ku mukwame ku kaana mwihyavwe?” <sup>3</sup> Netava, “Chinzi chava milaeli Mushe?” <sup>4</sup> “Chivati, “Mushe avo zuminini mukwame kuñola iñolo lye nkauhano nikumutanda.” <sup>5</sup> “Ivaali kukukutuhala kwe nkulo zenu chingi avamiñoleli uwu mulao,” Jesu naati kuvali. <sup>6</sup> Kono kumatangilo empupo, 'Ireeza avavapangi mukwame ni mwanakazi.' <sup>7</sup> Cheli ivaka mukwame kasiye vesi ni vanyina ni ku ñambatila kwa mwihyabwe, <sup>8</sup> mi vovele kavave inyama imwiina. 'mukuti kavasili vovele, kono inyama imwiina. <sup>9</sup> Kuzwaho Ireeza chavakopanyi hamwiina, ka kwina muntu yochihita hakati.” <sup>10</sup> Havaveena munzuvo, valutwana chiva muvuza hape ku amana nezi. <sup>11</sup> Naati kuvali, “Yense yokana mwihyabwe niku sesa ungi mwanakazi uchita vusangu kwali. <sup>12</sup> hakana mwihyabwe niku seswa kuungi mukwame, uchita vusangu.” <sup>13</sup> Chivaleeta vahwilezana vavo kwali kuti pona chova woondava, imi valutwana chivava kalimela. <sup>14</sup> Kono Jesu hachaillemuha, kenaava taveli ni kucho kuvali, “Muzuminine vahwilezana kwiza kwangu, kanji mu vakanini, mukuti muvuso wa Ireeza waavo vaswana naavo. <sup>15</sup> Chovusakusima niti kwenu, yense yasa satambuli muvuso wa Ireeza uvu muhwilezana cheniti kete naaka winjile.” <sup>16</sup> Linu chahinda vahwilezana ni ku va kumbata mu mavoko akwe niku vafuyola chaku vika mayanza akwe havali. <sup>17</sup> Imi hatanga lweendo lwakwe, mukwame chatilila kwali ni kukamufukama havusu bwakwe, ni kuvuza, “Muluti wina nenza, chinzi chinitamehete ku chita kuti niyole vuhalo vusamani?” <sup>18</sup> “Imi Jesu nati, “chinzi honisumpa wina nenza? Kakwina wina nenza, mbwita Ireeza yeyena. <sup>19</sup> Mwizi intaelo: kanji wihayi, kanji utendi vusangu, kanji wivi, kanji upaki mapa, kanji uchengeleli, kuteke isoo ni nyoko.” <sup>20</sup> Mukwame nati, “Muluti, zonse izi zintu nibazikuteki kuzwa kubuhya bwangu.” <sup>21</sup> Jesu chikumulola ni kumusuna. Chati kwali, “Chintu chimwina chobulite. Utamehete kuwuzwa zonse zokwete ni kuziha kubahumanehi, imi kove ni chifumu chakwiwulu. Linu wize, nichilile.” <sup>22</sup> Kono chevaka lyechi chiwambo, naboneka kuwilwa hahulu chazwaho ni kuyenda imi nayenda naswabite, mukuti abena chifumu chingi. <sup>23</sup> Jesu nalolalola nikucho varutwana vakwe, “Kukutu vuti ku vahumine kwinjila muvuso wa Ireeza!” <sup>24</sup> Varutwana niva komokiswa kuziwambo zakwe. Imi Jesu navolela kucho kuvali, “Vahwile, ku ka vo vule kwi njile mu muvuso we Ireeza! <sup>25</sup> Ku huya kuti i kamere injile muliso lye ndonga, ku hita muntu wo muhumi kwi njila mu muvuso we Ireeza.” <sup>26</sup> Vava komokwa vukando ni kuwambisana, “Linu njeni yowola

kuhazwa?”<sup>27</sup> Jesu chavalola ni kucho, “Nivantu kakuwoleki, kono isiñi niIreeza. Mukuti zonse zintu ziwoleka chaIreeza.”<sup>28</sup> Pitolosi natanga kuwamba kwali, “Lole, tuvaka siyi zintu zonse ni kukwichilila.”<sup>29</sup> Jesu nati, “Chavusakusima nicho kwenu, kakwina waka siya inzubo, kamba vanaswisu, kamba vanakazana, kamba vanyina, kamba vesi, kamba vahwile, kamba inkanda, kachangu, nicheIvangeli,<sup>30</sup> Yaseti natambule chamwandaa kuvuungi hahanu mweinu inkanda: mazuvo, ni vanaswisu, ni vanakazana, ni vanyina, ni vahwile, ni zivaka, chamasukuluka, ni munkanda ikeza, vuhalo vusamani.<sup>31</sup> Kono vangi vahitile kavave va mamani-mani, ni vamamani-mani kuva matangilo.”<sup>32</sup> Vavena mumugwagwa, kuya kwa Jerusalema, imi Jesu avena havunsu vwavo. Varutwana vava komoketwe, ni vavamwichilile vavatite. Linu Jesu nahinda vama mayanza ovele nivovele kumbali hape nikutanga kuva wambila zete chiziwola kutendahala haho kwali.<sup>33</sup> “Muvone, tukaya hesi kwa Jerusalema, imi Mwana Muntu kakahewe kuvapurisita vakulwana ni Vañoli.<sup>34</sup> Kava munyanse hesi kulufu nikumuha kuVamachava. Kavamukuve, kumuswila, kumushupa, ni kumwihaya. Kono chikwahita mazuva otatwe kavuke.”<sup>35</sup> Jakobo ni Johani, vaana swisu va Zevedia, chiveza kwali ni kumuti, “Muluti, tusaka kuti iwe ututendele zonse zitu kukumbila.”<sup>36</sup> Chati kuvali, “Chinzi chimusaka kuti nimi tendele?”<sup>37</sup> Chivati, “Tu zuminine kwikala nawe mwi kanya yako, umwi kuvulyo vwako ni umwi ku vuzohoto vwako.”<sup>38</sup> Kono Jesu chavetava, “Ka mwizi chimukwete kukumbila. Muwola kunywa munkomoki yete ni nywe kamba kuva munkolovezo yete ni kolovezwe chayo?”<sup>39</sup> “Chivacho kwali, “Tuwola” Jesu nati kuvali, “Inkomoki yete ninywe, mumuinywe. imi ninkolovezo ini kolovezwe chayo, nanwe kamu ikolovezwe.<sup>40</sup> Imi njeni yete chiwikala kuvulyo vweyanza lyangu kamba ku vuzohoto vweyanza lyangu kahena njikwangu kuha, kono njikwavo avo vava ivikiilwe.”<sup>41</sup> Vamwi varutwana vena ikumi havazuwa ichi, chivataanga ku nyerererwa Jakovo ni Johani.<sup>42</sup> Jesu chava sumpila kwali nikucho, “Mwizi avo vezibahele kuva vayendisi va Machava vava lyatilila, ni vantu va sepahala vavelekisa mulao mukando hewulu lyavo.<sup>43</sup> Kono ketenikuve bulyo mukati kenu. Yense yosaka kuva mukando mukati kenu uyelela kuva muhikana wenu,<sup>44</sup> ni yense yosaka kuva kuvusu mukati kenu uyelela kuva chikombwa chavonse.<sup>45</sup> Mukuti Mwana Muntu kena avakezi ku kutendelwa, kono kukutenda, ni kwiza kuha vuhalo bwakwe kulukulula vaangi.”<sup>46</sup> Chiveza kwa Jeriko. Havali kuzwa mwa Jeriko ni varutwana vakwe ni chinavuungi, mwana wa Timea, Vatileya, mukumbiiri wachivofu, Avekele kumbali ninzila.<sup>47</sup> Hazuwa kuti nji Jesu wa Nazareni, chatanga kuhuwa ni kuwamba, “Jesu, Mwana wa Dafita, nifwile inse!”<sup>48</sup> Vaangi chiva kalimela chivofu chamumbila kuti atontole. Kono chahuwa kukekeza, “Mwana Dafita, ni fwile inse!”<sup>49</sup> Jesu chazimana ni kulaela kuti asumpwe. Chiva sumpa chivofu chamukwame, nivati “U kole, “Ziimane! U ku sumpa.”<sup>50</sup> Cha sohela kuna inguvo yakwe, kulotoka, nikwiza kwa Jesu.<sup>51</sup> Imi Jesu chamwitava nacho, “Chinzi chosaka kuti nikuchitile?” Chivofu cha mukwame chichati, “Muluti wangu, nisaka kuvolelwa kuvona kwangu.”<sup>52</sup> Imi Jesu nacho kwaali, “Kwiya. Itumero yako chiyakuhaza. “Hohyaho chawola kuvoona hape, nikumwichilila

munzila.

## **Ikauhanyo 11**

<sup>1</sup> Linu hachi va keza mwa Jerusalama, va vena hafuhi ni Betefage ni Betenia, he rundu lya Olive, mi Jesu cha tuma vovere va varutwani vakwe, <sup>2</sup> mi cha va wambila, “Muyende ha munzi wutuli lolele nawo. Haho kuti chimwa wi njila, ka muwane imberesa iseni kumbereswa. Mu isumunune mi mu ka ini letere. <sup>3</sup> Mi haiva zumwi mwa wambe kwenu, 'Chinzi ha mupanga ichi?' mu swanera kuwamba, 'Simwine u isaka mi haho vulyo mutuka itumine kunu.’” <sup>4</sup> Vava yendi mi chivaka wana imbongolo isuminwe ha mulyango hanze he nzila iyalukite, mi chi ba isumununa. <sup>5</sup> Vamwi vantu vavali ku zimene hateni ni chiva wamba kubali, “Mutenda nzi, ha mu sumununa imbongolo iyo?” <sup>6</sup> Vava wambi kuvali mwavava teli Jesu, mi vantu chi vava siya kuti ba yende. <sup>7</sup> Valutwani vovele chi ba ileta imbongolo kwa Jesu mi chi va zindwelela inguvo zavo kuti Jesu a tante hateni. <sup>8</sup> Vungi vwa vantu ni va zala zizwato zavo munzila, mi vamwi ni va zala mitavi yi va va ku tema mu mawa. <sup>9</sup> Avo vavena ha busu bwakwe navo vavali kumwi chilire chiva huwa, “Hosana! Imbuyoti njozo wiza mwi zina lya Simwine. <sup>10</sup> Imbuyoti yo muvuso ukezite weshetu Davida. Hosana mwi wulu!” <sup>11</sup> Mi Jesu che njila mwa Jerusalem ni kuya mwi tempele ni kuka lola hazintu zonse. Linu, inako kakuti chi yi ba manite, cha ya kwa Betenia ni vena ikumi ka vovele. <sup>12</sup> Izuva lichilira, hava ka vola kwa Betenia, ava fwile nzala. <sup>13</sup> Ha vona isamu lye ifenga livena makova kuule zana, cha yenda kuti mwendi ka wane kwateni muselo. Mi hakeza kwateni kakwina chava wani konzi makoba, kakuti kana ibali inako ye misero ye feiga. <sup>14</sup> Cha wambila kulili, “Kakwina yete na lye muselo kwako hape.” Mi balutwani bakwe vava zuwi. <sup>15</sup> Ni beza kwa Jerusalama, mi che njila mwi tempele ni ku kalisa kuzwisa bawulisi hanze ni ba ba kuwula mwi tempele. Cha pindumuna mataafule a ba tambuzana mali ni zipula zabo ba ba ku wuza inkwilimba. <sup>16</sup> Kena a ba ku zuminina muntu yo hindite choku wuza kuhita mukati ke itempele. <sup>17</sup> Na valuta nati, “Ku ñoletwa, “I nzubo yangu mu yi sumpwa inzubo ye tapelo ya mishobo yonse? Kono inwe chi mwa yi panga maipato a vasa. <sup>18</sup> Vapuritsita bakulwana ni bañoli ni ba zuwa za waamba, mi ni vaa saka inzila iba wola ku mwihaya. Mi vava tiite kakuti vungi vwa vantu vava komokiswe mwa va ku lutila. <sup>19</sup> Mi chitengu muchivali kwizilanga, vavali kusiyanga muleneñi. <sup>20</sup> Havavali kukavu yenda kakusasani, chi ba bona i samu lye ifeiga lizumite kutwala ku mihisi yalyo. <sup>21</sup> Pitorosi cha kumbulukwa mi cha wamba, “Rabbi, bone! I samu lye ifeiga lyo va kuuti li zumite.” <sup>22</sup> Jesu cha ve tava, “Mu ve ni ntumelo kwe Ireeza. <sup>23</sup> Cha vuniti ni mi wambile ye nse yete a wambe kweli iluundu, 'Nyamuke mi u lizindile umwine mwiwate,' mi heva ka hakanyehi munkulo yakwe kono na zumina kuti mwa wambila ka ku tendahale, icho Ireza chete na pange. <sup>24</sup> Lyahanu ni wamba kwenu: Chonse chete mulapele ni ku chi kumbila, muzumine kuti chimwa chitambula, mi ka chive nji chenu. <sup>25</sup> Heva no zima ni ku lapela, u lukela kuwondela chonse ca ku fosekeze zumwi, ili kuti Ishenu wina kwiwulu naye ami wondela milandu yanu.” <sup>26</sup> Kono haiva nosa wondeli, nanga Iso wina kiwulu kete aku wondela zivi zako. <sup>27</sup> Chi veza kwa Jerusalem hape.

Jesu hava kuka vuyenda mwi tempele, mupurisita mukulwana, vañoli, ni vakulwana chi veza kwali. <sup>28</sup> Chiva wamba kwali, “chowuhi mulao wo panga izi zintu? imi njeni ya va kuhi mataa a ku zi panga?” <sup>29</sup> Jesu chawamba, “Ka ni mivuze i mpuzo yonke. Muni wambile mi name ka ni mi wambile kuti chaahi maata anipanga izi zintu. <sup>30</sup> I nkolobezo ya Joani, i ba kuzwa kwi wulu kamba ku vaantu? Mu ni tabe.” <sup>31</sup> Chi va wambola mukati kavo mi chi kanana mi chi ku wamba, “Heva tuwamba, 'kuzwa kwiwulu,' ka wambe, 'chinzi hamusena muva muzumini?” <sup>32</sup> Kono heba nituwamba', Kuzwa kuvaantu...” Vava tiite vaantu, kakuli zumwi ni zumwi ava zumine kuti Joani ivali mupolofita. <sup>33</sup> Linu chive tava Jesu ni vati, “Ka twizi.” Linu Jesu na va cho, “Name kani mi wambili chaahi maata ani panga zinu zintu.”

## Ikauhanyo 12

<sup>1</sup> Lyinu Jesu na tanga kuva ruta che inguli. Nati, “Mukwaame a va vyalite iwa lye feiga, cholu zakiriza, mi chasa ne chikomba choku kamwina iveine. Ava zaki itawala mi chatambika iwa kuva vyala iveine. Lyahanu iye chayenda mumusipili. <sup>2</sup> He nako iswanera, chaka tumina muhikana kuva vyali ve veine kwiza kuhinda kuvali zimwi zihantu zo mwiwa lye veine. <sup>3</sup> vava muhindi, kumundama, ni kumuvonza nikusena chimwi cha hindite. <sup>4</sup> Hape chavatumina zumwi muhikana, mi chiva muhorofaza mumutwi ni kumu nyandisa ahulu. <sup>5</sup> Chatumina hape zumwi, mi uzu vavamwi hayi. Vava pangi vangi vamwi mwinzira iswana, kundama vamwi nikwi haya vamwi. <sup>6</sup> Avali kusina yenke zumwi mutu wo kutumina, mwana yo sakiwa. Avali njiwa mamani-mani wava tumini kuvali. Mi nati, “Muvaka kuteke mwanangu.” <sup>7</sup> Kono vavyali vewa chivali wambira zumwi ku zumwi, “Uzu njeye swana, Mwize, tumwi haye, mi chifumu muchive chetu.” <sup>8</sup> Vava muwondi, kumwihaya niku mu zindira hanze lyewa lyeveine. <sup>9</sup> Linu, chizi chete apange mwine wewa lye veine? Mwakeze nikwiza kushinya babyali veveine ni kwiza kuha iwa lyeveine kuvamwi. <sup>10</sup> Kamwini kuvala ili iñolo? 'Ivwe ilyo vazaki livava kani, livapangwa musumo. <sup>11</sup> Ichi chivali kuzwa kwa Simwiine, mi chilotu mumenso entu.” <sup>12</sup> Niva zeza kusumina Jesu, mi vavatiyite chinzi, ka kuti vavezi kuti ava wambi iyi nguli kutondeka avo. Chiva musiya ni kuliyezeza. <sup>13</sup> Linu chivatumika vamwi vama Farisi niva Heroda kwali kuka mu cheesa cha manzwi. <sup>14</sup> Mi havakeza, chiva wamba kwali, “Muruti, twizi kuti ko wina indava ne kuti muntu zumwe u tiinzi, mane hape u hinda vantu choku lyikana. U ruta cho vuniti inzira ye Ireeza. Kana mulao kulihwa mutero kwa Sisare kamba vule? Tulihe kamba sanzi tulihi?” <sup>15</sup> Kono Jesu avali kwizi mwipo wavo ni kuwamba kuvali. “Chizi hamuni lika? Munitambike i koviri iri kuti ni lole halli.” <sup>16</sup> Chiva leta yonke kwa Jesu. Cha wamba kuvali, “Chiswaniso chani ichi ni ziñoletwe?” Chivati, Sisare.” <sup>17</sup> Jesu chati, “Muhe kwa Sisare zintu zili za Sisare, ni kwe Ireeza zintu zili ze Ireeza.” Chava komokisa. <sup>18</sup> Linu va Saduki, vata kuti kakwina kuvuka kuvafwire, chiveza kwali. Chiva muvuza, nivati, <sup>19</sup> “Muruti, Mushe ava tuñoleri, 'Haiva mukulwomuntu wa fwa ni kusiya muihyabwe, niku sena mwana, mwanche uswanera kuti a sese muka mukulwe, ne kumu zaalira vana.' <sup>20</sup> Ku vena vakwame vakwana iyanza nivovere; we intanzi cha hinda mukulwakazi kusesa mi nikufwa, kusiya kakwina mwana. <sup>21</sup> Linu

wovuveri cha hinda uzo mukulwakazi ni kufwa, kusiya kakwina mwana. Niwo vutatu naye ni kuswana. <sup>22</sup> Mane ne woku mana iyaanza ne toovere na vula ku siya vaana. Ku mamanmani a teni mukulwaakazi naye choku fwa. <sup>23</sup> Muku vuka kwa vafu, chiva vuka, ka yive mukani? Ka kuti vonse va mana iyaanza ne toovere vava musesi.” <sup>24</sup> Jesu chawamba, Ili kajilyona ivaka hamupanga mafosisa, ka kuti ka mwizi mañolo kamba ziho ze Ireeza? <sup>25</sup> Kakuti hateniva vuke kuvafwiire, kate niva sese kamba kusesiwa, kono kavaswane uvu mañiroyi mwi wulu. <sup>26</sup> Kono kuyamana nivafwire avo vete niva vunswe, kena muvavali mwimbuka ya Mushe, mwi ndava iyama chihumbu, vule Ireeza mwava wambiri kwali ni kuti, 'Jeme Ireeza wa Amburahama ni Ireeza wa Isaka ni Ireeza wa Jakovo? <sup>27</sup> Kena ji Ireeza wava fwire, kono wavahala. Mwina muma fosisa.” <sup>28</sup> Zumwi wava ñoli cheza nikwiza kuzuwa ingambolo yavo; ava voni kuti Jesu avave tavi hande. Chamuvuza, “Jouhi mulao wina vutokwa hayonse?” <sup>29</sup> Jesu chetava, “Ovu tokwa kuhitiliza jowu, 'Zuwe, Isiraele, Simwine Ireeza wetu, Simwine yenke. <sup>30</sup> U swanera kusaka Simwine Ireeza wako che nkulo yako yonse, chemunahano wako onse, che mizezo yako yonse ni cheziho zako zonse.' <sup>31</sup> Ovuvure mulao jowu, 'Uswanera kusaka yo wikala hembali nawe uvu molisakira umwine'. Kakwina imwi milao mikando kuhita iyi.” <sup>32</sup> Mu ñoli chati, 'Yowina hande, Muruti! Wawamba vuniti kuti Ireeza yenke, ni kuti kakwina zumwi kwanda yakwe. <sup>33</sup> Ku musaka ni nkulo yako yonse ni kutwisiso yako yonse ni cheziho zako zonse, ni kusaka yowikala hembali nawe sina molisakira iwe umwine, mane ihita nagati ineo zokusumika ni zitavero.” <sup>34</sup> Linu Jesu havona kuti waha ikalavo yo vutali, chati kwali, “Kowina kule ni muvuso we Ireeza.” Hakumana zina, kakwina zumwi yava zezi kuvuza Jesu ipuzo hape. <sup>35</sup> Mi Jesu chetava, yaha nakwete kuruta mwi tempere; chati, “Kwina vule kuti vañoli vawambe Keresite mwana wa Davinda? <sup>36</sup> Davinda iye mwine, mu Luhuhu lu Njolola, avacho, wikale kwi nyanza lyangu lyechiliso, kusikira hate nini pangire vakulwisa maltatiro a matende a ko.' <sup>37</sup> Davinda iyemwine umu supa kuti 'Simwine; cwale kuwoleka vule kuti Keresite ave mwana wa Davida?” Chisi chikando chivali kusangitwe ahulu kutekereza kwali. <sup>38</sup> Mututo zakwe Jesu ava wambi, “Mutokomere vañoli, vasaka ahulu kuyenda muzizwato zilele mi vasaka itumeriso ziva wana muzivaka zomusika <sup>39</sup> mi vasaka kuwana zipura zovulena muma sinangonge ni zivaka za malena ha mikiti. <sup>40</sup> Miva vasinya mazuvo e mberwa, mi valapera itapero inde luli iri kuti vantu vavone. Ava vakwame kavatambule ikatulo ikando luli.” <sup>41</sup> Linu Jesu chekala hansi kumbali ni ka tanda ke neo muchivaka che tempere; avali kukwete kulwera vantu chiva vika mashereñi avo muchitanda. Vungi vwava fumite vavali kuvika mashereñi mangi. <sup>42</sup> Chikwakeza mukulwakazi avali kufwirirwe we mberwa nikwiza kuvika makoviri overe, alikana i shiriñi. <sup>43</sup> Mi chasupa varutwana vakwe ni kuva wambira, “Chovuniti ni miwambira, uzu mukulwakazi yasali wanini wa vikamo kuhita vonse vavika muchitanda che neo. <sup>44</sup> Kakuti vonse vaha kuzwisa hachifumu chavo, kono kuzwa havunjabwe bwakwe, wavikamo onse mashereñi aswanera kuli hazikiza ho.”

## Ikauhanyo 13

<sup>1</sup> Sina Jesu havali kuyenda kuzwa mwi tempere, zumwi kuva rutwana vakwe cha wamba kwali. “Muruti, lole ha mavwe akokiswa ni muyaho ukomokisa!” <sup>2</sup> Cha mu wambila, “Ubwene iyi mizako mikando?” Kakwina nangati ivwe lyonke lyete nili shale ni lilimbite limwi lyete nili kangwe kuwisa hanshi.” <sup>3</sup> Sina havali kwikere he Rundu lya Olive kulilolera ni tempere, Pitorosi, Jakovo, Johani ni Anderiasi chivamuvuza kwimbali, <sup>4</sup> “Tu wambile, izi zintu kazi pangahale lili? Zi supo nzi zitu lukere kuvona heva izi chi zina hafwihi niku pangahala?” <sup>5</sup> Jesu chatanga kuwamba kuvali, “Mutokomere kuti kakwina zumwiyante ami yembulule. <sup>6</sup> Vangi kavakeze mwizina lyangu ni kuti, 'Jime iye; mi kava yembulule vaangi. <sup>7</sup> Ha mu zuwa ze kondo, ni ma hulyuhulyu e kondo sanzi mu vileli; inzo zintu zi lukere kupangahala, kono mamanimani kaeni kusika. <sup>8</sup> Cho kuti i kanda kai lwise i kanda, muvuso ka u lwise mu vuso. Ka kuve ni zikinyeho mu zi vaka zimwi ni nanga. Aa njima ma tangilo a ku sasama kwaku huzumuka (kusumunuka). <sup>9</sup> Muve muva mameli venu mu vene. Mu vaka mi twale kuva si tutengo, mi kamu ka kavolwe mwi muma sinangonge. Kamu zimane ha vusi bwa vavusisi ni malena ke vaka lyangu, Sina vupaki kuvali. <sup>10</sup> Kono pili ivangeli lyi lukere ku ku taziwa mwi kanda zose. <sup>11</sup> Ha va mi sumina niku mi twala, sezi mu vilelezwa zete muwambe. Ka kuti mweyo ihola zeti muwambe kamu zi hewe; Kese i ve njenje mu wamba, kono Luhuhu mu Njolola. <sup>12</sup> Mukwakwe mutu ka veteke mukwake kwifuu, mi vesi mwana wa vo. Vaana kava zimane ni kulwisa bashemi va vo, nikuva letera kuvikiwa kwi ifu. <sup>13</sup> Mu mu toiwe kubatu vonse ivaka lye zina lyangu. Kono yense yate a wonderele hesi kuma mani mani, unzo muntu ka hazwe. <sup>14</sup> Chimwa vona vuvi vu dadola kuti bwina havusa swaneli( yo vala a zuwi sise), mu siye avo vena mwa Judea va tilile ku ma ruundu. <sup>15</sup> mi wina hakatungandu kezuvo sanzi a voli mwi zuvo kapa kuhinda cimwi mwa teni, <sup>16</sup> mi mu siye wina mwi waa, sanzi abolyi kuka hinda inguvo. <sup>17</sup> Kono bumai kwavo be minsi mwe yo i nako kapa vanyosa mweyo inako! <sup>18</sup> Mulapele kuti kanji nzi pangahali ha maliha. <sup>19</sup> Kakuti ka kuve ni manyando makando, aseni kuvonwa kutanga ku matangilo, aho Ireeza ha bumba i kanda, konji hanu, nanta, hape kese ni ku ve vulyo. <sup>20</sup> Hesi Simwine cha fwihaza mazuva, kakwina inyama yese ni hazwe, Kono kevaka lyi va ketetwe, avo vava keti ava fwihazi i palo ya mazuva. <sup>21</sup> Lyahanu heva zumwi chacho kuti, 'Vone, zunu kiresite!' kapa 'Vone, zuna hana!' sanzi mu zumini. <sup>22</sup> Kakuti va kiresite va mapa ni vapolofita va mapa muva voneke mi kavahe zisupo ni makazo, kuku yembulula, nanga niva ketetwe. <sup>23</sup> Mu tokomele! China mi wambila izi zintu niku sina i nako. <sup>24</sup> Kono chi amana manyando ayo mazuva, izuva kalisihiswe, mwezi kese uhe i seli lya teni, <sup>25</sup> i kaani kaziwe kwi wulu, mi ziho zina kwi ulu kazi nyanganiswe. <sup>26</sup> Lyaho kava vone Mwana Muntu na keza muma kope ni ziho zikando ne kanya. <sup>27</sup> Mi ka tume mañeloyi akwee mi ka kopanye hamwina ba ketetwe, kuzwa muma ihuhu zo nee, kuzwa ma mani mani e kanda kuya kumamanizo e wulu. <sup>28</sup> Muli tute ituto kwi samu lye Fenga, Haho mutavi hau zuma ni kuwisa makova alyo, mwi ziva kuti imbumbi chiyina hafuhi. <sup>29</sup> Mi hape, hamu vona i zi zintu nizi pangahala mwi zive kuti cho wina

hafwihi, ha fuhi ne mulyango. <sup>30</sup> Ka busakusima nimi wambila ulu lu zuvo kese lu fwee inzi zitu nizi seni kupangala. <sup>31</sup> I wulu ni kanda kazi mane, kono mazwi angu kese ni a mane. <sup>32</sup> Kono ku amana nelyo izuva kamba iyo inako, kakwina yo yizi, nangati mañiloyi, kamba Mwana, kono tayo. <sup>33</sup> Mu tokomere! Mulole, kakuti ka mwizi kuti inako nzi. <sup>34</sup> Ku swana iri mukwame yo yenda mumu musipili, u siya i zuvo yakwe niku vika bahikana vakwe kuku mamele i zuvo, zumwi ne zumwi ne musevezi wakwe, ni ku laela mungateli kuti a tonde. <sup>35</sup> Lyahanu mwikale ni mutonda, kakuti kamwizi aho simwine we zuvo yasaka vole kumuzi; i wola kuva muchitengu, ha kati ka masiku, mukombwe ciwa lila, kapa kakusasani. <sup>36</sup> Heva nakeza chokuhyera, kanji mumuzuminini kumi wana mulere. <sup>37</sup> Izo zini wamba kwenu ni ziwambira vonse: Mutonde!”

## Ikauhanyo 14

<sup>1</sup> Chiyi vali hanu mazuva overe niwuseni kusika mukiti we Paseka ni Mukiti we nkonko isena Mulungo. Mukulwana wavaPurisita ni vañoli vavali kunganisisa mwete vawolere kuwonda Jesu ni kumwihaya. <sup>2</sup> Ka kuti vavali kuwamba. “Isiñi hamukiti, iri kuti kanji kuvuki inyakanyaka mukati kavantu.” <sup>3</sup> Lyahanu Jesu avena mwa Betani mwizuvo ya Simoni we mbingwa, sina havali kwikere he tafule, mukulwakazi chakeza kwali ni votera lya alabasitera lyomunikiso undula ahulu, uvali wa menzi a nandi. Cha pwachula ivotera ni kuitira hamutwi wakwe. <sup>4</sup> Mi kuvena vamwi vavali kuvengete. Chiva wamba kukati kavo nivati, “Ivakanzi lye shinyehero iyi?” <sup>5</sup> Iwu munukiso uvali kuswanera kuwuziwa kumashereñi a hitilira miyanda yotatwe ye dinarii, ni kuha kuva shevete. Imi vavali kumu kalimera. <sup>6</sup> Kono Jesu chawamba, “Mu musiye yenke, mu mu kataleza nzi? Wapanga chitu chilotu kwangu. <sup>7</sup> Mwina inako yonse vashevete nanwe, mi inakao yonse imwa saka muwola kupanga zilotu kuvali, kono kete muve name inako yonse. <sup>8</sup> Wapanga icho cha wola: wa singa muvili wangu haku zikwa. <sup>9</sup> “Chovu niti ni wamba kwenu, konse uko ivangeli kwete ikakutaziwe mwi kanda yonse, icho chapanga uzu mukulwakazi kachika wambiwe, mwikupuzo yakwe.” <sup>10</sup> Lyinu Judasi Isikariyota, zumwe wava vena ikumi ne tovere, a va yendi ku vapurisita vakulwana kuti a wolye kumuva wuzukiza choku muva tambika. <sup>11</sup> Lyahanu mukulwana wa mapurisita hazizuwa, vavali kutavite ni kumu sepisa kumuha mashereñi. Chatanga kulola inzira yate awane chivaka cho kumutambika kuvali. <sup>12</sup> Mu izuva lye ntazi lye chinkwe chisena mumera, chinga va panga chitavero che imberere ye paseka, varutwana vakwe choku mucho kuti, “U saka kuti tuye kuhi kutu wola kuka ku vakanyeza zilyio ze paseka, iri kuti ukalye zilyo ze paseka? <sup>13</sup> Choku tuma vovere va varutwana vakwe choku vacho kuti, “Mu kwiya mu muleneñi, ku zwaho mumu wane mukwame yo hindite kahambwe kamentzi mwami katane. Mu muichirire. <sup>14</sup> Mu inzuvo yeeti a ke injire, mu muichirire mo mi muka cho kusi inzuvo kuti, ‘Muruti ucho kuti, inzuvo yangu yeti ni lyire ipaseka ne varutwana vangu yina kuhi?’” <sup>15</sup> Mwa a ka mutondeza inzuvo inkando yi vakanyizwe yahe wulu, muka tuvakanyeze mwateni.” <sup>16</sup> Varutwana ni va zwa ni kuyenda mumuleneñi. Mi ni va ka wani chimwe ne chimwe

china sina mwa a vawambiri kuvali, mi. <sup>17</sup> Ha chivali chitengu, chakeza ni vekumi nivovere. <sup>18</sup> Sina havavali kwi kere he tafule ni kulya, Jesu chati, “Chovuniti ni wamba kwenu, wumwina kwenu yo lya name.” <sup>19</sup> Vonse vavali lizuwi inkumbu, mi zumwi ni zumwi chiva wamba kwali, “Luli isiñi me?” <sup>20</sup> Jesu che tava ni kuvawamba kuvali, “nje zumwi wa vena ikumi ne vovere, yozo yo sunsa name inkonko mu kasuva. <sup>21</sup> Kakuti Mwana wo Muntu mwayende mwinzira iyo mañolo awamba kuyamana naye. Mi ku mayivite kozuo mukwame yo veteka Mwana o Muntu! Ku vaa shiyeme kuti kalyi uzu muntu na sana a va zalwa.” <sup>22</sup> Chi va si kwete kulyia, Jesu cha hinda chinkwe, ni kuchi fuyola, ni kuchi jamona. Ava chivahi ni kuwamba, “Muhinde ichi. Uwu chimuviri wangu.” <sup>23</sup> Chahinda i komoki, nikulitumera, ni kuitambika kuvali, mi vonse chiva nya kuili. <sup>24</sup> Chawamba kuvali, “Aya jamalaha angu echilikani, malaha awo etilirwe vangi. <sup>25</sup> Chovu niti niwamba kwenu, Kasane kani nywe hape kwezi zihikantu hape ze veine kusikira kusikira lina izuva hate kani inwe mumuvuso we Ireeza.” <sup>26</sup> Hachiva manite kuzimba luzimbo, chiva yenda hanze kwi Lundu lya Olive. <sup>27</sup> Jesu chata kuvali, “Muvonse mumunitiyire, kakuti kuñoletwe, 'Muni kave mulisani mi imberere kazi hasane.’” <sup>28</sup> Kono china mana kuvuswa hape, Kanili tangize kwenu kuya kwa Galileya.” <sup>29</sup> Pitorosi choku mucho kuti, “Nangati vonse kava ku tiyire ime keti ni ni ku tiyiire.” <sup>30</sup> Jesu chamu wambira kuti, “Cho vuniti nikuwambira, masiku a sunu, mukombwe ni useni kulira kovere, moni sapule kotwatwe.” <sup>31</sup> Kono Pitorosi chati, “Haiva nini wola kufwa nawe, kete nikusampule.” Vonse vava chiva panga i sepiso i swana. <sup>32</sup> Va veza ku chivaka chi sumpwa Getesimani, Jesu cho kucho varutwana vakwe, “Mu ikale a ha chini rapera.” <sup>33</sup> Cha hinda Pitorosi, Jakovo ni Johani choku zwa navo, choku tanga ku wirirwa ne ku katazaha a hulu. <sup>34</sup> Cha wamba kuvali, “Luhuhu lwangu lu zuwire ku chisa a hulu, nanga kwi nako yefu. Mu shale hanu ni kutonda.” <sup>35</sup> Jesu na ya ha vusuzana, choku wa hanshi, choku rapera kuti kambe ni ku wolyeka, iyi inako imu hitirire kwali. <sup>36</sup> Nati, “Abba, Tayo, zintu zonse zi wolyeka nawe. Zwisa iyi inkomoki kwangu. Kono isiñi chini saka, Kono yako.” <sup>37</sup> Chaka vola ni kwiza kuvawana valere, mi chawamba kwa Pitorosi, “Simoni, ulere? Wakangwa kutonda nagati i hola yonke?” <sup>38</sup> Mutonde ni kulapera iri kuti kanji mwinjiri mumuliko. Luhuhu che niti lusaka, kono inyama i kangitwe.” <sup>39</sup> Hape chayenda kule ni kukalapera, mi ava severisi manzwi a swana. <sup>40</sup> Hape cha vola ni kukawawana valere, kakuti menso avo avali kulema mi kena vavali kwizi cho kuwamba kwali. <sup>41</sup> Cho kuiza lo vutatu na vacho kuti, “Mu si lere ne ku pumula? Muvuke! inako chi ya sika. Muvone! Mwana o Muntu cha vekwa mumanza ava ezalivi. <sup>42</sup> Mu vuke; tuyende. Muvone, uzo yo ni veteka wina hafuhi.” <sup>43</sup> Cho usi kwete ku wamba, Judasi, zumwe wa vena ikumi ne tovere, choku sika, nena ni vantu vangi ni va ka kwete mikwale ni masavule, kukazwa ku vapurisita vakulwana, n vañoli, ni vakulwana. <sup>44</sup> Lyahanu yo muveteka avava here chisupo, kuti, “Uzo yete ni chunchune nji yena.” <sup>45</sup> Judasi hasika, pona aho cheza kwa Jesu nikuwamba, “‘Rabbi! mi chamu chunchuna. <sup>46</sup> Linu chivavika maanza hali ni kumu sumina. <sup>47</sup> Kono zumwi yava zimene hembali chazwisa mukwale niku kosola kutwi kwa muhikana wo mupurisita



mukulwana. <sup>48</sup> Jesu chawamba kuvali, “mu ka ni izilile mane ili musa, cha mikwale ni che inkolyi kwiza kuni wonda?” <sup>49</sup> Nivena nenwe izuva nezuya hini vaku siina nnaanwe izu nva niva kuluta mwi tempele, kena muva nisumini. Kono ichi chiva pangahali kuti intimana zi zuzilizwe.” <sup>50</sup> Mi vavena ni Jesu vava musiyi niku valeha. <sup>51</sup> Mu lombwaana, ya va zwete vulyo inguvo ivali kumuzingerete, avali kwi chilire Jesu. Aho vakwame hava mukwata, <sup>52</sup> chasiya inguvo ye line ni kutiya mapunu. <sup>53</sup> Vavatwali Jesu kumupurisita mukulwana. Uko vavali kungene naye vonse malena vmapurisita, vakulwana, niva ñoli. <sup>54</sup> Lyahanu Pitorosi avali kumwi chilire chaka vakazana, mane mbwita kukasika he rapa lya mupurisita mukulwana. Avake kali mukati kava ngateri, vavali kwina hembali ni muliro kuli tukusa. <sup>55</sup> Linu mukulwana wava purisita ni nkuta ya Majuda vonse vavali kungana vupaki vuhambiriza Jesu iri kuli vamwi haye. Kono kakwina vuvava wani. <sup>56</sup> Kakuti vangi vavaleti vupaki bwa mapa kumulwisa, kono mane vupaki bwavo kena vuva zumizani. <sup>57</sup> Vamwe ni va zimana avo choku mu hambiriza, ni vaati, <sup>58</sup> “Tu vamu zuwi nati, ‘Ka ni rutunune iyi itempere yi va pangwa cha manza, mi ku zwaho njeti nini pange yimwe yi sana yiva pangwa cha manza.’” <sup>59</sup> Mane nangati aho hape vupaki vwavo ni vwa vula ku zuminzana. <sup>60</sup> Mu purisita mukulwana ava zimani mukati kavo ni kuvuza Jesu, “Kowina iwe ikalavo? Chintu nzi ava vakwame zivapaka kuamana nawe?” <sup>61</sup> Kono avali kuntontwere ni kusetava chimwi. Hape mupurisita mukulwana chamuvuza ni kuti, “Jewe Keresite, mwana wozo yo fuyaulitwe?” <sup>62</sup> Jesu chati, “Jeme. Mi kovone Mwana o Muntu hasana kekale he yanza lyokulisa lya ziho ni kukeza ni makope e wulu.” <sup>63</sup> Mu purisita mukulwaana cha halula mukanjo wakwe ni kucho, “Tusi saka vumwi vupaki?” <sup>64</sup> Mwazuwa vunyefuli. Ikatulo yenu jeyihi?” Mi vonse chiva yatula uvu zumwi yoswanera ifu. <sup>65</sup> Vamwi chivatanga kumu swira mate ni kuwumba impata yakwe ni kumu vakula ni kucho kwali, “Porofite!” Mapokola chiva muhinda ni kuka mundama. <sup>66</sup> Linu Pitorosi havali kwina hanze ye rapa, omwina muhikana wo mukazana wo mupurisita mukulwana cheza kwali. <sup>67</sup> Avavoni Pitorosi sina havali kuzimene ha muliro kuli tukusa, mi chalola hande kwali. Mi cha wamba, “I we nawe uvali kwina nimu Nazareta, Jesu.” <sup>68</sup> Kono ava sampuli, nati, “Kanimwizi kamba kuzuwisisa chizi chowamba nacho.” Lyaho che jira mwirapa. <sup>69</sup> Kono muhikana wo mukazana umo chamuvona nikutanga kuwamba hape kwavo vavali kuzimene, “Uzu mukwame ji zumwi wavo!” <sup>70</sup> Kono cha kanana hape. Hakuhita inako zana vulyo avo vavali kuzimene ho vavali kuwamba kwa Pitorosi, “Kamaniti uzumwi wavo, kakuli nawe umu Galileya.” <sup>71</sup> Kono chatanga kalivika muchikuto ni kulinkonka, “Kanizi uzu mukwame umukwete kuwamba zakwe.” <sup>72</sup> Mukombwe yahaho chiwa lira lya vuveri. Mi Pitorosi cha hupula manzwi awo Jesu ava muwambiri: “Pilio mukombwe niuseni kulira tovere, moni sampule to tatwe.” Imi cha virera ni kulira.

## Ikauhanyo 15

<sup>1</sup> Kakusasani luli, bapurisita bakulwana choku kopana hamwiina ni bakulwana ni bañoli mi ni khuta yonse ya Majuda. Linu chi basumina

Jesu ni ku mutwala. Chi ba mu tambika kwa Pilato. <sup>2</sup> Pilato na mu buza, “Njiwe u Simwine wa Majuda?” Cha mwitaba, “Uwe njo wamba bulyo.” <sup>3</sup> Bapurisita bakulwana ba bali ku hambiza Jesu milandu mingi. <sup>4</sup> Hape Pilato cha mubuza, “Ko ni tabi? Bone milandu ku bungu yi ba leta ni ku ku hambiliza!” <sup>5</sup> Kono Jesu kana abali ku chi mwi taba Pilato, mi iyo ndaba ni ya mukomokisa. <sup>6</sup> Linu mu inako ya mukiti, Pilato a vali ku lukululanga kuvantu chifosi cho nke, chifosi chi vavali ku li kumbililanga. <sup>7</sup> Mwateni ni vasandukile muntolongo, mukati ka vehayi va vakwatilwe ka kuva ni chiyemba mu kusandukila, kuvena mukwame ya vali ku sumpwa Banabasi. <sup>8</sup> Vungi vwa vantu chi vweza kwa Pilato mi chi va tangisa ku mu kumbila ku va pangila sina mwa va pangililanga inako yonse. <sup>9</sup> Cha ve tava Pilato mi nati kuti, “Musaka kuti ime ni mi lukululele Simwine wa Majuda?” <sup>10</sup> Kakuti a vezi kuti i vali che vaka lya muna vapurista vakulwana ha va va hi Jesu kwali. <sup>11</sup> Kono vapurista vakulwana chi va shongeleketa vungi vwa vantu kuhuwa ahulu kuti Vanavasi a lukululwe. <sup>12</sup> Pilato chawe tava hape ni niku wamba, Chinzi cwale chini swanera kupanga ni Mulena wa Majuda” <sup>13</sup> Chiva huwerezha hape, “Mu kokotele!” <sup>14</sup> Pilato cha wamba kuvali, “Mulandu nzi wa tenda?” Kono chi ba huwa ahula ni ahulu, “Mu mu kokotele.” <sup>15</sup> Ka kuti Pilato abali ku saka ku zuwisa hande vantu, mi cho ku lukulula Banabasi. Cha shupa Jesu mi ni ku mubaha kuti ba mu kokotele. <sup>16</sup> Masole chi ba mutwala mukati ke ilapa (iri muleneŋi wo muvuso), mi chi ba sumpila masole bonse hamwina. <sup>17</sup> Chi ba zwatika Jesu chizwato chisubile mi chi ba zingela ihusi ya miya mi chi bai mu zwatika ku mutwi. <sup>18</sup> Linu chi ba tangisa ku mu lumelisa ni bati, “Osho, Simwine wa Majuda!” <sup>19</sup> Chi ba mukaba ha mutwi ka luhe ni ku muswila. Ba ba kuchola mazwi abo habusu bwa kwe ku mukuteka. <sup>20</sup> Mi linu ha chi ba mana ku mushubula, chi ba mu chupula chi zwato chi subila ni ku mu zwatika za kwe zi zwato, mi linu chi ba mu zwisa ku mutwala ku ka mu kokotela. <sup>21</sup> Chi ba bika ya bali kulihila fela mu musebezi, ya bali ku ka zwa mu nkanda, mukwame ya bali ku sumpwa Simoni wa Sirene (isi wa Alexander ni Rufusi); chi ba mu hambiliza ku kulika cifapano cha Jesu. <sup>22</sup> Masole chi ba twala Jesu ha cibaka chi sumpwa Gologota (i talusa kuti Cibaka cha katendere). <sup>23</sup> Ni ba mu newira iwaine ikopenywe ni shantukwe, kono ka hena a ba inywi. <sup>24</sup> Ni ba mu kokotela mi ci bali kauhanyeza zi zwato za kwe ka ku sumikiza kwi ziba kuti uzu lisole ni lisole ka hinde nzi. <sup>25</sup> I bali ke nako ya butatu ha ba mu kokotela. <sup>26</sup> Ha chishupo ku ba ñoletwa indaba za ku mu lwisa, “Simwine wa Majuda.” <sup>27</sup> Ku ba kokotelwe naye basa bobele, umwina ku malyo mi zumwi ku ma monso akwe. <sup>28</sup> Mi inolo ni le zuzilizwa lita kuti a be haiwa ni zifosi. <sup>29</sup> Avo vava kuhita vavali ku mutuka, ni va nyunga mwi twi yavo mi ni vati, “Ehe! U vali kuti no va lutununi itempele ni kui zaka hape mu ma zuva o tatwe, <sup>30</sup> U lihaze u mwine mi uzwe u suke ha chifapano!” <sup>31</sup> Mu nzila iswana vapurista vakulwana va vali ku mushuvula mukaati kavo navo, hamwina ni vañoli ni va cho, “A vali kuhaza vamwi, kono iye ka lihazi mwine. <sup>32</sup> Musiye Kilesite, Simwine wa Isilaele a zwe a suke ha chifapano hwa hanu, kuti tu mu vone mi tu zumine.” Mi va va kokotelwe naye na vo va vali ku mu sheununa. <sup>33</sup> Mi nako imane iyanza ha ikwana, keerima ni ka wumba inkaanda yonse mbwiita che inako yoku mana iyanza ni tone. <sup>34</sup> Mi

inako ya kumana iyanza ni tone, Jesu cha huwa ka linzwi li zuweka ahulu “Eloi, Eloi, la masabakatani?” I talusa kuti, Ireeza Wangu, Ireeza wangu, Wani siila nzi?”<sup>35</sup> Vamwi kwa va vo va va ku zimena he mbali, chi va zuwa mi ni vati, “Muvwene, cha sumpa Elia.”<sup>36</sup> Zumwi cha tiya, ku kahinda chiponchi ku chitila i waine i chanchumuka, cha chi bika ku mpela ya luhe, mi chi ku muha kuti a nywe. Uzo muntu cha wamba kuti, “Musiye! tubone kamba Elia ukezite kwiza ku mu hangula.”<sup>37</sup> Mi Jesu cha huwa ka linzwi li zuweka ahulu mi cho kufwa.<sup>38</sup> Isira lya mu itempele chi lya haluka tobele kutangiseza ku iwulu kutwala hansu.<sup>39</sup> Mi muyendisi we chisole ya ba zimine na lolete Jesu, ha vona kuti wa fwa mweyi nzila, cha wamba, “Cha Vuniti uzu mukwame ivali mwana we Ireeza.”<sup>40</sup> Ku vena vamwi vanakazi va va bwenene kule. Mukati kabo ku vena Maria Magadalena, Maria (inyina wa Jakobo munini ni Josesi) ni Salome.<sup>41</sup> Mi havena mwa Galileya va va mwi chilile ni ku mu tendela. Vamwi va vanakazi bangi na vo va va kezite naye kwa Jerusalema.<sup>42</sup> Mi nako ya chitengu ha yi sika, ka kuti li bali izuba lya mughivero nji kuti, izuba lwe Sabata, ni li seni ku sika.<sup>43</sup> Josefa ya va kuzwa kwa Arimatea ca keza mwa teni. A vali i membala ya vali ku kutekewa we chikwta cha Majuda, ya vali ku lindile mubuso wa Ireeza. Na kenjila kwa Pilato kakusa tiya ni ku ka kumbila mubili wa Jesu.<sup>44</sup> Mi Pilato cha komokwa ahulu hazuwa kuti Jesu wa fwa kale; ava sumpi mukulwana wa masole ni ku mubuza heba Jesu cha va ku fwile.<sup>45</sup> Pilato ha zuwa kumuyendisi wa masole kuti Jesu chavali kufwire, cha lukulwila chitunta chakwe kwa Josefa.<sup>46</sup> Josefa a va li ku wulite masira e lineni. Cha muzwisa ha chifapano, ni ku mu bungila mumasira e lineni, mi chi ku mulalika mu ikumbu lya ba chakuile mu mavwe. Linu cha pindumwina ibwe mu mulyango we ikumbu.<sup>47</sup> Maria Magadalena ni Maria inyina wa Josesi va va voni chivaka i cho Jesu mwa va zikwa.

## Ikauhanyo 16

<sup>1</sup> Izuba lye Sabata ha limana, Maria Magadalena ni Maria inyina wa Jakobo ni Salome, ni va wula mi nunkiso, kuti va yende va ka singe mubili wa Jesu.<sup>2</sup> Cho kufuma ahulu kakusasani ku sili kulunza izuva lye ntanzi lye Nsunda, chi ba yenda ku ikumbu izuva ni liseni kuñatula.<sup>3</sup> Va vali kuya vu wambola, “Njeni yeti a katu pindumwiine ibwe kuzwa ha menjililo e ikumbu?”<sup>4</sup> Mi hava nyamuna menso, chi va vona kuti ibwe liva pindumunwa, ka kuti livali ikando ahulu.<sup>5</sup> Ni benjila mu ikumbu mi chi va vona muswisu ya va zwete chizwato chi tupa, ne keele ku imbali ya malyo, mi va va komoketwe.<sup>6</sup> Chava wambila, kanji mutiyi. Mu saka Jesu, mu Nazareta, ya va kokoterwa. Waa vuka! Ka kwina hanu. Mu vone mu chivaka umo mu vava mulalikite.<sup>7</sup> Kono muyende, mu ka wambile valutwani ni Pitorosi kuti mwa yende havusu bwenu cha ya kwa Galileya. Kwateni kwete mu ka mvonene sina ha va milwili.<sup>8</sup> Ni va zwila hanze ni kutiya mu ikumbu, va vaIi ku chachalika ni ku komokwa. Ka kwina chi va va wambili zumwi kakuti va vali kutite ahulu.<sup>9</sup> Kakusasana luli mu izuva lye ntanzi lye Nsunda, kuzwa ha kuvuka, a va voneki lwe ntanzi kwa Maria Magadalena, iye ya va zwisize vadimona vena kumana iyanza ni vovele kwali.<sup>10</sup> Cha yenda ni ku ka wambila a vo va veena navo,

ha va sina mukufwilwa ni ku lila. <sup>11</sup> Chi va zuwa kuti u hala mi a va li vonahazi kwali, kono kahena va va zumini. <sup>12</sup> Mi izi zintu hazi mana ca vonahala mu mu ikalilo umwi ku vovele va vo, ha va vali ku zwa hanze ye nkanda. <sup>13</sup> Chi va yenda mi chi va ka wambila valutwani vakwe vonse, kono ka hena vava va zumini. <sup>14</sup> Ku zwaho Jesu cha voneka ku vene kumi ni umwina, ha vava ku ikela ni va zimbulukite itaafule. Cha va nyansa choku saa zumina kwaabo ni ku zuminina kwe inkulo. Ka kuti ka hena vava zumini avo va va muvoni ha vuuka ku vafu. <sup>15</sup> Cha va wambila, “Muyende munkanda mukutaze linzwi, mu inkanda yonse. <sup>16</sup> Iye yo zumina mi choku kolobezwa, kahazwa, mi uzo yasazumini kahewa mulandu. <sup>17</sup> Izi nje zishupo zete zi yende navo va zumina: mu izina lyangu ka va zwise vadimona. Ka va wambe mu mishobo mihya. <sup>18</sup> Muva toole inzoka cha mayanza abo, mi ni heti ni va nywe chonse chihaya kete ni chi ve ihaye, Ka va vike mayanza he iwulu lya valwele, mi ka va hole.” <sup>19</sup> Simwine chinga mana ku wamba ku vali, choku hindilwa ku iwulu mi choku ke ikala ku iyanza lya malyo lye Ireeza. <sup>20</sup> Valutwani chi va yenda ni ku ka kutaza konse konse, mi Simwine cha tenda navo, mi ne cha kooza linzwi che imakazo zi vali kuyenda navo.

## Luka

<sup>1</sup> Vangi vachi vava liki ku vika i nswanelo lye kande lyezo indava zichi zive zuzilizwa mukati ketu, <sup>2</sup> uvu vo vulyo mu vava zituheli mi avo kuzwila ku matangizo ivali impanki ni vahikana ve ñusa. <sup>3</sup> Cwale kwangu name ivali kuvoneka kuva hande - kuganisisa hande inzila ye indava yezo zintu kuzwila kuma tangizo - kuñola indava ye nswanelo yako iwe, Theophilus yo sepahala. <sup>4</sup> Ili ku pangila kuti mwi zive vuniti vwezo zintu zimu va lutwa. <sup>5</sup> Muma zuva a Heroda, simwine wa Judeya ku vali kwina mu purisita we zina lya Zakariya, ya vali kuzwa kwi inkauhanyo ya Abija. Mwi hyavwe avali kuzwa kuvana vechi kazana va Aruni, Izina lyakwe ivali nji Elizabeta. <sup>6</sup> Vonse vo vele vava shieme ha vusu vwa Ireza, ku kuteka zonse intaezo za Simwine. <sup>7</sup> Kono kana vavena mwana kakuli Elizabeta kana vena luzalo, mi hape vonse chi vava supele ahulu he iyi inako. <sup>8</sup> Mi kuvezi kuchita kuti Zakaria avena mukwina kwa Ireza, kwi chilila ni kupanga iyo mintendo yovu purisita yava hewa mwi nswanelo ye inkauhanyo ya kwe. <sup>9</sup> Kuya ke chizo choku keta kuti njo zuhi mu purisita yese a tende, ava ketwa kwa loto kuti e njile mwi tempele ya Simwine kuti a hise minunkiso. <sup>10</sup> Chonse chichava cha vantu chiva kwete ku lapela hanze heyo inako minunkiso iva hiswa. <sup>11</sup> Mi ñiloi lya Simwine livezi kuvoneka ha vusu vwake ni ku zimana ku vulyo vwe alutare ye minunkiso. <sup>12</sup> Zakaria ha muvona, ava tilimuki mi lyowa livezi hali. <sup>13</sup> Kono i ñiloi chi lya ti kwali, “sanzi uvi ni lyowa, Zakaria, kakuti intapelo yako iva tekwa. Mwi hyenu Elizabeta mwa pepe mwana o mwisisu. Kamu sumpe izina lyakwe Johani. <sup>14</sup> Ka muve ni ntabo ni kusanga, mi vangi vese va sangilile he mpepo yakwe. <sup>15</sup> Kakuli mwave muntu mukando mu menso a Simwine. Sanzi na nywi i waine kapa zinywiwa zi kolete, mi mwe zule ni Luhuhu lu Jolola ku zwilila mwi vumo li ba nyina. <sup>16</sup> Mi vantu vangi va Isiraele kava sandulwe kwali Simwine wavo Ireza. <sup>17</sup> Mwa yende havusu bwe chifateho cha Simwine muluhuhu ni ziho za Eliya. Mwa pange vovuti kupangila kuti a sandule inkulo za bashemi ve chikwame ku vana, ku pangila kuti vasa kuteki kava yende mu vutali vwa vantu va lukite - ku litukiseza kwa Simwine vantu valukisezwe iye. <sup>18</sup> Zakariya cha wamba kwi ñiloi, “Ni wola kuzi ziva vule izi? kakuli chili ni Mukwame yo supele mi ni mwihyetu naye cho supele ahulu. <sup>19</sup> Mi ñiloi chila mwi taba ni ku wamba kwali, “njime Gaburiyele yo zimene mwikwina Ireza.” Nivaka tumwa ku kwiza kuwamba nawe, kukuletela aa makande ma lotu. <sup>20</sup> “Cwale uvone, mo tontole, kese uwole kuwamba heisi izuva izi zintu hese nizi pangahale. Ichi nji kuti kana uva zumini manzwi angu, ese e zuzilizwe he nako i swanezi. <sup>21</sup> Cwale vantu vava lindile Zakariya. Vava komeketwe kakuli avali kwi kele inako ingi mwi tempele. <sup>22</sup> Kono haka zwa mo, kana vali ku wola ku wamba navo. Chiva bonisisa kuti ava voni i pono havali kwina mwi tempele. Ava zwili ku panga zi supo kuvali na shele u tontwele. <sup>23</sup> Ku vezi kuva kuti mazuva akwe oku tenda ha amana, cha yenda kwi nzuvo yakwe. <sup>24</sup> Kuzwa aa mazuva, mwi hyavwe Elizabeta ava hi menzi ma hya. Avali zwisi ku vantu ka mwezi i hinda iyanza. Cha wamba, <sup>25</sup> “Izi za vani pangili Simwine

ha vani loli ni chishemo ku pangila kuti a zwise maswavisisa angu ha vusu bwa bantu.”<sup>26</sup> Mu Mwezi we yanza ni kamwina, I ñiloi Gaburiyele liba tumwa ku zwa kwa Ireza kwi tolopo mwa Galileya i sumpwa Nazareta,<sup>27</sup> kwa kamwale yaba vikilizwe ku mukwame we zina lya Josefa. A vali ku wila ku luzuvo lwa Davida, kamwale izina lyakwe i vali nji Maria.<sup>28</sup> Cheza kwali ni kuwamba, “Lumele, iwe yo shemuvitwe ahulu, Simwine wina nawe.”<sup>29</sup> Kono ava lyangene ahulu cha manzwi akwe, ava hupuli kuti iwola kuva mulumelisezo nzi uwu.<sup>30</sup> Iñiloi chila wamba kwali, “Sanzi utiyi, Maria kakuli cho va wani chishemo ni Ireza.”<sup>31</sup> Mi u vwene, mo pange mwana mwi vumo mi mo pepe muswisu. Mo sumpe izina lyakwe “Jesu.”<sup>32</sup> Mwa ve mukando mi mwa sumpwe kuti Mwana wa Sikwiwulu. Simwine Ireza mwa muhe chipula chavu simwine chika zwilila ku vasikulwe vave sikulwe Davida.<sup>33</sup> Mwa vuse inzubo ya Jakovo kuya kwile, mi kесе kuve nima mani ku muvuso wakwe.<sup>34</sup> Maria cha wamba kwi ñiloi, “Kai pangahale vule, kuvona kanini ku kopana ni mukwame?”,<sup>35</sup> Iñiloi chilye tava niku wamba kwali, Luhuhu Lujolola ka lwize hako, miziho za Sikwiwulu ka zize hako. Cwale iye uzo yo jolola yenke yese apepwe mwa sumpwe Mwana wa Ireza.<sup>36</sup> Mi ubwene, mukwako Elizabeta naye aba pepi mwana o muswisu mu busupali. Uwu mwezi we yanza ni konke wali, uzo yabali kusumpwa kusa pepa.<sup>37</sup> Kakuli kakwina chese nichu sa woleki ni Ireza.<sup>38</sup> Maria chati “ubwene, ni muhikana wo mwanakazana wa Simwine.” Kuve vulyo kwangu kakuya che ñusa lyako. Mi iñiloi chilya musiya.<sup>39</sup> Linu Maria ava vuki mwa awo mazuba, mi cha hwelela kuya kwi nkanda ye ziwulu, kwi tolopo mwa Judeya.<sup>40</sup> Ava yendi mwi nzuvo ya Zakariya mi chaka lumelisa Elizabeta.<sup>41</sup> Cwale kuva pangahali kuti Elizabeta ha zuwa mulumelisezo wa Maria, mbumbu mwi vumo lyakwe ava shili, mi Elizabeta ave zulwa Luhuhu lu Jolola.<sup>42</sup> Cha koza inzwi lyakwe ni kuwamba kaku huwa “Iwe njo fwiyoletwe mukati kavanakazi, mi ni muselo we vumo lyako ufuyoletwe.”<sup>43</sup> Mi chinzi hayi va pangahali kwangu kuti vanyina va Simwine wangu va swanela kwiza kwangu?<sup>44</sup> Mu vwene, mulumo we ntumeliso zako ha ziza ku matwi angu, mbumbu yo wina mwi vumo lyangu ava shili nche intabo.<sup>45</sup> Mi uzo u fwiyoletwe yaba zumini kuti ka kuve ni kwizuzilizwa kwezo zintu ziva wambwa kwali ku zwilila kwa Simwine.<sup>46</sup> Maria cha wamba, “Luhuhu lwangu lu temba Simwine”,<sup>47</sup> mi luhuhu lwangu lusanga mwe Ireza mutusi wangu.<sup>48</sup> Chaba loli ha mazimo avolele hansi a muhikana wakwe wo mwanakazana. Cwale mu vone, ku zwila hahanu onse masika ka a nisumpe kuti ni fwiyoletwe.<sup>49</sup> Kakuli iye yo wina ziho chavani pangili zintu zikando mi izina lyakwe li jolola.<sup>50</sup> Chishemo chakwe chikalilile ku mahasi ni mahasi kwabo vamu tiya.<sup>51</sup> Chava tondezi ziho zakwe kache yanza: chaba hasani avo vavali kulikumuseza mihupulo ye nkulo zavo.<sup>52</sup> Chava soheli hansi vaana vavene simwine vechi kwame ha vuyendisi vwavo. mi chava nyamuni avo ba mazimo mavi.<sup>53</sup> Chave zuzi avo va fwile inzala ni zintu zilotu, kono va humite avava tumini kule niva sena chintu.<sup>54</sup> Chava hi intuso kwa Isiraele muhikana wakwe, kupangila ku hupula ku tondeza chishemo<sup>55</sup> (mwava teli ku veshetu) kwa Aburahama niba mwi chilila kuya uko kusena mamanamani.<sup>56</sup> Maria ave kali ni

Elizabetha na miezi yo tatwe mi cha volela kwi nzuvo yakwe. <sup>57</sup> Hanu inako chi iva sikite ya Elizabetha kuti ahwizumuke muchiche mi ava pepi mwanaswisu. <sup>58</sup> Va vambene naye niva kwakwe vava zuwi kuti Simwine ava mutondenzi chishemo chakwe chikando kwali mi vava sangi naye. <sup>59</sup> Hanu kuvezi kupangahala he zuva li hinda iyanza ni to tatwe vava kezi njeva muchite mupato muchiche. Ni vava musumpi “Zakariya,” ku zwila izina li vesi. <sup>60</sup> Kono va nyina chive tava ni kuwamba “Ne, mwa sumpwe Johani.” <sup>61</sup> Chiva wamba kwali, “kakwina yenke mukati kava mwenu yo sumpwa keli zina.” <sup>62</sup> Vava pangi zi supo kuvesi kupangila kuti vesi ve zive muvavali kusakila kuti a hewe izina. <sup>63</sup> Vesi chiba kumbila chiñolelo mi chiva ñola, “izina lyakwe nji Johani”. Vonse vava komokwa. <sup>64</sup> Haho vulyo kaholo kakwe kave yalulwa mi lulimi lwake luva lukululwa. Ava wambi niku lumba Ireza. <sup>65</sup> Lyowa livezi havo vavali kwi kala muma bali avo. Zonse izi zintu ziva twala monse mwi inkanda za ziwulu za Judeya. <sup>66</sup> Mi vonse vava vazuwi vava ziviki mwi nkulo zavo, kuwamba, “cwale uzu muhwile mwave chi?” Kakuli iyanza lya Simwine livena naye. <sup>67</sup> Vesi Zakariya ave zwile ni Luhuhu lu Jolola mi cha polofita, kuwamba, <sup>68</sup> “Simwine a lumbwe, Ireza wa Isiraele, kakuli avezi kwiza ku tusa mi ava kwanisi kuvozekezwa kwa bantu bakwe” <sup>69</sup> Chava tuzimikili luziya lwo kuhaza mwi nzuvo yo muhikana wakwe Davida, <sup>70</sup> hava wambi cha kaholo zama polofita va jolola bakwe va vena mwi nako ya kale kale. <sup>71</sup> Mwa lete vu hazo vuzwilila ku zila zetu mi ni ku mayanza avo batu toyete. <sup>72</sup> Mwa pange vovuti ku totendeza chishemo chakwe ku veshetu mi ni ku hupula ku jolola kwe ntumelelano yakwe, <sup>73</sup> ku lisumina kwava wambi kwa Aburahama ishe etu. <sup>74</sup> Ava sepisi kutuha kakuli tuba zwiswa muma yanza e zila zetu, katu mutendele niku sena lyowa, <sup>75</sup> muku jolola ni muku shiama ha vusu bwake onse mazuva etu. <sup>76</sup> Eni, nawe, mwana, mo sumpwe mupolofita wa Isiwulu, kakuti moye ha vusu bwe chifateho cha Simwine kuli tukisa inzila zakwe, ku lukisa bantu cha kukeza kwakwe, <sup>77</sup> kwiza kuha inzivo yo kuhazwa ku vantu vakwe kaku swalelwa kwa zivi zavo. <sup>78</sup> Ichi kachi pangahale bakeñisa chishemo cha Ireza wetu, bakeñisa ke zuva lizwa kule lyese lize kuku tutusa. <sup>79</sup> Ku venya havo ve kele mwi fifi navo vena mu munzunde we fu. Mwa pange vovuti kutondeza matende etu mwi nzila ye nkozo. <sup>80</sup> Hanu mwana ava kuli niku kola mu luhuhu, mi avena mumu zuka heisi izuva hali vonekisa kwa Isiraele.

## Inkauhanyo 2

<sup>1</sup> Lyahanu mwa ana mazuva, ni kweza za Ceaser Augusto na tuma sikwata ku laera kuti kuve ni cipalo ca ku vala vantu vonse mwi nkanda. <sup>2</sup> Ichi chivali chipalo cha hentanzi chiva pangahali kwa Quirinius havali muyendisi we nkanda ya Siriya. <sup>3</sup> Lyahanu zimwi ni zumwi naya ku toropo yakwe ku ku ka ñolisa ku chipalo. <sup>4</sup> Josefa naye na yenda kuzwa kwa Galileya, kuzwa ku toropo ya Nazareta. kuya kwa Judeya, kwi totopo ya Davita i va ku sumpwa Betelehema, mukunti avali ku zwilila ku luzuvo lwa Davita. <sup>5</sup> Na enda ko kuka liñolisa hamwina ni Mariya iye yaava veeleze avali hindite. <sup>6</sup> Linu ni yeza inako, havava ku sina koko, niya ba inako ya yakwe ya kuletwa kwa mucice. <sup>7</sup> Na leta mwana shwisu, we ntazi, cha mu vungila mu

majira male, linu na mulazika muchililo che ñombe, mukuti kahena ku vena chivaka cha masikilo. <sup>8</sup> Kuvana valisi vamitapi vavena mweco chilalo mu mumawa, vava ku lalila mitapi yavo masiku. <sup>9</sup> Iñeloi lya Simwine ni lyalivonahaza ku vali, ni kwava ni nkanya ya Simwine iva niya pazima kuva zimbuluka, imi vava tite tota. <sup>10</sup> Linu iñeloi nilya va cho kuti, musiye ku tiya, mukuti twa mi letela liinzwi i ilotu, lyete lilete ku sanga ku kando ku vantu vonse. <sup>11</sup> Sunu muhazi ava letwa kwenu mwi toropo ya Davida! Nji Keresite Simwine. <sup>12</sup> Ichi nji chisupo chete nichu hewe kwenu, mu mu wane muchiche yo zingeletwe muma jira u lazikite muchililo ce ñombe. <sup>13</sup> Hahaha ni iñeloi ni lina ku kuvana vuungi bwe mpi izwa kwiwulu ivali ku lumbeka Ireza, ni icho, <sup>14</sup> “Inkanya kwa Ireza mulena wa mawulu, mi kuve ni nkozo hansi mukati ka vantu va tavela.” <sup>15</sup> Nikweza hakuti mañeloi ha a yenda kuzwa ku vali kuya kwi wulu, valisi ni vali ambila, tu yende kwa Betelehema, kuka vona ichi chintu chiva chitahali, icho chava twi zivisi Simwine. <sup>16</sup> Niva hwelela kwateni ni vaka wana Mariya ni Josefa, ni ku vona lukeke lu lele muchililo. <sup>17</sup> Haba mana kumu vona, ni ve zibahaza chi vava wambilwe ku likana nozu muhwile. <sup>18</sup> Vonse vava izuwi ni ba makala ku chiva wambitwe kuzwa ku balisi. <sup>19</sup> Kono Maliya na zwila havusu ku zeza zintu zonse za va zuwi, ku zi vika mu nkulo yakwe. <sup>20</sup> Balisi niva vola, ni va chenchelela ni ku lumba Ireza cha zintu zonse zi vava zuwi ni ku vona, uvu mu ku va wambilwa ku vali. <sup>21</sup> Hakuva kuma mani-mani e zuva li hinda iyanza ni otatwe, ha citwa mupato, na vikwa izina lwa Jesu, izina lyava hewa ku mañeloi naseni ku vumbwa mwi vumo. <sup>22</sup> Impalo ya mazuva ava sakahere ku kulijoloza kwavo ha i hita, kakuya cha mulao wa Mushe, Josefa ni Maliya ni va muleta kwi tempere mwa Jerusalema ku muleta havusu vwakwe kwa Simwine. <sup>23</sup> Muku ñolelwe mu mulawo wa Simwine, “umwi ne umwi mwana shisu wi yalula lupepo mwa vikwe kumbali kwa Simwine”. <sup>24</sup> Linu chivaha chitavelo chavo kakuya mukuva telwa mu mulao wa Simwine, “inkuva zovele kamba imkwilimba inini zo vele” <sup>25</sup> Muvone, kuvana mukwame mwa Jerusalema izina lakwe avali nji Simioni imi uzu mukwame ava shiyeme ni ku li neela. Ava lolelele muhazi wa Isiraere, imi luhuho lu jolola luvena hali. <sup>26</sup> Iva ungulwilwe kwali cha luhuho lujolola kuti kete na vone lufu naseni ku vona Keresite wa Simwine. <sup>27</sup> Che nkelelo ya luhuho, Simiyoni neza mwi tempele. Bazazi hava leta lukeke Jesu, ku mu chita cha kuya ka sico cha mulao, <sup>28</sup> na mu hinda mu mavoko akwe ni ku lumbeka Ireza mi na cho, <sup>29</sup> Hanu u siye muhikana ko a yende mu nkozo, Simwine, chakuya cha liinzwi lyako. <sup>30</sup> Mukuti menso angu ava voni impulsu yako, <sup>31</sup> yo va bakanyi mwi muvusu vwa vantu vonse: <sup>32</sup> Mumuni we nsinulo kuva sa zumini ni nkanya ku vantu vako Isiraere.” <sup>33</sup> Vesi wa muhwile ni vanyina vava makele ka zintu ziva li ku wambiwa ku amana naye. <sup>34</sup> Simiyoni cha va fuyola na cho kwa Mariya inyina wakwe, “Vone, uzu muhwile ketelwe kuwa ni ku vuka kwa vantu vangi mwa Isiraere imi cha chisupo chi kanitwe- <sup>35</sup> mi ilumo mu li hweze mu luhuho lwako-mukuti muzezelo we nkulo zingi ku letwe he nkanza. <sup>36</sup> Muporofita wa mwanakazi ava ku sumpwa Anna kwavena. Avali mwana wa Fanuwelu yozwa ku mushovo wa Asha. Ava supele luli. <sup>37</sup> Ava hali ni mwihyabwe ka zilimo zi hinda iyanza ni zovele. imi avali mufwilwa cha zilimo zina makumi a hinda iyaza ni makumi o tatwe ni zone. Kana ava ku siya



itempere kono avali ku tendela cha kulinyima zilyo ni ntapelo, masiku ni kamwi. <sup>38</sup> Cho wo muzuzu, cheza kuvali ni kutanga kuha vuitumero kwa Ireza mi na wamba ka za muhwile ku zumwi ni zumwi yava lwindile ku hazwa kwa Jerusalema. <sup>39</sup> Linu hava mana zonse zivavali lukela ku chita ka kuya ka mulao wa Simwine, niva vola kwa Galileya, kwi toropo yavo ya Nazareta. <sup>40</sup> Muhwile na kula ni kuva yo kolete, na ekeza ku vutali, ni chishemo cha Ireza chivena hakwe. <sup>41</sup> Vazazi vakwe vava kuyendanga chilimo ni chilimo kwa Jerusalema ku mukiti we mpaseka. <sup>42</sup> Ha va ni zilimo zine ikumi ni zovele, hape niva yenda kuya ke nako ya chizo ku mukiti. <sup>43</sup> Have kala mazuva avalwa ezwile a mukiti, niva tanga ku voola ku muzi. Imi mushisu nashala mumasule mwa Jerusalema mi vazazi vakwe kena vave zivi. <sup>44</sup> Chiva zeza kuti wina mukati ka chikwata ca vamwi vava vali kuyenda navo, imi niva yenda lwendu lwe zuva lyonke. Linu ni va tanga ku mu lola mukati ka vakwavo ni bamwakwe. <sup>45</sup> Hava mu vula, niva vola kwa Jerusalema ni ku tanga kumu lola kwateni. <sup>46</sup> Nikwahi ta mazuva otatwe, chi va muwana mwi tempere, ne kele mukati ka muruti, nava tekete ni kuva vuzo impuzo. <sup>47</sup> Vonse vava zuwi ku amana naye ni va makala ha ku zuwisisa kwakwe ni nkalabo za kwe. <sup>48</sup> Havu muvona, ni va makala. Vanyina ni vawamba kwali, "Mwanangu, cinzi hawatu cita vuti? Teke, veso neme tuva ku ku saka saka." <sup>49</sup> Nati kuvali, "Cinzi hamu kwete kuni saka? kana muvezivi kuti ni lukela kuva munzuvu ivandanda?" <sup>50</sup> Kono kena vava zuwisisi cha va talusi chawo manzwi. <sup>51</sup> Imi chayenda kuvola kumunzi navo kwa Nazareta ni kuli voza hansi ku vali. Banyina ni va ungula izi zintu zonse munkulo yavo. <sup>52</sup> Linu Jesu na zwila havusu ku kula cha vutali ni ku wera ku chiyemo, ni wera ku chishemo ni Ireza ni vantu.

### Inkaushanyo 3

<sup>1</sup> Muchilimo che ikumi ni iyanza cho mubuso wa Tiberiasi Sisarechikwina bulyo Pontiusi Pilato abali mubusi wa Judeya, Heroda ibali muyendisi wa Galileya, mwanchakwe Filipe abali kuyendisa chikiliti cha Ituria ni Trakoniya, mi Lisaniya abali kuyendisa chikiliti cha Abilene, <sup>2</sup> mwi nako ya vuvusi vwa muprisita mukulwana yo hanzi Ananiya ni Kaishala-inzwi lye Ireeza ni lyeza kwa Johani mwana Zakaria, mwi ikanda. <sup>3</sup> Aba yendi mu zikiliti zonse zi zimbulukite Jorodani, ku kutaza i nkolobezo ya ku baka ya kuwondela zibi. <sup>4</sup> Sina mukuñolelwe mwi mvuka ya manzwi a Isaya mupolofita, "Inzwi lya yenke lisumpa mwi ikaanda, 'Mu vakanye i nzila ya Simwine, mu wolole inzila zakwe. <sup>5</sup> Mikokolombwa yonse mu izuzwe, mi ilundu ni chi ulu mu zi bozekezwe hansi, ni inzila zi nyonokete muzi wololwe, ni zi baka zisa shiyeme muzi zakwe mu migwagwa, <sup>6</sup> mi inyama zonse muzi bone kuhaza kwe Ireeza." <sup>7</sup> Linu Johani na wamba ku vantu vangi vavali kwiza kuku kolobezwa kwali, "Inwe muvaana va zihili! Njeni yava mi mamelisi kutiya ku vukali vukezite? <sup>8</sup> Linu he, muvike zilyantu ziswanele ku vaaka, mi kanji muti mukati kenu, 'Twina Abrahamama che sheetu,' ni miwambile kuti Ireeza uwola ku busa baana ba Abrahamama mwa a mavwe. <sup>9</sup> Nanga hani ibbeule li bakanyezwe muhiisi wa masamu. Mu kuti i samu lyonse lisahi zilyantu zi lotu mulitemenwe hansi ni ku sohelwa mu mulilo." <sup>10</sup> vungi vungi vwa vantu ni va tanga kumubuza, ni vacho, "Linu aha tuchita

vule?” <sup>11</sup> Chetaava nikuti kuvali, “Chikuti muntu wina zizwato zo beele, ali kauhanyeze ni ya sena, nozuna wina zilyo naye achite cho kuswana.” <sup>12</sup> Va kunganyi ba mali naabo niveza kuku kolobezwa, mi ni kucho kwali, “Muruti, chinzi chitu lukela kuchita?” <sup>13</sup> Na wamba kwavo, “kanji mukunganyi mali mangii kuhitiliza amwa laelwa ku kunganya.” <sup>14</sup> Vamwi masole navo chiva muvuza, ni va cho, “Mi linu iswe vule? Tu swanela ku chita nzi?” Na wamba kubali, “kanji muhindi mali kuyense muntu cha kuhambiliza, imi kanji munyansi muntu cha mafosisa. mulikolwisise kache ntuwelo zenu.” <sup>15</sup> Linu vantu hanu hachivava lindile che ntakazo kwiza kwa Kiriste, zumwi no zumwi avali komokelwe mwi nkulo zavo ku amana ni Johani mukuti pona chova njeye Kireste. <sup>16</sup> Johani ne taava cha kuwamba kuvali vonse, “Ka changu, Ni mikolobeza ni menzi, kono zumwi ukezite yokolete tota hita Ime, mi Ime kani swaneli ni ku sumununa mihala ye nsangu zakwe. Mwa mi kolobeze cha Luhuhu lu Jolola ni cha mulilo. <sup>17</sup> Chi damiso cha kwe cha haluvuwa cina mwi yanza lyakwe ku joloza luli lu vuwa lwa kwe ni ku kunganya mahila mu chishete cha kwe. Kono mwa hise buhundu ni mulilo usa zimwa.” <sup>18</sup> Ni manzwi mangi a mwi e nsusuwezo hape, Johani na kutaza ivañeli indotu kuvantu. <sup>19</sup> Mi Heroda mubusi ha nyanswa cha kusesa mwi hyavwe wa mwa nce, Herodiasi, mi ni cha zonse zivi zintu Heroda za vapangi, <sup>20</sup> ava weli izi kumi landu yakwe: ne yalila Johani mwi ntolongo. <sup>21</sup> Linu nikwa va kuti, vantu vonse chivavali kukolovezwe, Jesu naye ava kolovezwe. mi haho havalu ku lapela, mawulu niye yaluka, <sup>22</sup> Mi Luhuhu Lujolola mu chi vumbantu cha vuntu ni lweza cha ku shulumuka hali ubu inkuva, mi inzwi nilya zwa mwi ulu, “U mwanangu wa muswisu, uni saka, Ni kondetwa ka chako.” <sup>23</sup> Jesu hatanga ni luko lyakwe, avalu kulichunza ku zi limo za makumi otatwe. Ivali mwana (sina muinuhelelwe) wa Josefa, mwana wa Heli, <sup>24</sup> mwana wa Matihati, mwana wa Levi, mwana wa Meluchi, mwana wa Janai, mwana wa Josefa. <sup>25</sup> Josefa ivali mwana wa Matatiasi, mwana wa Amosi, mwana wa Nahum, mwana wa Esili, mwana wa Nagayi, <sup>26</sup> mwana wa Mati, mwana wa Matatiasi, mwana wa Seimini, mwana wa Josechi, mwana wa Joda. <sup>27</sup> Joda ivali mwana wa Joanani, mwana wa Rhesa, mwana wa Zerubabeli, mwana wa Salietele, mwana wa Neri, <sup>28</sup> mwana wa Meluchi, mwana wa Adi, mwana wa Kosamu, mwana wa Elumadamu, mwana wa Eri, <sup>29</sup> mwana wa Joshuwa, mwana wa Elieze, mwana wa Jorimu, mwana wa Matihati, mwana wa Levi. <sup>30</sup> Levi ivali mwana wa Simioni, mwana wa Juda, mwana wa Josefa, mwana wa Jonamu, mwana wa Eliakimu, <sup>31</sup> mwana wa Melea, mwana wa Mena, mwana wa Mattata, mwana wa Natani, mwana wa Dafita, <sup>32</sup> mwana wa Jese, mwana wa Obedi, mwana wa Bowazi, mwana wa Salumoni, mwana wa Nahashoni. <sup>33</sup> Nahashoni ivali mwana wa Aminadabu, mwana wa Adimini, mwana wa Arini, mwana wa Hezironi, mwana wa Perezi, mwana wa Juda, <sup>34</sup> mwana wa Jakobo, mwana wa Isaka, mwana wa Aburahama, mwana wa Tera, mwana wa Nahori, <sup>35</sup> mwana wa Serugi, mwana wa Rewu, mwana wa Pelegi, mwana wa Eberi, mwana wa Shelahi. <sup>36</sup> Shelahi ivali mwana wa Kainani, mwana wa afakisadi, mwana wa shemu, mwana wa Nowa, mwana wa Lameki, <sup>37</sup> mwana wa Metusela, mwana wa Enoki, mwana wa Jaredi, mwana wa Mahalalelu, mwana wa Kainani, <sup>38</sup> mwana wa Enosi, mwana wa Sethi, mwana wa

Adama, mwana we Ireeza.

## Inkauhanyo 4

<sup>1</sup> Linu Jesu, chokwi zula Luhuhu Lujolola, hakazwa kulwizi Iwa Jodani, mi ava yendiswe Luhuhu mwi halaupa. <sup>2</sup> havena mazuva ena makumi one nalikiwa kwa javulusi. Kakwina cha va lile mwao mazuva, mi kuma manisilizo eyo inako chava fwile inzala. <sup>3</sup> Javulusi cha wamba kwali, “Haiva u Mwana we Ireza, ulaele ilibwe ive chinkwa.” <sup>4</sup> Jesu cha mwitava, “Kuñoletwe, Muntu kahali vulyo ha chinkwa.” <sup>5</sup> Linu javulusi cha mutwala ha chivaka chile, ni ku mutondeza mivuso yonse ye inkanda hohwaho vulyo. <sup>6</sup> Javulusi cha wamba kwali, “Ka ni kuhe vuyendisi bwe inkanda ni vilotu vonse, kakuti zivahewa kwangu, mi ni wola kuziha yense unisaka. <sup>7</sup> haiva chiwani kuvamela ni kuni kunkwila muive yako.” <sup>8</sup> Jesu che tava cha muti, Kuñoletwe, mo kunkwile Simwine Ireza, mi hape mo mutendele yenke.” <sup>9</sup> Linu javulusi cheza kutwala Jesu mwa Jerusalema niku muvika ha chivaka chichilelele cha muzako we tempele, mi chati kwali, “Heiva u Mwana we Ireza, lisohele hansi kuzwa hanu. <sup>10</sup> “Kakuti ku ñoletwe, mwa laele ma ñiloi akwe, a amana niwe, aku vukeleze, <sup>11</sup> mi hape, ‘Ka akunyemune muma yanza ao, kuti kenzu u chunchuli itende lyako hebwe.” <sup>12</sup> Kuku mwitava, Jesu chati, “Ku wambitwe, ‘Kenzu viki Simwine Ireza wako hakulikwa.” <sup>13</sup> Cwale javulusi ha mana kulika Jesu, cheza ku musiya ni kuyenda haisi imwi inako. <sup>14</sup> Linu Jesu havola mwa Galilea muziho zo Luhuhu, indava zi amana naye chize zulankana ku zimbuluka chikiliti chonse. <sup>15</sup> Mi chatanga ku luta mu ma sinagoge avo mi vonse chi va mutemba. <sup>16</sup> Cha keza mwa Nazareta, mwi tolopo mwa va kulili, mi sina ha i vali chizo chakwe, cheza mu ma sinagoge i va li zuva lya la Mugivelo, sina ha i vali chizo, cha zima ni ku vala cha ku huweleza. <sup>17</sup> Imbuka ya mupolofita Isaya iva hewa kwali, che yalula imbuka ni kuwana chi vaka hai va ñoletwe, <sup>18</sup> Luhuhu Iwa Simwene lwina hangu, kakuti a vani singi ku wamba makande malotu ku va shevete. A va ni tumi ku nkonkelza intukuluho ku va suminwe, ku lukulula va lyatililwe, mi ni ku vo zekeza ku vona ku va sa voni, <sup>19</sup> ni ku konkeleza chi limo cha Simwine che nshemuvo.” <sup>20</sup> Che yala imbuka, ni ku i voza ku ya vali muvavaleli ne kala hansi. Menso a vonse va vena mu ma sinagoge a va lolete vulyo hali. <sup>21</sup> Chatanga ku wamba ku vali, “Sunu i intimana chi ye zuzilikizwa ni mu zuwile.” <sup>22</sup> Vonse mwateni chi va va paka ku zavali ku wamba mi chiva komokiswa cha manzwi e zwile chishemo avalu ku zwa mukaholo kakwe. Va vali ku wamba, “Uzu mwana Josefa wa muswisu, nandi kanjeje?” <sup>23</sup> Cha wamba ku vali, “Cheniti ka muwambe iyi inguli kwangu, Iñanga, lihoze u mwine. Zonse zitu va zuwi zo va pangi mwa Kapenaumi, pange zi swana ni mu munzi we tolopo yako.” <sup>24</sup> Kono cha wamba, “Ni mi wa mbila vu niti kakwina mupolofita yo tambulwa mwi tolopo munzi we tolopo yakwe. <sup>25</sup> Kono mu vuniti ni mi wambila ku vena vafwililwe vangi mwa Isilaele mwinako ya Eliya, i wulu hali ve yalite zilimo zotatwe ni myezi i ma na iyanza ni chonke, chi kweze inanga ikando mu chi vaka chonse. <sup>26</sup> kono Eliya kena ava tumwa nanga ku umwina wavo, konji kwa Zarefasi mwa Sidoni, ku yo fwililwe ya vali kwi kala

mwatени. <sup>27</sup> Kuvали kwina ve mbingwa vangi mwa Isilaele mwi nako ya Elisha mupolofita, kono ka kwina kuvали ya va hozwa kwande ya Namani mwina Siriya.” <sup>28</sup> Vonse vantu va vena mu ma sinagoge chi ve zula kuvenga hava zuwa izi zintu. <sup>29</sup> Chiva zimana, ni ku mu hambiliza kuzwa mwi tolopo. Chiva muhitisa ku mu vika ku impela ya chiwulu hava za kitwe itolopo yavo, kuti va musohele he impela ya chiwulu. <sup>30</sup> Kono cha va hita hakati kavо mi chaya ku chimwi chi vaka. <sup>31</sup> Linu cha na sezumukela mwa Kapenaumi, mwi tolopo ya Galileya, mi ava tangi kuva luta ivali la Mugivelo. <sup>32</sup> Va va komokiswa mulutilo wakwe, kakuti ava wambi ni vuyendisi. <sup>33</sup> Hanu mu masinagoge ku vena mukwame ya vena i dimona-luhuhu lusajololi, mi chahuweleza ahulu cha linzwi. <sup>34</sup> “Mawe! tuswanela kupanganzi nawe, Jesu wa Nazareta? Wakeza ku ku tusinyasinya? Ni kwizi kuti njiweni- Yenke yo Jolola wa Ireza.” <sup>35</sup> Jesu cha kalimela i dimona, chikuti, “Kenzu wambi zwe mukati kakwe!” Cwale aho i dimona li va soheli mukwame hansi mukati kavо, chilyazwa mukati kakwe, mi kena liva muholofazi ni hakuva vulyo. <sup>36</sup> Vantu vonse va va komokwa ahulu, chi va zwila havusu ku wamba zateni zumwi ku zumwi. Chivati, “Kanti manzwi amushovo nzi aa? U laela luhuhu lusajololi che nkamaiso ni ziho mi zi zwa.” <sup>37</sup> Linu makande aa amana naye chi atanga kwi zivankana zivaka ku zimbuluka chikiliti. <sup>38</sup> Linu Jesu chazwa mu ma sinagoge ni kwinjila munzuvo ya Simoni. Hanu makwenyani va Simoni va chanakazi va vakatezwe vutuku bwa kuhisa muvili (isinza), mi chiva mu kumbila cha kuli kombeleza kachakwe. <sup>39</sup> Linu chazima hali ni ku kalimela isinza, mi nilya musiya. Haho vulyo cha zimana ni kutanga ku vatendela. <sup>40</sup> Izuva ha limina, vantu chivaleta vonse va vali kulwala matuku avali ku chinchana chinchana kwa Jesu. Chavika mayanza akwe havali vonse ni kuva hoza. <sup>41</sup> Madimona nao chiazwa muvantu vangi, ni a lila kuhuwa mi nati, “Njewe Mwana we Ireza!” Jesu cha kalimela madimona, mi kena ava azuminini ku wamba, kakuti a vezi kuti ivali nji Kirisite. <sup>42</sup> Izuva haliza ku zwa, chazwa ni kuya ku chivaka chili patite. Chisi cha vantu chi vali kumu lola chi cheza ku chi vaka kwavena. Chi va lika ku mukanisa kuti kanzi azwi havali. <sup>43</sup> Kono chati kuvали, ni swanela ku wamba makande malotu omu muvuso we Ireza ku matolopo mangi, kakuti njivaka hani ni vaka tumwa kunu. <sup>44</sup> Linu cha zwila havusu ku kutaza mu ma sinagoge mane konse kwa Judeya.

## Inkauhanyo 5

<sup>1</sup> Linu chikwa chitahala, Mukuti vantu vava kungeene kuzimbuluka Jesu ni kutekeleza linzwi lye Ireza, mi avali kuzimene he iyambezi lya Geneserate. <sup>2</sup> Chavona mato ovele ni avakwitilwe he rizo lye iyambezi. bayambi civava kuzwile mwa teni mi vava kwete kushanza tunyandi twavo. <sup>3</sup> Jesu chechira muvumwi bwato, vuvali bwa Simone, chamucho kuti avusikule chivakazana kuzwa ha hamutunda. Chekala hansi ni ku luta vantu nena mubwato. <sup>4</sup> Hamana kuwamba, cha wamba kwa Simone, “Twale bwato mumenzi male mi musohele tunyandi muchese.” <sup>5</sup> Simone chetaba ni kucho “Simwine twatenda masiku onse, kakwina chitwa chesa, kono cha linzwi lyako, munisohele tunyandi.” <sup>6</sup> Hava chita bulyo, chiva kunganya impalo ingi ye nswi, mane tunyandi twavo tuva kuhaloka. <sup>7</sup> chibawambila ba

mwavo mubwato bumwi kuti beze zeba vava tuse. Chiveza ni kwizuya mato onse ovele, linu niva tanga kumina. <sup>8</sup> Kono Simone Pitorosi, havona vulyo, cha wa cha mazwi a Jesu chati, “Zwe kwangu kakuti ni muntu ni muvi, Simwine.” <sup>9</sup> Kakuti avakomoketwe, mane nivonse vavali kwina naye, haku cheswa kwe nswi zivava hindi. <sup>10</sup> Aha kuva kwina Jakovo ni Johani, vavali vaanaswisu va Zevedia vavali kusevelisana ni Simone. Mi Jesu chati kwa Simone “Kanji utiyi, kakuti kuzwa hanu mo mochese vantu.” <sup>11</sup> Haba leta mato avo hanshi, civa siya zintu zonse niku mwi chilila. <sup>12</sup> Hakuva kuti avali kwina imwi toropo, mukwame yabezwile vutuku bwe mbingwa mwavena. Havona Jesu, cha wa cha chifateho ni ku mukumbila, nacho, “Simwine, haiva usaka uwola kuni joloza.” <sup>13</sup> mi Jesu cha wolola iyanza iyakwe nikumu kwata, nawamba, “Nisaka jolole.” mi haho bulyo imbingwa yakwe chiya zwa kwali. <sup>14</sup> Cha mulaela kuti sanzi awambili muntu, kono cha mucho kuti, “Liyendeze, mi ukalivonahaze kuba purisita mi ukatambike chitabelo cha ku jolozwa kwako, kuya ke taelo ya Mushe, ive vushupi kubali.” <sup>15</sup> Kono ikande liamana naye chi lya yenda iñuwa, mi vungi bwa vantu chiva keza hamwina kwiza kumuzuwa na luta, mane nikuhozwa matuku abo. <sup>16</sup> Kono inako ni inako cha zwa nikuya muzivaka zili mumatongo nikuka lapela. <sup>17</sup> Chikwa sika limwi zuva mwawo mazuva lyava kwete kuluta, mi kuvali kwina Mafarisi ni valuti va mulao vavali kwi kele mwateni kuzwila muminzi mingi ichinchana muzikiliti za Galileya ni Judeya, mane ni mwi tolopo ya Jerusalema. Ziho za Simwine zivali kwina naye za kuhoza. <sup>18</sup> Lyahanu vamwi vakwame chivakeza, vavali kuhindite muntu yo lwala vutuku bwaku zuminina ha vulo, vavali kusaka mahitilo a kumwinjilika mukati ni kuka mulalika havusu bwa Jesu. <sup>19</sup> Kana vavali kuwola kuwana mahitilo o kumwinjilika mukati chevaka lya vantu vangi, linu chiva ya hewulu lya chituwa ni ku sezumwina mukwame hateni, havulo bwakwe, mukati ka vantu, hene havusu bwa Jesu. <sup>20</sup> Chakuvona kuzumina kwavo, Jesu chati, “mukwame, zivi zako chiza swalelwa we.” <sup>21</sup> Va ñoli ni ma Farisi chivatanga kuli vuza ichi, nivati, “Njeni uzu yo wamba cha kunyansiliza? Njeni yowola kuswalela vuvi konji Ireza yeyena?” <sup>22</sup> Kono Jesu, chalemuha zivavali kuhupula, chetava nikuwamba kuvali, “Chinzi hamukwete kuli vuza vulyo mwinkulo zenu, <sup>23</sup> Njechihi chihuva kukuwamba, 'Zibi zako chiza swalelwa,' nikuta kuti 'zimane uyende?’” <sup>24</sup> Kono kuti mwizive kuti Mwana Muntu wina inkamaiso zakuswalela zivi hanshi, Ni wamba kwako, zimane, 'Hinde vulo bwako mi uyende kwinzuvo yako.’” <sup>25</sup> Haho vulyo cha zimana havusu bwavo ni kunyemuna vulo hava lele. Chavola kwinzuvo yakwe, nakavu kuchenchelela Ireza. <sup>26</sup> Vonse vavakomoketwe niku chenchelela Ireza. Vave zwile kutiya, ni vati “Twavona zintu zihitilize sunu.” <sup>27</sup> Hakumana kupangahala izi zintu, Jesu cha zwa mwateni umo mi avavoni Mutelisi we zina lya Levi nekele mwi tente lya kutambwila mitelo. Chamuta kuti, “Ni chilile.” <sup>28</sup> Linu Levi cha zimana ni kumwi chilila, kusiya zintu zonse kuma sule. <sup>29</sup> Linu Levi cha ha Jesu ziloy zingi munzuvo yakwe. Muvali kwina vatelisi vangi mwateni ni vantu vamwi vavali shamine he ntafule mi niva kwete kulya navo. <sup>30</sup> Kono Vafarisi ni va ñoli vavo vavakwete kuvilela kuvalutwana vakwe, “chivati, Chinzi hamulya ni kunywa niva telisi niva vantu vachita vuvi?” <sup>31</sup> Jesu cha vetava, “Vantu vasa

Iwali kavasaki musiliki, konji balwala nji musaka. <sup>32</sup> Kena nivakezili kusumpa vantu vashiyeme kuku vaka, kono kusumpa vachita zivi ku ku vaka. <sup>33</sup> Chivawamba kwali, “inako ni nako, valutwana va Johani valinyimanga zilyo niku lapela, ni ba lutwana vava Falisi vachita vulyo navo, kono va lutwana vako valya niku nywa.” <sup>34</sup> Jesu chawamba kuvali, “Kana kwina yo wola kuwambila vena hamukiti wa musesi kuti vali nyime zilyo musesi nasina navo?” <sup>35</sup> Kono mazuva akeza hete nazwiswe kuvali musesi, mi aho kavali nyime zilyo.” <sup>36</sup> Linu Jesu cha wamba che huko kuvali. “Kakwina muntu yohalula isila hachizwato chihya niku lukila hesila ikulukulu. Mi hachita vulyo, mwahalule chizwato chihya, mi kasila kazwa ha chizwato chihya kete kaswanele ha chizwato chikulukulu. <sup>37</sup> Kakwina yo vika i waine ihya muzivikiro ze waine ze dalo chikulukulu. Mi hachita vulyo i wine ihya muiñatule madalo, Mi iwaine muitike. Mi zivikilo ze wine ze dalo muziñatuke. <sup>38</sup> Kono i waine ihya iswanela kubikwa muzibikilo zedalo ziteketeke. <sup>39</sup> Mi kakwina yo chita kuti hamana kunywa iwaine yakale yosaka ihya, kakuti ucho kuti, “Yakale ina butuka.”

## Inkauhanyo 6

<sup>1</sup> chikwachitahala kuti ivali lwe Nsabata, mi Jesu avali kuhita muluwa lwa buheke, mi balutiwa vakwe vavali kwa vutola mitwi ya vuheke ni kulya vuheke. <sup>2</sup> Mi vamwi vava Falisi chivawamba kuti. “Chinzi ho chita chisa swaneli kuchitwa luzuva lwe nsavata?” <sup>3</sup> Cha kumwitava, Jesu chetava kuti, “kena muvavali chava chiti Davida ha va fwile inzala, iye ni vakwame vavena navo? <sup>4</sup> avayendi mwi nzuvo ye Ireza, avahindi inkonko ivavikitwe muchivaka che Ireza, ni kulya imwi mwateni, nikuhinda imwi chikuha kwateni mane nivavali kwina naye kuti valye kwateni, nihakuva vulyo zivali kuswanelwa kuliwa va Purisita ka mulao”, <sup>5</sup> Chata kuti mwana muntu simwine mane ni wale Nsavata. <sup>6</sup> chikwa chitahala kuti lwensavata lumwi cheza mu ma Sinagoge nikuka luta vantu mwateni, Mukwame mwavali kwina mwateni yavali kwina iyanza lyakwe lyachilyo livanyonyovete. <sup>7</sup> Va ñoli niva Falisi vavali kumulolete chentokomelo kuvona kapa mwahoze muntu lwensavata, kuchitila kuti vawane vushupi bwakumu sumina indava. <sup>8</sup> Avezivi zivavali kuhupula, mi chata mukwame yavena iyanza linyonyovele, “Zimane wize aha vakuvone vantu vonse,” Mi mukwame cha zimana haho. <sup>9</sup> Jesu cha wamba, “nimivuza, kana kuzumininwe kuchita vulotu kapa siya zintu lwe Nsavata? Ku chita vuhalo kapa kuvusiya. <sup>10</sup> Linu chava lola vonse niku wamba kuyo lwala, “Wolole iyanza lyako” chachita vulyo mi iyanza lyakwe chilya va hande. <sup>11</sup> Kono vavezwile kuvenge mane chivatanga kuli wambila mwete vachitile kaha Jesu. <sup>12</sup> Chikwachitahala kuti mwao mazuva cha yenda kuma lundu nikuka lapela. cha zwila havusu niku lapepa masiku onse kwe Ireza. Haiva <sup>13</sup> musihali, cha sumpa valutiwa vakwe, nikuketa vena makumi nivi vele, vava sumpi va Apostola. <sup>14</sup> Mazina ava Apositola ivali nji Simon (wava sumpi Pitorosi), ni mwance, Andulu, Jakovo ni Johani, Filipi, Bartholome, <sup>15</sup> Mateu, Tomasi, Jakovo mwana wa Alufeya, Simone yavali kusupwa Zealote, <sup>16</sup> Judas mwana Jacobo, Ni Judasi Isikariyote, yava vi muveteki. <sup>17</sup> Linu Jesu chakav0la navo kuzwa he lundu navo, cheza kuzimana ha

pateme ni chikwata cha valuti vakwe ni vantu vangi vavali kuzwila kwa Judeya, ni Jerusalema ni Tire ni Sidoni. <sup>18</sup> Vavakezi kwiza kuteka kwali ni kwiza kuhozwa matuku avo onse. Vantu vavali kukatazwa luhuho luvi vava hozwa navo. <sup>19</sup> Vantu vonse vavena muchisi vava kulika kumu kwata kakuti ziho zakuhoza zivali kuzwa kwali, mi avava hozi vonse. <sup>20</sup> Chalola kuva lutiwa vakwe, nikuti, mwina imbuyoti inwe musena chenu, kakuti chenu muvuso wa kwi wilu we Ireza. <sup>21</sup> Imbuyoti njiyenu mufwa inzala hanu, kakuti kamwi kutiswe. mufuyaulitwe inwe mulila hanu kakuti kamu seke. <sup>22</sup> mwina imbuyoti vantu hava mi toya, havasamivali ni kumi tukola, chevaka lya mwana a muntu. <sup>23</sup> Mutabe mwelina izuva mi mulotoke che ntavo. Kakuti kamuve ni mupuzo mukando mwi wulu. Kakuti vakukwavo muvava chitili va Polofita vamwi mwinzila iswana. <sup>24</sup> Kono woo kwenu mufumite, kakuti chiva tambuli inkavelo yenu. <sup>25</sup> Woo kwenu mwi kusi hanu kakuti kamu fwenzala mazuva akeza. Woo kwenu museka hanu, kakuti kamulile ni kuswava kuvusu. <sup>26</sup> woo kwenu vantu hava mitemba, kakuti muvava chitili kuva Polofita va mapa. <sup>27</sup> Kono niwamba kwenu mutekeleze, musake zila zenu mane muchite hande vami toyete. <sup>28</sup> mufuyole vami kuta mi mufuyole vaminyandisa. <sup>29</sup> Yokuwopa kulimi tama, mumu he ni limwi a wope kwateni. Haiva zumwi nahinda chi Jansi chako, muhe ni vulukwe. <sup>30</sup> He kuvonse vakumbila. haiva zumwi nahinda chintu kwako, Zanzi umuwambili kuti achivize. <sup>31</sup> Mosakila kuti vantu vaku chitile, upange vulyo kuvantu. <sup>32</sup> Haiva usaka vulyo vakusaka, cho wana mwateni iwe chinzi. Ni vaezalivi vasaka vava <sup>33</sup> saka. Haiva uchita vulotu kuvaku chita hande, cho volelwa chi? esi ni va ezalivi vachita ziswana, <sup>34</sup> linu ho kalima vulyo vana vowizi kuti vawola kuku vozekeza, chovolelwa chi, niva eza livi vakolotisa va eza livi kuti vavolelwe zi swana. <sup>35</sup> Kono usake zila zako mi uvachite hande. Kolotise nosalindili kutambula chimwi mi mupuzo wako kauve mi kamuve mu vaana va Simwine mukandomukando kakuti iye ushiyeme kuvali tumuli niku vantu vavi. <sup>36</sup> Muve ni chisemo kakuti ishenu wina chisemo. <sup>37</sup> Sanzi u atuli, mi nawe kete u atulwe. Sanzi unyazi mi nawe kete unyaswe. Swalele, mi nawe ko swalelwe. <sup>38</sup> Uhe nawe ko hewe. cha vungi luti, vakakatele, zinyungitwe hamwina, niku hasanywa, kasi tikile muchivikilo chako. kakuti vulemi votendesa, muvuseveliswe kwako. <sup>39</sup> linu chaba wambila linu ihuko. “kana muntu yasa voni uwola ku etelela zumwi yasa voni? Haiva nachita vulyo, vuvele bwavo muva wile mwi lindi. kapa kaku oleki? <sup>40</sup> Mulutiwa kena muku lwana ku muluti wakwe, kono zumwi ni zumwi hamana ku lutiwa chakwizula, uswana ni muluti wakwe. <sup>41</sup> Chinzi holola haka chiti kanini kena mulinso lya mwako, Mi kolemuhi chikando chikutoweze. <sup>42</sup> U wola kw u wamba vule kwa mwako, mwangu nikuzwise chikutoweze, mi nikwina kuti iwe umwine kovonwe chikutoweze mulinso lyako. Inwe mulihele, Tange pili uzwise chikutoweze mulinso lyako, mi mo wole kuvona hande, linu njete uwole kuzwisa china mulinso lya mwako. <sup>43</sup> kakuti kakwina isamu ilotu livika zihantu zi volete, nandi isamu livolete kaliwoli kuvika zihantu zi lotu. <sup>44</sup> Isamu ni isamu lizivahala cha zihanto lyalyo lili vika. Vantu kavawoli kukunganya ma Feiga kwi samu lya miya, kapa manjembere kuzi chachani. <sup>45</sup> Muntu mulotu kuzwilila kuvulotu bwa vuhumi bwina mwinkulo yakwe, uzwisa vulotu, ni muntu muvi ku zwilila ku vuhumi bwa vuvi bwina

mwinkulo yakwe, uswisa sivi, kuzwilila ku vuhumi bwina mwinkulo yakwe muntu, uzwisa mwinkulo yakwe cha kaholo. <sup>46</sup> Chinzi hamuni sumpa kuti simwine simwinwe, kono kamu mameli zini mi wambila. <sup>47</sup> Muntu ni muntu wiza kwangu ni ku zuwa manzi angu ni kua mamela. Muni mi wambile mwe kalile. <sup>48</sup> Ukola sina muntu yo zaka inzuvo, ya va shii chaku tunga mwivu, ni kuzaka musumo we nzuvo hebwe likolete. Mi muunda haukeza, ni menzi mangi kuvuvila he mota lyenzuvo, Kono kana abai nyanganisi, kakuti iva zakwa hande. <sup>49</sup> Kono muntu yo zuwa manzi angu kono ka amameli, ukola sina muntu yo zaka inzuvo yakwe he wulu lyevu kusena musumo. Mi menzi ha vuvila he nzuvo, chiya wa kapilpili, Mi kusinyeha kwe nzuvo kuva mani.

## Inkauhanyo 7

<sup>1</sup> Kuzwa Jesu hamana zonse zabali kuwamba bantu nibazuwile, nakenjila mwaKapenauma. <sup>2</sup> Linu muyenzi wachisole abena muhikana yabali kusunwa hahulu kwali, mi abali kulwala ni kusaka kufwa. <sup>3</sup> Muyenzi wachisole nanga zuwa za Jesu, natumina kwali bakulwana ba Majuda, kumukumbila kuti eze njamuhozeze muhikana wakwe. <sup>4</sup> Habati chibasika kwa Jesu, ni bamukumbila chakukakanina, ni bati, “Uyelele kuti umutendele bulyo, <sup>5</sup> mukuti usaka chisi chetu, imi njabatuzakili masinagoge etu.” <sup>6</sup> Chobulyo Jesu nazwila habusu munzila yakwe nabo. Hati chotumbatumba henzuvo, muyezi wachisole abatumini balikani bakwe kukamuwambila kuti, Simwine, usiye ulikatazi, kakuli kaniyelele kuti iwe winjile munzuvo yangu. <sup>7</sup> Chelyo ibaka kanilihindi kuti niyelele kwiza kwako, kono uwambe bulyo inzwi mi muhikanangu kahole. <sup>8</sup> Mukuti ime name ni muntu wina mwikonde lamulao, ni masole ni bena mwikonde lyangu. Niwambila umwina, 'Yende', mi uyenda, imi kuumwi, 'Wiize', mi wiiza, imi kumuhikanangu, 'Tende ichi', mi uchitenda.” <sup>9</sup> Imi Jesu hazuwa bulyo, namukomukwa, mi nasandukila kuchisi chibamuichilile nati, “Nimi-cho kuti, mane nangati mwalsilaele kananibeni kuwanika itumelo ina bulyo.” <sup>10</sup> Imi linu bana babatumitwe habakabola kunzuvo, nibeza kuwana kuti muhikana chaba nenza. <sup>11</sup> Izo hazimana kutendahala, Jesu abayendi kwitolopo isupwa Naine, mi barutwana bakwe ni chisi ni bayenda naye. <sup>12</sup> Habali kutumbatumba hamenjlilo etolopo, mi hamulole, muntu yofwile abahinditwe, mwana wamuswisu umwina bulyo wanyina (yabafwamini), mi chisi chingi chizwa mwitolopo chibena naye. <sup>13</sup> Imi Simwine hamubona, abamufwili maswe inse, imi abawambi kwali nati, “Sanzi ulili.” <sup>14</sup> Kuzwaho nichaya kwateni ni kukakwata kuzisamu hababahindile chitumbi, imi babachihindite nibazimana. Nichati, “Murombwana, nikucho kuti, buke.” <sup>15</sup> Yofwile nekala ni kutanga kuwamba, mi Jesu namutambika kubanyina. <sup>16</sup> Linu insabo ni chiyabawila bonse, imi chibazwira habusu kubabaza Ireeza, nibati, “Mupolofita yomaniniza ababuswa mukati ketu,” mi “Ireeza abaloli hewulu labantu bakwe.” <sup>17</sup> Iyi indaba ya Jesu ibahasani mwaJudea yonse ni zikiliti zonse zibambene nanyo. <sup>18</sup> Barutwana ba Johani babamuwambili izi zintu zonse. <sup>19</sup> Kuzwaho Johani nasupa bobele babarutwana bakwe ni kubatumina kwaSimwine nibakati, “Kana nguwe yoswanela kwiza, nandi tuswanela kulola zumwi?” <sup>20</sup> Heti chibasika hafwihi ni Jesu, bakwame nibati, “Johani



Mukolobezi wakatutuma kwako zetu kuti, 'kana nguwe yokezite, nandi tuswanela kulola zumwi?'”<sup>21</sup> Mweyo inako Jesu abahoji bantu bangi mumalwalila abo ni mumasukuluko abo ni mwihuhu imbilala, imi ni kubahofu bangi ababahi kubona.<sup>22</sup> Jesu nabetaba nabacho, “Heti chimwamana kuyenda musipili wenu, mukabihe kwa Johani chimubaboni ni kuzuwa. Bantu babahofu babahewa kubona, ziyanga zibatangi kuyenda, bachisenda babanjolozwa, basusu chibusuwa, bantu bafwile bababuswa ni kuhala, mi bahumanehi bawambilwa indava indotu.<sup>23</sup> Muntu yasasiyi kuzumina kwangu chebaka lazitendantu zangu utohonolofezwe.”<sup>24</sup> Kumasule abatumwa ba Johani heti chibayenda, Jesu natanga kuwambila zisi kaza Johani. “Chinzi chobayendi kukabona mwihalaupa? Luhe lunyanganyiswa luhuho.<sup>25</sup> Linu chinzi chobayendi kukabona? Mukwame yozabele zizabalo zinolonolo? Lole, bazabala zizabalo zimaniniza ni bahala mumbombolelwa bena muzibaka zibasimwine.<sup>26</sup> Linu chinzi chobayendi kukabona? Mupolofita na? Eee, niwamba kwenu, ni kuhitilila mupolofita.<sup>27</sup> Uzu njiyena uzo zakwe ziñoletwe, 'Hamulole, nitumina mutuminwa wangu mubusu bwako, Yeti nalukise inzila yako noseni kusika.'<sup>28</sup> Niwamba kwenu, mukati kababahwizumukwa kumwanakazi kakwina mukando kuhita Johani. Nihakubabulyo umwina yomaniniza kubunini mupuso ya Ireeza mukando kumuhita.”<sup>29</sup> Bantu bonse habazuwa ichi, kuhindilila batelisa, bababonisi kushiyama kwa Ireeza, chakukolobezwa chekolobezo ya Johani.<sup>30</sup> Linu Bafalisi ni baluti babamaninizi bamulao wa chiJuda babakani zamulero weze Ireeza kuamana navo, mukuti kana babakolobezwa kwa Johani.<sup>31</sup> “Kuchinzi, linu, kuniwola kubambanya bantu bounu murahi? Bakola sina chizi?<sup>32</sup> Bakola sina bahwile bakwete bazanina henkanza, bekala ni kulinsupa ni bati, “Tubamilizizi impeta, kono kanamubazani. Tubamizimbili izimbo zenjinjo, mi kana mubasilisi.”<sup>33</sup> Mukuti Johani Mukolobezi abezi nasaali inkonko ni kusanywa iwaine, muwamba kuti, 'Wina idimona.'<sup>34</sup> Mwana Muntu abezi nalya ni kunywa, imi muti, “Mulole, nji shazilyo ni chidakwa, mulikani wabatelisa ni batendi bazive!”<sup>35</sup> Kono butali buzumininwe ni bana bakwe bonse.”<sup>36</sup> Lyahanu umwina wa Bafalisi na mema Jesu kukalya naye. Linu Jesu hamana kwinjila munzuvo ya Mufalisi, nekala hetafule kulya.<sup>37</sup> Mi hamulole, kubena mwanakazi mumuleneñi, yabali mutendi wachive. Hazuwa kuti Jesu wina munzuvo ya Mufalisi hetafule, abaleti ijaki ye alabbasitera mwina ioili inunka nenza.<sup>38</sup> Nazimbe kumasule akwe hembali ni matende akwe, nalila, natanga kubombisa matende akwe ni zisonzi zakwe, imi nazisinda ni insuki zamutwi wakwe mi nachuchuna matende akwe ni kwasinga ni oili inuka nenza.<sup>39</sup> Mufalisi yabamemete Jesu habona bulyo, nahupula munkulo yakwe, nati, kambe uzu mukwame mupolofita, hanu neziba kuti njeni ni kuti mwanakazi wamufuta nzi yomukwete, mukuti mutendi wachive.”<sup>40</sup> Jesu namwitaba nati, “Simoni, nina chinisaka kuwamba kwako.” Nati, “Chiwambe, Muruti!”<sup>41</sup> Jesu nati, “Mukolotisi zumwi wamasheleñi abena bakoloti bobele. Umwina nakolota ipondo zichita myanda imana iyanza, imi zumwi niyaba makumi amana iyanza.<sup>42</sup> Imi habakangwa kumuliha, nabaswalela bonse. Cheyo inzila, njeni kubali yeti amusake chakumaniniza?”<sup>43</sup> Simoni abamwitabi nati,

“Nihupula kuti njozuna yabaswalelwa kukando.” Jesu namuti, “Waatula nenza.”<sup>44</sup> Jesu abasandukili kumwanakazi ni kuwambila Simoni, “Ubwene uzu mwanakazi. Nibenjili munzuvo yako. Kana ubanihi menzi amatende angu, kono iye wabombisa matende angu ni zinsonzi zakwe ni kuzisinda ni insuki zakwe.”<sup>45</sup> Iwe kana ubanichuchuni, kono iye kuzwa henako yinitanga kwiiiza kasiite kuchuchuna matende angu.<sup>46</sup> Kana ubetili ioili hamutwi wangu, kono iye abetili matende angu ni ioili inunka bulotu.<sup>47</sup> Chobulyo niti kwako, zive zakwe, zibali zingi, chizaswalelwa - mukuti watondeza kusuna kukando. Kono iye yoswalelwa halikene, usuna halikene.<sup>48</sup> Linu abati kwali, “Zive zako zaswalelwa.”<sup>49</sup> Babekele hamwina nibatanga kuambola mukati kabo, “Njeni uzu yoti uwola nanga kuswalela zive?”<sup>50</sup> Kuzwaho Jesu nichati kumwanakazi. “Itumelo yako yakuhaza. Yende chekozo.”

## Inkauhanyo 8

<sup>1</sup> Iva pangahali kavaka zana Jesu hatanga kuyenda mumileneni ni mizi, kukutaza ni kuwamba makande malotu kuamana ni mubuso wa Ireza. Ba cita ikumi nibobebe babakwina naye,<sup>2</sup> hamwina ni banakazi vava honzi kwi huho imbilala ni matuku; Mariya yava kusumpwa Magadalena, kozo madimona akwana iyanza nitobebe abazwiswa;<sup>3</sup> Johana, mwihyabwe wa Chuza, Muyendisi wa Heroda; Susana, ni bamwi vangi vulyo, camazimo, kuya chezo zivavali kusaka.<sup>4</sup> Yahoo chizi chikando chiva kwete kukopana hamwina, mi vantu vavali kukeza kwali kuzwa mwitoropo ni toropo, ca wamba inguli:<sup>5</sup> “Mulimi abayendi hanze kukavyala imbuto. Haba kubyala, zimwi ziba wili mumungwangwa mi ziba lyatwa hansi, ni zizuni ze wulu ziba mani kuzilya.”<sup>6</sup> Zimwi ziba wili mumabwe, linu haci zikula, ciza nyana, kakuti sekazina mezi.<sup>7</sup> Mi zimwi ziva wili mukati ke miya, mi ciza kulilila hamwina ni ntanga ciza nyana ni kuzihwezola.<sup>8</sup> Kono zimwi ziba wili mwibu lyindotu micियाleta imbuto amana ikumi mane chovungi. “Jesu hachamana kuwamba izi zintu, chasumpa, “Yense wina matwi azuwa, mumusiye azuwe.”<sup>9</sup> Varutwana bakwe ciba mubuza intaluso ye nguli.<sup>10</sup> Cawamba, “Inzivo ye nkunutu za mubuso wa Ireza zibahewa kwenu, kono kubamwi ni wamba ce nguli, njokuta kuti kubona kanzi baboni, niku zuwa kanzi ba zuwisisi.”<sup>11</sup> Cwale iyi ngi ntaluso ye nguli: Imbuto linzwi lye Ireza.<sup>12</sup> Ina iba wili mwinzila njabana babazuwi, kono dyabulusi wiza kuhinda linzwi mwinkulo zabo, njokuta kuti kanzi bazumini ni ku hazwa.<sup>13</sup> Mi yo mumabwe njabana, bazuwa linzwi nikuli amuhela che ntabo. Kono kabena mihisi; bazumina kenako zana, mi mwi nako yokulikiwa bawa kuwililila.<sup>14</sup> Imbuto ina iva wili mumiya bantu bazuwa linzwi, kono chi bayenda mwinzila zabo, banyanyiswa ke mpilayelo ni chifumi ni minyaka yo buhalo, mihe zihantu zavo kazi buzwi.<sup>15</sup> Kono imbuto ibawili mwibu i lotu, abo njabo, bazuwa kenkulo indotu, balikwata chokuli sileleza mi vavika zicherentu kenkulo inde niku kwatilira.<sup>16</sup> Linu, kakwina zumwi, yomunika ivoni, ni ku bwika hateni itungu kamba kui vika muni yo bulalo. kono wibika ha mekalo evoni, ilikuti yense winjila abone seli,<sup>17</sup> Ka kakwina chiliwungwile cete nici kangwe kwizibeka, mi kakwina chiliwungwile chete ci kane kwizibahala nikwiza mwi seli.<sup>18</sup> Cwale mutekeleze hande, kozo yo

wina, zingi kazihewe kwali, kono ya sena, nanga ca hupula kuba nacho kachihindwe kwali. <sup>19</sup> Cwale banyina ni bance ve chikwame chiva keza kwali, kono kena babezi havumbali bwakwe kebaka lye chizi. <sup>20</sup> Avawambilwa, 'Vanyoko ni bance bako vechi kwame vazimene hanze, balindire kukubona,' <sup>21</sup> Kono Jesu chavetava ni kuva cho, 'Bamama ni bance bangu vechikwame njabana bazuwa linzwi lya Ireza nikuli panga." <sup>22</sup> Linu izuba limwi abenjili muchisepe niba rutwana bakwe, mi chaco kubali, "tulutire kweyina imwi imbali yo lwinzi." Chiva tanga kuzuha, <sup>23</sup> Kono havava kuzuha chaya mwiñonzi. I huho ikando litiza libezi halwizi, mi chisepe chabo ciba kwingila menzi, mi vavena mu vukavu. <sup>24</sup> Cwale barutwana ba Jesu' chiveza kwali kwiza kumubusa, ni vacho, Simwine! Simwine! chitufwa!" Chabuka niku kalimela luhuho nikubenga kwa menzi mi chikwamana, mi njikwiza ku ntontola. <sup>25</sup> Cwale chawamba kubali, "Intumelo yenu inahi?" Mi vavali kutite, mwinako se ibatite baba kukomoketwe hape, hape chivatanga kuli buza, "zu cwale njeni, yoha intayelo ku menzi ni ku luhuho, imi zichilila?" <sup>26</sup> Chiba zuhila kuchi kiliti ca Gerasene, ina mwi shirwa lyo lwizi lwa Galileya, <sup>27</sup> Jesu hakalyata herizo, a vakatanwa mukwame zumwi yaba kwina madimona. Ke nako inde kena aba kuzwete zizavalo, mi kena abakwikala mwizubo abakwikala kuma kumbu. <sup>28</sup> Havona Jesu, chatanga kulila niku wa hansi mi chawamba mumulumo mukando, "usaka kupanganzi name, Jesu, mwana Ireza wina kwiwulu? nikukumbira, kanji uninyandisi." <sup>29</sup> Kaho Jesu ava layili luhu lubilala kuzwa mwali. Kaho luba munyandisi kenako inde, nanga aba kusuminwa mahaka ni mihala nikuba mwintokomelo, ava kukosola mahaka niku yendiswa madimona mwinkanda. <sup>30</sup> Cwale Jesu ca mubuza, "Jeweni inzina lyako? "chawamba, njime Legiyoni," kakuti madimona mangi ave njili mwali, <sup>31</sup> Chiya wondelela kumukumbila kuti kanji aya tumini mwintolongo. <sup>32</sup> Hanu mulaka mukanda we zugulube zibakwete kulya ku mbali ni chiwulu. Madimona chiya mukumbila kuti aye muzili, cha a zuminina. <sup>33</sup> Cwale madimona chi a zwa ku mukwame nikwi ngila muzigulube, mi mulaka chiwa shetumuka kuyenda mulwizi ni kuka mina. <sup>34</sup> Avo vavakuyendiswa zigulube habavona chapangahala, chivatiya ni kukawamba mwintolopo chapangahala ni mukanda. <sup>35</sup> Cwale bantu chiba yenda kukabona chapangahala, Mi hachi veza kwa Jesu ni kwiza kuwana mukwame uzo kuvazwi madimona, wikele kumatende a Jesu, uzwete nikuba mwingana yakwe, mi vava tiyi <sup>36</sup> Cwale vana vavavoni chiva wambila vantu mukwame yava kunyandiswa madimona mwava hozwa. <sup>37</sup> Cwale vantu vonse ve ntolopo ya Gerasene chiva kumbila Jesu kuti azwe kubali, kakuti vava tiyite a hulu. Cwale chenjila mu chisepe nikubola. <sup>38</sup> Mukwame uzo madimona avazwi kwali chakumbila Jesu kuti ayende naye, kono Jesu chamukanina, cacho kwali, <sup>39</sup> Vole kwinzuvo yako ukawambe kecho Ireza wakupangila. Mukwame chayenda munzila yakwe nakaya buwamba chamupangila Jesu. <sup>40</sup> Hanu Jesu ha kavola, chichava chicha muamuhela, kakuli vonse vavakumulindire. <sup>41</sup> Mulole, mukwame yo supwa Jairasi, yabali zumwi wava yendiswa wesinagoge, avakezi ni kwiza kuwila kumatende, a Jesu' ni ku mukumbila kuti ayende kwinzubo yakwe <sup>42</sup> kakuli mwanakwe womukazana yenke, wezilimo

zekumi nizo bele, chava kufwa. Sina Jesu hava kwina mwinzila, chisi chicha kungana kumuzimbuka. <sup>43</sup> Linu mukulwakazi kwavali kwina yava kulwala vutuku bwa malaha kezilimo zekumi, miava sinyehelwi mashelefi akwe kuvasiliki, kono kenavaholi kuvali. <sup>44</sup> Chakeza kumasule a Jesu nikukwata kumangundero e zi zwato zakwe, yahaho kuzwiza kwakwe chikwa mana. <sup>45</sup> Jesu chawamba, “njeni zuna wani kwata?” Vonse haba sampula, Pitolosi chawamba, “Simwine, chisi ca vantu chikuzimbulukite, <sup>46</sup> kono Jesu chawamba, “zumwi wani kwata, kakuti nizi kuti ziho zazwa kwangu. <sup>47</sup> Mukulwakazi habona kuti kasiwoli kuli wungula, cheza nakwete kuchachalika ni kuwila habusu bwakwe. cheza kuliwamba mukati kabantu chinzi cha mukwatira, ni mwavaholeri yahaho. <sup>48</sup> cho kwali mwanangu we chikazana, intumelo yako yakuhoza, Yende ce nkozo.” <sup>49</sup> Nasi kwete kuwamba, zumwi yava kukazwa kwizuha yo muyendisi ya sinagoge, chawamba, “Mwanako we chikazana chafwa. Kanji ukatazi muruti ahulu.” <sup>50</sup> Kono Jesu hazuwa izo, chetava Jairasi, “kanji utiyi; uzumine fela, mi kahole.” <sup>51</sup> Hava kezi kwinzuvo, ka kwina yava zumini kwi njila mukati naye, haisi Pitolosi ni Johani ni Jakovo, ni banyina ni vesi bo muhwile. <sup>52</sup> Linu vonse vavali kulila niku vokolola, kono chawamba, “kanji mulili; kafwile kono ulele fela.” <sup>53</sup> Kono chiba museka, chokwiziba kuti ufwile. <sup>54</sup> Kono cha muhinda kwiyanza ni kusupa, kuwamba, muhwire vuke!” <sup>55</sup> Luhuhu lwakwe chilwa vola, mi chavuka yahaho. Chava laya kuti bamuhe chimwi chokulya. <sup>56</sup> Bashemi bakwe vava komokwa, kono chava laya kuti kanji bawambili muntu chapangahala.

## Inkauhanyo 9

<sup>1</sup> Abasumpi bena ikumi ni bobele bonse mi nicabaha maata ni buyendisi heulu la madimona onse ni kuhoza matuku. <sup>2</sup> Nabatuma kukawamba inzwi ni kukahoza balwela. <sup>3</sup> Ni chabawambila nati, “Kanji muhindi chimwi ni chimwi mulwendo lwenu- nanga inkoli, nanga chinkwama, nanga chinkwa, nanga masheleni nanga ingubo zimwi. <sup>4</sup> Inzubo yonse yete mwinjile, mwikale mwateni kuhitila hete nemuyendele. <sup>5</sup> Konse kwete nimuye kobasamutambuli, hamuzwa mweyo intolopo muzukutule isukuko kumatende enu ive vupaki kwinekulyabo.” <sup>6</sup> Kuzwaho ni chibanyamuka ni kuyenda muminzi, kuwamba inzwi ni kuhoza konse ko bakaya. <sup>7</sup> Linu Simwine Heroda ha zuwa zonse zi batendahali, na komokwa, mukuti bamwi bati Johani Mukolobezi ababuki kubafwile, <sup>8</sup> kumwi bati Elija chababoneki, kono bamwi bati zumwi wa bapolofita bentanzi abavuki. <sup>9</sup> Heroda ni cha wamba, “Johani ye ni banokoli mutwi hape uzo njeni ye ni zuwile zakwe?” Mi ni chalika kubona. <sup>10</sup> Mi balutwana ha va voola, va wambili Jesu zonse zintu ze va vatendi. Mi ni chavahinda ni kuyenda kungi kuchivaka chilezana kuitolopo isumpwa Betisaida. <sup>11</sup> Kono chisi ha chizuwa bulyo, nichu chamuichilila. A b batambuli ni kuwamba kuvali ka zamuvuso we Reeza, ni kuhoza ba bakusaka kuhozwa. <sup>12</sup> Linu izuba chiliba kuya kuku imina, mi bekumi ni bobele ni chibeza kwali ni chivawamba kuti, “Tumine chisi chiyende kuminzi ituzimbulukite ni zivaka zi likungwile ku kaliwanina malalo ni zilyo, kakuti iswe kunu twina muchivaka chi liungwile.” <sup>13</sup> Kono ni chawamba kuvali ni cha ti. “Inwe muvahe chimwi chakulya.” Ni chi

vati, “Katwina nzinkwa zihitilila zimana iyanza ni nswi zobebe - haisi iswe ha tuyenda ku ka ulila bantu bonse aba zilyo.”<sup>14</sup> (Kuola ku va ni vakwame va bena zikiti zikwanisa iyanza.) I ca co ku Balutwani vakwe, “Muvavike bekale muzikwata ziwoola kusika mumakumi a kwanisa iyanza chikwata ni chikwata.”<sup>15</sup> Ni chi vachita bulyo, mi ni chi vavika vantu kuikala hanshi.<sup>16</sup> Ni chahinda zinkwa zikwanisa iyanza ni nswi zobebe, ni chalola kwiulu, ni ku zitohonolofaza ni kuzi gamona kuzichita tubbali bbali, ni chaha balutwani vakwe kukaha chisi.<sup>17</sup> Bonse ni chibalya ni kuikuta, mi zivashali ni chizatolwa - ni chikwezula zitanda zivena ikumi ni zobebe zatubbali bbali.<sup>18</sup> Kuvezi vuti Jesu ha va kulapela na li yenke, balutwani vakwe va vena naye. A vavuzi, ni cha ti, “Chisi chiti njime eni?”<sup>19</sup> Ni chi vetaba, “Johani Mukolobezi. Kono bamwi bati nji Eliya, mi bamwi bati nji zumwi wa bapolofita va kale a vavuki.<sup>20</sup> Ni cha wamba kuvali, “Kono inwe muti nji me ni?” Pitrosi ni chetava ni chati, “Njiwe Keresite we Ireeza.”<sup>21</sup> Kono avakalimela chenguzu ku sawambila muntu zumwi,<sup>22</sup> kuwamba kuti, “Mwana Muntu u swanera kunyandila zintu zingi ni kukanwa kwa vakulwana va chisi ni basimwine ba maprisita ni bañoli, mi kehawe kono mwizuba lya butatu ka vuke.”<sup>23</sup> Ni cha wamba kuvali vonse, “Haiva kwina u saka ku ni ichilila, u swanela kulikana i ye mwine ni kuhinda chifapano chakwe mwizuba ni zuva ni ku ni ichilila.<sup>24</sup> I ye mwine cha vavalela vuhalo bwakwe mwa vusinyehelwe, kono yo sinyehelwa vuhalo bwakwe chevaka lyangu ka vuhaze.<sup>25</sup> Bulutu njo vuhi kuti muntu aluwe inkanda yonse kono iye na sinyehelwa kapa na lihaya?<sup>26</sup> I ye mwine yo ni swavela ni manzwi angu, na ye mwana Ereeza kamuswabile hachakeza mwikanya yakwe, ni mwikanya ye Reeza ni ya mangeloyi achenete,<sup>27</sup> Kono ni miwambila cheniti, kwina vamwi vazimene hanu ve te ne vakane kubona ifu pili ne vaseni kubona mubuso we Reeza.”<sup>28</sup> Haho kwisule amazuba akwanisa iyanza ni wotatwe kuzwa ha vawambili Jesu ao manzwi, ni chahinda Pitrosi ni Johani ni Jakobo ni chivaya kwilundu ku kalapela,<sup>29</sup> Havakwete kulapela, mazimo achifateho chakwe ni cha chinja, mi zizwato zakwe zi vсандuki kutuba.<sup>30</sup> Mi mulole, bakwame vo vere va va kuwamba na ye, Mushe ni Eliya,<sup>31</sup> va vavoneki mwinkanya ibenya. Ba vakuwamba za kuyenda kwake, ku vakusaka kuleta ma maninizo mwa Jerusalem, <sup>32</sup> Linu Pitrosi ni vavekele naye vava kulele ñozi inkando, kono havavuka ni chi va vona ikanya yakwe ni vakwame vovele va vazimene naye.<sup>33</sup> Mi havayenda kusiya Jesu, Pitrosi ni chati kwali, “Simwine kuluto kuti tuvekunu. Tu zake zitomba zotatwe, chimwi chichako, chimwi nji cha Mushe mi chimwi chi be cha Eliya” (Kana a vezi cha va kuwamba),<sup>34</sup> Ha va kuwamba vulyo, ikope chilyeza ku kubaungula kuvali, mi va batiite ha ve za kuinjila mwikope.<sup>35</sup> Inzwi li va lizwi mwikope, liti. “U zu nji mwanangu wa mwana-kwame, iye ya vaketwa, muteeke kwali.<sup>36</sup> Inzwi halimana kuwamba, Jesu ava wana yenke. Ba ba tontoli mi kakwina muntu ye ba bawambili mu mazuba ao chebababoni.<sup>37</sup> Linu mwizuba li ichilila, ha ba ba kusuka kuzwa helundu, chisi chingi cha musanganya.<sup>38</sup> Mi hamulole mukwame u zwa muchisi ni cha huweleza, ni chati,<sup>39</sup> “Muluti, ni kukumbila kulola ku mwanangu wa muswisu, nji mwanangu yenke. ubwene, luhuhu luvi lumuyendisa

mi haho uhuwa, ni kumumbandinisa ni kumuletela ifulo kumulomo. Umusiya cha bukukutu ni kukukatala. <sup>40</sup> Ni bakumbili balutwani vako kuti va luzwise kono ba ba kangwi. <sup>41</sup> Jesu a ba vetabi mi abawambi, “Inwe mubetumelo inini baluzubo lu sazumini, mo ni hinde inako ikuma kuhi na nwe ne ni likwete kwenu? Lete mwanako kunu, <sup>42</sup> “Mwana havakwiza luhuhu lubi lwamuwisikeza hansi mi lwa mumbandinisa. Kono Jesu akalimela luhuhu lubi ni kuholisa mwana, ni ku mubozekeza kubesi. <sup>43</sup> Bonse ba komokwa kwa maata e Ireeza. Ne va komoketwe ku zintu zonse za va chiti, na vcha wamba kwa balutwani vakwe.” <sup>44</sup> “ Musiye ao manzwi e chile mumatwi enu: Chokuti Mwana e Ireeza ka vetekwe ni kuhewa mumayanza a vantu.” <sup>45</sup> kono kana va va zuwisizi chiwambo echo. zi va kupatelwa a bo, kuti kanji ve zivi intaluso. Mi hape chi va va kutiya kuvuza intaluso ya chiwambo echo. <sup>46</sup> Linu inkani chi zatanga mukati kavo zakuti njeni mukulwana mukati kabo. <sup>47</sup> Kono Jesu, alemuha mihupulo yina mwinkulo zabo, ni cha hinda muhwile munini ni kumubika hafuhi naye, <sup>48</sup> ni chati kuvali, “Muntu yense yotambula muhwile chezina lyangu, njime yo tambula; mi u tambula ni ya va ni tumi. I ye yense u boneka bunini mukati kenu mwense nji mukando kwenu.” <sup>49</sup> Johani chetava, “Simwine tu baboni muntu yo kwete kutanda badimona chezina lyako ni twa mukalisa, chokuti ka yendeleli naswe.” <sup>50</sup> “Kanji mumukanisi,” Jesu awamba, “chokuti muntu yense ya samilwisi wina kwenu.” <sup>51</sup> Haho mazuva hanze achuta a kutwi atwalwe kwiulu, ni chahupula kulolelela kwa Jerusalema. <sup>52</sup> Ni chatumina ñusa kubusu bwakwe, mi chivayenda kumunzi wa Masamaria kukalukisa zintu zonse. <sup>53</sup> Kono vantu kana ba bamutambuli, kakuli a ba lolete kuya kwa Jerusalema. <sup>54</sup> Cwale Balutwani bakwe ba Jokobo ni Jahani ha ba bona bulyo, ni chivawamba kuti, “Simwine, kana u saka kuti tulaele mulilo kuzwa kwiulu ni kubasinya bonse?” <sup>55</sup> Kono a ba chevuka ni kubanyansa <sup>56</sup> mi ni chibayenda kumunzi u mwi. <sup>57</sup> Ha ba vakuyenda mwinzila, zumwi ni chati kwali, “Ka ni kuicilile konse kwete u ye.” <sup>58</sup> Jesu ni chamuitaba. “Basimbwe be na malindi, ni zizuni za kwiulu zina zizumbu, kono Mwana Muntu kena nanga halalika mutwi wakwe.” <sup>59</sup> Ni cha wambila muntu zumwi. “Ni icilile,” Kono zo ni chati, “Simwine, pili ni lindile ni ka zike bandanda.” <sup>60</sup> Kono ni chawamb kwali, “siye bafwile bazike bafu babo, kono haili iwe, uyende ukawambe inzwi mubule ni bukando ze Impuso ye Ireeza.” <sup>61</sup> Zumwi hape ni chati, “Ka ni kuicilile, Simwine, kono pili ni kalaeze ve na munzubo yangu.” <sup>62</sup> Jesu ni cha mwitava ni chati, “Ka kwina ubika iyanza lyakwe kumpilo ni kucheveka kwisule u swanela Mumpuso ye Ireeza,”

## Inkauhanyo 10

<sup>1</sup> Linu chinga kwamana izo zintu, Simwine nichaketa bantu bakwana makumi amana iyaza limwina ni overe Linu nichabatuma bovere bovere, habusu bwakwe mwitolopo ni tolopo mwava kuswanela kuyenda. <sup>2</sup> Nichawamba kuvali, ikukutulo yingi, linu basinza bache. Nihakubabulyo muvuze Simwine wekutulo atumene bamwi vasinzi mwikutulo yakwe. <sup>3</sup> Muyende mwizila yenu. Mubone, nimitumina hanze sina imbelele zina mukati ka batuhu. <sup>4</sup> Kanjimuhindi chikwama chamasherefi kanjimuhindi mukotana wazizwato kamba isangu. Mi

nsezi mulumelisi zumwi ni zumwi yesemusangane munzila. <sup>5</sup> Izubo ihi neihi yetimwinjile, Chama tangilo muwambe, 'Inkozo ive mweyinu izubo!', <sup>6</sup> Haiva mutu wekazo mwena mukati, Inkozo muiikale hakwe, kono haiva kanji mona, mwivole kwenu. <sup>7</sup> Mwikale mwizubo iswana, mulye ni kunywa zonse zivamiha, muvereki uyelere kuhewa impeyi yakwe. Kanji mukayendi mwinzuvo ni nzuvo. <sup>8</sup> Yonse itolopo yente nimwinjire, mi vamitambula, mulye zosezivamiha, <sup>9</sup> mi muhoze vose valwala venakwateni, Muwambe kuvali, 'mutekuti impuso ye Reeza chiyeza hafwihi nanwe.' <sup>10</sup> Inakoyonse hamwinjila mwitolopo mi kava mitambuli, muyende haze lyamingwangwa mi mukatekuti, <sup>11</sup> 'Nanga isuko lizwa mwitolopo yavo likakatile kuma ntende enu muliva limi lwisa muliva nkunkumwine! Linu mwi zive izi: Impuso ye Reeza chiyeza hafuhi', <sup>12</sup> Ikumbya nimiwambila nitii mwelina izuba lyekatulo Sodoma kapangiwe sinte kuhita yina itolopo. <sup>13</sup> Wina bumai iwe, korazini! Wina bumai iwe Betsaida! Mukuti kakuli zivapangiwa nanwe kambe zivapangiwa ni Tire ni Sidoni, niva vaki kale, kwikala niva zwete masaka niku lisinga itwe, <sup>14</sup> Nihakuba bulyo Tire ni sidoni kazipangiwe sinte kuhita inwe mwinako yekatulo kuhita inwe. <sup>15</sup> Iwe, kapenawuma, uhupula konyemunwe kwiwulu? Nanta, movozwe hansi mwihele. <sup>16</sup> Iye mwine yoteka kwenu uteka kwangu, linu yomikana ukana name, mukuti yonikana ukana niyabanitumi." <sup>17</sup> Ba makumi akwana iyaza limwina nimakumi overe nichibakavola nibasangite, nivatakuti,"Simwine, mane ni madimona atuzuwa mwizina lyako." <sup>18</sup> Jesu nichata kuvali, "niva boni satani chowa kwiwulu sina invula ivesa. <sup>19</sup> Mubone, nivamihi innguzu zakulyata izoka nitu vumwe, nihewulu lyenguzu zachila, mi kakwina mukwa umwi wete nicha miholofazo kawo. <sup>20</sup> Nihakuva bulyo kanji musangi kezo bulyo, kuti ihuhu zami zuwa, linu musange mukuti mazina enu afoletwe mwi mbuka yakwi wulu". <sup>21</sup> Mweyo inako iswana nicha taba ahulu Muluhuho Lunjolola, nichatakuti, "ni kulumbeka, Tayo, Simwine wewulu ni ikanda, mukuti izizintu ubaziwungwili vena mano nivazuwisisa, ni kuziwumbwila vana basana vavarutwa, sina vahwilezana, Eni, Ita, Mukuti chivali kusangisa kumbaliyenu." <sup>22</sup> "Zintu zose nivazihewa kwatayo, mukuti kakwina wizi kuti Mwana njozuhi mbwiteli Itayo, imi kakwina yowizi Tayo mbwiteli mwanakwe hape yense yonsalwa kumwanakwe kumuzivahaza kwali." <sup>23</sup> Linu nicha sandukira kuvarutwana vakwe ni kuva wambira kwimbali, "Bafuyoletwe avo vantu vavona zintu zimuvwene. <sup>24</sup> Nimilwira, mapolofita vangi ni vasimwine vava sakite kuvona zintu zimuvwene, linu kana vavazivoni, mane nikuzuwa zintu zimuzuwile, imi kana vavazizuwi." <sup>25</sup> Mulole, umwi muruti wamulao wa Majuda nicha zimana kusaka kumulika, nichati, "Muruti, munipange vuti kuti niwole kuyola vuhalo vusamani?" <sup>26</sup> Jesu chata kwali, "Chizi chiñoletwe mwimbuka yamulao? Kati wuvala vule?" <sup>27</sup> Linu chinge tava chatakuti, "Mosake simwine Ireeza nikulo yako yose ni mozo wakowose, ni nguzu zakozose, ni mizezo yakoyose, ni yovambee naye sina njewe." <sup>28</sup> Jesu nata kwali, "Wetava sinte. Wupange, vovu lyo imi mohale." <sup>29</sup> linu muruti, kulakanamina kuli nyemuna iyemwine, nichata kwa Jesu, "linu univambene naye njeni?" <sup>30</sup> Imi hetava ikalavo Jesu nata kuti, "Mukwame zumwi avakuzwa kwa

Jerusalema kuya kwa Jerico. Nicha wila mumayaza avansa, ni chi vamuchupulisa ni kumunyanga zintu zakwe, nichu vamundamona nikumusiya uzuminine. <sup>31</sup> Chetohonolo muprista avakuhita mweyo inzila, chinga muvona, nicha muzimbuluka. <sup>32</sup> Chokuswana mulevi naye, chingasika hachivaka chiswana ni kumubona, nichazimbulukila kumbali. <sup>33</sup> Linu mukwame Wamusamaria, hava kuyenda mweyo inzila, Chinga muvona, chamu nfwila inse. <sup>34</sup> Chamu chunina nikusumina zilavi zakwe, niku chuka ioyili ni veine hateni. Ni kumutatika hembelesa yakwe, nicha muleta mwi hotela, kwiza kumulwalikila mwateni. <sup>35</sup> Imi izuva lichilila chahinda impondo zovere. imi nichaziha mwine we hotela, “imi nichamuwambila kuti, zintu zonse zete notendise, china kabola, munize nikuluwere. <sup>36</sup> Imi njeni kwava votatwe, yo hupula, kuti yava vambene naye hawila muyaza abansa? <sup>37</sup> 'Imi muruti nichatii, “Yava mufwili inse,” Jesu nichata kwali, “Yende ukapange ziswana.” <sup>38</sup> Linu havava kwavuyenda, niche njila mu muni wumwi, mwanakazi zumwi yava kusupwa Mareta nicha mutambula mwizuvo yakwe. <sup>39</sup> Avena mwache wamwanakazana yavakusupwa Maria, yave kele havunsu vwamatende a Simwine niku zuwa mazwi akwe. <sup>40</sup> Kono Mareta avapatehete nimitendo mingi yakwihika kuti avayumbule. Nicha yende kwa Jesu, Nikuka cho, “Simwine, kovilaeli kuti mwachangu wanisiya nini seveza neke? linu umuwambile zanituse,” <sup>41</sup> imi Simwine nicha mwitava nati, Mareta, Mareta, uvilaezwa nizintu zingi, <sup>42</sup> imi chitu choke chisakahala, linu Maria waketa chintu chilukite, chisa woli kuhindiwa kwali.

## Inkauhanyo 11

<sup>1</sup> Kubatendahali imwi inako Jesu haba kulapela muchibaka chimwi, mulutwana yenke chawamba kwali, “Simwine, tulute kulapela sina Johani mwaba lutili balutwani bakwe kulapela.” <sup>2</sup> Jesu chati kubali, “Hamulapela muwambe, 'Tayo, izina lyako lijolozwe. Mubuso wako ukeze. <sup>3</sup> Utuhe chinkwa chetu mwi izuba ne zuba. <sup>4</sup> Utu ondere zibi zetu, sina mutu ondera muntu ni muntu yowina mulandu kwetu. Sanzi ututwali mumuliko.” <sup>5</sup> Jesu chawamba kubali, “Njeni kwenu yowina mulikani, mi uyenda kwali hakati kamasiku, nokumuwambila, 'Mulikani, nikolotise zinkwa zotatwe',<sup>6</sup> <sup>6</sup> chinga sikira mulikanangu kukazwa munzira, mi kanina chimwi cho kumuyumbula, <sup>7</sup> Yavena mukanti chamucho kuti, 'kanji uni katazi. Mulyango we yaliwa kale, mi bana bangu, bena neme, bena habulalo. Kani oli kubuka ni kukuha nchinkwa.' <sup>8</sup> Nikuwambila, nihasabuki kuti akuhe nchinkwa, kakuli umulikani wakwe. Ibaka lyako lyo kundundamena kwako nosa swabi, mwabuke no kukuha zikwa zingi zosaka. <sup>9</sup> Ime name nikuwambila, kumbile, mi mowane; ngane, mi mowane; ngongote, mi mowi yalwilwe. <sup>10</sup> Muntu yense yokumbila uhewa; mi muntu yongana uwana; mi kumuntu yo ngongota, mweyalwilwe. <sup>11</sup> Mushemi inzi wechi kwame hakati kenu, haiba mwanakwe wechi swesu hamu kumbila inswi, momuhe izoka kapa inswi? <sup>12</sup> Kapa hakumbila iye, kana momuhe kabumwe? <sup>13</sup> Nihakubabulyo, haiba inwe mwina buvi mwizi kuha impo zilotu kubana benu, linu Ishenu yowina kwiulu, kahe zikuma kuhi ku bamukumbila luhuhu lujolola?” <sup>14</sup> Imwi inako, Jesu aba kuhindikira hanze indimona, mi ibali satambi. Chikupangahala



kuti indimona halizwa, mukwame abali satambi chatanga kuwamba. Chisi chicha komokwa! <sup>15</sup> Linu bamwi bantu chibawamba, Cheziho za Beelzebule, simwine wa madimona, uzwesa madimona. <sup>16</sup> Bamwi chibamulika kuti aba tondeze chisupo chizwa kwiulu. <sup>17</sup> Linu Jesu kokwiziba mihupulo yabo, chabawambila kuti, “Mubuso ni mubuso ose olikauhanya ushala niu kauhene, Mi inzubo ili kauhanya iyo ine kaiwe. <sup>18</sup> Haiba Satani uli kauhanya iye mwine, mubuso wakwe uzimana bule? Inwe muwamba kuti ime ni zwisa ihuho ca Beelzebule. <sup>19</sup> Haiba nini zwisa mandimona ca Beelzebule, chwale balutwani benu ba zwisa chani hanze? Bakeñi chezi, mubabe baatuli benu. <sup>20</sup> Kono haiba nizwesa mandimona chomunwe we Ireza, linu muvuso we Ireza chiweza kwenu. <sup>21</sup> Linu mukwame yokolete yokwete zilwiso namamela izubo yakwe, zibya zakwe zina mwipabalelo ina hande, <sup>22</sup> Linu mukwame yokolete hamukoma, mukwame yokolete uhinda zilwaniso zakwe, mi uzenenga chifumu chakwe. <sup>23</sup> Yase yasena name unisandukile, yasakunganyi name uhasanya. <sup>24</sup> Luhuhu lubi haluzwa kumutu, lu yenda muchibaka chisena menzi ni kungana chibaka cho kupumwira. Halubula, luli wambila, 'Munibole kwizubo kunakazwa.' <sup>25</sup> Halubola, lukawana kuti izubo ifiyelwe ni kubikwa hande. <sup>26</sup> Mi lubola ni kukahinda amwi madimona akwana iyaza nio bele alihita kulunya mi onse enjila nikuhala mwateni. Linu bwikalo bwama manimani bozo muntu mubube bubilala nikuhita bwe ntanzi.” <sup>27</sup> Kubapangahali vuti, habakuwamba inzi zintu, mwanakazi zumwi aba huwelezi kuhita mazwe a chisi, ni kuwamba kwali, “Lina itohonolo ibumo liba ku hwizumuki ni beere libakunyonsi.” <sup>28</sup> Linu iye chati, “Chobulyo, bena itohonolo njabana bazuwa linzwi lya Ireza nikulili vikira.” <sup>29</sup> Linu chisi hachibali kukopana nanga bantu bangi, chotanga kuwamba, “Uwu murahi - murahi mubilala. Usaka chisupo, kono kakwina chisupo chite chihewe kuwuli konji chisupo cha Jonasi. <sup>30</sup> Sina mwababiri Jonasi chisupo kuvene Nenive, Linu ku Mwana wa Muntu mwabe chisupo kounu murahi. <sup>31</sup> Simwine wa mwanakazi welu hati lwa chilyo mwazimane hekatulo ni mukwame wowuni murahi niku banyansa, linu aba kazwi kuma mani - mani a nkanda kwiza kuzuwa maano a Solomoni, mi mubone zumwi kuhita Solomoni kwena hanu. <sup>32</sup> Mukwame wa Nenibe kazimane he nkatulo nowu murahi wa batu ni kuunyaza, Linu baba baki henkutazo ya Jonasi, mi mubone, zumwi mukando kwa Jonasi zunu hanu. <sup>33</sup> Kakwina zumwi, hamana kumunik i lambi, nokulibika mukerima, kamba mwikonde lye chitanda, kono hama biko a lambi iri kuti benjila bawane iseri. <sup>34</sup> Menso ako nji lambi yomubili. Haiba menso ako ena hande, mubili ose wizwire iseli. Kono haiba linso lyako ivi, mubili wako wiizwere kerima. <sup>35</sup> Nihakwinabulyo, mutokomere kuti iseli lina kwenu kena kerima. <sup>36</sup> Nihakwinabulyo, mubili wako ose wina iseli, nikusena i mbali yomubili wako mu kerima, Linu mubili wako onse muuswane ubu i lambi haibanya choku njoloza kwako.” <sup>37</sup> Hamana kuwamba, Mufalisi chomukumbira kuti bakalye naye kwizubo yakwe, mi Jesu choyenda chokekala ha zilyo. <sup>38</sup> Mufarisi chokomokwa kuti kena aba tangi kusambi naseni kulalila. <sup>39</sup> Kono Simwine chali kwali, “hanu chwale, inwe Mafarisi muchenise inkomoki ni tusuba hanze, kono mukati kenu mwina feela belyavi, nibubilala. <sup>40</sup> Inwe bantu musena ingana! Kena kuti yaba pang'i hanze njiyena hape yopanga mukati?

41 Muhe ku babotana zina mukati, mi zintu zonse njisezi chene kwenu. 42 Kono bumayi kwenu inwe Mafarisi, kakuli muzwisa chintu chonke kuze kumi, minta ni kumini mwiwa lyezi byalantu, kono kamu bileli niswanero ni lato lya Ireza. Kwina hande kupanga nceswanero ni kusaka Ireza, nikusa kangwa kupanga zimwi zintu nazo. 43 Bumaiye kwenu inwe mafarisi, kakuli musaka zipula zokubusu mu masinagoge ni kulu meriswa chekute kuzibaka zemusika. 44 Bumaye kwenu, kakuli muswana sina makumbu asena maswayo, bantu baalyata niba sezi.” 45 Mi muruti zumwi omu lao wama juda chamwitaba nokuwamba kuti, “Muruti, zowamba zitu tuka neswe.” 46 Jesu chawamba, “Bumaye kwenu, baruti bomulao! Linu mulemeza batu ni miziyo ibasa oli kuhinda, kono inwe mani kamukwati iyo miziyo ni kanwe kenu konke. 47 Bumaye kwenu, kakuli muzakila ba polofita' makumbu, akubazezela ho, mi bazimu benu ba babehayi. 48 Mi mwipaki hape niku zumina misebizi yaba ziimu benu, kakuli cheniti luli babe hayi Baporofita, avo makumbu abo akuba zezela ho. 49 Cheri ibaka nalyo, butali bwe Ireza vuva cho, 'Muni tumene kubali baplofita ni ba apositola, mi mubaba nyandise ni kwihaya bamwi. 50 Uwu murazi, chwale, kababe nikulitabilira, kuamana ni malaha aba polofita avava tiri chinga libatangi ifasi. 51 kuzwa kumalaha a Abele kuya kumalaha a Zakaria, yabe hailwa hakati ka katala ni chihalaleho. Eni, niwamba kwenu, Owu murahi kaulitabilile. 52 Bumayi kwenu maruti bo mulao wa Majuda, kakuti chimubahindi inkii yenzibo; inwe mubene kamwinjili mwateni, mi mukanisa abo basaka kwinjila. 53 Jesu hachazwele kwateni, bañoli ni Mafarisi chiba mukananisa ni kumu lwanisa kuamana zintu zingi, 54 Kulika kumuchesa mumanzwi akwe.

## Inkauhanyo 12

1 Munako zana, chikiti chavantu chibena hamwina, mbwita nibalily-ata jo bungi, chatanga kuwamba kuva rutwana bakwe, Mutokomere mulungo wava Farisi, iri kuliha 2 Kono kakwina chinchinte, chete nichu kanwe kwi zibahazwa, 3 Cwale chose cimw va wambi mwififi kachi zibahazwe mwiseli, mi chimubali kushovota muma ntwi kachi huwerezwe hakantungandi ke zuvo. 4 Ni wamba kwenu balikani, kanji muntiyi behaya mubili, kuzwa ho kavena chimwi chiva ola kupanga, 5 Kono me ni mikalimera kuamana neni umowola kutiya. Mutiye yenke uzo Hamana kwi haya, wina ziho zo kutumina mwi here, Eye, Ni miwambira, mumutiye. 6 Kena kuti tuzuni tukuma he yanza limwina tu uziwa hetenko i likana tukoviri to Vere? Kono nanganti konke kutuli kase hupulwa kweIreza. 7 Kono nangati i mpalo ye nsunki nzenu ivalitwe, Kanji mutiyi. Mwina butokwa kuhita tuzuni tungi. 8 Ni wamba kwenu, yense yo niwamba havusu bwa bantu, Mwana u muntu kaka muwambe naye habusu bwa mañiloyi e Ireza. 9 kono nyense yo nisampula havusu bwa Vvantu kaka sampulwe havunsu bwa mañiloyi e Reza. 10 Yense yo wamba linzwi ivilala kuamana ni mwana wo Muntu, ka wonderwe awo mazwi, kono kozo yo wamba vuvilala kuamana ni Luhuhu lu Njolola, kasana a wonderwe. 11 Hasana kava mi lete havusu bwa masinangonge, va yendisi, ni vena ha muvuso, kanji ni muvireri kuamana nimwete ni

mwi tavire ku amana ni kulizimanina, kamba chete ni muwambe, <sup>12</sup> kakuli Luhuhu lu Njolola kalumi ka lumi lute mweyo nako chizi chi muswanera kuwamba. <sup>13</sup> Linu zumwi mukati kechisi cha cho kwali, “Muruti, wambire mukulwangu kuti a liyavire chifumu chavayoli name.” <sup>14</sup> Jesu cha kwa li, “Mukwame, Jeni wani vika mu atuli kamba muzimanini hakati kenu?” <sup>15</sup> Mi chati kuvali muli tokomere kobona kuti mulizwisa ku takazo yonse yomuuna, kakuti vuhalpo vo muntu kabwina vulyo hachi fumu chali kunganize muntu.” <sup>16</sup> Linu Jesu chava wambira i nguli, ni kucho Iuwa lo mukwame yavali kufumite, luvali kuvikite ahulu, <sup>17</sup> mi chali wambira ni kucho, chizi chete ni pange kakuli kanina chiviko cho kuvika zilyo zina lima? <sup>18</sup> Cha wamba, í chi jichona chete ni pange. Mu ni wise hansi zishente zangu ni kuzaka zikando ahulku, umo mwete ni vinke vuhenke bwangu vonse ni zimwi zimera zete ni sinze. <sup>19</sup> Muni wambe ku luhuhu lwangu, “luhuhu, wina zilyo zingi zisizitwe zonso seberise zirimo zingi. Pumule hande, lye, nwe, unsese.” <sup>20</sup> Kono Ireza cha cho kwali, ‘Chihole cho mukwame, masiku a nsunu luhuhu lwako luhindiwa kwanko, mi nzintu ziwa lukisa, muzive zani?’ <sup>21</sup> China mwe kalire muntu yoli kunganyiza chifumu kwali mi kafumite havusu bwe Ireza.” <sup>22</sup> Jesu cha wamba kuva lutwana bakwe, “Cwale he nicho kwenu, kanji muvireri kuamana ni vuhalo bwenu - chizi chese mulye, kamba kuyana nizo mubiri wenu - chinzi chete muzwate. <sup>23</sup> Kakuti vuhalo bwina butokwa kuhita zilyo, mi muviri wina butokwa kuhita zizwato. <sup>24</sup> Mulemuhe ma ñwarara, kuti kava byali kamba kusiza. Kazina zivinko kamba zishete, kono Ireza uzilelra. Muvo vutokwa vule kuhita zizuni! <sup>25</sup> Mi jeni kwenu choku virera u wola kuyekeza i zuva kuvuhalo bwakwe? <sup>26</sup> Cwale haiva kamu oli kupanga nanga nti chitu chinini, chinzi hamu virera kuamana ni nzonse? <sup>27</sup> Mulemuhe tuyanga yanga mutumenena - zikula vule. Kazi sevezi, kamba kuhosa. Kono ni cho kwenu, nanga Salumoni mwi kanya yakwe kenba aba zwatikiwa uvu ji limwi. <sup>28</sup> Haiva Irazza uzwatika lyani lyomukanda, lina kwateni nsunu, mi inzona lizindirwa muhisa, inwe cwale mwa mizwatike vule, mawe inwe ve tumero inini! <sup>29</sup> Kanji mungani zete mulye kamba zete munwe kanji mu vireri. <sup>30</sup> Kakuli inkanda zonse ze fasi bangana inzi nzintu, mi Ishenu wizi kuti musaka inzi zintu. <sup>31</sup> Kono musake mubuso wakwe, mi inzi zintu ka muziyekerezwe. <sup>32</sup> Kanji mutiyi, tumberere tunini, kakuli i shenu i sangitwe kumiha Muvuso. <sup>33</sup> Mu uze maluwo enu mi muhe kuva shevete. Muli pangire ziviko zisa woli kusupala - Vufumu mwi wulu muzisa mani, uko kusengiri vasa mi Ifulapepe kuzisa shinyi. <sup>34</sup> Kakuti kwina chifumu chenu, uko ni inkulo yenu kwete ive nayo. <sup>35</sup> Imunda zenu zisuminwe muma tunga mi malambi enu a zwirehavusu ni kumbukuka, <sup>36</sup> mi muswane uvu vantu bakwete kulola muyendisi wavo chakavola kumukiti we senso, iri kuti cha keza ni kwiza kungongo ta, yahaho bamwi yalwira mulyango. <sup>37</sup> Imbuyoti yaba bahikana, vesana keza wanikize niva lindire chakeza. Chama niti ni miwambire kuti keza nsumine ziwato zakwe zile mumunda che tunga, ni kuve kalika hasi kuzilyo, mi mwakeze nikwiza kuva haza. <sup>38</sup> Haiva muyendisi ukeza malunga siku, kamba kalya butatu bwe nako, ni kwiza kuva wana vali tukise, Imbuyoti zavo vahikana. <sup>39</sup> Konohape mwizive inchi, kuti haiva muyendisi we nzuvo ave zivite inako iyo musa avali kukeza, nasana a va siyiriri inzuvo yakwe ni

iñatulwa. <sup>40</sup> Mulitukiseze nanwe vulyo, kakuti kamwizi inako iyo mwana o Muntu sana keze.” <sup>41</sup> Pitorosi chati, “Simwine, uwambira iyi nguli kwetu fera, kamba niku vantu vonse?” <sup>42</sup> Mi Simwine chati, “Njeni he you sepahala ni kutalifa muyendisi simwine yata vike vuyendisi he wulu lya va hikana kuti a kuva hanga zilyo che nako iswanera? <sup>43</sup> Ufuyaulitwe uzo muhikana, uzo muyendisi wakwe keza wane napanga izo hakeza. <sup>44</sup> Cheniti niwamba kwenu kamuvike vuyendisi bwe luwo lyakwe. <sup>45</sup> Kono haiva uzo muhikana nali wambnira mwinkulo ya kwe, 'Simwine wangu unlyeha kuku vola; mi utanga ku mbupola bahikana vava kwame ni ve chanakazi Vahikana, ni kulya ni nwa, ni kukolwa, <sup>46</sup> simwine wozuna mu hikana kakeze mwizuba lyasa mulindire, ni mwi nako yasenzi mi kamu konsole mutu vindivindi nikumu tumina kuchi vaka chimwi navana vasasepahali. <sup>47</sup> Zuna muhikana, hace zivite mihupulo ya simwine wakwe, mi kena ava lukise kamba kuyendereza mwa sakira, kakaviwe cha mafaindi mangi. <sup>48</sup> Kono uzo yasana a bezivite, kakaviwe chama faindi mache. Zumwi ni zumwi kwali kuherwe a hulu, zingi kazi sakahane kwali, mi kwali vava sepahali ahulu, kava vuze zingi ahulu kwali. <sup>49</sup> Ni vakezi kuzindira muliro mwi kanda, mi muni sangirwa kuti kamba ciwuva mbukulwa kale. <sup>50</sup> Kono nina i nkolovezo ini swanera kukolovezwa chayoy, mi kaini kalikite hande konji chiya lizuziriza! <sup>51</sup> Muhupula kuti ni va kezi kuleta inkozo mwi ikanda? Ne, Ni ki wambira, kono niva leti ikauhano. <sup>52</sup> Cwale kuzwa hanu kuya kuvusu, mukube mwizuvo nyonke inkauhano zeyanza lyonke - vantu vo tatwe kulyisa vovere, vantu vo vere kulwisa vantu vo tatwe. <sup>53</sup> Kava kauhane mushemi we chikwame kulwisa mwana kwe we chiswisu, ni mwana we chiswisu kulwisa isi; mushemi we chanakazi kulwisa mwanakwe we chikazana, ni mwana kazana kulwisa nyina; mukwenyani we chanakazi kulwisa mukwenyana kwe we chikazana, ni mukwenyani we chikazana kulwisa mukwenyanakwe we chanakazi.” <sup>54</sup> Jesu avali kuwamba ni kuchisi bulyo, “Hamubona i kope lizimana kubwimino, yahaho mu wamba, 'I vula ikezite; mi iza kuva bulyo. <sup>55</sup> Mi haiva luhuhu lo kwiyaza lye chimonso ni hunga, mu wamba, 'Mukuhise a hulu nsunu; mi kwiza kuva vulyo. <sup>56</sup> Balihere, mwinsi kutoloka mayemo e kanda ni e wulu, linu vule hape hamusezi muku tolokerwa i nako ya hanu? <sup>57</sup> Chinzi hamusa atuli zina hande kwenu? <sup>58</sup> Kakuli haiva no yenda niyo ku zekisa kumu atuli, mu zira ulike ahulu kuti mumane indava naye, iri kuli kanji naka kutambinki kumu atuli, mi kuti muatuli kanji a kaku tambiki kumu yendisi, mi munyendisi kanji a kakusoheri mwi ntorongo. <sup>59</sup> Ni wamba kwenu, kasana ko zwe mwateni konji hete no lihire ishhereñi yama manimani yo kwete.”

## Inkauhanyo 13

<sup>1</sup> Cheyo nako vantu vamwi vava mu wambili cha Magalileya avo, malaha, avo, a va kopanyi Pilato ni zitabelo zavo. <sup>2</sup> Jesu ave tabi nati ku vali, Linu muhupula kuti avo Magalileya vena zivi zingi kuhita Magalileya vonse vava nyandiswa che nzila iyi? <sup>3</sup> Nanta, ni mi wambila. Niti, heva ni mu sa lisa lichuli zivi zenu muvonse mo mufwe munzila iswana. <sup>4</sup> Ni heva vantu vene kumi ni valikana iyanza ni vo tatwe, va zwa mwa Siloe avo itawala iva wili ni ku ve haya, muhupula kuti va vena zivi kuhitiliza vamwi vakwame mwa

Jerusalema? <sup>5</sup> Nanta, niti kwenu, heva ni musa lichuli zivi zenu mu vonse momu fwe. <sup>6</sup> Jesu ava wambi inguli iyi, muntu zumwi ava vyali isamu lye feiga mwi wa lyakwe lye veine, linu neza kulola kwateni zi hantu ze veine cheza kuvula na nga konke. <sup>7</sup> Mukwame, nati ku mulimi, lole, cheli zilimo zo tatwe nini za kulola zi hantu kweli samu kono kani wani nanga konke. Liteme, liwe bulyo. Chinzi holi silile ni lishinye vuu? <sup>8</sup> Mulimi, ne tava nati, 'Mu siye vulo, chinu chilimo, nili, limine ni ku livika mununo. <sup>9</sup> Heva mu livike, zi, hantu, chilimo chi keza, ku lotu, linu, heva ka liviki, mu liteme liwe.'" <sup>10</sup> Linu, Jesu avali ku ruta mwi Sinagoge, le nsavata. <sup>11</sup> Muvone, mwanakazi a vena mwa teni ke zi limo zine kumi ni zi likana iyanza, ni zo tatwe, nena luhuhu lubi lwa kufokola, linu, chava koteme musana kana vali ku wola kuzima. <sup>12</sup> Linu, Jesu nga amu vona, ava sumpi kwali nati, "Mwanakazi, niti, chi wa sumununwa ku manyando ako. <sup>13</sup> Cha vika manza heulu lya kwe, mi chenako yonke, cha oloka mi chatemba Ireeza. <sup>14</sup> Linu Mukulwana we Sinagoge cha venga ahulu che vaka lyo kuti Jesu ava hozi mwanakazi mwi zuva lye nsavata. Linu muyendisi we Sinagoge ne tava ku chicava nati, kwina mazuva alikane yanza ni zuva limwina, mazuva etu swanela ku seveza. mwize muhozwe, nanta lye nsavata. <sup>15</sup> Ireeza na mwi tava nati, Inwe mulihele kana kete musumunune imbongolo kapa Iñombe kuitwala ku kunywa menzi le nsavata? <sup>16</sup> Linu kozu mwana Abrahamama yava suminwe kwa Satani zi limo cha zi limo zine kumi ni zilimo zilikane ya nza ni zilimo zo tatwe, linu kene nswanelo yakwe kuti a sumununwe mwi zuva lye nsavata? <sup>17</sup> Sina hava wambi izi zintu, vonse va vali kumu sheunana, vava swabi ahulu. Linu, chonse chi chava chiva sangi ahulu ni kumu temba cha zintu za vatendi. <sup>18</sup> Linu, Jesu chati, muvuso we Reeza wina vule? Imi ka ni u vambaye ni chi? <sup>19</sup> Kukola uvu lutanga lwe samu luva sohelwa mwiwaa, ni ku kula kuva isamu ikando, mi zizuni zewulu chiza zaka zizumbo kumitavi." <sup>20</sup> Hape chati, "Kani uvambanye nichu muvuso we Reeza? <sup>21</sup> Ku swana sina mulungo wava kopanyi mwanakazi muvusu vwavu roto kuti vu funduluke chi vukopene neza ni vusu vwa vuroto. <sup>22</sup> Jesu ava poteli mileni ni minzi havena munzila kuya kwa jerusalema niku va ruta. <sup>23</sup> Zumwi chati kwali, "Simwine, na vache feela vantu vete vapuluswe?" Cwale cha wamba kuvali, <sup>24</sup> Mu lwile kwinjila mu mulyango u kumbene, kakuti, niti kwenu, bungu mu vatavele kwi njila, kono kete va wole kwi njila. <sup>25</sup> Linu mwine we nzuvo havuka, mi cheyela mulyango, linu kamu zimane hanze ni mungongota, ni muti, Simwine, Simwine tusiye twinjile, Mi ketave ni kucho kwenu, kani mizi inwe kapa muka zwila kuhi.' <sup>26</sup> Linu ka mu wambe, "Tuvali ni ku nywa havusu bwako mi uva ruti mu makululu etu, <sup>27</sup> linu ketave nati, niti kwenu, kani mizi ku mu kazwila. Muzwe kwa ngu, Inwe mutenda zivi. <sup>28</sup> Ka valile ni ku kwenga meeno, chi va vona Abrahamama, Isaaka, ni, Jakobo ni vonse va polofita mu muvuso we Reeza, <sup>29</sup> Linu inwe - inwe ka mu zindilwe hanze. Ka vasike kuzwililila ku vuzwe, ku vwimino, upa ni mbowela, ni kwi kala he ntafule mu vuso we Reeza. <sup>30</sup> Mwizive izi, va ma manikizo kava ve ventanzi, ventanzi kavave va ma manikizo. <sup>31</sup> Che nakozana Vafarisi chiveza mi chivati kwali, "Yende mi wikale kunu kakuti Heroda usaka ku kwi haya. <sup>32</sup> Jesu chati, Muyende mi mu ka wambile zuna Luwawa, "vone, ni zwisa madimona, ni kuhoza va lwala sunu, ni zona ni lya vutatu

ni sika ku mamani a musevezi wangu.' <sup>33</sup> Linu ni hakuva vulyo, kuni swanela ku zwila havusu lya sunu, sina haku sa zumi ninwe kwi haya mupolofita kule ni Jerusalema. <sup>34</sup> Jerusalema, Jerusalema, wi haya va polofita ni kuva zinda mavve avo vava tuminwa kwenu. Chini lakaza ku kunganya vaana venu sina uvu inkuku ikunganya vaana vayo mu mavando, kono ka mu lakazi vulyo. <sup>35</sup> Voone, inzuvo yako ikendetwe. Ni wamba kwako, kete uni vone konji chi wati,' Imbuyoti nji yozo yo keza mwi zina lya Simwine Reeza."

## Inkauhanyo 14

<sup>1</sup> Izuba limwi le Savata Jesu a vayendi muzuvo ya mukulwana wavafalisi kukalya inkonko, miva vaku mulolete. <sup>2</sup> Mubone, habusu vwa kwe kuvana mukwame yava kulwala butuku bwa chirunta. <sup>3</sup> Jesu ava kumbili vene inzivo ya mulao ni vafalisi chati: Kana iswanelo kuti muntu yo lwala a olwe ku hozwa le Savata kapa ka ku oleki? <sup>4</sup> Imi vava tuntwele. Jesu ava muondi, ava muhozi, ni ku mulwila kuti ayende. <sup>5</sup> Cha wamba kuvali, njeni kwenu wina manaswisu kapa ipulu iwilile muchisima le Savata ya sati amu zwise muchisima? <sup>6</sup> Kana vava oli kuha inkalabo kwezi zintu zonse. <sup>7</sup> Linu Jesu cha lemuha kuti ku vava memetwe vava liketeli kwi kala ku zipula zi sepahala, cha wamba che nguli, ku wamba nati kubali, <sup>8</sup> "Ha mu memwa ku mukiti weseso, kanzi mwi kali ku zipula zi sepahala, kuola kuva ni muntu yo memetwe wina mazimo ahita enu. <sup>9</sup> Linu zuna muntu yava mi memi mu vonse ha sika, uwola ku milwila kuti muhe uzu mwi chi baka chenu; Linu che nsoni ka muhinde chipula cha hansi. <sup>10</sup> Linu ha mu memwa muyende ukekale ha chabaka cha hansi nji kuti zuna wa mi mema ha sika mwati kwenu mukwangu, zimane uzwe mu chaba cha hansi uke kale mu chabaka heulu.' <sup>11</sup> Linu kamu kutekehe ha vusu vwa vantu vonse vekele hentafule nanwe. Yense muntu uli nuneka kabozwe mwi sule." <sup>12</sup> Jesu chata ku mukweme ya va mumemi kuzilyo za musihali kapa za chitengu, sanzi mu memi va likani niva kwenu, kapa muntu muhumanehi imu vambene naye chinanga amimeme naye, cho kuti kamulihiwe. <sup>13</sup> Kono hova ni zilyo zi chitengu umeme vashebeta, zihole, vasayendi ni vasaboni, <sup>14</sup> Imi mo fuyolwe, kakuti kavaoli kuku vozekeza chimwi kapa kukuliha. Mukuti, molihwiwe kenako yoku vaka kuva shiyeme." <sup>15</sup> Imi zumwi yabekele ni Jesu hentafule hazuwa zonse izi zintu abati kuti ufuyolwete yete nalya inkoko mu mubuso we Reeza!" <sup>16</sup> Imi Jesu chata kuti zinwi mukwame, "Ava lukisi zilyo ze chitengu ni kumema bantu bangi. <sup>17</sup> Imi zilyo hazi lukiswa, avatumi zumwi kuvahikana vakwe kukasumpa bonse vamemetwe, 'Mwize, kakuli zonse zintu chiza shiama. <sup>18</sup> Bonse chi vatanga kuha mavaka. Wentazi avati kwali, niva uli iwa, nisaka kuyenda nika libona, ni ondele. <sup>19</sup> Linu zumwi naye chata kuti niva uli mapulu atenda ikumi ni saka ku ka atapisa, ni ondele. <sup>20</sup> Linu zumwi naye chata kuti, 'nji ni sesa hanu, kani oli kusiya va mwihetu, ni ondele kani oli kwiza.' <sup>21</sup> Muhikana ava ka voli kwa nfumwe kwiza kumu wambila zintu zonse. Linu nfumwakwe cha venga ni ku wamba kuti azwe ayende mu ma kululu onse e tolopo ni kuka leta va shebeta, zihole, va sayendi mane navana va saboni, <sup>22</sup> Muhikana chati, nfumwangu, zova ni tumi zi petehele linu kusina chivaka cingi.' <sup>23</sup> Nfumwakwe chati

ku muhikana wakwe, 'Yende mu makulu makando onse uka sumpe vonse cho kuti inzuvo yangu izule. <sup>24</sup> Linu niti kwako, kakwina kwavo vakwame vava memetwe yete na sole zilyo zangu zi chitengu.' <sup>25</sup> Linu chisi chi va ku yenda naye, cha chevuka, chati ku vali, <sup>26</sup> "Yense wiza kwangu yasa toyete vesi, vanyina, vamihyabwe, vana, vamukulwe ni va nchizye - initi, ni vu halo vvakwe, ka woli ku va mulutwana wangu. <sup>27</sup> Yense ya sa woli ku kulilka muziyo wakwe ni kwiza kwa ngu ka woli ku vuba mulutwana wangu. <sup>28</sup> Njeni kwenu, yo lakaza ku zaka itawala, ya sa oli kwikala hansi ni ku hupula kapa, wina zi swanela ku mana ku mana muzako wa kwe. <sup>29</sup> Hamwi, chatanga kete a wole ku mana, vonse vete ni vavone kava tange kumu somoza, ni vati, <sup>30</sup> 'Uzu mukwame ava tangite ku zaka linu kana ava woli ku mani.' <sup>31</sup> Simwine nzi, yoya ku kulwa ni simwine zu mwi, ya sati ne kale hansi kapa ku kumbila intuso ku vamwi, ku vona kapa u wola kuya ku nkondo ni va kwame va likana zikiti zina ikumi, ni zumwi simwene yo keza ni mpi ina zikiti zina makumi ovele? <sup>32</sup> Linu heva ka njo vulyo, linu impi imwi ni sina kule, ka tumine muzimani zumwi ku ka ziminzana zikozo. <sup>33</sup> Cho kuti, linu, yense kwenu ya siyi zonse za kwate kete na wole kuva mulutwana ngu. <sup>34</sup> Mwinyo mu lotu, linu heva mwinyo ha u sampuka, ka u lungwe vule? <sup>35</sup> Linu ka kwina intuso kwi yevu nanga mu sutelo u lindikitwe. Ka u soiwa vulyo. Yense wina matwi aku zuwa, azuwe."

## Inkauhanyo 15

<sup>1</sup> Linu vatelisi vonse ni vamwi vaezalivi vavakezite kwa Jesu kukuteka kwali. <sup>2</sup> vonse vafalisi ni vañoli vava kuñuñu, nivati, "Uzu mukwame u tambula vaezalivi, mi mane ulya navo." <sup>3</sup> Jesus avawambi iyi inguli kuvali, nati, <sup>4</sup> "Njeni kwenu, haiva wina imberere zina makumi ekumi imi yonke izova, kete usiye imberere zina makumi akwana iyanza ni makumi one kuvika zikwana iyanza ni zone mwinkanda, nikwichilila ya zova haisi hokayiwana? <sup>5</sup> Linu cwale hayiwana, u yi kulika hamaheta ni kusanga. <sup>6</sup> Hakeza kwi nzuvo, usumpa valikani ni niva vambane nivo, nati kuvali, musange nime, nakawana imberere se izovete.' <sup>7</sup> Niwamba kwenu nihakuva vulyo, mukuve nikusanga mwi ulu nahaiva muezalivi yenke halitekula, kuhita vantu vena makumi akwana iyanza ni one kuvika vakwana iyanza ni vone vasiyeme vasa lili kulitekula. <sup>8</sup> Kapa zuna mwanakazi yavena muwayawaya we silivela i kwana ikumi, kuti azovelwe hateni yonke, kete a munike i lambi, kufiyela inzuvo, kungana kavutali kutwala chawana muwayawaya. <sup>9</sup> Mi linu hauwana, u sumpa balikani ni vekala he mbali yakwe, nati, musange name, nawana muwayawaya wangu se uzovete. <sup>10</sup> nihakuba vulyo, niwamba kwenu, kwina kusanga mukuva kwa mangeloi e Reeza muezalivi yenke ha litekula. <sup>11</sup> Linu Jesu chati, mukwame zumwi avena vanaswisu vovele, <sup>12</sup> mi wachinini cha wambila isi, 'Ita, munihe chanda cha chifumu chiwila kwangu,' chava kauhanyeza zibya zakwe. <sup>13</sup> Kena kuvahiti mazuba mangi, wachinini cha kunganya zibya zakwe zonse hamwina zavayoli ni kuya kwinkanda imwi kule, mi uko avaka sinyi mashelinyi akwe, cha kaula zintu zisena itunso, avashinyi mashelinyi akwe muzintu zenkanda. <sup>14</sup> Linu hanu hashinya zintu zonse, inzala ikando ibatasezi inkanda yonse, mi chava ni ntakazo. <sup>15</sup> Cha yenda ni ku kaseveza ku zumwi

yava kuhala mweyo inkanda, yava mutumi kuluwa ku kaha ziguluve zilyo. <sup>16</sup> Mi navatavi kukalya zilyo ziva kuliwa ziguluve kakuti kakwina yava kumuha zilyo. <sup>17</sup> Kono mwan'a swisu wa munini ha ka volelwa ingana, cha wamba, vongayi kuvahikana vaseveza kuva ndanda vena zilyo zingi luli, mi nina kunu, nini fwa inzala! <sup>18</sup> Munizwe kunu mi ni yende kuva ndanda, mi mu ni kawambe kuvali, "Ita, ni bafosekezi iwulu, ni mu menso enu. <sup>19</sup> Kaniswaneli kusumpwa kuti ni mwanenu, mu ni pange feela nibe ni muhikana wenu. <sup>20</sup> Cwale mwan'a swisu wamu nini cha katuka, ni kukeza mubusu bwe isi, ha ba kusina kule, isi cha mu vona, mi chali zuwa masisi, mi cha mutilila ni ku mutula manza ni ku muchunchuna. <sup>21</sup> mwan'a swisu chati kwali, Ita, ni vafosekezi muvuso weulu ni ha menso enu. Ka ni swaneli kuti ni sumpwe kuti ni mwana nenu. <sup>22</sup> Isi chati kuva hikana vakwe, 'Mulete kapilipili inguvo indende indotu, mu mu zwatike, mi mu mu zwatike iseka kumunwe, mu mu zwatike ni nsangu kuma tende. <sup>23</sup> Linu mulete inamani inunite twi ihaye. Tu lye mukiti! <sup>24</sup> Kakuti mwanangu wa mususwi ava fwile. mi hanu u hala, ava zovete, hanu cha wanika. mi chi va sangwa. <sup>25</sup> Linu mwana swisu wa mu kulwana avena kuluwa, ha sika hafuhi ni munzi, ava zuwi inzimbo nikuzana, <sup>26</sup> Cha sumpa zumwi wa va hikana ni ku muvuza kuti izi zintu zi wola kuva chinzi. <sup>27</sup> Muhikana cha mu wambila, mwancako weza mi veso vamwi hails inkomwana inunite, kakuti wa kavola na liketete. <sup>28</sup> Mwan'a swisu wa mukulwana ava vengi, mi kana avayendi mukati, mi vesi va vakezi hanze, ni kwiza ku ku mu kombelela, <sup>29</sup> Kona che tava isi chati, vone, zonse izi zilimo zi ni va kusevelezi, mi kena ni vacholi mulao wako, mi nahanu kowini ku niha ni haiva kampene kanini kuti nilitavise ni valikani vangu. <sup>30</sup> Kono mwanako heza, ya vaali chifumu ni vanakazi va mahule, u va mwi hayili inkomwana inunite. <sup>31</sup> Vesi chiva wamba kwali, 'Mwanangu, wina name inako yonse, mi chonse cheli changu nji chako, <sup>32</sup> Kono ni kwava hande kuti tusange ni kutava, kakuti mwancako ava fwile mi hanu chahala; ava zovete, mi hanu cha wanika.

## Inkauhanyo 16

<sup>1</sup> Jesu naye cha wamba valutwana vakwe, "Kuvana mukwame wa muhumi avena muyendisi wa musevezi yakwe, mi kuva vihiwa kuti muyendisi wa musevezi ya kwe u kwete ku mu sinyeza iluwo lya kwe. <sup>2</sup> Cwale muhumi cha musupa mi chati kwali, 'Zintu nzi zi nizule kuamana niwe? U nihe chakwizula za musevezi wako, ili kuti kese uzwile havusu ni vuyendisi.' <sup>3</sup> Muyendisi cha liwambila, 'chiniswanela kupanga chinzi, hakuva mukulwana choni zwisa musevezi? Ka nina ziho za kusha, mi niswava ku mukumbila. <sup>4</sup> Nizi chini swanela ku tenda, ili kuti china zwiswa ha musevezi wangu wa vu yendisi, bantu va ni tambule mu mazuvo avo. <sup>5</sup> Cwale muyendisi chasupa zumwi ni zumwi ya vaali kukolota si mwin'a kwe, mi cha vuza we ntazi, 'U kolota vukayi simwin'a ngu? <sup>6</sup> Cha wamba, 'Ni kolota makumi ekumi ya byima bya mafuta e oli.' Mi chati kwali, muhinde zikoloti zenu, mwikale kapili, mi muñole makumi akwana yanza.' <sup>7</sup> Cwale muyendisi cha wamba ku zumwi, 'mi vukayi yo kolota?' Chati, 'makumi ekumi a vuyima bwa vuroto.' Chati kwali, 'hinde chikoloti mi u ñole makumi akwana yenza ni to tatwe. <sup>8</sup> Simwin'a kwe cha lumba chikombwa chi



sa sepahali kakuti ava sevezi mu kusasepahala. Vaana ve fasi ilyi vena ahulu mukusa sepahala chiva kwete kuseveza ni vantu vavo hita vaana vena mu liseli. <sup>9</sup> Ni wamba kwenu, mutende valikani che nzila za mashenyi a sa sepahali, kutendela kuti chi bwamana, va woole ku mitambula mu mazuvo asamani. <sup>10</sup> Iye yo sepahala ku zinini mwa sepahale ni ku zikando, mi niya sasepahali mu zinini kasepahali mu zikando. <sup>11</sup> Haiva kena u va sepahali ku ku sevelisa mashelenyi a fosahale, nje ni yeta kusepe mu chifumu che niti? <sup>12</sup> Mi haiva kawini ku sepahala mu kusevelisa mashelinyi a vamwi, njeni ya sa kuhe mashelenyi ako u mwine? <sup>13</sup> Ka kwina muhikana yo wola ku seveleza malena vo vele, kusicwalo mwa toyeye umwi ni kusaka zumwi, mwa kumalele umwi kapa kunyefula zumwi. Ko woli kuseveleza Ereeza ni chifumu. <sup>14</sup> Hanu Vafalisi, va vali kusaka hahulu mashelenyi, va va zuwi zoose inzi, mi chi va museka. <sup>15</sup> Mi chati kuvali, "Mu li shiyamisa mu menso a vantu, kono Ireeza wizi ikulo zenu. Zina zivoneka vulotu mumeeso a vantu kwe Reeza zi fosahale. <sup>16</sup> Mulao ni vupolofita ziva kuseveza kuleta Johani hasika. Ku zwa iyo nako, inzwii lya muvuso we Reeza li va kutazwa, mi zumwi ni zumwi ava sa kuhambiliza inzila za vo mwateni. <sup>17</sup> Kono kuhuya kwiwulu ni hansu zi mane isi kuti intaku imwi ya mulao sanzi ivi ni mutendo. <sup>18</sup> Yense yo kauhana ni mwanakazi wakwe ni kusesa zumwi u chita vushahi, mi yo sesa mwanakazi ya va kanwa kwa mwihyabwe naye utenda vushahi. <sup>19</sup> Linu ku vena mukwame ya va humite, ya va kuzwete zi zwato ze pulipera ni line mi mazuva onse ava kulikola chifumu cha kwe. <sup>20</sup> Mukumbizi ava kusumpwa Lazaro ava lele hamulyango, avali kwizwile zilavi muvili wonse. <sup>21</sup> Mi avali kuhala kulya vungululwa vu vali kuwa hentafule ya muhumi, mi kuzwaho, vambwa va vali kukomba zilavi zakwe. <sup>22</sup> Ku vezi kuva kuti mukumbizi chafwa, mi avezi ku hindwa mangeloi ku mutwala kwimbali ya Abrahamama. Muhumi naye chafwa mi cha zikwa, <sup>23</sup> mi mu lyangalilo, na sukulukite, cha kotola menso mi cha vona Abrahamama nena vutavule ni Lazaro nena ha chizuva chakwe. <sup>24</sup> Cha lila mi chati, Tayo Abrahamama, uni zuwile kusasama, mi tumine Lazaro, kuti a tompe munwe wakwe mu menzi mi nja tontoze lulimi lwangu, kakuti ni hile maswe mowu mulilo. <sup>25</sup> Kono Abrahamama chati, 'mwan'a ngu, u hupule kuti muvuhalo bwako uva tambuli zako zilotu, mi Lazaro mwinzila iswana ava ku tavela zintu zivilala, kono hanu cho kwete kusengwa sengwa kunu, mi iwe wina mumanyando. <sup>26</sup> Mi kuzwaho zintu zoose, chigodi chikando chivavi mukati, ili kuti avo vasaka kuluta kuzwa kunu kwiza kwako kese vawole, mi kakwina yese awole kuzwa uko kwiza kwetu.' <sup>27</sup> Muhumi chati, ni ku kumbila, Tayo Abrahamama, kuti umuni tumine kuzuvo ya tayo <sup>28</sup> kakuti nina vanche vava swisu va tenda yanza - kutendela kuti akava kalimele, kutiya kuti navo chiveza mwe chi chivaka cha masukuluka.' <sup>29</sup> Kono Abrahamama chati, veena Mushe ni vapolofita; mu vasiye va tekeleze ku vali.' <sup>30</sup> Muhumi che tava chati, 'Nanta, Tayo Abrahamama, kono haiva zumwi na yenda kuvali kuvafwile, mu va lichiule.' <sup>31</sup> Kono Abrahamama chati kwali, 'Haiba ni vasa tekelezi kwa Mushe ni vapolofita, kese vaole kuzumina ni haiva vafwile kuti va vuke.'"

## Inkauhanyo 17

<sup>1</sup> Jesu chati kuva lutwana bakwe, “kwina kusakusimwa mukuve ni zintu zete ziwole ku tuletala ku tenda chivi, kono kwina vumai koozo muntu kwete ni zize! <sup>2</sup> Ni kuvavi ni vutuka kwali haiva ivwe ikando nili vikwa kuzimbuluka insingo yakwe mi na va sohelwa mwi wate, kuhita kuti a letele zumwi kwava va nini kuti sanzi a sihya inkulo. <sup>3</sup> Multokomele muvene. haiva mukwako va chita chivi, mu kalimere, mi cha linyansa, mu wondere. <sup>4</sup> Hachita chivi kwako kusikahe yanza ni tovele mwizuva, ni yanza ni tovele na vola kwako, nati, 'na linyansa,' u swanela ku mu kumu wondera!” <sup>5</sup> Vaapositola va vati kwa Simwine, yekeze intumelo yetu. <sup>6</sup> Simwine chati, kamba muvena intumelo uvu lutanga lwa masitete, ni mu vawambi izi kwi samu lye feiga, U nyukuke, mi ukavwalwe mwi wate,' mi nili vami kukuteki. <sup>7</sup> Kono njeni kwenu, yo wina muhikana yolima kapa kilisa i mberere, yeta wambe kwali haka vola kuzwa kuluwa, 'wize kavu hweluhwelu mi zo wikale tulye'? <sup>8</sup> Keta wambe kwali, ni vakanyeze zakulya, mi mu sumine mambanti mi munihe kutwala china mana kulya nikunwa. linu kuzwa aho njete mulye ni kunwa'? <sup>9</sup> Kalitumeli ku muhikana mukuti watenda ziva laitwe, utenda? <sup>10</sup> Ni hakuva vulyo iwe, hete chiwa wamana zonse zova laitwe, mu wamba, tu vahikana va sena intuso. Twa tenda vulyo ze zi tu telwe kuti tu tende. <sup>11</sup> kuva kezi kuva kuti ha ya kwa Jerusalema, ava hiti vulyo mwi nyinza ya Somaria ni Galilea. <sup>12</sup> Ha va ke njila mu kamwi kanzi, ava katanwa vakwe vena ikumi va lwala imbingwa, va va zimene vatavule naye <sup>13</sup> chi va katula manzwii avo, nibati, “Jesu, Nfumwetu, tufwile insoni. <sup>14</sup> Ha va vona, chati ku vali, “Mu kali vona haze ku Muprista.” kuvezi kuva kuti hava yenda, chi va jolozwa. <sup>15</sup> zumi kuvali havona kuti cha hozwa, cha vola li nzwi linyemukite na temba Ireeza. <sup>16</sup> Cha kuvama hamatende a Jesu, nali tumela kwali, avali Musamaria. <sup>17</sup> Mi che tava, Jesu chati, “Kana vena ikumi va va jolozwa? Vena Iyanza ni vone vena kuhi? <sup>18</sup> Ka kwina vamwi va vola kwiza kutemba Ireeza. Kunde yo zu muzwakule?” <sup>19</sup> Cha wamba kwali, zime, mi uyende. Intumelo yako ya kuhoza. <sup>20</sup> Cha vuzwa Vafalisi muvuso wa Ireeza ukeza lili, Jesu cha veta mi chati, “Muvuso wa Ireeza kaukezi ni mu uli tekele. <sup>21</sup> Kau woli kuwambiwa kuti, 'Lole kunu!' kapa, 'Lole kuna!', Muvone, Muvuso wa Ireeza wina mwenu.” <sup>22</sup> Cha wamba ku valutwana, Mazuva a keza heti ni mutavele kuvona izuva lyonke ku mazuva a Mwana mutu, kono kete mu avone. <sup>23</sup> Linu kava wambe kwenu, 'Muvone, kuna! Muvone, kunu!' Kono sanzi muyi hanze kapa kuve chilila, <sup>24</sup> imi mumuni kauvenya kwimwi imbali ye wulu ku twala ku yimwi imbali ye wulu, mukuve bulyo ni ku Mwana Muntu mwi zuva lyakwe. <sup>25</sup> Kono che ntazi uswanela ku sukuluka mu zintu zingi ni ku kanwa kolu lusika. <sup>26</sup> Sina mu ku vatenda halili ku ma zuva a Nuwe, mwete ni ku tendahalele mu mazuva a Mwana muntu. <sup>27</sup> Va valyi, va vanwi, va vasesi, ni kusesisa, kutwala Nuwe he njila mwa Areka - mi chikweza munda mukando ni kwiza kuveha vonse. <sup>28</sup> Sina vulyo mukuvapanga halili ku mazuva a lota, va valyi, kunwa, ku ula, ku wuza, ku vwala, ni ku zaka. <sup>29</sup> Kono izuva lya zwa lota mwa Sodoma, mulilo uva soki ni silufula kwi wulu mi va ve haiwa vonse. <sup>30</sup> kuzwa ku mukwa uswana kuve vulyo ni mwi zuva lyete a voneke Mwana muntu. <sup>31</sup> Mwe lyo izuva, wina he wulu lye nzovo

sanzi ashetumukeli mwate ku kahinda chifumu chakwe. Mi yo wina muluwa sanzi avoli. <sup>32</sup> Muhupule mwihavwe wa lota. <sup>33</sup> Yense yo saka kuwana buhalo vwakwe mwa vu sinyehelwe. Kono yonse yo sinyehelwa vuhalo vwakwe ka vu vusilele. <sup>34</sup> Nimi wambila, mwawo masiku, mukuve ni bantu vovele hamumbeta wu mwina. Umwina ka hindwe, mi umwina ka shale. <sup>35</sup> Ka kuve ni vakulwakazi vo vele vete va kutwa hamwina. Umwina mwa hindwe, mi umwina mwa shale.” <sup>36</sup> Vo vele muluwa, umwina mwa hindwe, mi umwina mwa shale. <sup>37</sup> Chiva muvuza, “Kuhi, Simwine? Mi chati kuvali, “Kwina muvili, njoko makuvi nao kwete aka kunganele.

## Inkauhanyo 18

<sup>1</sup> Linu cha wambe nguli kuvali muva swanelela ku lapelela mi kanzi va zwafi ku wamba vulyo, <sup>2</sup> kuvena muleneñi u mwi mukuvena, Mwatuli ya sana vali kutiye Ireeza ni kusa kuteka vantu. <sup>3</sup> Linu ku vene Imbelwa mu muleneñi mi i vali kwizanga, nati, unituse ni wane ku atulelwa kozo ini zeka naye.’ <sup>4</sup> Chenako nde kana va tavele ku mutusa, linu chenako zana chati, kwali iye mwine, nga kuti kani tiyi Ireeza nanga ku kuteka vantu. <sup>5</sup> Linu uzu mukulwakazi we Mbelwa yoni kateze. Linu, kani mutuse ku nkatulo, ili kuti kanzi ani katazi kwi zanga kwa ngu.” <sup>6</sup> Linu Ireeza chati, Muzuwe, mutekeleze ku mu atuli za wamba. <sup>7</sup> Linu Ireeza kete ashemuve va ketetwe, avo va lilila kwali masiku ni musihali? Na, kana mwa liyehe ku vali? <sup>8</sup> Ni mi lwilite kuti ka shemuve vonse cha kuli tahanela Ni hakuva vulyo Mwana a Mukwame cheza, Chavu saku sima, keze a wane ntumelo mu nkanda?” <sup>9</sup> Linu haho cha wambe, nguli ku vamwi avo vava shushwezwa avo vene kuva va shiyeme imi vavali ku sheununa vamwi vantu, <sup>10</sup> Va kwame vo vele, vava yendi mwi Tempele kuku lapela zu mwi avali Mufalisi zu mwi avali Mutelisi. <sup>11</sup> Mufalisi cha zima ni ku lapela manzwi aa kwali iye mwine, Ireeza, ni litumela kwako, ka kuti kani swani sina vantu vamwi vasa, va sa jolwele, mahule, kapa uzu Mutelisi. <sup>12</sup> Nili nyimanga zilyo tovele mwi nsunda, ni zwisanga vulishumi ku zonse zini wana.’ <sup>13</sup> Kono Mutelisi, Na zimene vuta vule, na sa oli nanga ku nyamuna Menso akwe kwi ulu, na kwete kuli kava-kava achizuva, nati Ireeza, uni zuwile nkulo vutuku, ni tenda zivi.’ <sup>14</sup> Niti kwako, uzu Mukwame ava voli kunzuvo yakwe na jolwezwe Kuhita mwakwe, cho kuti muntu yense yo likatula iye mwine ka vozwe haansi mi yo likokoveza iye mwine ka kakatulwe.” <sup>15</sup> Vantu vava kuleta kwali ni va hwile vavo, ili kuti ava wonde, kono linu va rutwana nga vavona vulyo vava va kalimeli. <sup>16</sup> Lino Jesu chava sumpila kwali, naati, “Muzuminine va hwile kukeza kwa ngu, mi kanzi mu vakanisi kwiza kwa ngu. Imi Muvuso wa Mulimu nji wavo vaswana navo. <sup>17</sup> Chavu sakusima, niti kwenu, yense ya sate a amuhele muvuso we Ireeza sina munini, kete, enjile mumu vuso we Ireeza.” <sup>18</sup> Muvusi zumwi cha mu vuza, nati, Muruti mulotu, moni tende vule kuti ni luwe muvuso we Ireeza?” <sup>19</sup> Jesu chati kwali, uni sumpilazi Mulotu? kakwina muntu mulotu, kwande Ireeza yeke. <sup>20</sup> Wizi milao ine kumi, kanzi uvuki, kanzi wihai, kanzi wi vii, kanzi uhi vupaki vwa mapa, ukuteke veso ni va nyoko.” <sup>21</sup> Muvusi chati, zonse zo chini va, zikuteki kuzwilila ku vu lombwana bwangu.” <sup>22</sup> Linu Jesu nga zuwa bulyo, cha muwambila nati kwina chonke chosena uswanela ku uza zako zonse zokwete ni

ku yavelela va votana, mi ko wane chifuma cha kwi ulu, linu wize uni chilile.”<sup>23</sup> Linu Muhumanehi nga zuwa izi zintu. Chava yo swavite ahulu. Sina avalu Muhumanehi ahulu.<sup>24</sup> Linu, Jesu cha muvona kuti uswavite ahulu mi chati, ku kukutu vule kwavo, va humanehi kukwinjila mumu vuso we Ireeza!<sup>25</sup> Imi ku huva ku nkamele kuku njila mulinso lye ndonga, ku hita mu Humanehi kwinjila mumu vuso we Ireeza.’<sup>26</sup> Avo vava tekeleze chivati, linu nji vani vete va puluswe?<sup>27</sup> “Jesu chee tava, nati zintu zisa woliki ku vantu zi woleka kwe Ireeza.”<sup>28</sup> Pitrosi chati, “linu, tuvasiyi zintu zonse zivali zetu ni kukwichilila.”<sup>29</sup> Jesu cha wamba kuvali, Chavu sakusima, ni wamba kwenu niti kakwina kwenu umwina ya vasiyi inzuvo yakwe kapa Mwihiyavwe, kapa vana vakwe, nchizyakwe, kapa vashemi vakwe, vakeni cha muvuso we Ireeza.<sup>30</sup> Yasate atambule kuhitiliza munu'munkanda ni munkanda ikeza, muvuhalo vusa mani.”<sup>31</sup> Nga a kunganya va rutwana vakwe vene kumi, ni vovele, chava wambila nati, “muvone, chitukaya kwa Jerusalema mi ni zintu zonse ziñoletwe ku vapolofita cha Mwana Mukwame kazi zuzilikizwe.<sup>32</sup> Kakuti kahewe mu manza avo vasezi Ireeze. mi, kava musomoze ni ku musheununa kumunyandisa ni kumu swila mate.<sup>33</sup> Chiva mushimeha ni kumwi haya mi mwi zuva lyavu tatu ka vuke hape.”<sup>34</sup> Kena vava zuwisisi chimwi kwezi zintu mi aya manzwi ava humbitwe kuvali, mi kana vava zuwi mwi zintu zava wambi.<sup>35</sup> Ku vezi vulyo sina Jesu chava atumele munzi wa Jeriko, mukwame wa chivofu ave kele hembali ne kululu na vu kumbila kuvantu,<sup>36</sup> cha zuva inyangela ni hitite, cha vuza ziva ku tendahala,<sup>37</sup> chiva muwambila kuti nji Jesu wa Nazareta yo hitite he mbali.<sup>38</sup> Linu, Mukwame wa chivofu cha, huweleza, nati, “Jésu Mwana Davida, uni fwile nkumbu.”<sup>39</sup> vamwi vavali kwenda avusu, chi va mu kalimela Mukwame wa chivofu, ku muwambila kuti atontole. Kono nja huweleza kuhitiliza, Mwana Davida, uni fwile nkumbu.”<sup>40</sup> Jesu cha zimana ni kulaela vakwame kuti vamu lete kwali. Linu mukwame wa chivofu avena hafwi, Jesu cha muvuza,<sup>41</sup> “Usaka kuti ni kutendele nzi?” chati, “Simwine nisaka ku hewa ku vona.”<sup>42</sup> Jesu chati kwali, Linu tambule ku vona. Intumelo yako chi ya kuhoza.”<sup>43</sup> Chenako imwina chata mbula ku vona mi cha mwi chilila, nakavu lumbeke Ireeza. Ha kuvonwe zi, Vantu vonse chiva tanga kulumbeka Ireeza.

## Inkauhanyo 19

<sup>1</sup> Jesu abe njili ni ku hita mukati ka Jeriko. <sup>2</sup> Imi, kubena mukwame aba ku sumpwa Zakia. A bali mukulwana ku balihisi mi a baku fumite. <sup>3</sup> A ba kulika ku bona kuti kanti Jesu njeni, kono kana aba kuwola kubona kwi shila lye chikwata, bakeñi cha kuti abali mufwihi. <sup>4</sup> Mi cha tilila ku busu bwa bantu ni kukantanta kwi isamu lya sikomore kuti amubone, kakuti Jesu kwa bakuhitila. <sup>5</sup> Mi Jesu ha sika hecho chibaka, cha lola kwiwulu mi cha muwambila kuti, “Zakia, suke hansi kakuhwela, mukuti sunu ni kekala kwi nzubo ya ko.” <sup>6</sup> Cha suka kapili, kwi za hansi mi chamutambula na tabite. <sup>7</sup> Mi bantu haba bona vulyo, chi ba bilela, chiba wamba, “Cha yenda kukupotela mukwame wina chibi.” <sup>8</sup> Zakia cha zimana mi cha wamba kwe Ireeza kuti, “Bone, Ireeza, ni bahi imbali yimwi ye ntuntu yangu kubanjebwe, mi heba kwina yenke uni bachengeleli ni chimwi, ka nimu bozekeze zone.” <sup>9</sup> Jesu cha wamba kwali, “Sunu i puluso yeza mwi nzubo yako, kakuti

nawe u mwana wa Abrahamama. <sup>10</sup> Mukuti Mwana a Muntu a ba kezi ku gana ni ku haza bantu ba zobete.” <sup>11</sup> Mi haba zuwa izo zintu, cha zwila habusu ku wamba mi na wamba che nguli, kakuti cha bena hafwihi ni Jerusalema, mi baba kuhupula kuti mubuso we Ireeza chiu bena hafwihi ni kwiza. <sup>12</sup> Cha wamba, “Zumwi kuluzubo lwa busimwine cha yenda kule mwi nkanda kukali wanina mubuso ni ku kabola.” <sup>13</sup> Cha sumpa i kumi lya bahikana ba kwe, cha baha ikumi lye pondo lya masheleni, mi cha wamba ku bali kuti, “Mu pange mu ku wuza ku lindila chi naka bola. <sup>14</sup> “Kono ba mushobo wakwe chi ba mutoya mi chi ba tumina chikwata chabazimanini mwisule lyakwe, mi ni ba wamba kuti, “Kese tu siye uzu muntu kuti atu yendise.” <sup>15</sup> Chi zapangahala haka bola hape, ha mana kuka wana mubuso, cha laela bahikana abo baba hewa masheleni kuti basumpwe kwali, kuti eze ezibe kuti kanti nji bukai ibaba wani yahewulu ha baba ku wuza. <sup>16</sup> We ntanzi cheza kwali, na wamba kuti, “Ireeza, ha masheleni ako ni ba pangi ikumwi lya masheleni hewulu, <sup>17</sup> Yo zwa kuluzubo lwa busimwine cha wamba kwali kuti, “Wa tenda hande, u mu hikana yo shiyeme. Mukuti uba sepahali kuzintu zi nini, ko be imu yendisi hewulu lyekumi lya mileneni.” <sup>18</sup> Mi wa bubeli cheza, na wamba kuti, Ma masheleni ako, Ireeza, aa panga i yanza lya masheleni hewulu. <sup>19</sup> “Yo zwa haluzubo lwa busimwine cha wamba kwali kuti, ko yendise i yanza lye mileneñi.” <sup>20</sup> Hape zumwi cheza, na wamba kuti, “Ireeza, masheleni ako aa, ni baabikite mwi njiila, <sup>21</sup> kakuti ni ba ku tiite, mukuti u muntu yo bambamite. U hinda mosana uba biki, mi u sinza mosana u ba byali.” <sup>22</sup> Wa luzubo lya busimwine cha wamba kwali kuti, “kachi wambo chako ka ni ku atule, iwe muhikana mubi. U bezi kuti ime ni muntu yo bambamite, ni hinda ha ni sana ni ba biki, mi ni sinza mu ni sana ni babyali. <sup>23</sup> Mi chinzi ho sana u ba biki masheleni angu mwi banka, kuti ime chi na kabola, nize ni ahinde ni chimwi hewulu?” <sup>24</sup> Wa luzubo lwa busimwine cha wamba ku bose baba zimene, “Mu hinde masheleni ena kwali, mi mumu he ikumi lya masheleni,” <sup>25</sup> Chi ba wamba kwali kuti, Ireeza, wina kale i kumi lya masheleni. <sup>26</sup> Ni wamba kwenu, muntu yese wina u swanezi kuhewa zingi, kono kwa kwe ya seena, niheba chi na cha kwete ka chi hindwe kwali. <sup>27</sup> Kono zila zangu, abo ba sa ni suni kuti ni ni bayendise, mu ba lete kunu mi mwize mubehaye habusu bwangu.” <sup>28</sup> Ha wamba izo zintu, cha zwila habusu, ku yenda kwa Jerusalema. <sup>29</sup> Hati cho chunine ha fwihi ni Bertifage ni Betania, helundu li sumpwa Oliveta, cha tuma balutwana bobele, <sup>30</sup> na wamba kuti, “Mu yende ha munzi uwo wi chilila, mi chi mwe njila bulyo, ka muwane i mbongolo i seni kwi chilwa. Mu yisumunune mi muyi lete kunu kwangu. <sup>31</sup> Heba kwina yete ami buze, “Chinzi ha mu i sumununa? mu wambe kuti, Ireeza njo i suna.” <sup>32</sup> A bo baba tumwitwe baba yendi ni kuka wana i mbongolo bo bulyo mwa ba wambili Jesu. <sup>33</sup> Ha baba ku kwete ku sumununa i mbongolo, bene bayo chiba wamba ku bali kuti, “Chinzi ha mu sumununa i mbongolo?” <sup>34</sup> Chi ba wamba kuti, “Ireeza njo i suni.” <sup>35</sup> Chi ba kayi leta kwa Jesu, mi chi ba zala zizwato he mbongolo mi chi be tantika ho Jesu. <sup>36</sup> Ha ba ba ku yenda, chi ba zala chizwato za bo mu nzila. <sup>37</sup> Ha chunina ha chibaka cina zi samu ze olive, bungu bwa balutwana ci ba tanga ku luluweza ni ku temba Ireeza ka

muhuwo mukando ka mitendo mi lontu yi baba boni, <sup>38</sup> ni ba wamba kuti, “Kutompwe simwine yo kezite mwi zina lye Ireeza! Kusanga ku be kwi wulu mi ikanya i be hewulu!” <sup>39</sup> Bamwi ku Bafalisi ba bona mu chikwata, chi ba wamba kwali kuti, “Muluti, kalimele balutwana bako.” <sup>40</sup> Jesu che taba cha wamba kuti, Ni mi wambila, heba aba ni ba ntontola, ma ñomwe ka a huwe.” <sup>41</sup> Cwale Jesu ha chunina ku muleneni, ca lila, <sup>42</sup> na wamba kuti, Kambe u be zibite ze linu i zuba lya ko li ka kuletele ikozo, kono hanu zi patitwe ha menso ako. <sup>43</sup> Mi mazuba ka akeze hewulu lyako, mi zila zako ka zi ku zimbuluse ni lukwakwa, mi zikuzimbuluke, ni kuku kakatiza imbali zose. <sup>44</sup> Ka ba ku wisikize hasi iwe ni bana bako. Keteni ba siye ibwe hewulu lya limwi, mukuti kena u be zibi Ireeza ha ba kusuni ku kutusa. <sup>45</sup> Jesu che njila mwi keleke ni ku tandila hanze bonse baba ku wuza, <sup>46</sup> na wamba ku bali kuti, “Ku ba ñoletwe, “I nzubo yangu ye ntapelo, kono inwe chi mwa yi tenda inzubo ya basa.” <sup>47</sup> Mi Jesu aba ku kutaza izuba ni zuba mwi keleke, ba kulwana ba Mapurisita, ni bañola mane ni bakulwana be cisi, ba ba ku saka ku mwi haya. <sup>48</sup> Kono kana ba ba wani inzila ya ku tenda bulyo, mukuti chisi chonse ci bakumalele ku muzuwa.

## Inkauhanyo 20

<sup>1</sup> kubezi zuba lyonke, linu Jesu abali kuluta ni kuwamba ku bantu mwi ntepele naluta Izwi, mukulwana wa mapulisita ni bamwi ba kulwana baba kezi kwali nibamwi <sup>2</sup> Baba wambi, chibati kwali, “utu wa mbile ma tanzi au kwete ku chita ezi zintu? Njeni uzo aba kuhi mata?” <sup>3</sup> Che taba nati kubali, “Name muni mibuze ipuzo. Muni wa mbile <sup>4</sup> che nkolobezo ya Joani. Iba kuzwa kwiulu kapa ku muntu?” <sup>5</sup> Baba lielezi abobene, chibacho, “Chi twati, 'Izwa kwi ulu,' mwa wambe, 'chinzhi ha musa zumini kwali?’ <sup>6</sup> Linu chi twati, 'izwa ku muntu,' bonse bantu kaba tuñate, abo baba susu wezwa kuti Joani abali mupolofita,” <sup>7</sup> Linu chi betaba kuti kabezi kuzi ka zwa. <sup>8</sup> Jesu chati ku bali, “kese nimi wa mbile Inguzu zini chita izi zintu.” <sup>9</sup> Cha wambila bantu Inguli, “Muntu cha biala nzi chelantu zakwe muluwa, muntu aba kalimise luwa kuba viali bo muomba, ni kuya kwi nkanda Inako Inde. <sup>10</sup> Chi yasike nako chi kutuma bahikana kubabiali ba muwomba, muhe nzimwi nzi chelantu zizwa muluwa lo muwomba. Baba kutokomela luwa lo muomba baba mukabi, niku musiya mayanza-yanza. <sup>11</sup> Hape cha tuma zumwi muhikana naye baba mukabi, ni kumu nyandisa cha chituhu, niku mutumina naye mayanza-yanza. <sup>12</sup> Chiba tuma zumwi wa butatu naye baba mukabi kumu nongola nzilabi kwali, niku musohela hanze. <sup>13</sup> Linu Simwine wa luwa lomuomba chati, 'Muni chite bule?’ Muni tume mwa nangu unisuna. Mwe ndi mubamuhe Ikute.’ <sup>14</sup> Kono ba byali ba muomba chiba mubona, chiba wamba mukati kabo, chi ba cho, Uzu nji yena swana. Tumwi haye, tuhinde chi fumu chibe chetu.’ <sup>15</sup> Chi ba musohela kunze wo luwa lomuomba, ni kumwi haya. Mihe simwine wa luwa lomuomba mwati nzi kubali? <sup>16</sup> Kakeze ni kwiza kushinya ba byali boluwa lya muwomba, mwahe luwa lomu womba ku bamwi.” Mi ha ba zuwa, chiba cho, “Ireeza ukanisa!” <sup>17</sup> Jesu cha lola kubali, nacho, “Iñolo litalusa nzi? 'Ivwe liba sohiwa bazaki, liba bikwa musumo wo mwinkona?’ <sup>18</sup> Nzonse zibawi kweline vwe nziba kosoki hakati. Yense ase awile vwe, muli

sinyehe.”<sup>19</sup> Bañoli niba kulwana bama pulisita baba kusuna kubika mayaza abo cheyo nako, babe zibite kuti inguli ya wamba i baku keza kubali. Linu baba ku tiya chi kwata cha bantu.<sup>20</sup> Baba ku mulolete che ntokomelo, baba tumini bantu ba matwela baba lihele kuti abo ba lukite, kuti baka wane muladu mu nzi wambo zakwe, bamu twale kwa bana ba yendisi ni kuba kulwana be chisi.<sup>21</sup> Chi bamu buza, nacho, “Muluti, twizi kuti uba wambi ni kuluta nzilukite, mikana Insusuwezo ye chitulo cha zumwi, kono ubakuluta buniti bwe nzila ye Ireeza.<sup>22</sup> Kana Iswanelo kwetu kuliha mutelo kwa Sesare, kapa bule?”<sup>23</sup> Kono Jesu cha zuwi sisa mizezo yabo, chati kubali,<sup>24</sup> “Muni tondeze ma sheleñi. Chi fateho chani chi na hateni?” Chi bacho, ‘Sesare.’<sup>25</sup> Chati kubali, “Muhe Sasere zintu za Sasere, ni kwe Ireeza, zintu zakwe Reeza.”<sup>26</sup> Kana baba kwizi za kumu kananisa ha ba ku kwete ku wamba hakati habusu bwa bantu. Baba zimene niba ñuñuna kana baba kwina cho kwi taba.<sup>27</sup> Bu ngi bwa Masadduse chi ba keza kwali, yeke ya ba ku wamba kuti ka kwina kubuka kubafu,<sup>28</sup> chi ba mu buza, chi bati, “Muluti, Mushe aba tuñoleli kuti haiba mukulwe wa mukwame nafwa, nena mwanakazi, mi nasa kwete bana, mukwame uwola kuhinda mwanakazi wamukulwa kwe, niku wanina mukulwe bana.<sup>29</sup> Kuba kwina bana ba bakwame ba tenda iyanza ni bobele, wetanzi aba hindi mwanakazi, aba fwi na sena mwana,<sup>30</sup> niwa bubeli naye.<sup>31</sup> Wa butatu cha muhinda, ubu nja bana be yaza ni bobeli ba bafwi, ka bena bana.<sup>32</sup> Ha ku hinta inako mwanakazi naye chafwa.<sup>33</sup> Mwinako yokubuswa, mwabe mwanakazi wani? Kakuti iyaza nibo bele bakwete iye kuti nji mwanakazi wabo.”<sup>34</sup> Jesu cha cho kubali, “Bana be nkanda ba sesa, bahewa maseso.<sup>35</sup> Cwale aho njeni njete ahewe chifumu. abo bahindwa ku baba kutekwa mwinako yoku amuhelwa kuba ntu bafwile kuzwa kubafu.<sup>36</sup> Mikese ba olele kuzwilila kufwa. mukuti ba likanelele ni mangeloi ni bana ba Ireeza, bababi bana ba ba buswa.<sup>37</sup> Kutu babafwi baba buswa, naye Mushe aba ntondezwa, kuamana ni chi humbu, kwa ba kusumpa Simwine Ireeza wa Abrahamana ni Ireeza wa Isaka ni Ireeza wa Jakobo.<sup>38</sup> Hanu kanji Ireeza wa bafu, kono Ireeza yohala, Linu bonse bahalila kwali.”<sup>39</sup> Bamwi ba masika babe tabi, “Muluti, wetaba nenza,<sup>40</sup> “Kana baba bozekezi kubuza nzimwi mpuzo.<sup>41</sup> Jesu chati kubali, “Chizi ha ba wamba kuti Jesu mwana wa Davida? <sup>42</sup> Mukuti Davida iye mwine aba wambi mwi mbuka ya Lisamu, Simwine aba wambi kwa Simwine wa ngu, ‘Wikale kubulyo bwe yanza lyangu,<sup>43</sup> konji chi napanga zila zako kuba mayendelo ako.’ <sup>44</sup> Davida cha sumpa Jesu, simwine,’ linu aho njeni mwana Davida?’ <sup>45</sup> Mu kuhoza bantu bonse cha wamba kuba lutwana bakwe,”<sup>46</sup> Muzwe kubantu, bena mizezo yoku yenda munzila isalukite, abo basaka ahulu intumeliso zamanzimo muchibaka cha maunzikizo, mi simwine wikala muma sinangonge, zibaka zasimwine zemikiti.<sup>47</sup> Bamana mazubo abanakazi ba fwililwe, nibaba lapelela intapelo inde. Abo kabahewe chikuto chikando.

## Inkauhanyo 21

<sup>1</sup> Jesu ha lola aba boni bafumi niba bika impo zabo mwi citanda.  
<sup>2</sup> A ba boni mwanakazi yo fwililwe yo nyandite habika tuhafu twe pene.  
<sup>3</sup> Chawamba, Zeniti nami bona, Uzu mwanakazi yo fwililwe wa zwisa kumihita.  
<sup>4</sup> Mubonse mwa zwisa impo zenu, Kono uzu

mwanakazi ya sena chakwe wa mihita ka kuli waleta zonse zakakwete mubu njobwe bwakwe. <sup>5</sup> Bamwi ba bali ku wamba Inkeleke mwiba kabizezwe ka bukwala ni mavwe ni mpo, cawamba. <sup>6</sup> Kwezo zintu zimubwene, inako mwiikeze kakwina iwwe lyete nilishale kulimwi nilisawi". <sup>7</sup> Chiba mubuza kuti muluti, Izo kazi tendahale lili? Hape chisupo chete chitondeze kuti kazi tendahale? <sup>8</sup> ce taba; mumamele, kanzi muchengwa. Bangi kabeze che zina lyangu, Nokucho kuti; Njime kreste, inako chiya chuta, kono kanji mubechilili. <sup>9</sup> Ha muzuwa inkondo ni kuli sandukila, Kanji mutiyi, Izo zintu kazi pangahali pili, kono kanji ma mani mani. <sup>10</sup> Chawamba kubali; Masika kalwise masika amwi; Mushobo ni mushobo kabalwe. <sup>11</sup> Izikinyebo ikando mwi kanda iboneke, Nilufu lungi muzibaka zingi, Ni zala, Nizitiza, Ni zikomosa zikando zizwa kwe lreeza kwi wulu. <sup>12</sup> Izi, ni ziseni kwiza, Bantu kaba milwise kamayaza, Bami sukulule niku mikwitila mu masinagoge, ni mwi tolongo, bami twale kuba simwine, niku ba atuli bezintu kebaka lyezina lyangu. <sup>13</sup> Izo kazi mizile kuti muwambe buniti. <sup>14</sup> Aho muli lemuhale mwi inkulo zenu, kuti kanji mulitukisezi pili zete muli tabilile kazo. <sup>15</sup> Mukuti ime kanimihe mamzwi ni butali, kuti bami lwisa bakangwe kumi taba ni kumi kanaanisa. <sup>16</sup> Kamu betekwa niku bazazi benu, niba kwaluzubo benu, niba likani benu, kabe haye bamwi kwenu. <sup>17</sup> Imi kamu toiwe bantu bonse ibaka lyezina lyangu. <sup>18</sup> Imi ka kwina nanta lusuki lu mwina lwete nilu shale kumitwi yenu. <sup>19</sup> Kamu haze ihuho zenu kaku kola kwenu. <sup>20</sup> Chimwa bona Jerusalema izimbukitwe masole mwizibe kuti kuza kunuka kwayo chiku chunine. <sup>21</sup> Ili, bena kwa Judea batilile ku malundu; Bena mu munzi bazwe mo'imi bena mwi kanda kanji bazwimo, ku bolela ku munzi. <sup>22</sup> Mukuti inako yaku bozekeza bantu bubu bwabo, kuti ziŋoletwe zi boneke zose. <sup>23</sup> Bukabo kabwizile banakazi ba lihindite niba nyosa mwao mazuba; ka kuti bukabo bukando ka bube kwa nteni mwi kanda; imi bukali kabu sukile abo bantu. <sup>24</sup> Mubawe kabu kali bwe sumo, kaba hapwe batwalwe kubantu bonse, imi jelusalema ka lyatolwe kube kanda mane ba maninine. <sup>25</sup> Zisupo kazi boneke hezuba ni mwezi ni nkani; imi mwi kanda mahasi kahwilwe niku njanja kebaka lya mawate ni masunda. <sup>26</sup> Bantu kaba zumininine kebaka lya kutiya niku lindila zete zize mwi kanda; ka kuti zina ziho zo kwi wulu muzi nyanganye. <sup>27</sup> Imi kaba bone Mwana wo Muntu heti chokeza mu makope ke ziho ni kanya ikando. <sup>28</sup> Izo chizatanga kwiza; mu leleze menso kwi wulu, Imi muinuke; ka kuli kulukululwa kwenu chi kwina hafwihi. <sup>29</sup> Cha ba wambila inguli, Chati' mubone i samu lye feiga ni zisamu zimwi. <sup>30</sup> Hali tumpa makoba, Imi mwi ziba ni kulemuha kuti imbumbi chiina hafuhi. <sup>31</sup> Ka mukwa wina bulyo, ne nwe, hamu bona izo chizi keza, mwina no kwi ziba kuti mubuso we Ireeza chi wina hafuhi. <sup>32</sup> Kabuniti ni wamba kwenu, ulu luzubo kete lumane, zonse zi seni ku tendahala. <sup>33</sup> Iwulu kali mane ni kanda bulyo; mi manzwi angu kete ni a mane. <sup>34</sup> Imi mu mamele inkulo zenu kanji zi lyanganiswa kulya kwenu, niku kolwa mutoho, niku bilela zo buhalo. <sup>35</sup> mane ilyo izuba kali miwane kamu litukise; MU kuti kachiwile bonse bazakite mwi kanda yonse. <sup>36</sup> Mi he, mutonde mulapele inako yonse, ili kuti mukole ni kubanduka kwezo zonse zete nizi boneke, ni kwa kwe habusu bwa Mwana Muntu. <sup>37</sup> Jesu abali kulutanga musihali mwi nkeleke imi masiku aba kuzwanga niku ka lindila hachi wulu



chisumpwa ze samu lya olive. <sup>38</sup> Imi chichaba chonse chibali kwiza kakusasani mwi nkeleke kuku mutekeleza.

## Inkauhanyo 22

<sup>1</sup> Mukiti we inkoko isena mulungo chiuba kwina ha fwihi, uba ku sumpwa Impaseka. <sup>2</sup> Baprista ni Bañoli baba bi ni mulelo wa kwi haya Jesu, kono baba tiyi chichaba. <sup>3</sup> Satani abe njili kwa Judas Isikalote yabli zumwi wa balutiwa bena ikumi ni bo bele. <sup>4</sup> Judas aba yendi ku Baprista ni Baeteleli ku wambola mwete ba mu betekele ku bali. <sup>5</sup> Baba tabite, ni ku zuminzana ku muha mali. <sup>6</sup> Aba zuminzani, ni ku lola inzila yo kumu lukulwila ku chichaba. <sup>7</sup> Izuba lya mukiti u sena mulungo chi lya sika, li baba ku swanela kuti ingu ye Paseka i haiwe. <sup>8</sup> Jesu aba tumi Peter ni Joani kuti baka lukise i paseka kuti balye, <sup>9</sup> Chiba mubuza kuti, Ko saka kuti tuka lukise njo kuhi? <sup>10</sup> Aba be tabi, “Mu ni teke, Chi mwa ke njila mu munzi mumu shangane Mukwame yo hindite kahambwe ka menzi. Mumwi chilile mwi nzubo yete ake njile. <sup>11</sup> Imi mu mu wambile si nzubo kuti, Muluti u wamba kwenu, Inzubo mwete a lile i paseka ni ba Lutwana bakwe inahi?” <sup>12</sup> Mwa mi tondeze inzubo ina kwi wulu inkando i lukiswe. Mulukise mwa teni. <sup>13</sup> Mi chi ba yenda, ni ku wana mwa ba ba teli, imi chiba lukisa ipaseka. <sup>14</sup> Inako ha i sika, che kala he ntafule ni ba lutwana. <sup>15</sup> Imi cha ba cho kuti, ni lakaza hahulu ku lya i paseka nenwe hani seni ku zuwiswa kuchisa. <sup>16</sup> Linu ni wamba kwenu, kuti kani li i paseka hesi chiye zibiswa mu mubuso wa Mulimu. <sup>17</sup> Jesu cha hinda i nkomoki, ha manaku litumela, ni ku cho kuti muhinde ichi muli abele. <sup>18</sup> linu chati ku bali, kete ni nwe i waine hape hesi mubuso wa Ireeza chi weza. <sup>19</sup> Cwale cha hinda chinkwa, ha mana ku litumela, cha chi komauna, ni ku baha ni ku cho kuti,” uwu nji mubili wangu mu lye nje nkupuzo yangu.” <sup>20</sup> Cha hinda i nkomoki che nzila i swana haba mana kulalila, chati, iyi inkomoki chilikani chetu ka malaha, angu ete e tikilwe nwe. <sup>21</sup> Kono mu teke, Yoni beteka wina neme he ntafule. <sup>22</sup> Mukuti Mwana we Ireeza che ziba kuti mukwi kalile, cwale kwina bumai kuya ba bi ni mulelo wo wa ku beteka. <sup>23</sup> Imi chiba tanga ku libuza mukati kabo, kuti njeni wina muhupulo uwo. <sup>24</sup> Imi chi kwa buka i nkani mukati kabo kuti yo hupulelwa kuba mukando njeni, <sup>25</sup> Chacho ku bali, Ba simwine bena bubusi hewulu lyabo, mi nji bena ziho hewulu lyabo ba sumpwa kuti bayendisi. <sup>26</sup> kanji ku bi bulyo nenwe. Kono, mu leke yo li hinda bukando mukati kenu abe munini, mi mu leke yo lihinda ku sephala abe bulyo; <sup>27</sup> Imi mukando, ibe iye wi kala he ntafule, kapa yo ha? Kanji wi kele he ntafule? Mukuti ime ni na mukati kenu ni ha. <sup>28</sup> Kono njenwe mu be ntanzi mu miliko yangu. <sup>29</sup> Imi muni mihe Mubuso, sina mwa ba ni heli Tayo mubuso, kuti mulye ni ku nwa he ntafule yangu mu Mubuso wangu. <sup>30</sup> Imi ka mwi kale ha chipula cha bu simwine ni ku atula luzubo lwa Isilaele. <sup>31</sup> Simon, Simon, bone, Satani uni kumbila kuti ami helule sina lungu lwa mauza. <sup>32</sup> Kono chi na mi lapelela kuti itumelo yenu kanji i boleli hanshi. Hachi mwa bola mukole ni mwachako. <sup>33</sup> Pitrosi cha wamba kwali, “Simwine, ni li bakenye ku yenda newe mwi ntolongo kapa ku fwa.” <sup>34</sup> Jesu che taba kuti, Pitrosi koni sampule ko tatwe pili mukombwe ni useni ku lila.” <sup>35</sup> Jesu aba wambi ku bali, “Hani mi tuma ni mu sena chipaupau, ni mukotana

usena zilyo, ni sangu, mu ba buli nzi?” Chi be taba, “Kakwina.” <sup>36</sup> Cwale cha wamba kubali kuti, Kono hanu, wina chipaupau ni mukotana we zilyo a zi hinde. Umwi ya sena mukwale, a uze ingubo yakwe a wule mukwale. <sup>37</sup> Chini wamba kwenu niti, chi űoletwe ku amana neme kachi zuzilizwe, Mi a balelwe kuba sinyi! Mukuti zakwe chi za tendahala. <sup>38</sup> Chiba wamba, “Simwine, lole, milinga yobele” Imi che taba, “Ku shiyeme.” <sup>39</sup> Hamana mulalilo, Jesu cha yenda, mwa yendelanga, kwi lundu lya zi samu za Olive, mi balutwana bakwe chiba mwi chilila. <sup>40</sup> Haba ka sika, chati ku bali, “mu lapele mukuti kanji mwi njili mu miliko.” <sup>41</sup> Cha chunduluka ku bali chibaka chi likana ni ku zindwa kwe ibwe cha kubama ni ku lapela, <sup>42</sup> Nati, “Tayo, haiba mo sakile u zwise i nkomoki kwangu. Kanji uchiti muni sakila, ku chitwe mo sakila. <sup>43</sup> Imi ingeloi lizwa kwi wulu chilye za kwali, ku mu koza, <sup>44</sup> Cwale ha ba bile mubukabo cha lapela ahulu, mane chitukutuku chi a donka ubu malaha a wila hanshi. <sup>45-46</sup> Ha mana ku lapela cheza ku Balutwana bakwe cha ba wana kuti balele cha maswabi abo, cha ba buza kuti, “Chinzi ha mu lele? Mu buke mu lapele, kuti kanji mubi mu mu liko.” <sup>47</sup> Haba ku si wamba, chi kweza chikwata, ni Judas, umwi wa balutwana yo ba hitile, cheza hafwihi ni Jesu cha mu chuchuna, <sup>48</sup> imi Jesu cha wamba kwali, “Judas, chiwa beteka mwana'muntu cha kumu chuchuna.” <sup>49</sup> Abo ba ba zimbukite Jesu haba bona zi ba ku pangahala, chi bati, “Simwine, tulwe ka mukwale?” <sup>50</sup> Cwale zumwi ca hinda mukwale ni ku konokola muhikana wo Muprisita mukulwana, ku mu konokola kutwi kwe chilyo. <sup>51</sup> Jesu chati, “ku shiyeme.” Cha wonda kutwi, ni ku mu hoza. <sup>52</sup> Jesu cha wambila baprisita ba kulwana, ni manduna ni balibeleli be nkeleke, ni bakulwana be chisi ba ba kezi kwa kwe, mwiza kwangu che mikwale ne nkoli ubu mu bwima musa? <sup>53</sup> Hani bena nenwe mazuba wonse mwi nkeleke, kana muba biki iyanza lyenu hangu. Kono nje nako inu yenu ni ziho ze chinzime. <sup>54</sup> Imi chi ba muwonda, kumu twala ku nzubo yo Muprisita mukulwana. Linu Pitrosi aba mwi chilile kule zana. <sup>55</sup> Haba mana ku tumbuza mulilo ha kati ke lapa chi be kala hamwina, ni Pitrosi che kala nabo. <sup>56</sup> Muhikana zumwi wa ba kazana cha mu bona ha mulilo, niku mu lolisa chati, “Naye uzu imwakwe wa Jesu.” <sup>57</sup> Linu Pitrosi cha kanana, chati, “Mukazana, Kani mwizi uzo.” <sup>58</sup> Ha ku hita kaba kazana zumwi cha mubona, chati, “Uzumwi wa bo.” Imi Pitrosi chati, “Mukwame, ka njime.” <sup>59</sup> Ha ku hita i hola zumwi Mukwame cha pihelela kuti, “Initi uzu mukwame a bena naye wuzu, Mugalileya,” <sup>60</sup> Imi Pitrosi chati, “Mukwame, kani zi izo zo wamba.” Na chi wamba, Mukombwe chiwa lila. <sup>61</sup> Jesu cha chebuka niku lola Pitrosi. Imi Pitrosi cha hupula manzwi a Simwine, ha wamba kwali kuti, Pili mukombwe nu seni ku lila totatwe ko be choni sampwile.” <sup>62</sup> Pitrosi cha zwila hanze, ku ka lila. <sup>63</sup> Bakwame baba ku gantela Jesu baba kumu shenda ni kumu kaba. <sup>64</sup> Haba mana ku mu sumina isila ku menso, chiba mu buza, kuti, “U nuhe wa ku kaba kuti njeni?” <sup>65</sup> Chi bawamba ziwambo zingi kwa Jesu. <sup>66</sup> Hali zwa izuba, bakulwana, ni ba kulwana ba Prisita ni baűoli chi ba kopana hamwina ku mu twala kwi nkuta, <sup>67</sup> Chibati, 'haiba njewe Kelesite, “tu wambile, “Kono cha ba wambila kuti, “chi na mi wambila, kete muni zumine.” <sup>68</sup> Mi niha ni mi buza, kete muni tabe. <sup>69</sup> Kuzwa sunu, Mwana wa Muntu mwe kale kwi yanza lya bulyo ka ziho ze Ireeeza.” <sup>70</sup> Bonse Chibati, “Linu u Mwana we Ireeeza?” Imi

Jesu cha cho kuti, “Mwa wamba njeme” <sup>71</sup> Chi bati “Chinzi hatu saka buniti? Mu kuti twa zuwa buniti buzwa mu kaholo kakwe.”

## Inkauhanyo 23

<sup>1</sup> Inkopano yonse chiya zimana mwi wulu, ni kuleta Jesu kwa Pilato. <sup>2</sup> Chiba muhambiliza indaba, kuti; “twa wana uzu muntu na hambusa mahasi etu; u kanisa bantu ku zwisikiza Sesara mutelo, mi ulisumpa kuti njeje krisite, Ireeza”. <sup>3</sup> Pilato cha mubuza, “kuti kana nji we Ireeza wa majuda?” Chetaba kuti, “wa wamba”. <sup>4</sup> Pilato cha wambila Maprisita bakulwna ni nyangela, kani wani mulandu kozu muntu. <sup>5</sup> Chiba koza kuti “U lyanganisa chisi, Na kwete kuluta bantu mwa Judea yonse, a sali kutanga kwa Galilea, nikwiza kusika kunu”. <sup>6</sup> Pilato hazuwa zo, cha buza kuti kanti Jesu Mugalilea. <sup>7</sup> Mi halemuha kuti ukazwa mwi puso ya Heroda, cha tumina Jesu kwa Heroda, uzo ya bali kwi kala naye mwa Jelusalema awo mazuba. <sup>8</sup> Heroda ha bona Jesu, aba tabi maswe, ka kuli aba hindi inako na saka kumu bona, kazitu zingi za kwe za bazuwi, mi aba sepete kuti kamu bone na tenda imakazo. <sup>9</sup> Heroda aba buzi Jesu cha manzwi mangi, kono Jesu kena betabi chimwi. <sup>10</sup> Baprisita ba kulwana ni bañoli chiba zimana, chiba muzinga indaba ko kukoza. <sup>11</sup> Heroda niba libeleli bakwe chiba mutuka, kumu shewununa, niku muzwatika zi zwato zilotu, niku muboza Jesu kwa Pilato hape. <sup>12</sup> Pilato ni Heroda chibaba muntu ni mulikani lolo luzuba, kono ibali muntu ni chila chakwe. <sup>13</sup> Imi pilato cha kunganya ba prisita niba yendisi babo mane ni chisi. <sup>14</sup> Chose cha wamba ku bali, “mwani letela uzu muntu, ni mucho kuti uzo yo hambusa chisi, ime namu buza habusu bwenu, kono kena na wana ubi bwakwe uzu mukwame ku amana nizi mu kwete kumu hambiliza. <sup>15</sup> Imi naye Heroda wa bona bulyo, cingi wa muboza kwetu, Ka mulole, Uzu muntu ka kwina cha foseze chi wola kumu cwala ku kwi haiwa. <sup>16</sup> Imi he kani mushupe niku mulukulula”. <sup>18</sup> Imi machaba onse aba huwelezi, ni kuti “ehawe uzo mi ulukulule Barabasi!” <sup>19</sup> I ye Barabasi aba bikwa mwi tolongo ibaka lyo kuleta mulandu mu munzi ni kwi haya. <sup>20</sup> Pilato cho kutabela kulukulula Jesu cha wamba nabo hape. <sup>21</sup> Chiba huweleza kuti aye ha chi fapano, “mi akokotelwe”. Chawamba nabo hape totatwe <sup>22</sup> “kuti kanti chibi cha foseze uzu mukwame njezihi? Chi swanela ifu lya kwe, ka kwina chafoseze, kani mushupe niku mulukulula”. <sup>23</sup> Kono ba bapiheleli ka manzwi ahanzi, chiba laela kuti a kokotelwe, manzwi abo chi akoma Pilato. <sup>24</sup> Mi Pilato cha kosola indaba, chati ku tendiwe muba sakila. <sup>25</sup> Imi cha lukulula ya bali kusuminwe mwi tolongo kama fosisa akwe, nika kwi haya, uzo iba kumbila Imi chabaha Jesu kuti ba ntende muba sakila. <sup>26</sup> Haba mutwala ku kwi haiwa, chiba kwata mukwame we zina lya Simoni wa kwa Sireni, ya bali kuzwa ku mawa, niku mutwikisa chifapano, no kwi cilila Jesu, <sup>27</sup> vungi bwa chi chava va va mwi chilili, ni vanakazi va vali kulila, chevaka lyakwe. <sup>28</sup> Jesu cha sanduka, niku wamba kuti vanakazi va Jelusalema, kanzi mulili ivaka lyangu kono mulile lwenu nilwa vana venu. <sup>29</sup> Ka kuti mukwize mazuva ete niva wambe kuti, vena imvuyoti vanakazi vasa zali, niva mavumo aseni ku zala, niva mavele aseni kunyosa. <sup>30</sup> vantu njete niva tange ku wambila ziwulu, vati 'mutuwile hewulu', ni ku tuwulu kavati muntu 'vwike'. <sup>31</sup> Kakuti hava tenda izo kuchi kuni chivombete, kakuve vule kuchizumite?”

<sup>32</sup> Bamwi bakwame, ni zisinyi zobebe, baba hitizwe naye kukwi haiwa. <sup>33</sup> Hava sika haka wulu kasumpwa “Gologota”, chiva mukokotela ha chifapano ha mwina nizi sinyi, chimwi kuvulyo, chimwi kuvuzohoto. <sup>34</sup> Jesu chacho, “Tayo Uva kwatile, ka kuti kabezi ziva tenda”. Chiva li aluhanyeza zi zwata za kwe cho ku laula. <sup>35</sup> Chisi chiva zimene, niku lolela kuba ye ndisi hava vali kumu sheunwina, chivati “Avali kutusa vantu, mu muleke ali tuse mwine, heva njeye krisite wa Ireeza, yava ketwa”. <sup>36</sup> Masole va vakumu nyefula niku chunina niva muchuka vinega, <sup>37</sup> Chivati,” haiva U mulena wa majuda uli tuse U mwine.” <sup>38</sup> Kuvena chisupo kwali, “Nji Simwine wa Majuda” <sup>39</sup> Zumwi wa vasa yava hanzi naye chamu tuka kuti, “kanjewe Kresite? Lituse umwine niku tu tusa, <sup>40</sup> vamwi chiva munyansa?” Kana kotiyi Ireeza, sina hawina muchi kuka chi swana? <sup>41</sup> Iswe itukelo yetu kuva hanu ka kuti tu fosete, tuli tumelela ma fosisa etu, kono uzu mukwame kena mafosisa. <sup>42</sup> Chazwila ha vusu “Jesu noni hupule mu muvuso wako.” <sup>43</sup> Jesu ava wambi kwali, “niku wambila ka vuniti, Sunu mobe name mwi paradaisi”. <sup>44</sup> Chivali ku patalala kwe zuva ka sikisi, mi kasinkwe cikeza kuwumba inkanda yonse kutwala ka naini, <sup>45</sup> mi chikwava ni kusiha, isila lya mwi kereke chilya ñatuka hakati. <sup>46</sup> Chalila chezwi lihanzi, Jesu chati, “Tayo, ni vika luhuhu lwangu mu mayaza ako.” <sup>47</sup> Ha mana ku wamba bulyo nicha maniñwa luhuhu, iñanga wempi za vakanteli ha vona ziva tendahali, chalumba Ireeza, “ni kuti niti, uzu muntu ava shiyeme”. <sup>48</sup> Imi vungi bwa vantu va vezi kulwela, zi vali ku tenda hala, nicha va vola niva li kava hazi zuva. <sup>49</sup> Imi vavezi Jesu, ni vanakazi va vali ku mwi chilile hakazwa kwa Galilea, va vazimene kule, niva lolete. <sup>50</sup> Mukwatise, ku vena mukwame ya vali kusumpwa Josefa we nkhuba Yecisi, mukwame mulotu yo lukite. <sup>51</sup> I ye kena bazumini milao yabo ni kelezo. Avali kuzwa kwa judea ya kwa Arimathea ava kulindile muvuso we Ireeza. <sup>52</sup> Uzu mukwame cha yenda kwa Pilato niku ka kumbila chitunta cha Jesu. Chiba muhangula ha chifapano. <sup>53</sup> Chiva muvuwika isila, imi chiva mupata mwikumbu liñatwilwe ni vwe, museni kubikwa muntu. <sup>54</sup> Imi ilyo izuva ivali lya vuitukiso, lya mukivelo chili vali kutanga. <sup>55</sup> Vanakazi, va vezite naye ku kazwa kwa Galilea, nive chilile Jesu, Niva lolete chitunta muchivikilwa mwa teni, <sup>56</sup> chiva vola niku kalitukisa, imi la mukivelo nicha vapumula sina muku layelwe.

## Inkauhanyo 24

<sup>1</sup> Haba fuma ku makalo e nviki, ci baya kwi bita ku leta mafuta a nunka a baba lukisi. <sup>2</sup> Baba wani ivwe ci lya pindumunwa kwi bita. <sup>3</sup> Cibe njila mukati, mi kana baba wani citunta ca Jesu. <sup>4</sup> Ci kwa tendahala bulyo, haba ba kusi lyangene nezo, kapilipili bakwame bobele ciba zimana ha mbali nebo muzizabalo zi benya. <sup>5</sup> Banakazi babe zwile ku tiya ciba kubama hansi cha zi fateho zabo, ci ba wamba ku Banakazi “chinzi hamu saka bahala ku ba fwile? <sup>6</sup> Ka kwina munu, Mi ca buswa, muhupule mwa ba wambili na sina mwa Galilea, <sup>7</sup> Chati mwana we Ireeza ka hewe mu mayanza aba tenda zibi ni ku mu kokotela, Imi ke zuba lya butatu ka buke.” <sup>8</sup> Banakazi ciba hupula manzwi akwe, <sup>9</sup> ciba zwa kwi bita ni kuka wamba zintu zonse ku balutwana ni bantu bonse. <sup>10</sup> Linu, Maria Madgalena, Joana, ni

Mary nyina wa James ni bamwi Banakazi ciba biha zintu zonse ku ba Apositola. <sup>11</sup> Imi i impiho ciya bonala kusa zuweka hande kuba Apositola, imi kana bab zumini zi baba wambi Banakazi. <sup>12</sup> Pitrosi cha zima niku tilila kwi bita, cha zima niku lola mukati, aba boni fela majila fela. Pitrosi aba boli ku Munzi na komoketwe chiba tendahali. <sup>13</sup> Celyo izuba balutwana bobele baba kuya ku munzi uba ku sumpwa Emmaus, ubena makumi ena i yanza ni kumi lyonke lye stadia kwa Jerusalema. <sup>14</sup> ciba ambola ni bamwi cezo zi ba tendahali. <sup>15</sup> Kuba tendahali kuti haba ba ku wamba ni kuli buza Jesu cha li bonahaza ku bali. <sup>16</sup> Imi menso abo aba ku kangwa ku mwi ziba. <sup>17</sup> Jesu aba wambi ku bali, “chinzi inwe mu wamba mu bobele cimu ya buyenda?” Chiba zima ni ku lola ni ba swabite, <sup>18</sup> Zumwi kubali we zina lya Cleopas ca mwi taba, “Kana njewe u muntu wenke mwa Jerusalema ya sezi zintu zi ba tendahali mwa anu mazuba?” <sup>19</sup> Jesu ca wamba ku bali, “zintu zih?” Ciba mwi taba, Zintu zi amana ni Jesu wa Nazareta, yabali Mupolofita, we misebezi mu manzwi, habusu bwa mulimu ne chisi. <sup>20</sup> Lyahanu ba Prisisa ba kulwana ni Bayendis, mumu baba mubetekeli ni ku mu nyansa kuti a kokotelwe ni kwi haiwa. <sup>21</sup> Imi tuba hupwile kuti njete na lukulule Israele. yee, nihakuba bulyo izi celi izuba lyo butatu kuzwa zonse zintu ha zi tendahala. <sup>22</sup> Kono banakazi bamwi be nkopano baba tukomokisi, kaku pakelela kwi bita, <sup>23</sup> Imi kana baba ka mu wani chitunta, baba boli chi bakati nabo ba ba boni impono ya Mangeloi baba wambi kuti u hala. <sup>24</sup> Bamwi ba Kwame mukati ketu baba yendi kwi bita, ciba kawana muba ba teli Banakazi, kono kana baba ka mu wani.” <sup>25</sup> Jesu aba wambi kubali kuti, Mawe inwe bantu musa zuwisisi bene inkulo zi lyeha ku lemuha ziwambo za ba wambi mupolofita. <sup>26</sup> Kana kena kubali kwa butokwa kuti Jesu a nyandiswe ni kwi njila mwi kanya, <sup>27</sup> Kwi ntazi ku zwa kwa Mushe ku ya ku baprofiti bonse, Jesu caba tolokela zintu ku amana naye mu mañolo. <sup>28</sup> Hachi ba ba sutelele ku munzi ku baba kuya, Jesu aba tendi ubu aba kusi zwila habusu, <sup>29</sup> kono chiba mu cho kuti, “wi kale neswe, imi celi chitengu ni zuba chiliya kuku mina” linu Jesu cha bola mukati kwi kala nabo. <sup>30</sup> Ku ba tendahali kuti haba kala naye ku lya, cha hinda chinkwa ku chi fuyola ni ku chi komauna cha baha, <sup>31</sup> Linu menso abo aba tondi ni chi ba mwi ziba, Imi cha zwa mu menso abo, <sup>32</sup> Chiba wamba kuzumwi ni zumwi, “kana inkulo kazi bili mukati ketu? Ha wamba kwetu munzila, ha tu wumbwila mañolo.” <sup>33</sup> Chiba zima che nako iyo ni ku yenda kwa Jerusalema, chi ba wana Balutwana bena ikumi ni yenke ni bamwi ba bena nabo, <sup>34</sup> chi bati initi Jesu aba buki ni ku libonekisa kwa Simoni, <sup>35</sup> chi ba wamba zintu zonse ziba tendahali mwi nzila, ni Jesu mwa ba tondelezwa ni kamo Jesu haba ku komauna chinkwa. <sup>36</sup> Haba ba ku wamba bulyo, Jesu cha zima mukati kabo, cha wamba ku bali chati “Ku sanga kube ne nwe”. <sup>37</sup> Kono baba bi ni sabo niku tiya ahulu, ni ku bonala kuti ba bona luhuhu lu jolola. <sup>38</sup> Jesu aba wambi ku bali, “Chinzi hamu bilela, ni kuba ni puzo mwi nkulo zenu? <sup>39</sup> Mu bone mu mayanza angu ni matende kuti njeme. Muni wonde niku ni lola, sina luhuhu lu jolola halu sena inyama ne zi fuha sina muni kalile me”. <sup>40</sup> Ha wamba bulyo aba ba tondezi mayanza ni matende a kwe. <sup>41</sup> Haba ba kwina mu ku sa zumina bakeñisa cha ku sanga bulyo niku komokwa Jesu cha wamba ku bali mwina chimwi

chete mulye? <sup>42</sup> Chiba muha chiyemba che nswi zi jichitwe, <sup>43</sup> Jesu cha hinda ni kulya mubusu bwa bo. <sup>44</sup> Aba wambi ku bali, “kuti hani bena nenwe, ni ba mi wambile kuti zonse ziba ñolwa ka mulawo wa Mushe ni we chiprofiti ni manolo a Lisamu e zuzilizwe”. <sup>45</sup> Cwale che yalula ingana zabo, kuti ba zuwisise mañolo. <sup>46</sup> Aba wambi kubali kuti, “chiba ñoletwe kuti Jesu u swanela ku nyandiswa ni ku buka ku ba fwile che zuba lyo butatu. <sup>47</sup> Niku bakila zibi zetu kuti tu swalele, zi swanela kukutazwa mwi zina lyakwe ku zisi zonse, ku matango a Jerusalema. <sup>48</sup> Mumpaki wezi zintu. <sup>49</sup> Mubone, nimi tumina zaba sepisi Tayo. Kono mu shale mu Muleneñi konji chi mwa bwikwa ni inguzu zi zwa kwi wulu.” <sup>50</sup> Cwale Jesu cha ba hitila mane kuka sika ha fwihi ni Bethani. Mi cha zimika mayanza no ku ba fuyaula. <sup>51</sup> Ku ba tendahali kuti haba kuba fuyola aba siyi ni ku hindwa kwi wulu. <sup>52</sup> Linu chiba mu lapelela kaku sanga ni ku bola kwa Jerusalema ke cha ku sanga. <sup>53</sup> Chiba zwila ha busu mwi inkeleke ku temba Ireeza.

## Johani

<sup>1</sup> Kumatangilo kuvali kwina linzwi, mi linzwi lyivena kwa Ireeza, mi linzwi ivali Ireeza. <sup>2</sup> Ichi chiva kwina ku matangilo ni Ireeza. <sup>3</sup> Zintu zonse ziva pangwa kwali, mi nikusena iye kakwina nanga chintu chonke chisena chapangwa chiva pangwa <sup>4</sup> Mwali kuva kwina vuhalo, mi vuhalo vu vwina mwiseli lya vantu vonse. <sup>5</sup> Iseli lyi munika mukwelima, mi mukwelima kena uvakomi iseli. <sup>6</sup> Kuva kwina mukwame yava ku tumitwe kwa Ireeza, uzo izina lyakwe ivali Johani. <sup>7</sup> Avakezi cho kuva Impaki kwiza ku paka ze seli, njokuti vonse njete va zumine kakwe. <sup>8</sup> Johani kena vali iseli, kono avakezi kuti za pake ze seli. <sup>9</sup> Ivali iseli lyeniti, lyiha iseli ku vantu vonse, lyikeza mwi fasi. <sup>10</sup> Avena mwi fasi, mi fasi lyiva pangwa kwali, mi fasi kena lyiva kumwizi. <sup>11</sup> Avakezi kuzakwe, mi zakwe kena ziva mutambuli. <sup>12</sup> Kono kwavo vangi vava mutambuli, vava zumini mwi zina lyakwe, Avahi inswanelo yo kuva vana ve Ireeza. <sup>13</sup> Ava kena vava zalwa cha malaha, kapa kentato ye nyama, kapa ke ntato yo muntu, kono ye Ireeza. <sup>14</sup> Mi linzwi chilyeza kuva inyama niku hala mukati ketu. Tuva voni inkanya yakwe, inkanya sina yozo mi iye vulyo yava kuka zwilila kwe Shetu, ye zwile chisemo ni niti. <sup>15</sup> Jahani avapaki kuamana iye niku lilila kwakwe, na wamba, uzu njiyena wa kwavo vani va wambi, 'uzo yo keza mumasule angu u i hitilila, kakuli kwavali kwina ni niseni kuva kwatani ime.'" <sup>16</sup> Kuzwa ku kwizula kwakwe tuva tambili chisemo kuzwa chisemo. <sup>17</sup> Kaho mulao uvahewa kwa Mushe. Chisemo ne niti ziva kezi ka Jesu Kreste. <sup>18</sup> Kakwina yava voni Ireeza ke nako ni nako. Ireeza yenkefela, yena hembali ni chizuva che Shetu, ava mwizivahazi. <sup>19</sup> Mi uvu nji vupaki bwa Johani aho majuda hava tumina ma Prisita ni naLivite kwali kuzwa kwa Jerusalema kuka muvuza, "njewe ni?" <sup>20</sup> Chentukuluho chawamba, mi kena va sampuli, kono che tava, "kena njime Kreste." <sup>21</sup> Cwale chiva muvuza, "Uchinzi cwale? Njewe Eliya?" Cha cho, "kena ime," Chiva cho, "Umuporofita?" Chetava," Ne." <sup>22</sup> Cwale chiva wamba kwakwe, "njewe ni, njokuti tuwole kukaha inkalavo kwavo vakatutuma? Uwambanzi kuama iwe umwine?" <sup>23</sup> Chacho, "ni mulumo, ulila mwihalaupa: 'Mupange inzila ya Simwine iwoloke; sina muporofita Isaya mwava teli.'" <sup>24</sup> Mi avo vavatumwa vavali ma Pharisi. <sup>25</sup> Chiva, muvuza niku muwambila, "Chinzi hokoloveza cwale heva kena njewe Kreste kapa Eliya kapa muporofita?" <sup>26</sup> Mi Johani cha vetava, kuwamba, "nikoloveza cha menzi. Kono mukati kenu kuzimene muntu imusezi; <sup>27</sup> iye yani chilila, uzo tukwele twe nsangu kani swaneli kusumununa." <sup>28</sup> Izi zintu ziva pangwini Bethani kwi neku lyimwi lya Jordani, uko Johani kwava ka kolovelezwa. <sup>29</sup> Izuva lyi chilila Johani cha vona Jesu na keza kwali, "Lole, kwina imbelele ya Ireeza izwisa zivi mwi fasi! <sup>30</sup> Uzu njiyena kuni va wambi, 'iye yokeza ku masule angu uni hitilila, kakuli kwavali kwina nini seni kuva kwatani.'" <sup>31</sup> Kena niva kumwizi, kono ivapangali kuti e zivahazwe ku isilaele kuti niva ku koloveza ni menzi." <sup>32</sup> Johani avapaki, kuwamba, "na vona Luho nilushetumuka sina inkuva kwi wulu, mi lyeza kwi kala hewulu lyakwe. <sup>33</sup> kena niva mwi zivi, kono iye

yava ni tumi kwiza kukoloveza ni menzi wawamba kwangu, 'Kozo yete uvone Luhuhu ni lusehemukela hali ni kwikala hali, njeje yo koloveza mu Luhuhu lu Jolola.' <sup>34</sup> Niva voni vonse niku paka kuti uzu nji mwana wa Ireeza." <sup>35</sup> Hape, izuva lyi chilila, sina Johani hava kuzimene ni Varutwana vo vele, <sup>36</sup> vava voni Jesu na yenda hembali, mi Johani chawamba, "Lole, Imbela ye Ireeza!" <sup>37</sup> Mi varutwana vakwe vava muzuwi na wamba izi, mi chive chilila Jesu. <sup>38</sup> Cwale Jesu chava vona niva mwichilile mi chava wambila, "Musakanzi?" Chivetava, "Rabbi (Itoloka muruti), Wikala kwi?" <sup>39</sup> Cha wamba kuvali, "mwize ze muvone." Cwale chiva keza kwiza kuvona kwekala; vave kali naye ilyo izuva, hakuli chivali inako ikwana ikumu. <sup>40</sup> Zumwi kuvali ava zuwi Johani na wamba mi nikwi chilila Jesu ivali nji Andrew, mukulwa Simone Pitulosi. <sup>41</sup> Avatangi kuwana mukulwe Simone mi chawamba kwali, "Twawana Messiah" (italusa Krete). <sup>42</sup> Ava muleti kwa Jesu. Mi Jesu cha mulola niku wamba, "Njewe Simoni mwana Johani, Kosupwe Cephas" (itoloka Pitulosi). <sup>43</sup> Izuva lyi chilila, Jesu hava kusaka kuyenda kwa Galilee, cha wana Filipi niku muwambila, "Nichilile." <sup>44</sup> Hanu Filipi ava kukazwililekwa Bethsaida, intoropo ya Andrew ni Pitulosi. <sup>45</sup> Filipi chawana Nathaniel niku wamba kwali, "Iye uzo Mushe ava ñoli mumulao, ni maporofita, chitwa muwana: Jesu mwana a Josefa, kwa Nazereta." <sup>46</sup> Nathaniel chamu wambila, "kwina chintu chilotu chiwola kuzwa kwa Narazeta?" Fiipi chamu wambila, "wize zo vone." <sup>47</sup> Jesu chavona Nathaniel nakeza kwali niku wamba zali, "vone, mu isilaele we niti, yasena kuchenga!" <sup>48</sup> Nathaniel cha mu wambila, "unizini vule?" Jesu chetava niku mu wambila, "Filipi naseni kukusumpa, ni wina mumsi ye chikuni cha feige, niva kuvoni." <sup>49</sup> Nathaniel che tava, "Rabbi, umwana we Ireeza! umurena wa Isilaele!" <sup>50</sup> Jesu che tava niku mu wambila, "kakuli na wamba kwako, 'naku vona mumsi ye chikuni cha feige; uzumina? Movone zintu zikando kuhita izi.'" <sup>51</sup> mi chawamba, "Zeniti, zeniti, ni wamba kwako, Kovone ma wulu ne yalukite, ni ma ñiloyi e Ireeza azwa hansi nikuya kwi wulu hewulu lya Mwana a Muntu."

## Inkauhanyo 2

<sup>1</sup> Hakuhiita mazuva otatwe, kuvena mukiti we seso mwa Cana ya Galileya, niva nyina Jesu kuvavene. <sup>2</sup> Jesu niva rutwana vakwe vava memetwe kwiseso. <sup>3</sup> Iwaine haimana, vanyina chiva wamba kwali, "kavasina iwaine." <sup>4</sup> Jesu cha wamba kwali, "Mwanakazi, chinzi hokeza kwangu? Inako yangu kaini kusika." <sup>5</sup> Banyina chiva wambila ba hikana, "chonse chamiwambila muchipange." <sup>6</sup> Linu kuvena impoto za mavwe amenzi zimane yanza ni konke kuseveliswa kusambila maJuda havava mukiti, impoto ni mpoto iva kuli yovule vulikana he ñokolwa zobeke kapa zotatwe. <sup>7</sup> Jesu cha wamba kuvali, "mwizuze impoto za menzi ni menzi." linu chiva zizuza ili kumilomo. <sup>8</sup> Linu chawambila vahikana, "Munembule amwi mwatani hanu ni kutwalile mukulwana yoha zilyo." Linu chiba tenda bulyo. <sup>9</sup> Mwihihi mukulwana chasola mumenzi ava sanduki iwaine, kono kena avazi kuizwa (kono vahikana vava teki awo menzi vavezi). Linu chasumpa musesi ni museswa <sup>10</sup> nikucho kuti, mukwame ni mukwame avike iwaine indotu chantazi nikuha isaduri chivakorwa. Kono mwavika iwaine indotu



kwiza kusika hanu. <sup>11</sup> Ichi je Chisupo che ntanzi chava tendi Jesu mwa Cana ya Galilea, niku tondeza ikanya yakwe, imi varutwana vakwe chiva zumina kwali. <sup>12</sup> Izi hazimana Jesu, va nyina, vanche bakwe, niva rutwana vakwe vava yendi kwa Capenamu niku kekala mazuva alikene. <sup>13</sup> Linu impaseka yama Juda chi yivena hafuhi, imi Jesu chaya kwa Jerusalema. <sup>14</sup> Chawana vava kuwuzza mapulu ni mbelele ni nkwilimba, niva chinja masheleni vava kwikele ho. <sup>15</sup> Linu chapanga imbazi yemihala hanze ye tempele, kuhindilila ni mbelele nima mapulu. Cha dadola makovili avantu va nchinja masheleni nikusoha Itafule. <sup>16</sup> Kuvava kuuza inkwilimba avati, “muzwise izi zintu munu. Muleke tenda inzuvo ivandanda musika.” <sup>17</sup> Varutwana vakwe chiva hupula kuti kupañoletwe, “Nihaiwa kutokomela inzuvo yako. <sup>18</sup> Cha mulawa wa Majuda chive tava nikumuta kuti, “Chisupo nzi chete utu tondeze, hamukwete kupanga izi zintu?” <sup>19</sup> Jesu chetava, “Musinye iyi itempele, imi mumazuva otatwe munivuse.” <sup>20</sup> Lunu muvuso wa Majuda chiwati, Iyi itempele ivazakwa muzilimo zina makumi otatwe ni akwana iyanza ni chonke, imi ko ivuse mumazuva otatwe?” <sup>21</sup> Nihakuva vulyo, ava kuwamba kuamana ni tempele ya muvili wakwe. <sup>22</sup> Cwale linu haka vuswa kuvafwile, varutwana vakwe chiva kumbulukwa kuti ava wambi izi, imi vava zumini iñolo ni chiwabo chava wambi Jesu. <sup>23</sup> Linu havena mwa Jerusalema kwi Mpaseka, mwinako ya mukiti, vangi vava zumini mwizina lyakwe havavona impono zava kupanga. <sup>24</sup> Kono Jesu kena vavasepi kakuli ava vezi vonse, <sup>25</sup> kakuli kena kusaka muntu kumupaka kuamana ni muntu, kakuli avezi zivena mukati kakwe.

### Inkauhanyo 3

<sup>1</sup> Kuvana mufalisi wezina Iya Nicodema, muyendisi wa Majuda. <sup>2</sup> Uzu mukwame chakeza kwa Jesu mi chati, “Rabbi, twizi kuti umuruti yo zwa kwa Ireeza mukuti kakwina muntu yo wola kupanga zisupo zowola kupanga haisi haiva Ireeza wina naye. <sup>3</sup> Jesu cha mwitava, “Niti, niti, haisi zumwi chapepwa hape, ka woli kuvona muvuso wa Ireeza.” <sup>4</sup> Nicodema chati kwali, “Muntu wola vule kupepwa hape yacho supule? kawoli kwi njila lyo uvuli mwi vumo livanyina ni kupepwa, uwola?” <sup>5</sup> Jesu che tava, “Nini, niti, haisi zumwi cha pepwa ka mezi ni ka Luhohu, kawoli kwi njila mumuvuso wa Ireeza. <sup>6</sup> Chivapepwa che nyama che nyama, imi chivapepwa cha Luhuhu cha Luhuhu. <sup>7</sup> Sanzi mukomokwa kuti nawamba izi kwenu, Muswanela kupepwa sinca, <sup>8</sup> Luhuhu luhunga konse kulusaka; mu zuwa mulumu walo, kono kamwizi luzwa kapa kuluya. Cwale nji zumwi ni zumwi ya vapepwa cha Luhuhu.” <sup>9</sup> Nicodema chetava chati kwali, Izi zintu ziwola kuva vule? <sup>10</sup> Jesu chetava chati, “U muruti wa Isilaye, imi nahanu kozuwisisi izi zintu? <sup>11</sup> Niti, niti, niwamba kwenu, tuwamba zitwizi, imi tupaka zituva voni. Kono kamutambuli vupaki vwetu. <sup>12</sup> Ha ni miwambila kuamana ni zintu ze inkanda mi kamuzumini, muwola vule kuzumina hanimi wambila zintu ze wulu. <sup>13</sup> Kakwina yava kambami kwi wulu konji yavasuki kwihulu: Mwana wa Muntu. <sup>14</sup> Ili Mushe mwava nyamwini inzoka mwi halaupa, <sup>15</sup> cwale Mwana Muntu uswanela ku nyamuna mwihulu, ili kuti vonse va zumina kwakwe vave ni vuhalo vusa mani. <sup>16</sup> Kakuli

Ireeza ava saki ahulu inkanda, mane avahi Mwanakwe yenke, ili kuti yense yo zumina kwakwe kate afwe kono kave nivuhalo vusamani. <sup>17</sup> Ireeza kana ava tumiki Mwanakwe kwiza kuwatula inkanda, kono kwiza kuhaza inkanda kakwe. <sup>18</sup> Iye yozumina kwakwe kete ka watulwa, kono yasa zumini u watulwe kale kakuli kana avazumini mwi zina lya yenke vulyo Mwana wa Ireeza. <sup>19</sup> Ili nji vaka lye nkatulo: iseli livakezi mwinkanda, imi vaantu vava kusaka ififi kuhita iseli kakuti mitendo yavo iva silafele. <sup>20</sup> Cwale yense yo tenda vuvi u toyete iseli imi kakezi kwi seli ili kuti mitendo yakwe sainzi izivahali. <sup>21</sup> Nivakuva vulyo, iye yotenda initi wiza kwi seli ili kuti ni mitendo, yapanga u yipanga cha Ireeza, ka ivoneke. <sup>22</sup> Hakumana izi Jesu ni varutwana vakwe chivaya mwinkanda ya Judeya. Uko avakekali inako navo ni kukoloveza. <sup>23</sup> Linu Johani naye chaka kakoloveza mwa Enoni kwi mbali ya Salimu kakuli kuvena menzi mangi. Vaantu vavali kwiza kwali imi vava kukolovezwe, <sup>24</sup> aho Johani kena aveni kusohelwa mwi ntolongo. <sup>25</sup> Cwale chikweza inkani mukati ka varutiwa wa Johani ni Mujuda kuamana ni kulijoloza. <sup>26</sup> Vava yendi kwa Johani nikuti kwali, “Rabbi, uzu yavena nawe kwi mbali imwi ya lwizi lwa Jodani, iye yova paki, lole, ukwete ukoloveza, mi vonse vakwete kuya kwakwe,” <sup>27</sup> Johani chetava, “Muntu kawoli kutambula zonse haisi haiva chivahewa kwakwe kuzwa kwiwulu. <sup>28</sup> Iwe umwine uwolakupaka kuti nivawambi, ‘Kanjime Keresite kono nihakuva vulyo, niva tumwa havusu vwakwe.’ <sup>29-30</sup> Musesiwa uwila kumusesi. Linu valikani va musesi, vazimana ni kumuzuwa, kusanga luli kakuli wazuwa inzwi lya musesi. Izi, linu, nji kusanga kwangu mi chikwatendahala. Uswanela kuwela, kono ni swanela fukuza. <sup>31-33</sup> Iye yozwa kwihulu wina he wulu lya vonse. Iye yozwa mwinkanda uzwa mwinkanda imi uwamba kuamana ni nkanda. Iye yozwa kwi wulu wina hewulu lya vonse. U paka kuamana kaza vavoni niza vazuwu, kono kakwina yo tambula vupaki vwakwe. Iye yotambula vupaki vwakwe initifaza kuti Ireeza we niti. <sup>34-36</sup> Kakuli yavatumiwa Ireeza uwamba linzwii lya Ireeza. Kakuli kahi Luhuhu cha kupima. Muzazi wa chikwame usaka Mwana imi avahi zintu zonse mu manza akwe. Iye yo zumina ku Mwana wina vuhalo vusa mani, kono yasa zumini ku Mwana kete avone vuhalo, kono vukali vwa Ireeza vwina hakwe.”

## Inkauhanyo 4

<sup>1</sup> Linu aho Jesu heziva kuti Mafarisi vava zuwi kuti avali kupanga ni kukoloveza valutiwa vangi kuhita Johani <sup>2</sup> (nangati kuti Jesu iye mwine kena avali kukoloveza, kono ivali valutiwa vakwate), <sup>3</sup> chazwa mwa Judeya ni kuvola hape kwa Galileya. <sup>4</sup> Kono ivali iswanero kwali ku hita mwa Samariya. <sup>5</sup> Cwale cha keza mwi toropo ya Samariya, i sumpwa Sychari, hembali ni chivaka chevu icho Jakovo ava here kumwane Josefa. <sup>6</sup> Chisima cha Jakovo puchivena aho. Jesu avali kukatere kuzwa ku musipiri wakwe ni kwiza ha chisima. Chi ivali kuchutire kwinako ye chitengu zana. <sup>7</sup> Mukulwakazi wa Musamariya ava kezi kuku teka menzi, mi Jesu cha wamba kwali, “Nihe ku menzi ni nywe.” <sup>8</sup> Kakuti valutwana vakwe vavali kuyendente mukati ke toropo kuku wula zilyo. <sup>9</sup> Yaho mukulwakazi wa Musamariya chata kwali, “Kuwoleka vule kuti iwe, kuva Mujunda, ukumbira ime,

kuva mukulwakazi wa Musamariya, kuchimwi cho kunywa?” Kakuli Majunda kavana cho kupanga ni Masamariya. <sup>10</sup> Jesu che tava ni kumuta, “Kambe we ziva impo ya Ireeza, mi jeni uzu yo wamba kwako, 'Unihe cho kunwa; ni wa wola kumu kumbira, mi na wola kukuha, menzi a hala.” <sup>11</sup> Mukulwakazi chata kwali, “Mukwame, kawina chitekiso imi isima litungite. Ena kuhi cwale kowina menzi a hala? <sup>12</sup> Kena umu kando, iwe, kuhita ishetu Jakovo, uzo ava tuhi chisima ni kunya mwateni iye mwine, nivane vulyo ni ñombe zavo? <sup>13</sup> Jesu che tava ni kumu ta, “Yense yo nwa kwaya menzi mwa fwe inyota hape, <sup>14</sup> kono yense yo nwa kumenzi awo ite ni muhe kate na fwe inyota hape. Nihakuli, menzi ete ni muhe muave chisima chamezi mwali, kuvuvira ku vuhalo vusa mani.” <sup>15</sup> Mukulwakazi chati kwali, “Mukwame, unihe aya menzi iri kuli nisiye ni kufwanga inyonta mi nisiye niku kezanga kunu kuku teka menzi.” <sup>16</sup> Jesu chata kwali, “Yende, kasupe mwihyenu, mi ukavole kunu.” <sup>17</sup> Mukulwakazi chetava ni kumuti, “Kanina mukwame.” Jesu chetava, “Wina hande mukuwamba,” Kanina mwihyetu; <sup>18</sup> kakuti uva vire ni vakwame vakuma ha minwe ye yanza, mi nozu yo wina naye hanu kanji mwihyenu. Chiwa wamba che niti.” <sup>19</sup> Mukulwakazi cha wamba kwali, “Mukwame, Ni vona kuti umu porofita. <sup>20</sup> Veshetu vavali kulaperera heli irundu, kono inwe muwamba kuti Jerusalema je chivaka uko vantu vaswanera ku laperela.” <sup>21</sup> Jesu chata kwali, “Uni zumine, mwanakazi, kuti i hola i kezite aho kamulapere Tayo kamba heli rundu kamba mwa Jerusalema. <sup>22</sup> Inwe mulapera icho chimusezi. I swe tulapera chi twizi, kakuti ipuluso i zwirira kuMajuda. <sup>23</sup> Niha kuva vulyo, I hola ikezite, imi ina hanu, aho valaperi ve niti kava lapere Tayo muluhuho ni mwi niti, kakuli Tayo u kwete kulola vantu vaswana vulyo kuva valaperi vakwe. <sup>24</sup> Ireeza luhuho, mi vantu vamulapera vaswanera kumu laperera muluhuho ni mwi niti.” <sup>25</sup> Mukulwakazi chati kwali, “Ni izi kuti Mesiya ukezite (uzo usupiwa Keresite). A ho hasana kakeze, keze a tutoloke zintu zonse kwetu.” <sup>26</sup> Jesu chamuta, “Jeme uzu, yo kwete kuwamba kwako.” <sup>27</sup> Heyo inako valutwana vakwe chivaka vola. Hanu vavali ku komoketwe chinzi havali kuwamba ni mwanakazi, kono kakwina ava wambi, “Usaka nzi?” kamba “Chinzi hau wamba naye?” <sup>28</sup> Cwale mukulwakazi chasiya i hemere lyakwe, ni kuvola mwi toropo, ni kuwamba kuvantu, <sup>29</sup> “Mwize, muvone mukwame wani wambira zintu zonse ziniva pangi. Uzu uswanera kuva iye Keresite, iwola kuva?” <sup>30</sup> Chiva siya itoporopo ni kukeza kwali. <sup>31</sup> Mwinako zana, varutwana vavali kumukumbira, nivati, “Rabbi, Lye.” <sup>32</sup> Kono cha wamba kuvali, “Nina zilyo zo kulya inzo zimusezi chazo.” <sup>33</sup> Cwale varutwana chiva wambolisana kuvali vene, “Kakwina zumwi wa muletera zokulya, vamu letera?” <sup>34</sup> Jesu cha wamba kuvali, “Zilyo zangu ku panga itato yakwe uzo yava kani tumi ni kumana musevezi wa kwe. <sup>35</sup> Kamu wambi kuti, 'Kwina myezi imwi yone mi ikutulo jese ikeze'? Ni wamba kwenu, mulole kwi wulu ni kuvone mawa, kakuli chi alitukiseze kusizwa! <sup>36</sup> Uzo yo kwete kusiza u tambula i tuwero ni kukunganya misero yo vuhalo vusa mani, iri kuti uzo yo vyala nozo yo sinza va sangwe hamwina. <sup>37</sup> Mowu muwambiro, 'Yenke ubyala, mi zumwi usinza; vuniti. <sup>38</sup> Ni va mitumi kuku sinza inzo zisina muva severezi. Vamwi vava sevezi, mi muvengiri mumi sevezi yavo.” <sup>39</sup> Vungi bwa Masamariya nowuna muleneñi chiva

zumina kwali vakeñi che vaka lyue ñusa lyo mukulwakazi lya paka, “Wani wambira zintu zonse izo zini vapangi.” <sup>40</sup> Cwale Masamariya hava keza kwali, chiva muvuza kwikala navo, mi ave kali kwateni mazuva overe. <sup>41</sup> Mi vungi vomwi vuva zumini chevaka lya manzwi akwe. <sup>42</sup> Chiva wamba ku mwanakazi, “Katusizumini chevaka lyezo ziwawamba, kakuti iswe tuvene chitwa muzuwa, mi twizi kuti uzu luli chovuniti jo muhazi we kanda.” <sup>43</sup> Hakumana awo mazuva o vere, Chazwa kwatenio ni kuya kwa Ngalileya. <sup>44</sup> Kakuli Jesu iye mwina ava wambi kuti muporofita mwi kanda yakwe kakutekiwa. <sup>45</sup> Hacha keza mwa Galileya, Mangalileya chi vamu tambula. Vava voni zintu zonse zava pangi mwa Jerusalema ha mukiti, kakuti navo vavali kuyendete kwateni. <sup>46</sup> Hanu chakeza hape mwa Kana mwa Ngalileya, umo mwava sanduli menzi i waine. Kuvena zumwi induna ili uzo mwane we chiswisu mwa Capenaume yavali kulwala. <sup>47</sup> Aho heza kuzuwa kuti Jesu ava kezi kukazwa kwa Judeya kwiza kwa Galileya, Cha yenda kwa Jesu ni kuka mukumbira kuti akeze ni kuhoza mwane we chiswisu, ya chavali kwina hafuhi ni kutokwala. <sup>48</sup> Jesu cwale cha wamba kwali, “Mbwita chi mwavona isupo ni makazo, kate muzumine.” <sup>49</sup> Induna chati kwali, “Mukwame, wize kunu mwanangu naseni kufwa.” <sup>50</sup> Jesu chawamba kwali, “Yende. Mwanako we chiswisu uhalu.” Mukwame ava zumini manzwi awo Jesu ava wambi kwali, mi chayenda kuzwa hateni. <sup>51</sup> Havali kushetumuka, muhikana wakwe chamu katana, nawamba kuti mwanakwe we chiswisu avali kuhala. <sup>52</sup> Cwale chava vunza inako hatangira kuli zuwa hande. Chiva mwitava, Inzona mwinako ya musihali i fivere chiya musiya.” <sup>53</sup> Cwale vensi chiva lemaha kuti ivali jiyona inako ina Jesu yava wambi kwali, “Mwanako we chiswisu uhalu.” Cwale iye mwine niver zuvo yakwe yonse chiva zumina. <sup>54</sup> Iyi ivali ivali je makazo yo vuveri yava pangi Jesu hakazwa kwa Judeya kuya kwa Ngalileya.

## Inkauhanyo 5

<sup>1</sup> Hakumana izi kuvena mukiti wa Majuda, imi Jesu chayenda kwa Jerusalema. <sup>2</sup> Linu mwa Jerusalema hamulyango wa mulaka we mbelele, kwina kaziva, ako muchi Heveru ka sumpa Betesida, kavakwina kazuvo kena milyango i kwana iyanza. <sup>3</sup> Ipalo ikatukite ya vaantu vava kulwala, vasavoni, vachunkuta, vazuminine luñañali vava lele mo. kulindila mezi avuva.” <sup>4</sup> Iñeloi lya simwine livashetuki ni kwiza kukundunga mezi imi vonse vava lyati mu mezi niakwete kukundungwa vava kuhola kumatuku onse avali kuva kataza. <sup>5</sup> zumwi mukwame avena ko ya valyali zilimo zina Makumi otatwe ni akwana iyanza ni zo tatwe. <sup>6</sup> Juse hamuvona nalele, imi cha lemaha kuti chavekele hateni inako inde, chawamba kwali, usaka kuva ni makete?” <sup>7</sup> Mukwame yava kulwala chetava, “Nfumwangu, kanina yowola kuni vika mukaziva ka mezi ha kasikwete kusimbulika. ha nikeza, zumwi wiza kuni hitilila.” <sup>8</sup> Jesu chati kwali, “Zimame, zalule vulo vwako, imi uyende.” <sup>9</sup> Haho vulyo mukwame chahola, imi chazalula vulo vwakwe, ni kuyenda. Linu iyo izuva ivali le Nsavata. <sup>10</sup> Cwale Majuda chivati kwali yava hozwa, “le Nsavata mikozumininwe kuhinda vulo vwako.” <sup>11</sup> Chetava, “Iye wanihoza wati kwangu, Tole vulo vwako uyende.” <sup>12</sup> Chiva muvuza, “Njeni yozo muntu wa kuwambila, 'Vutole uyende'?”

<sup>13</sup> Nihakuva vulyo, uzu yava hozwa kena avezi kuti ivali njeni kakuli Jesu ava lovoki, kakuli kuvena vantu vangi hechi chivaka. <sup>14</sup> Kuzwa aho, Jesu chamuwana mwi tepemele imi chati kwali, “vone, chiwava ni makete! Sanzi upangi chivi hape, ili kuti chimwi chivilala sanzi chi pangahali kwako.” <sup>15</sup> Mukwame cha yenda imi cha viha ku Majuda kuti ivali nji Jesu ya va muhozi. <sup>16</sup> Linu ivaka lyezi zintu Majuda chiva nyandisa Jesu, kakuli ava pangi izi zintu le Nsavata. <sup>17</sup> Jesu chavetava, Vandanda vakwetwe kutenda nangati hahanu, imi name, nikwete kutenda.” <sup>18</sup> Chevaka lyezi, Majuda chiva hupula kumwihaya nikuhitiliza kakuli kana vacholi feela i Nsavata, kono hapa ava sumpi Ireeza kuti njivesi, ava lilikanyezi ni mulimu. <sup>19</sup> Juse chavetava, “Niti niti, Mwana kakwina chawola kupanga mwine, kunde vulyo ya zavona Isi zapanga, chonse chapanga Isi, Mwana uzipanga naye. Kakuli <sup>20</sup> Musheni usaka Mwana umutondeza zinti zonse zapanga iye mwine, imi mwa mutondeze zintu zikando zihita izi ili kuti nawe mukomokwe. <sup>21</sup> Kakuti Tayo ava vusi vafwile imi ava vahi vuhalo, ni Mwana nae uha vuhalo kumuntu yense ya saka. <sup>22</sup> kakuli Tayo ka watuli muntu, kono kahe vuwatuli vonse ku Mwana <sup>23</sup> ili kuti vonse vakuteke Mwana muvakutekela Isi. Iye yasa kuteki Mwana kakuteki Isi yava mutumi. <sup>24</sup> Niti, niti, iye yo zuwa linzwi lyangu imi yo zumina yava nitumi wina vuhalo vusamani imi kete anyazahale, kono washila ifu kuya kuvuhalo. <sup>25</sup> Niti, niti, nimi wambila inako ikezite, imi njahanu, vafwile hete niva zuwe inzwii lya Mwana wa Ireeza, imi avo vete vazuwe muva hale. <sup>26</sup> Sina Tayo hena vuhalo mwali iye mwine, chovulyo avahi ku Mwanakwe ili kuti naye ave nivuhalo mwakwe mwine, <sup>27</sup> imi Isi avahi Mwana mata kuzwila havusu ni nkatulo kakuli Mwana wa Muntu. <sup>28</sup> Sanzi mukomokiswa izi, kakuli kwina inako ikeza iyo vonse vena mumavita kava zuwe ilinzwi <sup>29</sup> imi kaveze hanze: avo vavapangi vulotu kukuvuka kwa vuhalo, imi avo vava pangi vuvi kukuvuka kwe nkatulo. <sup>30</sup> Kakwina chini wola kulipangila nimwine. hani zuwa, ni watula, imi kuwatula kulukite kakuli kani kavulola kusaka kwangu kono cha kusaka kwa yava nitumi. <sup>31</sup> haiva niswanela kupaka kuamana name, <sup>32</sup> vupaki vwangu kete vuve vwe niti, kwina yo swanela paka kuamana name, mi nizi kuti vupakwi vaha kuamana name initi. <sup>33</sup> Uva tumini kwa Johani, imi avapaki vuniti. <sup>34</sup> Kono vupaki vuni vatambuli kavuzwi kumuntu. Niwamba izi zintu kuti muwanela ku hazwe. <sup>35</sup> Johani ivali ilambi liva kunika niku venya, imi muvakuwola kutavela kusanga mwiseli lyakwe chenako zana. <sup>36</sup> Kono vupaki vunikwete vukando kovuna vwa Johani, ka musevezi wavanihi uwo wavani Tayo uva nihi kuamana, yonse misevezi ini panga, unipaka kuti Tayo ava nitumi. <sup>37</sup> Tayo yava nitumi iye ava paki kuamana name. yaseni kuzuwa inzwi lyakwe, kapa kuvona Chivupeho chakwe che nako. <sup>38</sup> kamwina inzwi lyakwe lishela mwenu, kamuzumini muya vamitumi. <sup>39</sup> Musaka mañolo kakuli mu hupula kuti muali kamuve ni vuhalo vusa mani, Imi mañolo aswana apaka kuamana name, <sup>40</sup> imi kamusaki kwiza kwangu ili kuti muve ni vuhalo. <sup>41</sup> Kaniwani kulumbekwa kuvaantu, <sup>42</sup> kono nizi kuti kamwina ilato lya Ireeza mwenu. <sup>43</sup> Nivakezi mwizina liva Tayo, imi kana muvuni tambuli. Haiva zumwi nakeza mwizina lyakwe, kamumu tambule. <sup>44</sup> Muwola kuzuminz vule, inwe mutambula kulumbekwa kuvaantu

kono kamu gani kulumbekwa kuzwakwa Ireeza? <sup>45</sup> Sanzi muhupuli kuti niwola kumihambiliza havusu vwa Tavo. yava mihambilizi nji Mushe, mwali mumu vavikite insepo yenu. <sup>46</sup> Haiva muva zumini Mushe, ni muva nizumini kakuli ava ñoli kuamana name. <sup>47</sup> haiva kamuzumini zava ñoli, kamuzumine vule manzwii angu?”

## Ikauhanyo 6

<sup>1</sup> Hazimana inzi zintu, Jesu chayenda kuyimwi imbali ye wate lya Galileya, hape livali kusupiwa I wate lya Tiberiya. <sup>2</sup> Vungi vwe chichava chivali kumwi chilire kakuli vava voni imakazo zavali kupanga kwavo vavali kulwala. <sup>3</sup> Jesu cha yenda kwirundu mi uko abake kali hasi ni varutwana vakwe. <sup>4</sup> (Hanu mukiti we Paseka, Mukiti wa Majunda, uvali kwina hafuhi.) <sup>5</sup> Linu Jesu halola mwi wulu ni kuvona vantu vangi niva keza kwakwe, cha wambira Filipi, “Tuwola kuwula kuhi vuronto ili kuli ava vantu va wole kulya?” <sup>6</sup> (Kono Jesu a vawambi ichi kulika Filipi, kakuli iye mwine ivali kwizi icho chavali kuswanera kupanga.) <sup>7</sup> Filipi cha mwi tava, “Miyanda yovere yamashereñi ovuroto kasa a wole kuwulira zumwi ni zumwi wavo nangati kakwa kanini.” <sup>8</sup> Zumwi wa valutwana vakwe, Adiriyasi, mukulwe wa Simoni Pita, chata kwa Jesu, <sup>9</sup> “Kwina muhwire wo muswisu hanu wina zikwa zeminwe ye yanza zo Vuroto ni nswi zo vere, kono chinzi ichi mukati ketu?” <sup>10</sup> Jesu chati, “Mwikalike vantu hansi.” ( Hanu kuvena lyani liñgi mwe china chivaka,) Cwale vakwame chive kala hansi, valikana lule na lule lwe minwe yeyanza ku mpalo. <sup>11</sup> Linu Jesu chahinda vuloto mi hamana kuha vuitumero, cha tambika kwavo vavali kwi kere, mi kuswana nikwi inswi, chovungi sina muvavali kusakira. <sup>12</sup> Linu vantu havave kuti, cha wamba kuva lutwana vakwe, “Mukunganye vu fwafwali ni twa ngamoka twa shala, iri kuli kanji kuwaniki chi zova.” <sup>13</sup> Chale chiva tu kunganya ni kwizuza zitanda ze kumi ni tovere tufwafwali tuva zwi ha vuronto bwina palo ye minwe ye yanza ye; tu fwafwali tuva shali kwavo vavali. <sup>14</sup> Linu, vantu hava vona ichi chisupo chava pangi, chiva wamba, “Uzu chovu niti muporofita yo swanera kukeza mwi nkanda.” <sup>15</sup> Chale Jesu ha lemuha kuti chivavali kusaka kukeza ni kumukwata che nkani kuti vamupange mulena, cha zwengera yenke kuma Lundu. <sup>16</sup> Hachiyiza kuva chitengu, va lutwana vakwe chiva shetumukera kwi wate. <sup>17</sup> Chive chira muchikepe, mi vavali kuluta i wate kuya kwa Capenaume. Chikuvale kusiha cheyi nako, mi Jesu kena aveni kuka vola kale kuvali. <sup>18</sup> Imi i huho likolete livali kuhunga, mi iwate chili vali kutangite kulwa. <sup>19</sup> Hachi va zuhite chiuvaka chilikana makumi overe ni minwe ye yaza lyo ke kamba makumi o tatwe muvule, chiva vona Jesu nakaya vuyenda he wulu lya wate ni kezite kumbali ni chikepe, mi vavali kutiyite. <sup>20</sup> Kono chati kuvali, “Njeme! Kanji mutiyi.” <sup>21</sup> Linu vavali kukusaka kumu longa muchi sepe, mi yahaho chisepe chicha kasika he rizo havavali kukaya. <sup>22</sup> Izuva lichilira, chinavungi chivali kuzimene kwishirya lye wate chiva vona kuti kena kuvena chimwi chikepe mbwita fera china choke, ni kuti Jesu kena ave chili mwatani ni varutwana vakwe kono kuti varutwana vakwe chivavali kuyendete vovona. <sup>23</sup> Niha kuva vulyo, kuvena amwi mato avali kukazwa kwa Tiberiasi hafuhi ni chivaka aho hava liri vuroto uvo Simwine hava

litumeri. <sup>24</sup> Linu china vungi hachi lemuha kuti nangati Jesu kamba varutwana vakwe kena vavali kusikwina, cwale avo vene chiva chira mumato ni kuyenda kwa Capenaume kuka ngana Jesu. <sup>25</sup> Hachiva manite kumuwana kweyina imwi imbali ye wate, chiva cho kwali, “Rabbi, wakeza liri kunu?” <sup>26</sup> Jesu chawe tava, ni kucho, “cho vuniti, niti, muni ngana, isiñi kuti muvavoni imakazo, kono ivaka lyokuti muvavali vuroto vumwi bwe nkonko mi muve kuti. <sup>27</sup> Kanji muverekeri zilyo inzo zisinyeha, kono muverekere zilyo zikala inako kutwala kuvahalo vusa mani uvo Mwana o Muntu bwasa mihe, kwe Ireeza Isi ava viki iswayo hali.” <sup>28</sup> Cwale chivati kwali, “Chizi chi tuswanera ku panga, iri kuli tuwole kupanga misevezi ye Ireeza?” <sup>29</sup> Jesu che tava ni kuta kuvali, “Uwu njo musevezi we Ireeza: kuti mu zumine ku yenke unzo yavaka tumi.” <sup>30</sup> Chwale chiva ta kwali, “Chechihi chisupo cwale choso pange, iri kuli tuvone ni kuku zumina? Chinzi choto pange? <sup>31</sup> Veshetu vavali maana mwi halaupa, sina hakuñoletwe, 'Avavahi inkonko izwa kwi wuulu kulya.” <sup>32</sup> Linu Jesu chawe tava, “Chovu niti, niti, kena ivali Mushe yava mihi inkonko kuzwa mwi wuulu, kono ivali Tayo yo miha inkonko ye niti izwa kwi wulu. <sup>33</sup> Kakuti inkonko ye Ireeza je china chi zwa kwiwulu ni kukeza hansi ni kwiza kuha vuhalo kwi nkanda.” <sup>34</sup> Cwale chiva wamba kwali, “Nfumwetu, utuhe iyi inkonko inako yonse.” <sup>35</sup> Jesu cha wamba kuvali, “Jeme ni nkonko yo vuhalo; uzo yo keza kwangu kasane ka fwe inzala, mi uzo yo zumina mwangu kesane kafwe inyota. <sup>36</sup> Kono ni vami wambiri chovu niti muvavoni, mi kamu zumini. <sup>37</sup> Yense uzo Tayo waniha mwa keze kwangu, mi yense yo keza kwangu chovuniti kaseni muzindire hanze. <sup>38</sup> Kakuti niva kezi hansi kukazwa kwi wulu, isiñi kwiza kupanga itato yangu, kono chasaka iye uzo yavaka ni tumi. <sup>39</sup> Imi iyi nji tanto yakwe uzo yava kanitumi, kuti kanji ni zoverwa nangati yenke kwavo vonse vavanihi, kono kaniva vunse mwizuva lyama mani mani. <sup>40</sup> Kakuli iyi nje tanto ya Tayo, kuti yense yo vona Mwana ni kuzumina mwali mwave ni vuhalo vusa mani mi kanimu vunse mwi zuva lya ma mani-mani. <sup>41</sup> Cwale majunda chivatanga kukumbola kuamana naye kakuti avati, “Njeme ni nkonko iyo yaka zwa kwi wulu.” <sup>42</sup> Chiva wamba, “Uzu kanjiyena Jesu mwana wa Josefa, uzo insi ni nyina tuve zi? Kwiza vule hape hanu kuti awambe, 'Nakazwa kwi wulu'?” <sup>43</sup> Jesu che tava ni kuvata, “Musiyiye kukumbola mukati kenu. <sup>44</sup> Kakwina zumwi yo wola kukeza kwangu mbwita Tayo yava kanitumi hamu chuza, mi kani muvunse mwi zuva lyama mani-mani. <sup>45</sup> Ku ñoletwe muma porofita, 'Yense karutiwe nji Ireeza. 'Yense yava zuwi ni kulituta kwa Tayo ukeza kwangu. <sup>46</sup> Kena kuti vonse vava voni Tayo, mbwita fera iye yokazwa kwe Ireeza- ava voni Tayo. <sup>47</sup> Chovu niti, niti, iye yo zumina wina vahalo vusa mani. <sup>48</sup> Jeme ni nkonko yo vuhalo. <sup>49</sup> Veshenu vavali maana mwi halaupa, mi vava mani kufwa. <sup>50</sup> Iyi nje nkonko ikeza hansi kukazwa kwi wulu, iri kuli muntu awole kulya yimwi kuili ni kusa fwa. <sup>51</sup> Jeme ni nkonko i hala iyo ikazwa kwi wulu. Haiva zumwi ulya kuili iyi nkonko, mwa hale kuya kuire. Inkonko iyo yete nihe inyama wangu kuvu halo vwe kanda.” <sup>52</sup> Majunda chiva venga mukati kavo vene niku tanga kukanana, nivati, Kuwoleka vule kuti uzu mukwame atuhe inyama wakwe kuti tulye?’ <sup>53</sup> Cwale Jesu cha wamba kuvali, “Chovu niti, niti, kwanda yo kuti mulye inyama o Mwana o

Muntu ni kunwa malaha akwe, kete muve ni vuhalo mwenu. <sup>54</sup> Yense yolya inyama wangu ni kunwa malaha angu wina vuhalo vusa mani, mi kani muvuse mwizuvalya mamanikizo. <sup>55</sup> Kakuti inyama yangu chilyo che niti, mi malaha angu chinwiwa che niti. <sup>56</sup> Iye yo lya inyama wangu ni kunwa malaha angu ushala mwangu, ni me mwali. <sup>57</sup> Sina Tayo yo hala havaka ni tumi, mi sina hani hala ivaka lya Tayo, cwale iye yonilya, mwahale naye ivaka lyangu. <sup>58</sup> Iyi nje nkonko ina yakeza hanshi kukazwa kwi wulu, isiñi uvu veshenu vavali ni kufwa. Iye yo lya iyi nkonko mwahale kuya kuire.” <sup>59</sup> Kono Jesu avali kuwamba inzi zintu mwi sinangonge na kwete kuruta mwa Capenaume. <sup>60</sup> Cwale vungi vwava rutwana vakwe vava zuwi izi chiva ti, “Iyi ituto ikavo ahulu; jeni yo wola kuitambula?” <sup>61</sup> Jesu, kakuli avali kwizi mwali kuti varutwana vakwe vavali kukumbola heyi dava, chati kuvali, “Kana ichi chimi nyeza? <sup>62</sup> Cwale mukuve vule aho hasane kamuvone Mwana o Mutu nakambama kuta uko kwavali kwina sapilio? <sup>63</sup> Luhuhu luha vuhalo; inyama kakwina chi ivozekeza. Mazwi awo ani vawambi kwenu nga luhuhu, mi go vuhalo. <sup>64</sup> Imi kwina vamwi kwenu avo vasa zumini.” Kakuti Jesu avali kwizwa kuzwa kuma tangiro kuti mbani avo vate ni vakangwe kuzumina mi njeni uzo yate na muveteke. <sup>65</sup> Cha wamba, “I vaka lyezi kuti na miwamba kwenu kuti kakwina zumwi yo wola kukeza kwangu mbwita haiva wa zumininwa kwa Tayo.” <sup>66</sup> Kevaka lyezi, vungi bwa varutwana chiva vola kumusiya mi kena vavazwiri havusu ni kumwi chilira. <sup>67</sup> Linu Jesu cha wamba kuvana ikumi ni tovere, “Inwe nanwe kamusaki kuyenda nanwe, musaka?” <sup>68</sup> Simoni Pitorosi chamwi tava, “Simwine, njikwani kwete tuyende? Wina manzwi ovuhalo vusa mani, <sup>69</sup> mi tuva zumini ni kwiza kwiziva kuti jewe yo Chena yenke we Ireeza.” <sup>70</sup> Jesu cha wamba kuvali, “Kena kuti ni vamiketi, vena ikumi ni minwe yovere, imi zumwi kwenu ji diavulusi?” <sup>71</sup> Hanu avali kuwamba kuama ni Judasi mwana wa Simoni Isikariyoti, kakuti ivali iye, omumwina kuvena ikumi ni tovere, kakuti ivali njiyena, uzo yatane veteke Jesu.

## Inkauhanyo 7

<sup>1</sup> Mi hakuzwa izi zintu Jesu avayendauli mwa Galilee, kaho kena va kusaka kuyenda kwa Judea chevaka lyokuti majuda vava kumusaka kuti va mwihaye. <sup>2</sup> Hanu mukuti wa majuda wa munzunde uva kwina hafuhi. <sup>3</sup> Va mukulwe cwale chiva muwambila, “siye chivaka ichi uyende kwa Judea, njokuti va rutwana vako va vone mitendo yo panga. <sup>4</sup> Kakwina ya panga chintu ku mukunda iye mwine na saka kuti chivoneke. Haiva upanga izi zintu, livonahaze kwinkanda.” <sup>5</sup> Kaho nanga va mukulwe kena vava zumini kwali. <sup>6</sup> Jesu cwale cha wamba kuvali, “inako yangu kena ya sika kale, kono inako yenu ilyitukise kale. <sup>7</sup> Inkanda kalyi woli kumi toya, kono lyi toya ime kevaka lyokuti ni paka za mitendo yalyo mivi. <sup>8</sup> Muyenda haisi ku mukiti; kani yendi kowu mukiti kakuti inako yangu kaini ku talelezwa.” <sup>9</sup> Hachamana ku wamba izi zintu kuvali, che kala mwa Galileya. <sup>10</sup> Kono va mukulwe hati chivayenda ku mukiti, naye chayenda, isiñi na voneka kono cho kulipata. <sup>11</sup> Majuda vava kumusaka ku mukiti niku wamba, “wina hi?” <sup>12</sup> Kuva kwina ku wambolisana mukati ke chisi kuamana naye. Vamwi vava wambi, “Mukwame ushiyeme.” Vamwi vava wambi, “Ne,



Uyendisa vantu munzila isali njejo.”<sup>13</sup> Naho ka kwina yava wambi cha kuzuweka kuamana naye cho kutiya ma Juda.<sup>14</sup> Mukiti hachi uva kwina hakati kokumana, Jesu chayenda mwi ntempele nikukatanga kuka ruta.<sup>15</sup> Cwale ma Juda chiva komoka, niva wamba, “Uzu mukwame wizi vule zingi? kena va lituti.”<sup>16</sup> Jesu cha vetava niku wamba, “intuto zangu kena nji zangu, kono njiyakwe wani tuma.<sup>17</sup> Haiva kwina yo saka ku panga intato yakwe, kezive kuamana nezi intuto, kapa zizwa kwe Ireeza, kapa ni wamba ka lwangu.<sup>18</sup> Yense yo wamba ka lwakwe ungana inkaya yakwe iye mwine, kono iye ya ngana inkanya yozo wa tuma uzo muntu we niti, mi kakwina kusa njolola kwali.<sup>19</sup> Kena kuti Mushe ava mihi mulao? Kono kakwina kwenu ye chilila mulao. Chinzi hamu saka kunihaya?”<sup>20</sup> chisi cha vantu chichetava, “wina i dimona. Njeni yo saka kukwihaya?”<sup>21</sup> Jesu chetava niku va wambila, “na panga mutendo wonke, mi muvonse mukomoswa ke vaka lyecho.<sup>22</sup> Mushe ava mihi mupato (isike kuti izwa kwa Mushe, kono kuve sukulwetu), mi he nsavata mu panga muntu mupato.<sup>23</sup> Haiva mukwame upangwa mupato he nsavata njokuti mulao wa Mushe kanzi ucholwa, chinzi hamuni vengele kakuli na panga mukwame kunjolola he nsavata?<sup>24</sup> Kanji muatuli cha mayemo amuntu mwa vonekela, kono mu watule cho kunjolola.”<sup>25</sup> Vamwi kuvali vakwa Jerusalema vava wambi, “kena njiyena uzu ivakwete kungana kuti va mwihaye?<sup>26</sup> Mi muvone, uwamba na lukuluhite, mi kakwina chiva wamba kwali. kena kuti initi va yendisi vezi luli kuti uzu njiyena Kreste, iwola kuva?<sup>27</sup> Kono nitwizi kuti uzu uzwahi. Kono Kreste ha cheza, kakwina yete izive kuti ukazwila hi.”<sup>28</sup> Cwale Jesu cha lila mwi ntempele, kuruta niku wamba, “muvonse munizi mi mwizi kuni kazwilila. Kena na keza ka lwangu, kono iye wani tuma we niti, mi ka mumwizi.<sup>29</sup> Ni mwizi kevaka lyo kuti nikazwa kwakwe mi wa kanituma.”<sup>30</sup> Vava kulikite ku musumina, kono kakwina yava muviki iyanza chevaka lyokuta kuti inako yakwe kena ivali kusikite.<sup>31</sup> Kono vungi bwa vantu vava zumini kwali, mi chiva wamba, “Kreste hacheza, ka pange zisupo kuhita izi za panga uzu?”<sup>32</sup> Ma Farisi vava zuwi vantu niva shovota izi zintu kuamana ni Jesu, ni mu prisita mukulwana nima Farisi chiva tumina ma pokola kuka musumina.<sup>33</sup> Jesu cwale cha wamba, “ni sina nanwe che nako inini fela, mi cwale niyenda kwali wani tuma.<sup>34</sup> Kamuni ngane kono kete muni wane; kwete niyende, kete muwole kwiza.”<sup>35</sup> Ma Juda cwale chiva liwambila mukati kavo, “kayende kuhi uzu mukwame kwete tuwole kusa muwana? ka yende kuma Greek va hasene nikuka ruta ma Greek?<sup>36</sup> linzwi inzi ilyi lya wamba, 'koni ngane kono kete uni wane; kwete ni yende, kete mu wole kwiza?’”<sup>37</sup> Linu cha mamani, izuva lyi kando lyo mukiti, Jesu cha zimana niku lila, kuwamba, “haiva kwina yo fwile inyotwa, mumusiye eze za nwe kwangu.<sup>38</sup> Iye ya zumina kwangu, sina mulyitela ifnololo, lwizi lwa menzi ahala ka luvuve mwi vumo lyakwe.”<sup>39</sup> Kono ava wambi izi kuamana ni Luhuhu, kwavo va zumina kwali muva tambule; Luhuhu kena lyiveni kuhewa kevaka lyo kuta kuti Jessu kena va sini ku nyamwinwe.<sup>40</sup> Vamwi vantu muchisi, hava zuwa manzwi aya, chiva wamba, “Uzu muporofita luli.”<sup>41</sup> vamwi vava wambi, “Uzu njiyena Kreste.” kono vamwi vava wambi, “Kreste uzu uzwa kwa Galileya?<sup>42</sup> Kena kuti ma ifnololo ava wambi

kuti Kreste mwa kazwile kwi shika lya Davida mikwa Bethelahoma, muzi uko Davida avakwina?”<sup>43</sup> Cwale chikwava niku liyava mu chisi che vaka lyakwe.<sup>44</sup> Vamwi vava kusaka kumusumina, kono kakwina yava viki iyanza hali.<sup>45</sup> Cwale ma pokola vava kավoli nima Prisita vakuluna ni ma Falisi, vava wambi kwali, “chinzi hasena mwa muleta?”<sup>46</sup> Mapokola chivetava, “Kakwina yava wambi vuti.”<sup>47</sup> Cwale ma farisi chiva mwitava, “Chova kuchengetwe nawe?”<sup>48</sup> kana kwina va yendisi vava zumini kwali, kapa kuma Falisi?<sup>49</sup> Kono ichi chisi chisezi mulao, va kutitwe.”<sup>50</sup> Nicodemus (zumwi wa ma Falisi, vava kezi kwali kumatingilo), cha wamba kuvali,<sup>51</sup> Mulawo wetu u atula muntu ni useni kuzuwa kwali nicho cha panga?”<sup>52</sup> chivetava niku wamba kwakwe, “nawe uzwa kwa Galileya? sakisise uvone kuti kakwina muporofita yozwa kwa Galileya.”<sup>53</sup> Cwale zumwi ni zumwi cha yenda kwi nzuvo yakwe.

## Inkauhanyo 8

<sup>1</sup> Jesu avayendi kwi Lundu lya Olive. <sup>2</sup> Kuseni-seni avakezi kwi tempele hape, linu vantu vangi vava kezi; chi kala hanshi nikuva luta. <sup>3</sup> Vañoli ni ma Falisi nivaleta mwanakazi yava swalehi. Chiva muvika hakati. <sup>4</sup> Linu chiva mucho, “Muluti, uzu mwanakazi wa swaleha. <sup>5</sup> Lyahanu mumulawo wetu, Mushe avatulaeli kuti vantu vena vuti vaswanela kupwacholwa ni mañomwe; uwamba nzi kuamana naye?”<sup>6</sup> Vavawambi vulyo chokuti vawane inzila yo kumu hambiliza, kono Jesu ava sungami nikuñola hanshi ni munwe wakwe. <sup>7</sup> Hava zwila havusu kumuvuza, avazimi nikuwamba kuvali, “Iye yasena chivi kwenu, ave wentanzi kumuzinda iñomwe.”<sup>8</sup> Hape chakotamina hanshi, niku ñola hanshi ni munwe wakwe. <sup>9</sup> Hava zuwa bulyo, chivayenda umwina ka umwina, kutangila kumu kulwana. Kuma mani mani Jesu ava shali yenke, ni mwanakazi yavena hakati. <sup>10</sup> Jesu chazimana nikumuvuza, “Mwanakazi va hambilizi vako vena kuhi? Kakwina wakunyaza?”<sup>11</sup> Cha wamba, “Kakwina Simwine.” Jesu chati, “Name kani kunyazi. Yende ukasiye kupanga chivi hape.”<sup>12</sup> Hape Jesu avawambi kuvali kuta kuti, “Njeme niseli lwe nkanda; iye yoni chilila kete ayende mukansikwe kono mwave niseli lyo vuhalo.”<sup>13</sup> Ma Falisi chiva muwambila, “Uhindite vupaki hako; vupaki vwako kena vwe niti.”<sup>14</sup> Jesu chavetava nikuvata kuti, nanga hanilihindila vupaki vwangu, vupaki vwangu vwe niti. Nizi kunizwa ni kuni kaya, kono inwe kamwizi kunikazwa kapa kunikaya. <sup>15</sup> Muatula ke nyama; kono kakwina ini atula. <sup>16</sup> Nanga anitula, inkatulo yangu yeniti kakuli kanikele nenke, kono nina ni Tayo yo nitumite. <sup>17</sup> Eeye, nanga mumulao wenu kuñoletwe kuti vupaki vwa vantu vovele vwe niti. <sup>18</sup> Njeme nili hindila vupaki vwangu, hape Tayo yo nitumite wina vupaki vwangu.”<sup>19</sup> Vavawambi kwali, “Iso wina kuhi?” Jesu chetava, “Kakwina imwizi ime kapa Tayo; kambe munizi, ni mweziva ni Tayo naye.”<sup>20</sup> avawambi aa manzwi muchivulukelo na kwete kuruta mwi tempele, mi kakwina yava musumini kakuti inako yakwe kena iveni kusika. <sup>21</sup> Cwale hape ava wambi kuvali, “niya kungi; kamuni ngane mi kamufwile mu chivi chenu. Kuniya, kamuwoli kwiza koo.”<sup>22</sup> Ma Juda chiva wamba, “kalihaye iye mwine? chingi uwamba; Kuniya kamuwoli kuya kwatani?”<sup>23</sup> Jesu cha wamba wambi kuvali, “uzwa ku nsi;

nizwa kwi wulu. Uwe nkanda iyi; ime kena niwe nkanda iyi. <sup>24</sup> Cwale he, na miwambila kuti kamufwile mu zivi zenu. Haisi hachi mwa zumina kuti Ime Njime, ka mufwe muzivi zenu.” <sup>25</sup> Chiva wamba cwale he kwako, “Njewe ni?” Jesu cha wamba kwavo, “China wamba kwenu kuma tangilo. <sup>26</sup> Nina zintu zingi zo kuwamba ni kuwatula kwenu. Nihakuva bulyo, iye wani tuma we niti; mi zintu zina zuwa kwali, izi zintu ni wamba kwi nkanda.” <sup>27</sup> Kena vava zuwisisi kuti ava kuwamba kuvali ze Shetu. <sup>28</sup> Jesu cha wamba, “Hamumana kunyamuna mwana Muntu, cwale mumwizive kuti Njeme, mi kakwina zangu zini lipangila. Sina ishangu mwava ni rutili, ni wamba izi zintu. <sup>29</sup> Iye wani tuma wina name, mi kena ni siya nenke, kakuti ni panganga chimu tavisia.” <sup>30</sup> Sina Jesu hava kuwamba izi zintu, vangi vava zumini kwali. <sup>31</sup> Jesu cha wamba kuvo ma Juda vava zumini kwali, “Haiva mushala mu linzwi lyangu, cwale muva rutwana vangu ve niti, <sup>32</sup> mi kamwizive initi, mi initi kai milukulule.” <sup>33</sup> Chiva mwitava mwitavi, “Tuvana va Abrahamama mi kena tuvavi va hikana va muntu; uwola kuwamba vule, 'ka mulukuluhe'?” <sup>34</sup> Jesu cha vetava, “Niti, niti, nimi wambila, yense yo tenda chivi muhikana we chivi. <sup>35</sup> Muhikana ke kalilili mwizuvo kuya kwile; mwana wi kalilila. <sup>36</sup> Cwale he, haiva mwana umilukulula, ke niti ka mulukuluhe. <sup>37</sup> Nizi kuti mvana va Abrahamama; mukwete kungana kunihaya kakuti linzwi kalyina chivaka mwenu. <sup>38</sup> Ni wamba chini va voni ni Ishangu, mi mupanga chimu vazuwi kwe shenu.” <sup>39</sup> Chiva mwitava niku wamba, “Ishetu nji Abrahamama.” Jesu cha wamba kuvali, “kape sekeli mvana va Abrahamama, nimwa panga mitendo ya Abrahamama. <sup>40</sup> Kono, hanu musaka kuni haya, mukwame yava miwambili initi ini vaka zuwi kwe Ireeza. Abrahamama kena va pangi izi. <sup>41</sup> Mupanga mitendo ye Shenu,” chiva mu wambila, “Kena tuva zalwa muvuliyendezi; twina Shetu yenke: Ireeza.” <sup>42</sup> Jesu cha wamba kuvali, “Haiva kape Ireeza nji Ishenu, nimwani saka, kaho nikazwa kwe Ireeza mi imozu; kaho kena niva kezi ka lwangu, kono ava ni tumi. <sup>43</sup> Chinzi hamu sa zuwisisi manzwi angu? Ivaka lyo kuti kamuwoli kuzuwa manzwi angu. <sup>44</sup> Muve shenu, iye dyavulusi, mi musaka ku panga intato ze shenu. Ivali chihayi kuma tangilo mi kazimani he niti kakuti kakwina vuniti mwali. Hawamba vupono, uwamba cho mukwa wakwe ni isi wai zwile mapa. <sup>45</sup> Kono, kakuti ni wamba vuniti, kamu zumini. <sup>46</sup> Njeni kwenu yoni hambika chivi? haiva ni wamba vuniti, chizi hamu sa zumini? <sup>47</sup> Iye yazwa kwe Ireeza uzuwa manzwi ee Ireeza; kamu ya zuwi kakuti ka muzwi kwali.” <sup>48</sup> Ma Juda chivetava niku mu wambila, “Kena kuti tuwamba kuti umu Samariya mi wina i dimona?” <sup>49</sup> Jesu che tava, “kanina i dimona, kono ni kuteka Shangu, mi kamuni kuteki. <sup>50</sup> Kani ngani inkaya yangu; kwina yo ngana niku watula. <sup>51</sup> Niti, niti, nimi wambila, haiva kwina yata vike linzwi lyangu, keta vone ifu.” <sup>52</sup> Ma Juda vava wambi kwakwe, “Hanu twizi kuti wina i dimona. Abrahamama nima porofita vavafwi; kono iwe uwamba, 'haiva kwina yata vike linzwi lyangu, keta zuwe ifu.' <sup>53</sup> Kena umukando kuhata ishetu Abrahamama yava fwii, vule? Ma porofita navo vavafwi. Uhupula kuti njewe ni?” <sup>54</sup> Jesu che tava, “haiva nili nyamuna ime ni mwine, inkanya yangu kahena; nji Isi wangu yoni nyamuna-koo imuwamba kuti nji Ireeza wenu. <sup>55</sup> Ihati mwa mwiziva, kono ni mwizi. Haiva ni wola kuwamba, 'kani mwizi; kani swane sina njenwe, ihata.

Nihakuva bulyo, ni mwizi nikuvika linzwi lyakwe. <sup>56</sup> Ishenu Abrahamama ava sangi chokuvona izuva lyangu; ava lyivoni niku nyakalala.” <sup>57</sup> Ma Juda vava wambi kwali, “kawini kukwanisa makumi akwana iyanza ezilimo, mi muva voni Abrahamama?” <sup>58</sup> Jesu chava wambila, “Niti, niti, nimi wambila, Abrahamama naseni, Njeme.” <sup>59</sup> Cwale chiva tola mabwe niku musoholera kono Jesu cha lipata nikuzwa mwi tempele.

## Inkauhanyo 9

<sup>1</sup> Linu Jesu habahitite, nabona mukwame yabazalwa nalimuhofu. <sup>2</sup> Barutwana bakwe chibamubuza, “Muruti, babatendi chive njibani, uzu mukwame kapa bazazi bakwe, habazalwa nalimuhofu?” <sup>3</sup> Jesus abetabi, “Kenakuti uzu mukwame aba tendi chive nandi bazazi bakwe “kono kuti mitendo ya Ireeza ibungutulwe chali. <sup>4</sup> Tutameha kutenda mitendo yozo yabanitumi nichili musihali. Masiku akezite mweyonako kakwina yeti nawole kusebeza. <sup>5</sup> Hanichina muchisi, njime nisele lyechinu chisi. <sup>6</sup> Jesu hamana kuwamba izi zintu, naswila hansi, kutenda itope chamate, imi nasinga itope hamenso akwe. <sup>7</sup> Nichati kwali, “Yenda, kasambe muchihumbi cha Siloe (Itoloka kuti: kutumwa.” Hakwinabulyo mukwame naliyendela, nakasamba, imi nakabola chobona. <sup>8</sup> Hahabulyo bababambene nozo mukwame nabana babamuboni nali mukumbili babali kuwamba kuti, “Uzu kanjiyena yaba kuikalanga na kumbila?” <sup>9</sup> Balikene nibati, “Nji yena” Bamwi nibati, “Nanta, kono uboneka ubu njeje.” imi iye chati, “Njime.” <sup>10</sup> Nibati kwali, “Linuhe menso ako ayeluki bule?” <sup>11</sup> Netaba, mukwame yo sumpwa Jesu watenda itope ni kunisunga amenso angu imi nati kwangu, 'Yende kwa Siloe mi uka sambe,' Chobulyo chinayenda imi ninakasamba imi ninatanga kubona.” <sup>12</sup> Nibati kwali, “Winahi iye?” Netaba nati, “kanizi.” <sup>13</sup> Nibaleta mukwame yaba kubanga chihofu ku Mafalisi. <sup>14</sup> Linu ibali izuba lye nsabata ilyo Jesu aba tendi itope heyalula menso akwe. <sup>15</sup> Linu hape Mafalisi chiba mubuza mwaba bonene. Nati kubali, “Wabika itope hamenso angu, naka samba imi hanu chini bona.” <sup>16</sup> Balikene ku Bafilisi nibati, “Uzu mukwame kazwi kwa Ireeza mukuti kechilili Insabata.” Bamwi nibati, “Kwiza buti kuti mukwame wina chive atende imakazo zisika aha?” Chobulyo ni kwaba ni kuliyaba mukati kabo. <sup>17</sup> Chobulyo nibabuza mukwame wechihofu hape, “Utinzi kuamana naye mukuti njobeyalulwa menso kwali?” Mukwame wechihofu nati, “mutanikizi.” <sup>18</sup> Nangaho Majuda kanababazumini kuti ibali chihofu yabeyalulwa menso ulukusikila habasumpa bazazi bakwe yasanaabali kubona. <sup>19</sup> Nibabuza bazazi bakwe, “Uzu nji mwanenu wamuswisu imutakuti abazalwa nali chihofu? Kwiza buti kuti linu abone?” <sup>20</sup> Chobulyo bazazi bakwe babetabi, “Twizi kuti uzu nji mwanetu wamuswisu nikuti aba zalwa neli chihofu. <sup>21</sup> Mukubezili kuti abone hanu katwizi, ni yabeyaluli menso akwe katwizi. Mumubuze, mukulwana. Uwola kuliwambilila iye mwine.” <sup>22</sup> Bazazi bakwe babawambi izi zintu, mukuti babakutite Majuda. Mukuti Majuda chiba babazuminzene kale kuti iye yete alizumine kuti nji Kreste mubamuhindikile kunze yamasinagoge. <sup>23</sup> Chebaka lyezi, bazazi bakwe nibati, “Mukulwana, mumubuze.” <sup>24</sup> Mukuti chibabahitite tobole nibasumpa mukwame yabakubanga chihofu ni chibati kwali, “Uhe ikanya kwa Ireeza. Twizi

kuti uzu mukwame mutendi wazive.”<sup>25</sup> Linu uzo mukwame netaba, “Kanizi nandi mutendi wazive. Chimwi chinizi: Nibali nimuhofu, imi hanu chinibona.”<sup>26</sup> Kuzwaho nibamuti, “Chinzi chabatendi kwako? Abeyalula buti menso ako?”<sup>27</sup> Abetabi, namiwambila kale, imi kamutekelezi! Chinzi hamusaka kuzuwa chimwi hape? Kamusaki kuba barutwana bakwe nanwe, nandi musaka?<sup>28</sup> Nichibamutuka imi nibati, “Umurutwana wakwe, imi iswe tubarutwana ba Mushe.<sup>29</sup> Twizi kuti Ireeza abawambi kwa Mushe, imi katwizi kuti uzu uzwa kuhi.”<sup>30</sup> Mukwame netaba nabacho, Ichi chikomosa, kuti kamwizi kwazwa, kono abeyaluli menso angu.<sup>31</sup> Twizi kuti Ireeza katekelezi batendi bazive, kono haiba muntu ulibekite kwa Ireeza ni kutenda intato yakwe, umutekeleza.<sup>32</sup> Kutanga kumatangilo achisi kana kubeni kuzuweka kuti kwina ichabeyaluli menso amukwame yabazalwa neli muhofu.<sup>33</sup> Haiba uzu mukwame kazwi kwa Ireeza, kakwina chiti nabatendi.”<sup>34</sup> Nibamwitaba nibati, “Iwe ubazalilwa muzive kumaniniza, imi utuluta?” Hahobulyo nibamusohela kunze.”<sup>35</sup> Jesu abazuwi kuti babamuhindikili hanze yesinagoge. Hamusanganana nati, “Uzumina ku Mwana Muntu na?”<sup>36</sup> Netaba nati, “Njeni uzo, Simwine, kokuti nizumine kwali?”<sup>37</sup> Jesu nati kwali, “Ubamuboni, imi njejena yowamba nawe.”<sup>38</sup> Mukwame nati, “Simwine, nizumina” imi namulapela.<sup>39</sup> Jesu nati, “Kuatulwa chinibezili mwechinu chisi kokuti basaboni babone imi kokuti bana babona basanduke zihofu.”<sup>40</sup> Balikene ku Bafalisi babena naye babazuwi izi zintu imi nibamubuza, “Kana naswe bulyo tubahofu?”<sup>41</sup> Jesu nabati, “Haiba mubali muzihofu, nimusena mubabi ni zive, kono hanu muti, 'Tubona,' chobulyo chive chako muzishale bobulyo.

## Inkaushanyo 10

<sup>1</sup> Ikumbya line, nimiwambila, iye mwine yaseti enjile chamulyango wamulaka wembebele, kono utata kwiwulu chenzila inwi, unzo muntu musa mi wiba. <sup>2</sup> Iye winjilila kumulyango nji mulisana wembebele. <sup>3</sup> Mubabaleli wamulyango mwamwiyalwile. Imbebele zizuwa inzwi lyakwe, mi usupa imbebele zakwe chamazina ni kuzietelela hazizwa. <sup>4</sup> Linu heti chazizwisa nzose zakwe, uziyenda kubusu, mi imbebele zimwichilila, mukuti zinzi inzwi lyakwe. <sup>5</sup> Linu keti nizichilile muyenzi, kono kazimukekuluhe, mokuti kanzini inzwi lyamuyenzi.” <sup>6</sup> Jesu abawambi iyi nguli kubali, kono abo kanababazuwisisi kuti izi zintu ibali nji zona zabali kuwamba kubali. <sup>7</sup> Linu Jesu chawamba kubali hape, Ikumbya line, Nimi wambila, Njime nimulyango wembebele. <sup>8</sup> Yese yabezi kumasule angu musa mi wiba, kono imbebele kena zibamuteki. <sup>9</sup> Njime nimulyango. Yese winjila changu, kapuluswe; kenjile mukati ni hanze mi kawane malisikizo. <sup>10</sup> Musa kawoli kwiza heba kezi kwiba kapa kwihaya ni kushinya. Nibakezi kuti benze bawane buhalo mi babu wane cha bungi. <sup>11</sup> Njime nimulisana weniti. Mulisana weniti uha buhalo bwakwe muchibaka chembebele. <sup>12</sup> Mubeleki wakuhila kahena mulisana wembebele imi kamunite imbebele. Habona untuhu nakezite usiya imbebele ni kubaleha. Utuhu uwonda imbebele ni kuzihasanya. <sup>13</sup> Utiya mukuti mubeleki wakuhila kabileli ni mbebele. <sup>14</sup> Njime ni mulisani weniti, imi nizi zangu, mi zangu zinizi. <sup>15</sup> Tayo unizi, imi name nizi Tayo, imi nibahi buhalo bwangu muchibaka che mbebele. <sup>16</sup> Nina imbebele zimwi zisali

nzowo mukata wembebele. Niyelele kuzileta nazo, imi kazizuwe inzwi lyangu kokuti ibe mutapi wonke ni mulisana yenke. <sup>17</sup> Njikeli ibaka Tayo hanisaka: Nisinyehelwa buhalo bwangu kokuti ninibuhinde hape. <sup>18</sup> Kakwina yowola kubuninyanga, kono nibusinyehelwa changu nimwine. Nina maata akuzwisa, imi nina maata akuhinda hape. Nibawani iyo itaelo kuba Tayo. <sup>19</sup> Kuliyabahakati chikwa tendahala mukati kaMajuda bakeñisa chayo manzwi. <sup>20</sup> Bungi bwabo chiba wamba, “Wina i dimona mi umbulumuka. Chinzi hamutekeleza kwali?” <sup>21</sup> Bamwi chibati, “Aa kahena manzwi amuntu yoyendiswa idimona. Kana idimona liwola kwiyalula menso amuntu yasaboni?” <sup>22</sup> Linu chibali inako ya Mukiti wa Kunjoloza mwa Jerusalema. <sup>23</sup> Ibali maliha, mi Jesu abu kuyenda mwi keleke mumalibela a Solomoni. <sup>24</sup> Linu Majuda chiba muzimbuluka mi chiba wamba kwali, katuhinde inako ikumahi nitu sezibi? Heba njiwe Kirisite, tuwambile he ñandaleza.” <sup>25</sup> Jesu ababetabi kuti, “Nibamiwambili, kono kamuzumini. Mitendo initenda mwizina lya Tayo, yeyo njiipaka ziniama. <sup>26</sup> Nikwinabulyo inwe ka muzumini mukuti kahena mwimbebele zangu. <sup>27</sup> Imbebele zangu zizuwa inzwi lyangu; nizizi, imi zinichilila. <sup>28</sup> Niziha buhalo busamani; kesinizifwe, imi kakwina niuwina yetinazi nzwabule mumayaza angu. <sup>29</sup> Tayo, yabazinihi, mukando kuzamba bonse, mi kakwina yowola kubazwabula mumayaza a Tayo. <sup>30</sup> Ime ni Tayo tuchintu chonke.” <sup>31</sup> Linu Majuda chi bahinda mavwe nibamu ñabola. <sup>32</sup> Jesu ababetabi, “Nibamitondezi mitendo mingi milotu izwa kwa Tayo. Linu njo uhi kweyo mitendo umuniñabolela cha mabwe?” <sup>33</sup> Majuda babamwitabi, “Katuku ñaboleli mutendo mulotu, kono kushwaula, mukuti iwe, umuntu, uli tenda kuti njowe Ireeza.” <sup>34</sup> Jesu ababetabi, “Kanakuti kuñoletwe mumilao, Ni wamba, “mumizimu?” <sup>35</sup> Heba ababa supi kuti bazimu, nji kwani kulibazwi izina lya Ireeza (mi mañolo ka awoli ku lutwa), <sup>36</sup> muwamba konzo yaba bikiwakumbali nji Tayo ni kutumiwa muchisi, 'ushwaula; mukuti na wamba, 'Ni mwana we Ireeza.' <sup>37</sup> Heba kanitendi mitendo ya Tayo, kanzi muni zumini. <sup>38</sup> Kono heba niitenda, nangakuti kazumini, muzumine mitendo linukuti mwizimbe ni kuzuwisisa ziba Tayo benamwangu imi name ninamuba Tayo.” <sup>39</sup> Babaliki kumuwonda hape, kono abayindi kungi kuzwa mumayanza abo. <sup>40</sup> Chayenda hape mwishila lya Jorodani kuchibaka unko Joani abali kukolobeza, niku kekala kwateni. <sup>41</sup> Bungi bwabantu chibeza kwali nikuchokuti, “Cheniti Joani kana abatendi imakazo, kono zintu zonse zaba wambi Joani chozu mukwame ibali zeniti.” <sup>42</sup> Bantu bangi kwateni ni chibazumina kwali.

## Inkauhanyo 11

<sup>1</sup> Linu mukwame zumwi yabali kusingpwa chezina lya Lazaro yabali kulwala. yaba kuzwa mwa Betenia, mumunzi mwabali kwikala Maria ni mukulwe Mareta. <sup>2</sup> nji Maria yaba singi Simwine mafuta esende ni kumupemula kumatende ninsuki zakwe, imi Lazaro yabali kulwala ibala nchizyakwe. <sup>3</sup> Linu banchizyakwe nichibatumina iñusa kwa Jesu, nibacho, “Simwine, bone, iye yosaka ahulu ulwala.” <sup>4</sup> Linu Jesu hazuwa bulyo, nati, Uku kulwala kahena kufwa, kono bwakubonisa maata a Simwine chobulyo nimwana wa Ireeza uswanela kulumbekwa kachibatendahali.” <sup>5</sup> Linu Jesu abali kusaka ahulu Mareta ni

mwanchakwe ni Lazaro bulyo. <sup>6</sup> Chobulyo hazuwa kulwala kwa Lazaro, Jesu abekali mazuba amwi obele muchibaka mwabekele. <sup>7</sup> Linu hakumana bulyo, Chowamba kuba rutwana bakwe, “Twende tuye kwa Judea hape.” <sup>8</sup> Barutwana chibawamba kwali, “Muruti, munako inu Majuda basaka kukugobola nimabwe, linu iwe usaka kubola kwateni hape?” <sup>9</sup> Jesu nichati, kahena kuti inhola zitenda ikumi ni obele eseli mwizuba? Linu zumwi muntu hayenda musihali, keti aholofale kapa kusitatata kakuti ubwene mwahitite cha liseli lyefasi. <sup>10</sup> Nihakuba bulyo, hayenda masiku, mwasitatata kakuli iseli kalina mwali.” <sup>11</sup> Nichawamba izi zintu, linu hamana izo zintu, nichabawambila, “Mulikanetu Lazaro chalala, kono nikaya ili kuti nikamubuse.” <sup>12</sup> Barutwana linu chibawamba kwali, “Simwine, haiba ulele, mwabe nenza.” <sup>13</sup> Linu Jesu chabataluseza kuamana niifu, Chobulyo abo babali kuhupula kuti uwamba iñonzi zakulikatulusa. <sup>14</sup> Linu Jesu nichabataluseza, “Lazaru ufwile.” <sup>15</sup> Nisangite, kebaka lyenu, kuti kana nibena kwateni kokuti nimubazumini. Twende kwali.” <sup>16</sup> Tomasi yaba kunsumpwa Didima, chawamba ku Barutwana, “Tuyende naswe tukafwe ni Jesu.” <sup>17</sup> Linu Jesu hakeza, neza kuwana kuti Lazaro chowina kale mwikumbu chamazuba onee. <sup>18</sup> Linu Betania ibena hembali ni Jerusalema, kazibima zotatwe. <sup>19</sup> Bungi bwa Majuda babali kwiza kwa Mareta ni Maria, kubaombaomba kuamana ni nchinzabo. <sup>20</sup> Linu Mareta, hazuwa kuti Jesu ukezite, nichibaka mukatanyeza, cobulyo Maria abekele munzubu. <sup>21</sup> Mareta linu chawambila Jesu, “Nfumwangu, kapa kobena kunu, nchizyangu nasena bafwi. <sup>22</sup> Nangati hanu, nizi kuti chimwi nichimwi chokumbila kwa Ireeza, mwakuhe.” <sup>23</sup> Jesu chawamba kwali, “Nchizyako mwabuke hape.” <sup>24</sup> Mareta chawamba kwali, “Nizi kuti mwabuke hape he henzuho luzuba lwamamani mani.” <sup>25</sup> Jesu chawamba kwali, “Njeme ni nzuho ni buhalo; yense yozumina kwangu, niha fwa, mwa hale; <sup>26</sup> chobulyo yense yohala ni kuzumina kwangu keti nafwe. Na muzumina iyi ndaba?” <sup>27</sup> Nichawamba kwali, “Ee, Nfumwangu, nizumina kuti njewe Krete, mwana we Ireeza, yokezite mwi nkanda.” <sup>28</sup> Hamana kuwamba izi, chozwa mwateni nikusumpa mwanchakwe Maria kakuli ungula. chamuwambila, “Muruti chasika mi ukusumpa.” <sup>29</sup> Linu hazuwa bulyo, chonyamuka kapili nikuya kwali. <sup>30</sup> Linu Jesu kanabeni kusika mumunzi abali kusina kuchibaka kwaba kamukatanyezi Mareta. <sup>31</sup> Imi Majuda, babena naye mwinzubo babali kumuomba omba nibabona Maria hanyamuka kapili pili kuzwila hanze, chiba mwichilila, kuhupula kuti chokaya kwikumbu aka siliseze kwateni. <sup>32</sup> Linu Maria, hakeza kwabekele Jesu imi namubona, chowila hamatende akwe ni kumuwambila, “Simwine, kapa kobena kunu, nchizyangu nasena abafwi.” <sup>33</sup> Linu Jesu chamubona nasilisa, imi ni Mujuda wakeza naye chokwete usilisa, <sup>34</sup> chabahinditwe muluhuho lwakwe mi abali kubilela; chawamba, “Mubamulaziki kuhi?” Niba mwitaba, “Nfumwangu, wize zo bone.” <sup>35</sup> Jesu nasilisa. <sup>36</sup> Linu Majuda cibawamba, Mubone mwaba kusakila Lazaru!” <sup>37</sup> Imi bamwi chibawamba, “Kanjiyena uzu mukwame, yabeyaluli menso amukwame wamuhofu, hape ibaleti kuti uzu mukwame kuti afwe?” <sup>38</sup> Linu Jesu hape, nalizuwa kutomoha inkulo hape, nayenda kwikumbu. linu chibali ilindi, imi ibwe libatulitwe hateni. <sup>39</sup> Jesu nati, “Muzwise hateni

ibwe.” Mareta, nchinzye wa Lazaro, iye yofwile, nawambila Jesu, “Nfumwangu, cheinu inako chitupu chichinunka, kakuti chikwahinda mazuba onee kuzwa habafwili.” <sup>40</sup> Linu Jesu nati kwali, Naa kana nibakuwambili kuti, heba uzumina, mokabone mubuso wa Ireeza?” <sup>41</sup> Linu chibazwisa ibwe hekumbu. Jesu nakatula menso akwe kulola kwiulu imi nati, “Tate, Nilitumela kakuti wateka kwangu. <sup>42</sup> Nizi kuti utekanga kwangu inako yonse, kono niwamba bulyo kebaka lyekunga linizimbulukite kunibika mukati, ili kuti bazumine kuti ubanitumi.” <sup>43</sup> Chobulyo nawamba buti, nahuweleza chalizwi lizuweka ahulu, “Lazaro, wize hanze!” <sup>44</sup> Mukwame yabafwile nazwa mwikumbu; matende akwe nimayanza abali kuzingeletwe masila. Jesu nawamba kubali, “Mumusumunune imi mumusiye ayende.” <sup>45</sup> Linu bungi bwa Majuda babakezi kwa Maria imi nibabona zabatendi Jesu, niba zumina kwali, <sup>46</sup> kono bamwi mukati kabo chibayenda ku Bafalisi imi chibakawamba zabatendi Jesu. <sup>47</sup> Cwale mapurita bakulwana ni Bafalisi chibakopanya inkuta hamwina imi nibawamba, “Mutupange chihi? Uzu mukwame upanga imakazo zingi. <sup>48</sup> heba mutumusiye yenke sina buti, bonse mubazumine kwali; Maroma mubatunyange minzi yetu yonse ni nkanda yetu.” <sup>49</sup> Nihakuba bulyo, zumwi mukwame mukati kabo, Kayafa, yabali muprisita mukulwana mwecho chilimo, nati kubali, “Kakwina chimwizi. <sup>50</sup> Kamubwene kuti kulotu nibutuka kuti mukwame yenke afwile chichaba kundeye kuti inkanda yonse imaniswe.” <sup>51</sup> Lyahanu izi zawamba kazizwi kwali mwine. kono, kakuti abali muprisita mukulwana icho chilimo, aba polofiti kuti Jesu mwafwile inkanda; <sup>52</sup> kono isini inkanda bulyo imi kono kuti bana ba Ireeza bahasene bekale hamwina kalusika lonke. <sup>53</sup> Linu kuzwa ulo luzuba niba zuminzana mwete behaile Jesu. <sup>54</sup> Kelyo ibaka Jesu nasiya kuyenda mukati ka Majuda nibamubwene, imi chozwa mweyo inkanda nikuya mwihalaupa mumuleneñi wa Efraimi. Uko abakekali ni barutwana. <sup>55</sup> Lyahanu i Paseka ya Majuda chibena hafuhi, imi bungi bwabo nibaya mwa Jerusalema kuzwa mwinkanda i Paseka niseni kusika kuti bakalijoloze abo bene. <sup>56</sup> Babali kukabulola Jesu, imi nibena mwi Tempele nibakwete balibuza buza, “Muhupula bule? Na sanzi akezi kumukiti?” <sup>57</sup> Linu muprisita mukulwana ni Bafalisi niba hewa mulao kuti haiba kwina yowizi kwena Jesu, uswanela kuwamba ili kuti bamukwate.

## Inkauhanyo 12

<sup>1</sup> Mazuba amana iyanza ni limwina habusu bwa Mukiti we Paseka, Jesu abezi kwa Betania, kwabali kuhala Lazaro, yababuswa kwali kubafwile. <sup>2</sup> Chobulyo nibamutendela mulalilo kwateni, mi Mareta njabali kuha zilyo, kono Lazaro ibali njizumwi yabena nabana babena ni Jesu hetafula. <sup>3</sup> Linu Maria nichahinda ilita yebotela yamafuta adula anuka nenza, ni kuetila hamatende a Jesu, ni kuasinda ni suki zakwe. Inzubo niyezula mununko mulotulotu wamafuta anuka nenza. <sup>4</sup> Judasi Isikariota, zumwi wabarutwana bakwe, yeti namubeteke, nati, <sup>5</sup> “Chinzi aa mafuta hasana abawuzwa madola achita myanda yotatwe ni kuha kubahumanehi?” <sup>6</sup> Abali kuwamba bulyo, isiñi kuti abali kufwila bahumanehi inse, nata, kono ibaka lakuti ibali musa: njabakweta chikwama chamasheleñi mi abalikwiba



chibabikwa mwateni. <sup>7</sup> Jesu abati, “Mumuzuminine kuti abikile chakwete izuba lyangu lyekepele. <sup>8</sup> Kamubakubile ni bahumanehi inako yonse, kono ime keti nimubekubile name inako yonse”. <sup>9</sup> Mweyonako ikunga ikando la Majuda nilyeziba kuti Jesu kwabena, mi babezi, isifi kukezila Jesu bulyo, kono ni kwiza kubona Lazaro bulyo, ili yababusi Jesu kubafwile. <sup>10</sup> Baprisita bakulwana ni chibazumizana hamwina chamulelo wakwihaya Lazaro naye; <sup>11</sup> mukuti ibali chebaka lyakwe Majuda hababazwi chabungi ni kukazumina kwa Jesu. <sup>12</sup> Halizwa ikunga ikando nilyakeza ku Mukiti we Paseka. Linu habazuwa kuti Jesu ukezite kwa Jerusalema, <sup>13</sup> nibahinda mitavi yenzalu ni kuyenda kukamukatanyeza, ni kuhuweleza, “Hosanna! Yotohonolofezwe kwa Ireeza njozuna yokeza mwizina la Simwine, Simwine Mukulwana wa Isilaele.” <sup>14</sup> Jesu abawani mwana wedonki mi natanta haili; sina mukubañolezwi, <sup>15</sup> “Musiyemutiya, inwe mubantu ba Zion, Simwine wenu Mukulwana ukezite, natantite hamwana wedonki.” <sup>16</sup> Barutwana bakwe kanababazuwisi izi zintu kumatangilo; kono inako yahewa mata akubuka kubafu, nibahupula kuti izi zintu zibañolelwe chebaka lyakwe ni kuti babatendi izi zintu kwali. <sup>17</sup> Lyahanu ikunga libena naye inako yasupa Lazaro kuzwa mwikumbu imi abamubusi kuzwa kubafwile, ibabi bupaki. <sup>18</sup> Ibali chelyo ibaka ikunga liba zwili kwateni kukamukatanyeza mukuti babazuwi kuti njiye yabatendi iyi makazo. <sup>19</sup> Chobulyo Bafalisi ni chibawambinsena mukati kabo, “Hamubone, kakwina chimuwola kutenda, mubwene, chisi chose chimwichilile.” <sup>20</sup> Magerike bamwi mweyonako babena mukati kwabana babali kuya kukulapela munako yamukiti. <sup>21</sup> Aba bantu babayi kwa Filipi, yabali kuzwa kwa Betsaida mwa Galilea, babamubuzi, nibati, “Fumwetu, tusaka kubona Jesu.” <sup>22</sup> Filipi abayendi kukawambila Andreasi; Andreasi abayendi ni Filipi, mi nibakawambila Jesu. <sup>23</sup> Jesu nabetaba nati, “Ihola chiyasika yakuti Mwana Muntu abe hamazimo makando akububekwa. <sup>24</sup> Ikumbya liline, nimiwambila, uluhaiba luheke lwamundale ni luwila mwibu ni kufwa, kalushale lolona mbona bobulyo; kono haiba nilufwa, kalubike zichelantu zingi. <sup>25</sup> Iye mwine yosuni buhalo bwakwe mwabuluze; kono iye mwine yohinda buhalo bwabamwi batu kuti bwabutokwa kuhita buhalo bwakwe iye mwine kahale ni Ireeza kuyakuile. <sup>26</sup> Haiba muntu unisebeleza, mumusiye anichilile; henikele kwiwulu, ni muhikana wangu kabe kwateni naye. Haiba muntu unisebeleza, Tayo mwamuhe itompo. <sup>27</sup> Lyahanu luhuhu lwangu lukatazehete: Ketinilapele? 'Tayo, unihune mweyinu ihola?' “Kono njilona ibaka ili, hanibezi kuti zenitakisiwe. <sup>28</sup> Tayo, utumise kububana kwako.” Linu linzwi ni lyazwa kwiwulu mi nilyati, “Nibalitumisi kale, mi kanilitumise hape.” <sup>29</sup> Linu ikunga libazimene habumbali ni kulizuwa ni lyati kuti invula yapalakata. Bamwi nibati, “Ingeloi libali kuwambi kwali.” <sup>30</sup> Jesu abetabi nati, “Ili linzwi kanalibezi kwangu, kono kwenu. <sup>31</sup> Hanu chilinako yakuti chinu chisi chiatulwe: Hanu chili inako yakuti ninisinyesinye mata a Satani yobusa chihanu chinsi. <sup>32</sup> Imi Ime, heti bantu kabaninyamwine mwiwulu hachifapano, kanikwitile zumwi ni zumwi kwangu.” <sup>33</sup> Abawambi bulyo kutondeza kuti mufutazi wefu lyeti nafwe. <sup>34</sup> Ikunga libamwitabi, “Tubazuwi kuzwa kumulao kuti Jesu kekalile kuyakwile. Kwiza buti kuti uwambe, 'Mwana

Muntu utameha kuhazikwa hachifapano'? Njeni uzu Mwana Muntu yowamba zakwe?" <sup>35</sup> Jesu linu chati kubali, "Iseli kalibe kubile nanwe chenakozana ifwihi. Muyende hamuchina iseli, kokuti ififi sanzilimihitilili. Iye yoyenda mulififi kaboni kwakaya. <sup>36</sup> Inako yimwina name, muzumine kumanzwi angu initi ya Ireeza kayibe nanwe." Jesu abawambi izi zintu mi kuzwahateni naliyendela ni kukaliwungula kuzwa kubali. <sup>37</sup> Nihakuba kuti Jesu abatendi imakazo zingizingi habusu bwabo, nihakubabulyo kanababazumini kwali. <sup>38</sup> Kokuti inzwi lamutanikizi Isaya lizuzilizwe, ili umo abati: "Simwine, njeni yabazumini kwiñusa lyetu? Mi iyanza lya Simwine libeziwahaza kwani? <sup>39</sup> Cheli ibaka kanababali kuwola kuzumina, mukuti Isaya naye abati, <sup>40</sup> "Abatendi menso abo kuba buhofu, ni kuzumiza inkulo zabo; chenzila yimwi nibabawoli kubona ni menso abo ni kuzuwisisa ni nkulo zabo, ni kusanduka, imi ninibabahozi" <sup>41</sup> Isaya abawambi izi zintu mukuti ababoni ikanya ya Jesu imi abawambi kazakwe. <sup>42</sup> Kono nihakwinabulyo, bungi bwababusi babazumini kwa Jesu; kono chebabakala Bafalisi, kanababali kuzumina kweyo indaba kokuti sanzibakanisi kunjila mwisinagoge. <sup>43</sup> Babalikusaka kutembwa kubantu kuhita kutembwa kuzwa kwa Ireeza. <sup>44</sup> Jesu nahuweleza nati: "Yozumina kwangu, kazumini bulyo kwangu kono uzumina bulyo ni kwali zonitumite, <sup>45</sup> imi uzoyonibwene ubwene bulyo ni yonitumite. <sup>46</sup> Nibezi kuchisi ninili niseli kukuti yense yozumina kwangu sanzi nashali mulififi. <sup>47</sup> Haiba muntu zuhi no zuhi uzuwa manzwi angu kono kaabiki, kanimuatuli; mukuti kananibezili kuatula chisi, kono kwiza kuhaza chisi. <sup>48</sup> Iye yonikana ni yasazumini manzwi angu wina yomuutula: kaibe nji inzwi linibawambi letinilimuutule izuba lamamanimani. <sup>49</sup> Mukuti kananibawambi kazangu, kono njiza Tayo yabanitumi, yabanihi itaelo kuamana ni chiniswanela kuwamba ni chiniswanela kuluta. <sup>50</sup> Nizi kuti itaelo yakwe ileta buhalo busena mamaninizo, chobulyo checho chiniwamba - bobulyo fela sina Tayo mwabawambili kwangu, bobulyo name muniwambila."

## Ikauhanyo 13

<sup>1</sup> Lyahanu pili Mukiti we Paseka niuseni kuliwa Jesu chabezi kuti inakoyakwe chiyasika yakuzwa hanuhansi ni kuya kwa Tayo - sina habakusuni bakwe bamuchisi - ababasaki kutwala kumamanisizo. <sup>2</sup> Lyahanu satani chababiketi kale mwinkulo ya Judasi Iskariota mwana a Simon, kuti abeteke Jesu. <sup>3</sup> Chabakwi kuti Tayo chabahele kale zintu zonso mumayanza akwe imi chabakazwile kwe Ireeza ni chabakubola kwe Ireeza. <sup>4</sup> Abazimani hamulalilo ni kuzwisa chizwanto chakwe chahewulu. Linu chahinda kataulo ni kukalisumina iye mwine. <sup>5</sup> Linu chachunka mezi mukasuba ni kutanga kusaza matenda abarutwana bakwe ni kubapemula ni taulo yabalizingelete. <sup>6</sup> Chakeza kwa Simoni Pitiroso, imi Pitorosi chawamba kwali, "Simwine, mosaze matende angu na?" <sup>7</sup> Jesu chetaba ni chati kwali, "Chinitenda kwanko kese uchizuwisise hanu, kono kokachizuwisise mwinako inza." <sup>8</sup> Pitorosi chawamba kwali, "Kense usanze matende angu." Jesu chamwitaba, "Heba kanikusazi, kawina chemba kwangu." <sup>9</sup> Simoni Pitiroso chawamba kwali, "Simwine, kanzi unisazi bulyo kumatende, kono nikumayanza angu ni mutwi wangu." <sup>10</sup> Jesu chawamba kwali,

“Uzo yosazwa kena chasaka, hensi kusazwa kumatende, kono ujolwele neza; ujololwe, kono isini umwi ni umwi.” <sup>11</sup> (Mukuti Jesu abezi yese namubeteke; chinji abawambi, “Kahena kutimubonse mujolola.”) <sup>12</sup> Linu Jesu hamana kubasaza matende abo ni kuhinda zizwato zakwe ni kwikala hansi hape, chawamba kubali, “Kana mwizi chinatenda kwenu? <sup>13</sup> Munisupa 'Muluti' ni 'Simwine,' imi uwamba chishiyeme, kakuti linu njime. <sup>14</sup> Heba njime linu, Simwine ni Muluti, nashanza matende enu, nemwe mulishanze matende enu zumwi ni zumwi. <sup>15</sup> Mukuti chinamiha mutala kokuti nenwe mutende bobulyo munamitendela. <sup>16</sup> Ikumbya line, niwamba kwenu, mubeleki kena mukando kwafumwe; kapa mutumiwa kubamukando kuwamutuma. <sup>17</sup> Heba nimwiziba izizintu, mufuyoletwe heba nimuzitenda. <sup>18</sup> Kaniwambi mubonse; niziabo banibaketi — kono iñolo linani kwizuzilizwa; 'Iye ulya chikwa changu unilaha mulezele.' <sup>19</sup> Nimiwambila inzohahanu pili niziseni kutendahala, linukuti hazitendahala, nimuzumine kuti Njime. <sup>20</sup> Ikumbya line, nimiwambila, yotambula yese unatuma, watambulame, imi yotambula ime, utambula iye yabanitumi.” <sup>21</sup> Linu Jesu hawamba inzo, chabakatazehete muluhuho, chaha bupaki mi chati, “Ikumbya line, niwamba kwenu kuti zumwi kwenu kanibeteke.” <sup>22</sup> Barutwana chibalilola, nibabilelete kuti uwambani. <sup>23</sup> Zumwi wabarutwana, wabakusaka hahulu Jesu, abakushendeme hetafule nazendamine hachizuba cha Jesu. <sup>24</sup> Simoni Pitorosi chalolela konzo murutwana ni kuwamba, “Tuwambile njeni unzo yowamba zakwe.” <sup>25</sup> Linu chazendamine hachizuba cha Jesu ni kuwamba kwali, “Simwine, njeni unzo?” <sup>26</sup> Linu Jesu chamwitaba, “Njiyena yesenihe chikwa chinansunsa.” Chobulyo hamana kunsunsa chikwa, chachiha Judasi mwana Simon Iskariota. <sup>27</sup> Imi linu, hakumana chikwa, Satani chamwinjila, linu Jesu chawamba kwali, “Chosakaku tenda, uchitende kakuhwela.” <sup>28</sup> Kakwina nanga umwina kubabalikwikele naye hetafule yabezi kuti chizi hawamba inzo kwali. <sup>29</sup> Bamwi chiba hupula kuti, mukuti Judasi ibali iye yabakubika masheleni, chingi Jesu abawambi kwali, “Ukawule zisakahala kuti tube nanzo hamukiti,” kapa uwola kukaha zimwi kubanjebwe. <sup>30</sup> Judasi hamana kutambula chikwa, chazwila hanze hahobulyo. Chi ibali masiku. <sup>31</sup> Inako Judasi hayenda hanze, Jesu chati, “Hanu Mwana wa Muntu cholumbekwa, imi Ireeza kalumbekwe chebakalyakwe. <sup>32</sup> Ireeza kamulumbeke iye kalwake mwine, imi kamulumbeke hahanubulyo. <sup>33</sup> Bahwile banini, nichina nanwe mukuti kuchina kanakozana bulyo. Kamuningane, imi sinamuni bawambili majuda, 'Kuniya kamuwoli kwizako.' Nahanu nichu wamba inzi kwenu hape. <sup>34</sup> Nimiha mulao muhya, kuti musake umwi ni umwi; sina munibakumisakila, linu musake umwi ni umwi hape. <sup>35</sup> Chenzi umwi ni umwi kezibe kuti mubarutwana bangu, heba ni mulisuni zumwi ku zumwi. <sup>36</sup> Simoni Pitorosi chawamba kwali, “Simwine, ukaya kuhi?” Jesu abamwitaba, “Kuniya, kowoli kunichilila hanu, kono konichilele inako yiza.” <sup>37</sup> Pitorosi chati kwali, “Simwine, chinzi hanisawoli kukwichilila? Kanilifungule buhalo bwangu bakeñi chanko.” <sup>38</sup> Jesu chetaba, “Uwola kulifungula buhalo bwanko ibaka lyangu? Ikumbya line, Nikuwambila, munkombwe niuseni kulila kobe chonisampwile totatwe.”

## Inkauhanyo 14

<sup>1</sup> Sanzi musilili inkulo zenu kuti zisitatale. kono muzumine kwe Ireeza, <sup>2</sup> muzumine hape ni kwangu. Munzubo iba Tayo mwina misiyo mingi. kamba kanjobulyo, ninisena namiwambila iyo indaba, chobulyo nikaya nikamilukiseze chibaka. <sup>3</sup> imi haniyenda kukumilukiseza chibaka, munikabole hape imi zanimihinde chobulyo kunikena nanwe mukabe kwateni. <sup>4</sup> Wizi inzila yoko kunikaya.” <sup>5</sup> Tomasi chati kwa Jesu, “Simwine, katwizi kokaya, mutwizibe bule inzila?” <sup>6</sup> Jesu namuwambila, “Njeme ni nzila, initi ni buhalo; kakwina yowiza kwaTayo konji kangu. <sup>7</sup> Kapa munizi, nimwizi ni Tayo naye. kuzwa hanu chimwa mwiziba imi chimwa mubona <sup>8</sup> Filipi chati kwa Jesu, “Simwine, tutondeze Tayo, imi mukushiyame kwetu.” <sup>9</sup> Jesu nichawamba kwali, “Nibabi nanwe inako inde imi kanti nawe konizi, Filipi? Yense wabona ime wabona Tayo. Chinzi howamba, Kuti ni kutondeze Tayo”? <sup>10</sup> Na kamuzumini kuti ime nikele kwa Tayo imi Tayo wina kwangu? Manzwi animiwambila kanzwi kwangu kono a zwila kwa Tayo yohala kwangu yopanga musebezi wakwe. <sup>11</sup> Munizumine kuti njeme Tayo, imi Tayo wina kwangu, kakuba bulyo muzumine kebaka lya misebezi ine. <sup>12</sup> Inkyumba line, nimiwambila, yense yozumina kwangu mwapange misebezi ini panga, imi mwapange misebezi mikando ihita iyi kakuti ime nikaya kwa Tayo. <sup>13</sup> chonse cheti mukumbile mwizina lyangu, kanichipange ili kuti tayo alumbekwe cha Mwana wa muntu. <sup>14</sup> Haiba munikumbila chimwi ni chimwi mwizina lyangu, Munichipange. <sup>15</sup> Haiba munisaka, mumu mamele milao yangu. <sup>16</sup> Imi kani lapele kwa Tayo, imi mwamihe zumwi Mutusi ili kuti zabe nanwe inako zonse: <sup>17</sup> Luhuhu lweniti. Ulo lusawoli kutambulwa inkanda yonse kakuti kalumuboni kapa kumwiziba. Kono inwe mumwizi, imi wikele nanwe imi mwabe nanwe. <sup>18</sup> Keti nimisiye mwenge; munikabole kwenu. <sup>19</sup> Kusishalile inako zana imi inkanda keti munibone hape, kono kamunibone. kakuti nihala, nanwe kamuhale. <sup>20</sup> Cholo luzuba kamwizibe kuti nina kwa Tayo, imi nanwe mwina kwangu, imi name nina kwenu. <sup>21</sup> Umwi ni umwi yokwete milao yangu nikuimamela njiyena yonisaka, imi iye yonisaka mwasakiwe nikwa Tayo, imi name kanimusake imi kanilitondeze kwali.” <sup>22</sup> Judasi (insini Isikariota) chawambila Jesu, “Simwine, chinzi hosaka kulibonahaza kwetu isini kwi nkanda?” <sup>23</sup> Jesu chetaba nikumuwambila, heba kwina yonisaka, mwechilile linzwi lyangu. Imi Tayo kamusake, imi katwize kwali imi katuzake munzi wetu naye. <sup>24</sup> Iye yasanisaki keti echilile manzwi angu. Inyo linzwi limuzuwa kahena kuti lizwila kwangu kono lizwila kwa Tayo yonitumite. <sup>25</sup> Nibamiwambili kuti, hanu hanisikele nanwe. <sup>26</sup> Nihakuba bulyo, Muombaombi- Luhuhu Lujolola yesa katume Tayo mwizina lyangu- iye mwamilute zintu zonse imi mwamihupulise nizonse zini bamiwambili. <sup>27</sup> Nimisiya che nkozo; Nimiha inkozo yangu. Kanimihi sina mubaihela bena munkanda. Sanzi musilili inkulo zenu kuti zisitatale, hape sanzi mutiyi. <sup>28</sup> Mwanizuwa kuti hanawamba kwenu, 'Chinikaya imi munikabole kwenu.' haiba munisaka, ni mwasanga kuzuwa kuti nikaya kwa Tayo, mukuti Tayo mukando kunihita. <sup>29</sup> Linu nimiwambila nichiseni kupangahala ili kuti, hete nichipangahale kamuzumine. <sup>30</sup> keti niniwambe ahulu

nanwe, mukuti mutendisi wenkanda ukezite. Iye kena maata heulu lyangu, <sup>31</sup> chobulyo benkanda baswanela kwiziba kuti ime nisaka Tayo, Imi nipanga sina nji Tayo mwa ni balaelezi. Tuzimane tusiye ichi chibaka.”

## Inkauhanyo 15

<sup>1</sup> Njeme ni isamu lye niti lye veine, mi Itayo nji mu va valeli. <sup>2</sup> U zwisa mutavi onse mwangu usahi chihantu, mi u kosola mutavi onse usahi chihantu kuti uhe chihantu cho vungi. <sup>3</sup> Mujolola ivaka lya iñusa li ni va wambi kwenu. <sup>4</sup> Mushale mwangu, mi Name mwenu. Sina mutavi ha wusawoli kuha chihantu cha wo wine konji chi ha wushala mwisamu lye veine, mane nanga inwe, kwanda kuti mushale mwangu. <sup>5</sup> Njime ni samu lye veine, inwe mu mitavi. Iye yo shala mwangu mi Name mwali, uha chihantu chingi, kakuti mukuti kusena Ime ka kwina chi muwola kutenda. <sup>6</sup> Haiva zumwi kashali mwangu usohelwa kuna ni kuzuma, mi va kunganya mitavi ni ku isohela mu mulilo, ni ku hiswa. <sup>7</sup> Haiva mushala mwangu, mi haiva ni manzwi angu a shala mwenu, mu kumbile zonse zi mu litakaleza, mi ka muzi tendelwe. <sup>8</sup> Mi Itayo ka tembwe mwezi: kuti muhe chihantu chingi mu valutwani vangu. <sup>9</sup> Mi sina Itayo ha vani suni, Name mu ni va misuni, mushale mwi ilato lyangu. <sup>10</sup> Haiva mu vika intaelo zangu, ka mushale mwi ilato lyangu mi sina ha ni va viki intaelo za Itayo mi ni kushala mwi ilato lyakwe. <sup>11</sup> Na wamba izi zintu kwenu kuti ku sanga kwangu ku ve nanwe, ili kuti ku sangu kwenu kwi zu zilizwa. <sup>12</sup> Iyi nji intaelo yangu, mu lisune sina ha ni va mi suni. <sup>13</sup> Ka kwina wina ilato ikando li likana neli, kuti uha vuhalo bwa kwe ku valikani vakwe. <sup>14</sup> Mu valikani vangu haiva muvika zintu zi ni va milaeli. <sup>15</sup> Ka ni si misumpi vahikana, mukuti vahikana kavezi izo simwine wavo za tenda. Na misupi valikani, mi zonse zi ni vazuwi kwa Itayo, ni va zi zivahazi kwenu. <sup>16</sup> Kana mu va ni keti, kono ni va miketi mi ni ku mita kuti mukahe chihantu, ili kuti chihantu chikale. Mu kuve vulyo kuti chonse chi mukumbila cha Itayo mwi zina lyangu, mwa chi mihe. <sup>17</sup> Izi zintu ni milaela: mu mulisune mu vonse. <sup>18</sup> Haiva inkanda imi toya, mwizive kuti ivani toyete ni iseni ku mitoya. <sup>19</sup> Kamba mu ve inkanda, mi inkanda ni va misuni sina muvayo. Kono cho kuti ka hena mu ve inkanda mi chelyo ivaka ni va miketi kuzwa mwi inkanda, mi he inkanda i mi toyete <sup>20</sup> Muzeze linzwi li ni va mi wambi kwenu, 'Muhikana ka hena mukando kwa simwine wake'. Haiva va va nyandisi ime, nanwe ka va mi nyandise; haiva va viki linzwi lyangu, navo vulyo ka vike lyenu. <sup>21</sup> Ka va tende izi kwenu che ivaka lye zina lyangu kakuti ka vezi ya va ni tumi. <sup>22</sup> Kamba ka na ni vezi ku wamba ku vali, ni vasana va va pangi chivi, kono hanu ka vena ivaka lya chivi chavo. <sup>23</sup> Iye yo ni toya uto yete vulyo ni Itayo. <sup>24</sup> Kamba kana ni vapangi mitendo ni ku sena zumwi ya va itendi mukati kavo, ni vasena chivi, kono hanu va va voni ni ku nitoya tuvose Ime ni Itayo. <sup>25</sup> Kono ichi nji kwi zu zilikiza linzwi liñoletwe mu mulao, 'Va vani toyi ni ku sena chimwi.' <sup>26</sup> Linu Musengisengi- iye yese Ni tumine ku zwa kwa Itayo, iye njiye, Luhuhu Lujolola lwa initi, lu zwilila kwa Itayo-kwiza, ka pake changu. <sup>27</sup> Nanwe vulyo mupaka cha kuti muvena name ku zwa ku matangilo.

## Inkauhanyo 16

<sup>1</sup> “Ni ba wambi izi zintu kwenu chokuti kanji muzwi kwangu. <sup>2</sup> Ka ba mi sohe mu ma sinagoge. kono inako i kezite i yo zumwi ni zumwi yo mi haya kahupule kuti u ha mutendo wa chitabelo kwe Ireeza. <sup>3</sup> Ka ba chite izo zintu chokuti kana ba bezibi Itayo kapa I me. <sup>4</sup> Ni ba wambi izo zintu kwenu chokuti i nako ya bo ha i sika, ka muzeze kuti ni ba miwambili kuamana na bo. Kana ni ba miwambili kuamana nizo zintu kumatangilo chokuti ni bena nanwe. <sup>5</sup> Kono lyahanu ni kaya kwali ya ba ni tumi, nihaike kakwina kwenu ya ba ni buzi, “U kaya kuhi?” <sup>6</sup> Kono chokuti ni bawambi izi zintu kwenu, kuswaba ku be zuli mwinkulo zenu. <sup>7</sup> Kono ni miwambila buniti: mo kube hande kwenu ha ni ya kungi. Mukuti heba ne ni sa yendi kungi, Muombaombi kete ne ze kwenu, kono ha ni yenda, Ka ni mutumine kwenu. <sup>8</sup> Ha te neeze, Muombaombi ka tondeze inkanda ku ba ni mafosisa kuamana ni chibi, kuamana ni kuluka, ni kuamana ni nkatulo- <sup>9</sup> kuamana ni chibi, Chokuti ka ba zumini kwangu; <sup>10</sup> kuamana ni kuluka chokuti ni ka ya kwe Itayo, mi inwe ke te ne muzwile habusu ku ni bona; <sup>11</sup> mi kuamana ni nkatulo, chakuti mubusi we yunu inkanda cha ba atulwa kale. <sup>12</sup> Ni na zintu zingi za kuwamba kwenwu, kono kete mu zi zuwisize hanu. <sup>13</sup> Kono cwale iye, Luhuhu lwe Niti, ha lwiza, ka lu mi etelele mu buniti bonse, chokuti kete ne lu liwambile kuzwililia kwali mwine. Kono kawambe chonse chete na zuwe, mi ka wambe kwenu chete ne chize. <sup>14</sup> Ka ni tembe, kakuli ka hinde ku zwilila ku zangu mi ka zi wambe kwenu. <sup>15</sup> Chimwi ni chimwi chena na cho Tayo nji changu. Ni hakwina bulyo, Ni bawambi kuti Luhuhu ka luhinde ku zwilila ku che chili changu mi ka mi wambile. <sup>16</sup> Chakuya che nako i nfuhi kete ne mu ni bone, mi kwisule che nako i mwi i nfuhi ka mu ni bone.” <sup>17</sup> Kuzwaho bamwi ba balutwani ba kwe ni chi bati zumwi ku zumwi, “Chintunzi chi cha wamba kwetu, 'Che nako infuhi kete ne mu ni bone mi kwisule lye nako i mwi infuhi ka mu ni bone,' mi, 'Chokuti ni yenda kwe Itayo?’” <sup>18</sup> Nihakwina bulyo ni chi bati, “Kanti chintunzi chi chawamba, 'I nako zana i nfuhi?’ Katwizi cha kwete kuamana ni cha wamba.” <sup>19</sup> Jesu ni cha bona kuti basaka ku mubuza, ni cha ti kubali, “I chi che mukwete kulibuza mukati kenu kuamana ni cha na wamba, 'I nako zana infuhi kete ne mu ni bone mi kwisule lye nako zana i mwi infuhi ka mu ni bone?’” <sup>20</sup> Buniti, niti, ni wamba kwenu, ka mulile ni kusilisa, kono inkanda ka isange; kono nwe ka mu be ni ku wilwa kukando, kono ku swaba kwenu ka ku sanduke ku ba ni ntabo. <sup>21</sup> Heba mwanakazi u puluha u ba ni kuwilwa chokuti inako ya kwe chi ya sika, kono ha mana kupuluha muchiche, ka chi hupuli kuchiswa kwakwe chebaka lye ntabo chakuti muntu wa pepwa munkanda. <sup>22</sup> Chobulyo mwina kuwilwa hanu, kono ka ni mibone hape, mi nkulo zenu ka zisange, mi ka kwina ya te na wole kuzwisa intabo yinu kwenu. <sup>23</sup> Mwi zuba elyo ke te ne mu ni buze chimwi. Buniti, niti, ni wamba kwenu, haiba ne mukumbila chime kwa Tayo che zina lyangu, ka chi mihe. <sup>24</sup> Kuhitila hanu ka mwini ku kumbila chimwi che zina lya ngu. Mukumbile, mi ka muamuhele chokuti kusanga kwenu ne ku izuzilizwe. <sup>25</sup> Ni bawambi e zi zintu kwenu cha makabisa puo, kono inako i kezite ye se te ni ni wambe kwenu indaba zi sa zuweki, kono kusi bulyo ka ni miwambile ha jololwe kuamana ni Itayo. <sup>26</sup> Mwizuba lyo ka mukumbile che zina lyangu mi ka ni wambi

chobulyo kwenu kuti ka ni lapele kwe Itayo chenu, <sup>27</sup> chokuti Itayo i ye mwine a mi saka chokuti mu ba ni saki mi mu bazumini kuti ni ka zwilila kwe Itayo. <sup>28</sup> Ni zwilila kwe Itayo, mi ni bakezi mwi inkanda. Hape, chi ni siya inkanda mi chi ni kaya kwe Itayo.” <sup>29</sup> Balutwana ba kwe ni chi bati, “Bone, lyahanu cho wamba ha jolola mi ka u li tusisi indaba zi sa zuweki. <sup>30</sup> Lyahanu chi tweziba kuti wizi zintu zonse, mi ko saki zumwi muntu ku kubuza i mpuzo. Chebaka lyo, tuzumina kuti u kazwa kwe Ireeza.” <sup>31</sup> Jesu ni cha betaba, “Chi mwa zumina cwale? <sup>32</sup> Mubone, inako chi ya sika, eeni, che niti chi yasika, he te ni mu hasanywe, zumwi ni zumwi ku munzi wa kwe, mi ka munisiye ne nke. Kono ka ni bi nenke chokuti Itayo wi na name. <sup>33</sup> Ni ba wambi izi zintu kwenu kuti mu be ni nkozo kwangu. Mwinkanda mwina ni masukuluko, kono mu be ni bundume: Ni ba komi inkanda.”

## Inkaushanyo 17

<sup>1</sup> Jesu hamana ku wamba izi zintu, ncha katwila menso akwe kwi wulu mi na ti, “Itayo, inako chi yasika, ulumbeke Mwanako njo kuti Mwana naye aku lumbeke- <sup>2</sup> sina kamo ba muheli buyendisi he wulu lya zi bumbantu zonse njo kuti awole kuha buhalo busamani kwa zumwi ni zumwi yo ba muhi. <sup>3</sup> Ubu buhalo busamani: kuti ba kwizi, Ireeza yenke we niti, mi iye yo ba tumi, Jesu Kerisite. <sup>4</sup> Ni baku tembi hansi. Ni ba mani mutendo oba nihi kuti ni tende. <sup>5</sup> Linu, Tayo, ni tembe hamwina nawe cha ku tembwa ku ni bena nawe pili inkanda ni seni ku bumbwa. <sup>6</sup> Ni ba sinululi izina lya ko ku bantu bo banihi kuzwilila mwi nkanda. I bali bako, mi ni waba ni ha, mi baba kuteki inzwi lya ko. <sup>7</sup> Hanu chi bezi kuti zintu zonse zo banihi zi zwa kwako, <sup>8</sup> mukuti ni babahi ma nzwi anse oba nihi. Ba ba atambuli mi cho buniti ba be zibi kuti nibazwi kwako, mi baba zumini kuti ubani tumi. <sup>9</sup> Ni ba lapelela. Kani lapeleli inkanda kono ni lapelela abo boba nihi, mukuti nji bako. <sup>10</sup> Chonse chili cha ngu nji chako, mi chako nji changu, mi ni tembetwe mu bali. <sup>11</sup> Kani si mwina mwi inkanda, kono aba bantu bena mwi inkanda, mi ni keza kwako. I tayo yo Jolola, ba bike mwi zina lyako abo boba nihi njikuti babe ba mwina, sina hatuli umwina. <sup>12</sup> Hani ba sina nabo, ni baba bikite mwi zina lyako, lyo banihi. Ni baba silelezi, mi nanta yenke wabo ya ba sinyehi, kwanda ya mwana we nsinyeho, njo kuti mañolo e zuzilizwe. <sup>13</sup> Hanu ni keza kwako, kono ni wamba izi zintu mwi inkanda nji kuti babe ni ku saanga kwangu kwi zuzilizwe mu bali. <sup>14</sup> Ni ba bahi inzwi lya ko, mi inkanda ibaba toyi kakuti kahena be nkanda, sina hani sali we nkanda. <sup>15</sup> Kani kukumbili kuti uba zwise mwi inkanda kono uba wungule ku mubilala. <sup>16</sup> Kahena be inkanda, sina hani sali we inkanda. <sup>17</sup> Ba kungule kumbali cho buniti. Inzwi lyako buniti. <sup>18</sup> Sina mo bani tumini mwi inkanda, linu nibaba tumi mwi inkanda. <sup>19</sup> Che baka lyabo ni bali kunguli kumbali, mukuti abo beene nabo ba kungwilwe kumbali mubu niti. <sup>20</sup> Kani lapeli bulyo chaba, kono nabo bonse bani zumine kache nzwi lyabo. <sup>21</sup> Njo kuti bonse babe bamwina, sina iwe, Tayo, mwina mwa ngu, mi nina mwenu. Ni lapela kuti nabo babe mwetu njo kuti inkanda mwi zumine kuti ubani tumi. <sup>22</sup> Kutembwa kuna kobanihi, ni ba kubahi, njo kuti babe ba mwina, sina hatuli bamwina. <sup>23</sup> I me mu baali, mi iwe mwangu. Njo kuti be zuzilizwe mu mwina, njo kuti

inkanda izibe kuti uba ni tumi, mi uba ba suni, sina mo ba ni sunini. <sup>24</sup> Tayo, Ni saka kuti abo bo banihi nabo babe name kwete nibe njo kuti ba bone ku tembwa kwangu, ko banihi. Mukuti ubani suni kuzwililila ku matangilo a ku bumbwa kwe inkanda. <sup>25</sup> Itayo yo lukiti, inkanda kena iba kwizi, kono ni kwizi: mi aba bezi kuti ubani tumi. <sup>26</sup> Ni be zibisi izina lya ko kubali, mi ni sili izibisa njo kuti ke lato lyo bani saki kalyo libe mubali, mi munibe mubali.”

## Inkauhanyo 18

<sup>1</sup> Jesu hamana ku wamba aa manzwi, ni cha yenda ni valutwani mwi shilya lya musindi wa Kedroni, mu vena luwa u mo iye ni valutwani vakwe mu va ve njili. <sup>2</sup> Linu Judasi, ya vati a muveteke, a vezi chi vaka, kakuti Jesu avali ku yanga mwateni inako ni inako ni valutwani vakwe. <sup>3</sup> Linu Judasi, cha ku tambula chi kwata cha valwi ve inkondo ku zwilila ku va ku lwana va mapurisita ni ku Mafarisi, ni va sepahala, chi vakeza ni malambi ni matachi ni zilwiso. <sup>4</sup> Linu Jesu, ya vezi zintu zonse zi vali ku pangahala kwali, cha zwila havusu mi ni ku vavuzi, “Njeni imu kaya vugana?” <sup>5</sup> Chiva mwi tava, “Jesu wa Nazareta.” Jesu cha wamba ku vali, “Njeme.” Judasi, ya va muveteke, naye vulyo ava zimene ni valwi ve inkondo. <sup>6</sup> Mi ha wamba ku vali, “Njime,” chi va vola ni ku ka wila hanshi. <sup>7</sup> Linu hape cha va vuza, “Njeni imuka vugana?” Hape chi vati, “Jesu wa Nazareta.” <sup>8</sup> Jesu che tava, “Na mi wambila kuti Njeme. Haiva muka vugana ime, mu va siye ava vayende.” <sup>9</sup> Ichi ivali mukulukela kwi zuzilikizwa linzwi lyava wambi: “Kwavo vo va nihi, Ka kwina nanga yenke ini va tondi.” <sup>10</sup> Linu Simoni Pitulosi, ya vena mukwale, chi ku chomona ni kulenga ku kosola kutwi kwa chilyo kwa muhikana wa mupurisita yo hanzi. Linu izina lya muhikana ivali nji Malko. <sup>11</sup> Jesu chati kwa Pitulosi, “Voze mukwale mu chivikilo chawo. Kana kete chi Ni ywa ikomoki iyo Itayo ya vanihi?” <sup>12</sup> Mi chikwata cha valwi ve nkondo ni mu kulwana, ni va sepahali va Majunda, ni chi va kwata Jesu ni ku musumina. <sup>13</sup> Chi va musoteza itanzi kwa Anna, kakuti ivali mukwenyani wa mukwame wa Kayafa, ya vali mupurisita yo hanzi mwe cho chilimo. <sup>14</sup> Linu Kayafa nji yena yava hi inkelezo ku Majuda kuti ku vena nenza kuti muntu yenke a fwile vantu. <sup>15</sup> Simoni Pitulosi che chilila Jesu, mi mwa va tendele ni zumwi mulutwana. Linu mulutwani uzo ave zivahale ku mupurisita yo hanzi, mi che njila ni Jesu mwi lapa lya mupurisita yo hanzi; <sup>16</sup> kono Pitulosi ava zimene ha mulyango hanze. Mi zumwi mulutwana, ya ve zivahale ku mupurisita yo hanzi, chi kuya hanze ku ka wamba ni muganteli wa mwanakazana ni ku leta Pitulosi mukati. <sup>17</sup> Linu muhikana wa mwanakazana, muganteli, chati kwa Pitulosi, “Ka njewe zumwi wa valutwani vo zu muntu?” Chati, “Ka njeme.” <sup>18</sup> Linu vahikana ni vasepahali va vazimene aho, mi ni va tenda mulilo wa makala, kakuti ku vali ku tontola, mi avo vene ni vali tukutisa. Pitulosi naye vulyo a vena navo, ava zimene aho na li tukutisa. <sup>19</sup> Mu purisita yo hanzi cha vuza Jesu ku amana ni valutwani vakwe ni intuto zakwe. <sup>20</sup> Jesu cha mwi tava, “Ni va wambi he nkanza ku inkanda. Ni vali ku luta inako yonse mu masinagoge ni mwi tempele umo Majuda yonse va vali kwiza ha mwina. Ka kwina chi Ni wambi mu nkunutu. <sup>21</sup> Chizi ho ni vuza? U vuze avo va va ni zuwi zi ni va wambi. Lole



avo vantu vezi zi Ni va wambi.”<sup>22</sup> Linu Jesu ha wamba ichi, zumwi uva sepahala ava zimene aho chi kudama Jesu infaindi ni kuti, “Mu wi tavila mupurisita yo hanzi vulyo?”<sup>23</sup> Jesu cha mwi tava, “Haiva na wamba chi fosahale, he vupaki vu amana ni ku fosahala, kono haiva ku shieme, chizi ho ni kava?”<sup>24</sup> Linu Anna cha mutumina na suminwe kwa Kaefasi mupurisita yo hanzi.<sup>25</sup> Linu Simoni Pitolosi ya va zimene ni ku li tukutisa. Vantu linu chi vati kwali, “Kahena kuti u zumwi wa valutwani vakwe?” Cha kanana ni kuti, “Ka njeme.”<sup>26</sup> Zumwi wa vahikana va mupurisita yo hanzi, ya vali mukwakwe wa mukwame sikutwi Pitolosi kwa va kosoli, chati, “Kana ni va ku voni naye mwiwa?”<sup>27</sup> Pitolosi linu cha kanana hape, mi hahovulyo mukombwe chi wa lila.<sup>28</sup> Linu chi va soteza Jesu ku zwa kwa Kaefasi ku ya kwi maofesi makando a muvuso. Ivali ka kakusani ahulu, mi kana va venjili mwi lapa lya muvusisi ili kuti kanzi vali zuzi ikwe kono valye mukiti we Impaseka.<sup>29</sup> Linu Pilato cha zwila hanze ku vali mi chati, “Ku nyasa nzi ku mu leta ku amana no zu muntu?”<sup>30</sup> Chi vetava ni kuti kwali, “Haiva uzu muntu kana mutendi wa chivi, ni tusana tava muleti kwako.”<sup>31</sup> Pilato linu chati ku vali, “Mu muhinde muvene, mi mu ka muatule cha kuya cha mulao wenu.” Majuda chi va wamba kwali, “Kana ka ku zu mi ninwe kwetu ku vika muntu yense mwifu.”<sup>32</sup> Va va wambi izi ili kuti linzwi lya Jesu li zu zilikizwe lya va wambi ku tondeza mufuta we ifu lyesa nafwe.<sup>33</sup> Linu Pilato che njila mu maofesi makando a muvuso chi ku supa Jesu mi chati kwali, “Kana njewe Simwine wa Majuda?”<sup>34</sup> Jesu che tava, “U wamba cha ku zwilila mwako, kapa cha vamwi va vaku wambili ku amana name?”<sup>35</sup> Pilato che tava, “Ka hena ni Mujuda, Njime? Vantu vako ni mapurisita va kando va va kuhi kwa ngu. U va chiti nzi?”<sup>36</sup> Jesu che tava, “Muvuso wangu ka hena weyi inkanda. Kamba muvuso wangu uvali we neku lye inu inkanda, linu vahikana vangu ni valwa ili kuti kanzi ni hewa ku Majuda. Kono hanu muvuso wangu ka wuzwi munu”<sup>37</sup> Pilato linu chati kwali, “Linu njewe simwine?” Jesu che tava, “U wamba kuti Njeme simwine. Lyeli nji ivaka li Ni va pepelwa, mi cheli ivaka li ni vezili mwi inkanda kuti ni vike vupaki cha vuniti. Yese yo wila ku vuniti utekeleza ku linzwi lyangu.”<sup>38</sup> Pilato chati kwali, Vuniti chi? Ha mana ku wamba izi, cha yenda hanze hape ku Majuda mi chati ku vali, kana na wana mulandu mo zu muntu.<sup>39</sup> Kono mwina chizo cha kuti ni lukulule muntu yenke kwenu ha mukiti we Impaseka. Linu musaka kuti ni mi lukulwile Simwine wa Majuda?”<sup>40</sup> Linu chiva huweleza hape chi vati, “Isiñi uzu muntu, kono Banabasi.” Linu Banabasi ivali musa mukando.”

## Inkauhanyo 19

<sup>1</sup> Linu Pilato ni cha hinda Jesu ni ku mushupa. <sup>2</sup> Masole ni ba luka ihusi ya miya. Ni ba izwatika Jesu ku mutwi ni ku muzwatika muchizabalo cha mubala wabusimwine. <sup>3</sup> Ni chi beza kwali ni chi bati, “Yosho, Simwine wa Majuda!” mi ni chi ba mudama. <sup>4</sup> Linu Pilato ni cha zwila hanze hape mi ni chati kubali, “Mubone, Ni muleta hanze kwenu chokuti mwizibe kuti ka na na wana mulandu kwakwe.”<sup>5</sup> Chobulyo Jesu ni chazwila hanze, a ba zwete ihusi ya miya ni chizwato chamubala wa busimwine. Linu Pilato ni chawamba ku bali, “Mubone muntu!”<sup>6</sup> Linu ni hakwinabulyo bapurisita bakulwana ni

basepahala chi ba bona Jesu, chi bahuweleza ni kuwamba kuti, “Mu mu kokotele, mu mu kokotele!” Pilato ni cha wamba kubali, “Mu muhinde mubene mi mu mu kokotele, mukuti ka kwina mulandu wa nawana kwali.” <sup>7</sup> Majuda ni chi ba mwitaba, “Twina mulao, mi chakuya cho wo mulao u swanela kufwa chokuti a ba libiki kuti Mwana we Ireeza.” <sup>8</sup> Linu Pilato ha zuwa ao manzwi, ni chaba ni kutiya ahulu, <sup>9</sup> mi ni chenjila mu maofisi makando a mubuso hape ni chati kwa Jesu, “U zwa kuhi?” Kono Jesu kana a ba mwitabi. <sup>10</sup> Linu Pilato ni chati kwali, “I we ko wambi kwangu? Kana kawizi kuti ni na ziho za ku ku lukulula, ni ziho za ku ku kokotela?” <sup>11</sup> Jesu ni cha mwitaba, “Kawina ziho heulu lyangu konji zi ba hewa kwako kuzwilila kwiulu. Ni hakwina bulyo, i ye ya ba ni hi kwako wina chibi chikando.” <sup>12</sup> Che yi inkalabo, Pilato ni cha lika ku mulukulula, kono Majuda ni chi ba huweleza ni chi bati, “Heba ne u lukulula u zu muntu, kahena u mulikani wa Sesare: Zumwi ni zumwi u li bika busimwine u wamba cha kulwisa Sesare.” <sup>13</sup> Linu Pilato ha zuwa ao manzwi, ni chaleta Jesu hanze mi ni chekala muchipula cha buatuli muchibaka chi sumpwa, “Chibaka chi Bumwinwe,” Kono mu chi Heberu, “Gabati.” <sup>14</sup> Linu chi bali izuba lye ntukiso ye Impaseka, chi i bakusaka ku ba inako i kwana i yanza ni konke. Pilato ni chati ku Majuda, “Mubone, u zu simwine wenu!” <sup>15</sup> Ni chi bahuwa kuti, “Muzwise, muzwise; u mukokotele!” Pilato ni cha ti kubali, “ni kokotele Simwine wenu?” Ba purisita ba kulwana ni chi betaba, “Katwina Simwine esi bulyo Sesare,” <sup>16</sup> Linu Pilato na ba ha Jesu kuti a kokotelwe. <sup>17</sup> Cwale ni bahinda Jesu, mi ni cha ya hanze, kulihindila chifapano i ye mwine, ku chibaka chi sumpwa “Chibaka cha Katendele,” I cho mu chi Heberu chi sumpwa, “Kologota.” <sup>18</sup> Ba ba kokoteli Jesu u mo. Mi ne na ni bantu bamwi bo bele, yenke kwi neku ni neku lyakwe, ni Jesu ne na hakati. <sup>19</sup> Pilato hape na ñola chisupo mi na chibika ha chifapano. Haho ha bañoletwe: JESU WA NAZARETA, SIMWINE WA MAJUDA. <sup>20</sup> Bungi bwa Majuda ni chi ba bala i cho chisupo chokuti chibaka cha ba kokotelwa Jesu chi bena hafuhi ni tolopo. Chisupo chi bañoletwe mu chi Heberu, mu chi Latini, ni mu chi Gerike. <sup>21</sup> Linu mupurisita mukulwana wa Majuda ni cha wamba kwa Pilato, “Kanji u ñoli, “Simwine wa Majuda; kono u ti, I ye mwine a ba wambi, “Njime ni Simwine wa Majuda.” <sup>22</sup> Pilato ne taba, “Chi ni ba ñoli ni ba ñoli.” <sup>23</sup> Ha bamana masole ku kokotela Jesu, ni chi bahinda zi zwato zakwe ni ku li abela che inkalulo zone; inkabelo ku isole ni isole, ni chizwato cha hewulu. Kono chizwato che hewulu ke na chibena mapeka, chi ba ku lukililwe hamwina ku zwililila kwiwulu. <sup>24</sup> Linu ni chi ba li wambila a bo beene, “Kanji tu chi ñatuli hakati, kono ni hakwina bulyo tulaule che loto i yo italuhanye kuti ka chi be chani,” I chi chiba chitahali chokuti ifnolo li zuzilizwe li wamba kuti, “Ba ba lyiabili zizwato zangu mukati kabo; ba ba lauli che loto chizwato changu.” <sup>25</sup> Masole ba ba chiti izi zintu. Banyina wa Jesu, mwanche u banyina, Maria mwihabwe wa Kulopa, ni Maria Magadalena. A ba banakazi ba bazimene ku chifapano cha Jesu. <sup>26</sup> Jesu ha bona banyina ni mulutwana ya ba kusuna ni bazimine hambali, na ti ku banyina, “Mwanakazi, bone, mwanako!” <sup>27</sup> Linu nchati ku mulutwana, “Bone, banyoko!” Kuzwililila he nako yo mulutwana na muhinda ku mutwala kumunzi wa kwe. <sup>28</sup> Ha kumana ichi Jesu, mukuti a bakwizi kuti zintu zonse linu chi zamana, kuti kwi zuzilizwe

mañolo, ati, “Ni fwile inyotwa,” <sup>29</sup> Chibikilo chi bezwile i waine i canchumuka chi ba bikitwe aho, linu chi ba bika chiponji chi zwile i waine i chanchumuka ku mutabi we haisopu ni ku inyamwina ku kaholo ka kwe. <sup>30</sup> Mi Jesu a cha nywine ku i waine i chanchumuka, chati, “Chi kwamana.” Ni cha kotamisa mutwi wa kwe ni kuha luhuhu lwakwe. <sup>31</sup> Linu Majuda, chokuti i ba li izuba lya kuli bakanya, ni kuti mibili kanji i shali ha chifapano mu lye Insabata (Mukuti Insabata i bali ya butokwa ahulu), ni chi bakumbila Pilato kucholola matende a bo ni ku bahangula. <sup>32</sup> Lunu masole chibeza ni kucholola matende a mukwame wa matangilo ni a mukwame wa bubeli ya ba kokotelwe ni Jesu. <sup>33</sup> Linu ha be za kwa Jesu, chi ba bona kuti cha bafwile kale, chobulyo ka na ba ba muchololi matende. <sup>34</sup> Ni hakubabulyo, zumwi wa masole cha muhweza mumpati yakwe ni mulinga, mi hohwaho malaha ni menzi ni za zwa. <sup>35</sup> I ye ya ba boni izi nja bapaki, imi bupaki bwakwe bwe niti. Wizi kuti cha ba wambi i niti njo kuti nanwe bulyo chi muzumina. <sup>36</sup> Chokuti izi zintu zi ba chitahali cha kwi zuziliza iñolo, “Kakwina nanta chimwina ku zifuha za kwe chete chi cholwe.” <sup>37</sup> Hape, limwi iñolo liti, “Ka ba lole kwali iye u ba bahwezi.” <sup>38</sup> Ha kumana izi zintu Josefa wa Arimatea, sina ha ba li mulutwana wa Jesu (kono cha kuliungula ka lyowa ku Majuda) cha kumbila Pilato heba u wola kuhinda mubili wa Jesu. Pilato cha muha chibaka. Linu Josefa ni cheza ni kuhinda mubili wakwe. <sup>39</sup> Nekudema na ye cheza, u zo kumatangilo ya bezite kwa Jesu masiku. A baleti i maire i kopenywe ni incenka, cha buima busika ha mwanda wonke. <sup>40</sup> Linu chi bahinda mubili wa Jesu ni ku u zingelela mu majira a zi zabaloni mi nunkiso, si na haibali chizo cha Majuda cha kuzika zitupu. <sup>41</sup> Linu muchibaka umo mwa ba kankamizwe, kubena luwa lwa zibyalantu; mi mwelyo iwa lya zi byalantu ku bena ikumbu ihya umo musena mu beni ku ungwa muntu kale. <sup>42</sup> Kakuti i ba li izuba lye intukiso za Majuda mi ni kuti ikumbu li bena hafuhi, ni ba lazika Jesu mwa teni.

## Inkauhanyo 20

<sup>1</sup> Linu kuseni seni he zuba lya matangilo lye viiki, ha ku ba ku sisiha, Maria Magadalana cheza kwi kuumbu mi cha bona ibbwe ni li pindumunwa kuzwa kwi kuumbu. <sup>2</sup> Mi cha tiya ni kwiza kwa Simone Pitolosi ni ku ba lutwana bamwi abo Jesu ba ba kusuna, mi nati kubali, “Ba ba hindi Simwine kumu zwisa mwi ikuumbu, mi ka twizi uko ku baba ka mulaziki.” <sup>3</sup> Mi kuzwa aho Pitolosi ni zumwi mulutwana chi ba zwa kuyenda, mi chi ba yenda kwi ikuumbu. <sup>4</sup> Bonse chi ba tiya hamwina, mi zumwi mulutwana cha tiyaa ha busu kuhitilila Pitolosi mi ni ku sika wentanzi kwi ikuumbu. <sup>5</sup> Mi cha zunza mo cha bona majila a zi zwato na dansi hateni, kono kana abe njili mukati. <sup>6</sup> Simone Pitolosi ya ba shalile kwali cha sika mi cha yenda mwi ikuumbu. Cha bona majira a zizwato na dansi hateni, <sup>7</sup> mi ni jira li bena ku mutwi wa kwe. ka hena li ba dansi hamwina ni majira a zizwato kono liba bungeletwe ha ngi lyolyona. <sup>8</sup> Linu zumwi mu lutwana, iye ya ba tangi kusika kwi ikuumbu, naye che njila mukati, mi cha bona ni ku zumina. <sup>9</sup> Mi ku sikila ina i nako kana ba beni kwi ziba iñolo kuti mbwabuke ku zwa ku ba fwile. <sup>10</sup> Mi balutwana chi ba boola ku inzubo hape. <sup>11</sup> Kono Maria aba zimene hanze lye ikuumbu na silisa. Ha ba ku silisa bulyo, cha kotama ni ku zunza mwi ikuumbu. <sup>12</sup> Cha bona ma ngeloi obele

muzituba ne keele, limwi ku mutwi, limwi ku matende uko mubiliwa Jesu uba lele. <sup>13</sup> Chi bati kwali, “mwanakazi, cinzi ha usilisa?” cha wamba kubali, “Ka kuti ba hinda Simwine wangu, mi kanizi uko kuba mubika.” <sup>14</sup> Ha wamba ichi, cha chebuka mi cha bona Jesu na zimene hana, kono kana abezi kuti nji Jesu. <sup>15</sup> Jesu chati kwali, “Mwanakazi, chinzi ha u silisa? ukwete ku lola ni?” abali ku seza kuti mu loli we iwa, mi nati kwali, “Mutompehi, heba wa mu zwisa kunze, ni wa mbile ku wa mubika, mi munika mu zwise kwateni.” <sup>16</sup> Jesu nati kwali, “Maria.” Cha che buka, cha wamba kwali mu chi Aramaiki, “Rabboni,” (italusa: “Muluti.”) <sup>17</sup> Jesu nati kwali, “kanji uni kwati, ka kuti ka nini ku bola kwi wulu kwa Itayo, kono u yende ku ba mwangu mi ukate ku bali kuti muni ye kwi wulu kwa Tayo ni Itayo wako, kwe reeza wangu ni Ireeza wako.” <sup>18</sup> Maria Magadalena che za ni ku wambila ba lutwana, “Ni ba boni Simwine” mi ni kuti aba wambi izi ziintu kwali. <sup>19</sup> Ha chiibali citengu, ho luna lu zuba, izuba lye ntanzi lwe viiki, mi mi lyango ya mu babena ba lutwana, ibe ya litwe cha ku tiya Majuda, Jesu che za mi cha zimana mukati kabo mi chati ku bali, “i nkozo kwenu.” <sup>20</sup> Ha mana ku te chi, cha ba tondeza mayanza akwe ni mpaati yakwe. Mi ba lutwana haba bona Simwine, ba ba sangite. <sup>21</sup> Jesu kuzwaho cha wamba kubali hape, “i nkozo kwenu. Sina Itayo habani tumi, linu mu ni mi tumina.” <sup>22</sup> Jesu hamana ku ta ichi, na huzikiza ha bali mi nati kubali, “Mu tambule lu Huho lu Jolola. <sup>23</sup> Bonse ba mu wo ndola zibe, ba zi wo ndelwa; bonse ba zibe zi mukwete, zi si kwetwe.” <sup>24</sup> Tomasi, zumwi wabe kumi ni bobele, ya ba ku sumpwa Didimasi, kana bena nabo Jesu heza. <sup>25</sup> Bamwi ba lutwana ha ku mana chi ba mu cho, “Twa bona Simwine” Cha ba cho, “kwanda chi na bona mu mayanza akwe i bbata lya zi pikili, mi niku bika munwe mwi bbata lya zi pikili, ni ku bika i yanza lyangu mwi mpaati ya kwe, ke te ni zumine.” <sup>26</sup> Ha kumana mazuba akwana iyanza ni to tatwe ba lutwana bakwe ba bena mukati hape, Mi Tomasi a bena nabo. Jesu cheza milyango ni basi yalitwe, mi cha ziima mukati ka bo, mi chati, “inkozo kwenu.” <sup>27</sup> Mi cha ti kwa Tomasi, “u chune kunu ni munwe wako, u bone ma yanza angu, u chune kunu ni yanza lya ko, mi uli bike mwi mpaati yangu, kanji ubi yasa zumini, kono u zumine.” <sup>28</sup> Tomasi che taaba mi nati kwali, “Simwine wangu ni Ireeza wangu.” <sup>29</sup> Jesu na cho kwali, “kakuti wani bona, wa zumina. Ba fuyoletwe nja bo ba seni ku bona, mi ni bazumina.” <sup>30</sup> Linu Jesu cha tenda zi supo zimwi zingi mu ku bako kwa ba lutwana, zi supo zi seni kuñolwa mwe yi imbuka, <sup>31</sup> kono izi zi ba ñolwa mukuti mu zumine kuti Jesu nji Kerisite, mwana wa Ireeza, mi nji kuti ku zumina, ni mwaba ni buhalo mwi zina lya kwe.

## Inkauhanyo 21

<sup>1</sup> Haku mana izi zintu Jesu cha li bonekisa hape ku ba lutwana kwi iwate lya Tiberiasi. Bo buti mwa bali bonekisi: <sup>2</sup> Simone Pitulosi abena hamwina ni Tomasi yo sumpwa Didimasi, Nataniele uzwa mwa Kana wa Gagilea, bana ba chi swisu ba Zebedia, mi ni ba mwi ba lutwana bo bele ba Jesu. <sup>3</sup> Simone Pitulosi na ti kubali, “Ni kaya kuku yamba.” Ni ba ti kwali, “Iswe, naswe, mutwize na we.” Chi ba yenda ni kwi chila mu chisepe, kono kakwina chi baba kwati mu ma siku onse. <sup>4</sup> Linu, ha chibali kuseni kwa kaku sasana, Jesu cha zimana he lizo,

kono ba lutwana kahena ba bezi kuti ibali nji Jesu. <sup>5</sup> Mi Jesu cha ti ku bali, “Ba lombwana, mwina chimwi cha kulya?” chi ba mwi taaba, “Nee.” <sup>6</sup> Cha ti ku bali, “Mu so hele ka nyandi kenu kwi mbali yo bulyo bwa chisepe, mi kamu wane chi mwi.” Mi chi ba sohela kanyandi kabo, kono kena baba ku wola ku ka ya mbula che baka lye inswi zingi. <sup>7</sup> Linu mulutwana ya ba ku sunwa ahulu kwa Jesu nati kwa Pitolosi, “Nji Simwine.” Simone Pitolosi ha zuwa kuti nji Simwine, cha sumina chi zwato cha kwe cha hanze (mukuti kena a ba zwete), mi ni kuli sohela mwi iwate. <sup>8</sup> Ba mwi ba lutwana chi beza mu chisepe (mukuti ka hena ba bena kule ni mutunda, iba li zi bima zo bele ku kuzwa aho), mi ba bali ku kwita ka nyandi ke zwile inswi. <sup>9</sup> Linu haba zubuka ku ya ha mutunda, chi ba bona mulilo ho wa makala mi inswi ni ibikitwe hateni, ni chinkwe. <sup>10</sup> Jesu chata ku bali, “mulete ku zimwi inswi zi chi mwa kwaata.” <sup>11</sup> Simone Pitolosi linu cha yenda ko ni ku kwitila kanyandi ha mutunda, ke zwile inswi inkando; 153. Zi bali zingi tota, kono kanyandi kena kaba haluki. <sup>12</sup> Jusu nati kubali, mwize mi nje mulisuke,” ka kwina ku ba lutwana bakwe yaba bileli ni kumu buza, “nje weni?” Ba ba kwizi njeje Simwine, <sup>13</sup> Jesus cheza, cha hinda chinkwe, mi cha chi baha, mi ni nswi bulyo. <sup>14</sup> Ulu chi lubali lya bu tatu Jesu nali bonekisa mwine ku ba lutwana kuzwa ha bukila ku zwa ku ba fwile. <sup>15</sup> Ha ba mana kuli suka Jesu nati kwa Simone Pitolosi, “Simone mwana wa Johani, u ni suna kuhita aba?” Pitolosi chati kwali, “ee Simwine, wi zi kuti ni ku suna.” Jesu chati kwali, “Lisike i mbelele zangu, <sup>16</sup> Nacho kwali hape lwa bubeli, “Simoni mwana Johani, uni suna?” Pitolosi nati kwali, “ee simwine, wizi kuti niku suna.” Jesu nati kwali, “U ba balele i mbelele za ngu.” <sup>17</sup> Cha wamba kwali lwa butatu, “Simoni mwana wa Johani, uni suna?” Pitolosi aba wililwe ka kuti Jesu aba wambi kwali lwa bu tatu, “uni suna?” cha ti kwali, “Simwine, wizi zintu zonse, wizi kuti ni ku suna.” Jesu na cho kwali, “U lisike imbelele zangu. <sup>18</sup> Cha buniti, niti, nicho kwenu, ha mu ba kusili mu ba hwile, mu bali ku li zwatika mubene mi niku yenda konse ku mu bali kusaka, kono ha mu supala, ka mu na mulule mayanza enu mi zumwi mwa mi zwatike ni kumi twala kwe sete mu sake kuya.” <sup>19</sup> Linu Jesu na wamba ichi mukuti a bonise ka cheyo inzila ye fu iyo Pitolosi yete a tembe Ireeza. Ha mana ku wamba ichi, na cho kwa Pitolosi, “Ni chilile.” <sup>20</sup> Pitolosi cha che buka mi cha bona mulutwana uzo Jesu abali ku suna na be chilile; zuna yaba ku ze ndamina ha chizuba cha Jesu mwi nako yaku lalila zilyo mi nati, “Simwine, njeni uzo yete a ku beteke?” <sup>21</sup> Pitolosi cha mu bona mi chati kwa Jesu, “Simwine, chinzi chete a chite uzu mukwame?” <sup>22</sup> Jesu nati kwali, “Heba ni ni saka kuti ekale ku sikila hete ni bolele, chinzi che cho kwako? Ni chilile.” <sup>23</sup> Mi ichi chi wambo chi che zu lankana mu kati ka ba mwakwe, kuti kuti zuna mulutwana keti afwe. Kono Jesu kena ba ti kwa Pitolosi kuti zumwi mu lutwana keti cho fwa, kono, “Heba ni ni wamba kuti ekale ku sikila he te ni bolele, chi nzi icho kwako?” <sup>24</sup> Uzu nji mulutwana yo paka ka che zi zintu, mi ya ba ñoli izi zintu, mi twizi kuti ku paka kwa kwe kwe niti.” <sup>25</sup> Kwina zimwi zintu zingi Jesu za ba tendi. kambe chimwi ni chimwi chiba ñolwa hansi, Ni sepa kuti ni haibile inkanda yine niyesete niya wola kwi zula imbuka zete ni ziba ñolwa.

## Mitendo

<sup>1</sup> Imbuka inibañoli kale, Tiofliusi, ibawambi zonse zabatangi kutenda ni kuluta Jesu, <sup>2</sup> kutwala izuba lyabatambulwa kwiwulu. Ichi chibatendahali hamana kuha itaelo cha Luhuhu Lujolola kuba Apositola babaketi. <sup>3</sup> Kuzwa hakunyanda kwakwe, abalileti iye mwine nahala kubali ni bupaki buzuweka. Mumazuba achita makumi wone abalibonahazi kubali, mi abawambi ziamana ni mubuso we Ireeza. <sup>4</sup> Habali kulikopanya nabo, ababalaeli kuti kanji bazwi mwa Jerusalema, kono balindile insepiso ye Shetu, cheyo, nati, “Mubazuwi kwangu <sup>5</sup> kuti initi Johani abali kukolobeza ni menzi, kono inwe kamukolobezwe muLuhuhu luJolola mumazubazana akezite.” <sup>6</sup> Munako ibabakungene hamwina babamubuzi, “Simwine, iyi nji nako yeti nolete mubuso kwa Isilaele?” <sup>7</sup> Abawambi kubali, “kahena njikwenu kuti mwizibe inako kapa inkalulo yabatomi Tayo chamaata akwe. <sup>8</sup> Kono kamutambule inguzu, munako yaLuhuhu Lujolola heti nilwize hehulu lyenu, mi kamube impaki zangu monse mwa Jerusalema ni mwa Judeya ni Samaria, ni kutwala kumamanmani ekanda.” <sup>9</sup> Simwine Jesu hamana kuwamba izi zintu, nibalote kwilu, abatwalwa kwilu, mi ikope ni lyamuwunguli hamenso abo. <sup>10</sup> Habachitutubalile kwiwulu nakaya, hahobulyo, bakwame bobele babazimene hambali ni bazwete zituba. <sup>11</sup> Nibati, “Inwe mubakwame ba Galileya, chinzi hamuzimene aha ni mulolete kwiwulu? Uzu Jesu wayenda kwiwulu mwakabole munzila iswana sina mumwamubonena nakaya kwiwulu.” <sup>12</sup> Kuzwaho nibabola kwa Jerusalema kuzwa kwi Lundu la Olivi, lina hafwihi ni Jerusalema, musipili umana izuba Lesabata. <sup>13</sup> Habasika, nibatanta mumuzako wina kwiwulu, kubabali kwikala. Ibali nji Pitolosi, Johani, Jacobo, Andriasi, Filipi, Tomasi, Bartolome, Mateu, Jacobo mwana wa Alufeya, ni Simoni Zeloti, ni Juda mwana wa Jacobo. <sup>14</sup> Bonse babakopene kuba chintu chimwina, kuzwila habusu kulapela katata. Babena nabo ibali banakazi, Maria nyina Jesu, ni bache bakwe. <sup>15</sup> Mwawo mazuba Pitolosi abazimi mukati kabanakwabo, balikana bantu basika ha 120, mi nati, <sup>16</sup> Bakwetu, kuyezele kuti chiñoletwe chizuzilizwe, kotalusa kuti Luhuhu Lujolola lubawambi itanzi chakaholo ka Davida kuamana ni Judasi, yabaetelele babakasumini Jesu. <sup>17</sup> Mukuti ibali zumwi wetu mi abatambuli inkabelo yakwe yempo yelinu iluko.” <sup>18</sup> (Linu uzu mukwame abawuli luwa chentifo zabawani chabubilala bwakwe, mi haho natangisa kuwisa mutwi, mi mumili wakwe niwañatuka kwiyaluka, mi zamwibumo lyakwe zonse nizalongotoka. <sup>19</sup> Bonse babalikhala mwa Jerusalema babazuwi zateni, chobulyo babasumpi ulu luwa muchishobo chabo “Akeldama,” njikuti, “Luwa lwa Malaha.”) <sup>20</sup> Mukuti kuñoletwe mumbuka ya Lisamu, 'Musiye luwa lwakwe lube lusinyehete, mi kanji musiyi nanga muntu umwina kuhala mo'; 'Muleke zumwi ahinde chitulo chabuyenzi bwakwe.' <sup>21</sup> Chobulyo, kusakahala kuti umwina wa bakwame yabali kuyendanga naswe inako yonse Simwine Jesu habali kuyendanga mukati ketu, <sup>22</sup> kukatangila hakolobezwa kwa Johani kuya kwizuba lyabazwiswa kwetu, utameha kuba impaki hamwina naswe

kuamana nikubuka kwakwe kubafu.”<sup>23</sup> Babaleti habusu bakwame bobele, Josefa yosumpwa Barsabasi, yabali kusumpwa hape kuti nji Justusi, ni Matias.<sup>24</sup> Babalapeli nibati, “Iwe, Simwine, wizi inkulo zabantu bonse, chobulyo wizibahaze kuti njeni mukati kaba bobele yobaketi.<sup>25</sup> kuhinda chibaka mweli ikolo ni buapositola waba choli Judasi kuya kuchibaka chakwe,”<sup>26</sup> Babauli; mi idaula zibawili ha Mateu mi ababikwa hepalo yamuapostola wekumi ni wumwina.

## Inkauhayo 2

<sup>1</sup> Cwale izuva lya Pentecositi haliza, vonse vavena muchi baka chiswana. <sup>2</sup> Mwinako yonke chikweza mulumo uzwa kwi wulu uvu luhuho lye mbembwe lukando, mi chilweza kwizula inzuvo yonse iyo ivavali kwikere. <sup>3</sup> Chikweza kuvonahala kuvali malimi aswana uvu muliro uvali kukauhanywa, mi chiweza kuzimana hewulu lyo zumwi ni zumwi wavo. <sup>4</sup> Vonso vave zuziwa Luhuhu luNjolola mi chivatanga kuwamba mumishovo imwi, sina Luhuhu lu Jolola mulubali kuva hera kuti vawambe. <sup>5</sup> Linu kubena Majunda vavali kwikala mwa Jerusalem, vakwame vavalumeri, ku zwirila kwikanda zonse zomwi konde lye wulu, <sup>6</sup> Uwu mulumo hauzuweka, chisi chivakezi hamwina mivavali kulyangene kakuli zumwi ni zumwiavali kuva zuwire chiba wambulula mumushovo wakwe. <sup>7</sup> Vavali ku komokwete ni mbemuka; chiva wamba, “Luli, kena kuti vonse aba bakwete kuwamba Magalireya? <sup>8</sup> Chinzi hakuchita kuti tuva zuwa, zumwi ni zumwi mumishovo yentu ituva zalirwa mwayo? <sup>9</sup> Patiani ni Medesi ni Elamitesi, ni vamwi vavali kuhala mwa Mesopotamiya, mwa Judeya ni Cappadocia, mwa Pontusi ni Asia, <sup>10</sup> mwa Phygia ni Pamphylia, mwa Egepita ni muzibaka zimwi za Libiya kuama Cyrene, ni vapoti vavali kukazwa kwa Roma, <sup>11</sup> Majunda ni maProselite, Cretanisi ni ma Arambu, tuva zuwa niva wambira mumi shovo yetu kuamana ni misevezi mikando ye Ireeza.” <sup>12</sup> Vavali kukomoketwe vonse ni kuchanama; chavati kuzumwi ni zumwi, “Kanti ichi chitalusa nzi?” <sup>13</sup> Kono bamwi chiva sheununa ni kuti, “Vakoletwe i waine ihya,” <sup>14</sup> Kono Pitorosi chazimana nivena ikumi lyamaza overe ni yenke, cha katula linzwi lyakwe ni kuti kuvali, “Vantu vamwa Judeya nanwe mwense mwikala mwa Jerusalem, muzumine ichi chiziveke kwenu; mutekereze hande kumanzwi angu. <sup>15</sup> Kakuti ava vantu kava koletwe iwaine sina mumu hupulera, sina haili vulyo inanko ya kakusasani ke zuva. <sup>16</sup> Kono ichi jichona chiva wambitwe nji mupolofita Joele: <sup>17</sup> 'Kaive vulyo muma zuva okumamanikizo; Ireeza uti, 'Kani tire hasi Luhuhu lwangu kuvantu vonse. Vaana venu ve chikwame ni ve chanakazi kava porofite, balombwana benu kava vone impono, mi vasupali benu vechi kwame kava lote ziloto. <sup>18</sup> Ni hewulu lyaba hikana vangu mwao mazuva kanitire hasi luhuho lwangu, mi kava porofite. <sup>19</sup> Kani vonise imakzo mwi wulu kuhitirila ni zisupo mwi nkanda hanshi, malaha, ni muliro, ni vunsi mwibyubyulu. <sup>20</sup> Inzuva kali sandunke ka sikwe mi mwezi kuvoneka uvu malaha, pilio izuva ikando litiza lya Simwine nili seni kusika. <sup>21</sup> Kaive kuti yense yo supra he zina lya Simwine kahanzwe'. <sup>22</sup> Vantu va Isiraele, muzuwe aa manzwi: Jesu wa Nazareta, mukwame wava misepise kwenu Ireeza che zisupo zikando ni makazo ni zikomokisa izo Ireeza ava pang'i chali mukati

kenu, sina inwe muvene hamwizi-<sup>23</sup> chevaka lya mulelo u kolete ni kwizibahaza ni iseni kusika inako yakwe Ireeza, a vatambikiwa, mi inwe, cha manza abakwame basezi mulao, chiva mukokotera ni ku mwihaya;<sup>24</sup> iye Ireeza ava muvusi, hamana ku sumununa ku chinsa kwefu kwali, kakuli kena kuvali kuwoleka kuti a kwatwe kulili ifu.<sup>25</sup> Kakuli Davida ava wambi kuyamana naye, 'Ni va voni Simwine havusu bwangu, kakuti wikere kwimbali lye yanza lyangu lyachilinso iri kuti kanji ni nyangayiswa kamba kushimbululwa.<sup>26</sup> Linu hanu inkulo yangu ivali kusangitwe mi lulimilwangu chi lwa yakalala. Hape, muvili wangu kawikale musepo.<sup>27</sup> Kakuti kokafwe kusiya luhuho lwangu muvafwire, kamba kuzuminina wako yo Jolola kuti avone kuvola.<sup>28</sup> Uvavonahazi kwangu inzira zovuhalo; koni pange kuti nizule kusangwa che chi fateho chako.'<sup>29</sup> Vanakwetu, Ni wola kumiwambira cho vundume kuamana ni mupatirita Davida: uzo hape ava fwi ni kuzikiwa mi ikumbu lyakwe lisikere naswe ni sunu linu.<sup>30</sup> Cwalehe, avali muporofita mi avezi kuti Ireeza avali nkonki kwali cho kulisumina vuitamo kwali, kuti kazimike zumwi wavane hachi pura chovulena bwakwe.<sup>31</sup> Avatangi kuvona izi ni kutanga kuwamba kuama ni kuvuka kuva fwire kwa Keresite, 'Kena avazibalwa niku kungirwa muviri wakwe kukuvola.'<sup>32</sup> Uzu Jesu- Ireeza ava muvusi, aho twense twipanki.<sup>33</sup> Cwale hacha mana kumuvusa nikuka muvika kwiyanza lyakwe lyo kuchiliso lyaIreeza mi hachitu tambwire isepiso yo Luhuho lu Jolola luzwa kwa Tayo, abe tiri hansi inzi, zimubwene ni kuzuwa.<sup>34</sup> Linu Davinda kena ava kambamini kwi wulu, kono uwamba, 'Simwine ava wambi kwa Simwine wangu, Wikale kwiyanza lyangu lye chiliso,<sup>35</sup> kusikira hasana kani pangire nzira zako kuva malyatiro a mantende ako.'" <sup>36</sup> Hakuva vulyo, musiye inzubo ya Isiraele yonse izive handede kuti Ireeza ava mupangi hape kuva Simwine ni Keresite, uzu Jesu umuva nkankamizi."<sup>37</sup> Linu hachi vazuwa inzi, vava chisiwa mwi nkulo zavo, ni kuwamba kwa Pitorosi ni kuva lutwana vonse, nikuti, "Bakwetu, mutu pange nzi?" <sup>38</sup> Mi Pitorosi cha nti kuvali, "" Muvakire zivi zenu mi mukolovezwe, zumwi ni zumwi wenu, mwizina lya Jesu Keresite iri kuti zivi zenu ziwonderwe, mi mumu amuhere impo yo Luhuho lu Jolola.<sup>39</sup> Ka kuti kwenu nji kuherwe insepiso ni kuvana venu ni kuvantu vonse vana vena kule, sina vantuvangi vonse vasana kasumpe Ireeza."<sup>40</sup> Nicha ziwambo zingi cha paka nikuva kumbira; na nti, "Muli haze kuzwa kolu lusika luvilala."<sup>41</sup> Mi chiva tambula manzwi akwe mi chiva kolovezwa, mi kuva yekezwa mwelina inzuva valikana 3000 vantu kuvali.<sup>42</sup> Chi vazwira havunsu ni tunto zavaapositola ni kulapera hamwina, ni muku cholola chikwa ni mwi tapero.<sup>43</sup> Lyowa chilyeza hewulu lya Vantu vonse, mi zisupo zingi ni makazo ziva pangiwa kuva Apositola.<sup>44</sup> Vonse vavazumini vavali kwina hamwina mi vavalikwina zintu ziswana mumi hupulo,<sup>45</sup> mi vava uzi zibya zabo zi vavali kukwete ni kuyavira ku vonse, kuyenderela ni muvali kusaka halira kuzumwi no zumwi.<sup>46</sup> Cwale izuva ne zuva vavali ku zwira havusu ni muhupulo umwina mwi tempere, mi vavali kuchola chinkwa muma zuvo, mi vavali kuyavira zilyo cho kusangwa ni kukwatisana mwi nkulo;<sup>47</sup> vava rumbi Ireeza ni kuhewa chisemo kuvantu vonse, Mi Simwine avali kuyekeza kuvali inzuva nezuya avo vavali kusikuluha.



## Inkauhayo 3

<sup>1</sup> Linu Pitrosi ni Joani vavakuya kuyenda kwi Tempele mwinako ya milapelo, mwinako yavutantu. <sup>2</sup> Mukwame zumwi, yavali chihole kumatende, Avaku nyemunwanga nakalalikwa hamu lyango we Tempele, uvakusupwa mulutu. ilikuti akumbile itunso kuvatu vava kuya mwi Tempele, <sup>3</sup> chinga bona Pitrosi ni Joani chivasaka kwinjira mwi Tempele, chakumbila intuso. <sup>4</sup> Pitrosi, nicha muluvukila nimenso akwe, ni Johani, chati, 'Lole kwetu.' <sup>5</sup> Mukwame wechihole chava lola, nalitukiseze kutambula chimwi kuvali. <sup>6</sup> Linu Pitrosi chati, "Tsillivera ni gauda kani zikwete, kono chitukwete, mutuchikuhe. Mwizina Iya Jesu Kereste, Yende." <sup>7</sup> Pitrosi nicha mukwata kwiyaza Iya chilyo, niku munyemuna mwiwulu, inako ininizana matende ningongo chiza tambula ziho, <sup>8</sup> Chatanga kuchukuta mwiwulu, mukwame wachihole nicha zimana nikutanga kuyenda; Linu niche njila ne Pitrosi ne Joani mwi Tempele, naka buyenda, nachukuta, nikutemba Ireeza. <sup>9</sup> Bantu vonse nichiva muvona naka vutemba Ireeza. <sup>10</sup> Nicha valemuha kuti njiyena mukwame wilanga natambula itunso ha Vuluntu bwa mulyango we Tempele; bavezwile kumakala ni kukomokwa chizi chiva pangahali kwali. <sup>11</sup> Linu havali kukwatilile kwa Pitrosi ni Joani, Bantu vonse nichu vantilila hamwina kuvali muchivaka chisumpwa Solomoni, niva komoketwe ahulu. <sup>12</sup> Pitrosi havona ichi, chive tava vantu, "Nikuti inwe vantu va Isiraele, chinzi hamukomokwa? Chinzi hamu lolelera kwetu bulyo, uvu jenswe twamuleta kuti awole kuyenda cheziho zetu kamba chovu laperi bwetu?" <sup>13</sup> Ireeza wa Amrahama, ni wa Isaka, niwa Jakovo, Ireeza uve sukwezwetu, wakuteka muhikana wakwe Jesu. Jiyena yenke umuba tambiki ni kukana havusu bwa Pilato, Hacha vali kusaka kumu lukukulula kuti aliyendeze. <sup>14</sup> Mubakani yo Jolola ni Kuluka yenke, imi chimwa kumbira kuhewa mwihayi kuti a lukululwe ni kuhewa kwenu. <sup>15</sup> Muve hayi Mukwaye wo vuhalo, uzo Ireeza ava vusi kuva fwire - imi twi mpanki bechi chivapangahali. <sup>16</sup> Linu, che tumero mwi zina Iyakwe - uzu mukwame umubwene ni kwiziba - ili izina liswana Iyamu koza. Itumero ina cha Jesu yaha kwali kuhozwa kuyenderele muvusu bwenu mwense. <sup>17</sup> Linu, basakiwa, Nizi kuti muva pangi chokuseziba, uvu muvava pangiri vayendisi venu. <sup>18</sup> Kono zintu inzo Ireeza ava wambi kuvusu cha kaholo kava porofita vonse, kuti uzu Keresite uswanera kunyanda, hanumchave zuzirizi. <sup>19</sup> Muvake, cwale he, mi musanduke, iri kuti zivi zenu ziwole kuzwiswa kwenu, iri kuti kuwole kwiza inko zo kuli joloza kuzwamhavusu bwa Ireeza; <sup>20</sup> mi kuti na tumine Keresite yava keterwa inwe, Jesu. <sup>21</sup> Jiyena yenke Iwulu liswanera kutambula kusikira inako yo kuvozekezwa kwezitu zonse, kuamana nezo Ireeza ava wambi kale chatuholo twava porofita bakwe va jolola. <sup>22</sup> Mushe chovuniti avati, "Simwine wetu Ireeza kavuse mukati kenu muporofita yo swana name. Kamu teke zintu zonse zasana kawambe kwenu. <sup>23</sup> Kakupangahale kuti muntu yense yasana kakane kuteka uzo muporofita ke hayiwe kuzwiswa kuvantu vakwe." <sup>24</sup> Eni, mi vonse Vaporofita kuzwa kwa Samuere navo vavakezi muma sule akwe, vavezi kuwamba nikwiza kwi zivahaza aya mazuva. <sup>25</sup> Inwe muvana vamaPorofita mi nive chilikani icho Ireeza avapangi nive sukuzwenu, sina mwavateri kwa Amrahama, 'Mulusika Iwako jimona masika onse e

ikanda ka afuyaulwe.' <sup>26</sup> Kasumulaho Ireeza hacha zimikite muhikana wakwe, ava mutumini kwenu chetanzi, iri kuti awole kumi fuyola cho sundukira kuzumwi ni zumwi kumuzwisa kuvuvi bwakwe."

## Inkauhanyo ya 4

<sup>1</sup> Ba Pitrosi ni Johani ha va bakwete kuwamba kuvantu, bapurisita ni induna we tempele ni basaduki ni chivasika kuvali. <sup>2</sup> ba va kukatazehete chevaka lya Pitrosi ni Johana va vakuruta bantu mi va bakuwamba za kuvuka kwa Jesu kuzwilila kuvafwile. <sup>3</sup> Ba va basumini mi va vavika mwitolongo kuhitila kakusasana lichilila chakuti chivali chitengu. <sup>4</sup> Kono bungi bwa vantu bavazuwi iñusa lya ba bazumini; mi inombolo za vakwame va babazumini zi va kusika muzikiti zikwanisa iyanza. <sup>5</sup> I bezi buti mwizuva licilila, chakuti manduna bavo, bakulwana ni bañoli ba va kungene mwa Jerusalema. <sup>6</sup> Annas muprisita mukando, ni Kayafa, ni Johani, ni Alexandere na vonse bakwavo va muprisita mukando. <sup>7</sup> Ha va kaleta va Pitrosi ni Johana mukati kavo, ni chibaba vuza, "Cha maata ani, kapa chezina lyani, ha muchita ezi?" <sup>8</sup> Linu Pitrosi, ne zwile Luhuhu Lujolola, ni chawamba kuvali, "Manduna ba vabantu, ni bakulwana, <sup>9</sup> haiva iswe sinu mwikalile kutubuza chakuya cha musevezi mulutu wo tuvapangi kumuntu yo lwala -mi chenzila ihi uzu muntu a vaholi? <sup>10</sup> Chinu chiswanela kwizibwa kwenu ni kuvantu vonse va Isilaele, chakuti chezina la Jesu wa Nazareta, uzo ye muvakokoteli, uzo Ireeza a va muvusi kuvafwile - Nji kwakwe u zu mukwame hazimene aha havusu bwenu na liketete. <sup>11</sup> Jesu Keresite ibwe inwe muvazaki le muvanyansi kono livapangwa mutomo we mota. <sup>12</sup> ka kwina impulsu cha muntu zumwi; chakuti kakwina izina limwi mwikonde lye ulu, li vahewa muntu zumwi, ilyo lituswanelwa kuhazwa." <sup>13</sup> Linu cwale hachi vabwene vundume bwa Pitorosi ni Johani, ni kulemuha kuti avali vantu vulyo vasana vavalitutite, vava komokwa, cho kwiza kulemuha kuti Pitorosi ni Johani vavena ni Jesu. <sup>14</sup> Kakuli vava voni mukwame yava hozwa na zimene navo, kakwina chimwi chivava woli kuwamba kuamana nechi. <sup>15</sup> Kono hachi vamana kulaya ba Apositola kuzwa mumu kopano wavo, chiva tanga kuwamba mukati kavo vene. <sup>16</sup> Chivati, "Mutupange vule kwava vakwame? Cho vuniti vokuti imakazo ivoneka yapangahala chavo iziveka kuzumwi ni zumwi wikala mwa Jerusalema; katuwoli kuisampula. <sup>17</sup> Kono iri kuti kanji iyambuluki mukati kavantu, twende tuva kalimere kanji vawambi kuzumwi ni zumwi mweli izina." <sup>18</sup> Chiva sumpa Pitorosi ni Johani kwiza mukati ni vaha itayero kuti kanji bawambi hape kamba kuruta hape che zina lya Jesu. <sup>19</sup> Kono Pitorosi ni Johani chivali tavirila ni kuwamba kuvali, "Kamba kulukite mumenso a Ireeza kuti tuzuwe inwe isiñi iye, mu atule. <sup>20</sup> Kakuli katuwoli kulihaza kukuwamba kuyamana nezi zintu zituba voni ni kuzuwa." <sup>21</sup> Kasumulaho o kuva kalimera ahulu Pitorosi ni Johani, chivava siya nivaliyendeza. Kena vava wani ivaka liva wola kuva nyansa chalyo kuti vavahe inkoto, kakuli vantu vonse vavali kulumba Ireeza kwi makazo iva pangahali. <sup>22</sup> Mukwame ava tambuli iyi imakazo yo kuzwa chavali we zirimo zilikana makumi one ni kuhitirila kukuzalwa. <sup>23</sup> Hachiya mana kuva lukulula, Pitorosi ni Johani chiveza kuvantu vavo ni kwiza kuva

wambira zonse inzo vakulwana vamaPurisita zivaka va wambira ni manduna ve tempere zivava wambi. <sup>24</sup> Hachi va zuwa ichi, chiva katula manzwi avo hamwina kwa Ireeza ni kiuwamba, “” Simwine, iwe uva vumbi mawulu ni kanda ni wate, ne zina zonse zina mwa teni, <sup>25</sup> Inwe cho Luhuhu lu Jolola, cho kaholo ka tayo Davida muhikana wako, ava cho, “” Chinzi inkanda za machava hava lwa, ni maswaniso a sena ituso? <sup>26</sup> Basimwine va hanshi va balikunganyi hamwina, ni bayendisi ba vakopani hamwina kulwisa Simwine, ni kulwisa Keresite wakwe; <sup>27</sup> Cheniti, bonse Heroda ni Ponse Pilato, hamwina ni va chisi ni vantu va Isilaele, va bakopani hamwina mumuleneñi uwo kulwisa muhikana wako Jesu, iye yo va iketeli. <sup>28</sup> Ba vakopani hamwina kuchita zonse izo ni mayanza ako ni maikuto ako zi vahupulwi pili kuti kazichitahale. <sup>29</sup> Linu, Simwine, lole kumifumbo yabo mi uhe mwihikana wako kuwamba inzwi lyako cha kukola. <sup>30</sup> chakuti ha cha namulula iyanza lyako mukuholisa, iponiso ni imakazo ziva kuchitahala che zina la muhikana wako yo jolola Jesu.” <sup>31</sup> Ha chi bamana kulapela, chivaka ha vakopanela hamwina chi va zikinyehi, mi vonse ni chebezuzwa cha Luhuhu Lujolola, mmi va bakuwamba inzi la reeza cha kukola. <sup>32</sup> Inombolo inkando ya vo ba bazumini ba vena chenkulo yonke ni luhulo: mi kakwina zumwi wa bo ya vakuwamba chimwi chamunite kuti luli njichakwe; nihakwinavulyo, ba vena zintu zonse chakuswana. <sup>33</sup> Cha maata makando bapositola ba ba kuwamba ze va baboni kuamana ni nzuho ya Simwine Jesu, mi chisemo chikando chivena heulu lyabo. <sup>34</sup> Kakwina muntu mukati kavo ya va bulite chimwi chintu, kwavo vavali kuluwite ivu ini kamba mazuvo zana vava a uzi ni kuleta mali e zintu zivava uzi. <sup>35</sup> ni kwiza kuavika ha mantende'. Mi vantu babahewa kwavo vavali kuzumine, cho kuya zumwi ni zumwi mwavali kusakira. <sup>36</sup> Josefa, yavali Mulevi, mukwame yavali kuzwa kwa Cyprusi, ava hewa inzina lya Banabansi kuva Apositola( iri kuti, chikutolokiwa, mwana wu susuweza). <sup>37</sup> Chokuva newa, chali wuza ni kuleta mashereñi niwiza kuavika hamatende ava apostola.

## Inkauhanyo ya 5

<sup>1</sup> Lyahanu mukwame zumwi yo sumpwa Ananiyasi, ni Safira mwi-hyabwe, babauzi imbali ye zintu zabo, <sup>2</sup> Nabika imbali imwi yeshiliñi ibauzwa (mwihyabwe naye avakwizi), ni kuka leta onse avashali kumatende ava Apositola. <sup>3</sup> Linu Pitorosi nati, “Ananiyasi, cinzi Satani hezula munkulo yako ku chenga Luhuhu lu Jolola kupata imwi isheleñi ya muulo wa chisi chako? <sup>4</sup> Hachisena chiveni kuwuziwa, kana chivali njichako? Linu hachi mana kuuziwa, kana chivasina muyedisio yako? uva zezete vuti chezi zintu munkulo yako?” Kana uva chengi muntu, kono kwa Ireeza. <sup>5</sup> Mu kuzuwa aa maanzwi, Ananiyasi nawa hanshi niku huza lwa ma manimani. Kutiya kukando nikwezila vonse vava zuwi izo zintu. <sup>6</sup> Baswisu niveza kumu vungila mwi sila, ni kumu nyamuna ni kukamuunga. <sup>7</sup> Haku hita inhola zotatwe, mwihyabwe cheza kwinjira, nasezivite chiva tendahali. <sup>8</sup> Pitulosi nacho kwali, “Uni wambile kuti inkanda yenu mwa iwulisa cheyi inteko? “Nati “ee, cheyi inteko.” <sup>9</sup> Linu Pitulosi nati kwali, “Muva zuminzani vule ku lika luhuhu lwa Simwine? Lole, “Matende a vaka unga mwihiyenu ena hamulyango, imi njete vakunyamune nawe.” <sup>10</sup> Haho vulyo chawira

hansi ha matende akwe, niku huza lwa mamanimani, imi vaswisu havenjira nikumu wana ufwile; chiva munyamuna, nikuka muunga hembali ni mwihiyabwe. <sup>11</sup> Kutiya kukando nikweza he nkereke yonse, ni heulu lya vonse vava zuwi izi zintu. <sup>12</sup> Imboniso zingi ni makazo zivali ku chitahala mukati ka vantu cha mayanza avapositola. Vavena vonse mu malibera a Salumoni. <sup>13</sup> Imi kakwina niyava ku wola ku lipapata kuli kopanya navo; nikuva vulyo, vava ku tembwa ahulu ku vantu. <sup>14</sup> Nikuva vulyo balumeri vangi vavakusi wera kwa Simwine, ikunga lya bakwame ni vaanakazi, <sup>15</sup> chovulyo vava ku letanga va lwala mumigwagwa niku va lazika ha mimbeta ni muzipura, kuti Pitolosi cha hita, munzunde wakwe mu uwole ku wila havamwi vavo. <sup>16</sup> Nikweza hamwina impalo inkando ya vantu bazwa kumatoropo mwa Jerusalema, kuleta valwala navo vava vulumukiswa inhuho zisa jololi, imi vonse vava hozwa. <sup>17</sup> Kono mupurisita yo hanzi na ziimana, nivonse vavena naye (chikwata chava Saduki); imi nive zula muna <sup>18</sup> Niva viika mayanza havapositola, ni ku va vika mu ntorongo ya vantu. <sup>19</sup> Masiku Iñeloi lya Ireeza chilyeza kwi yalula milyango ye nJORONGO niku vazwisa hanze, ni kuvati. <sup>20</sup> Muyende, muka zime mwi tempere, niku wamba ku bantu vonse manzwi avuhalo.” <sup>21</sup> Hava zuwa izi, nivenjira mwi tempere musihalizana niku ruta. Kono mupurisita yo hanzi cheza, navo vavena naye, niku supa inkuta hamwina, ni vonse bakulwana vavantu va Isiraere, ni kuva tumina kuntorongo kuka leeta vapositola. <sup>22</sup> Kono vakapaso vava yendi kana vavakava wani muntorongo, ni vaka vola ni kwiza ku viha, <sup>23</sup> “Twaka wana intorongo iyalitwe siinte ni ba ganteli ba zimene hamulyango, kono hatwa iyalula, kakwina itwa wana mukati.” <sup>24</sup> Linu muyendisi wa mwi tempere ni mupurisita mukulwana hava zuwa aa maanzwi, ciba ziyeleha chavo ni chiwola kuzwa mwateni. <sup>25</sup> Linu zumwi neza kuva wambila, “Vakwame vamu va vikite muntorongo vazimeene mwi tempere niva ruta vaantu.” <sup>26</sup> Linu muyendisi chayenda ni vakapaso, niku kavavoza, kono nikusena vulwisi, mukuti vava tite kuti vaantu pona chivava pwacoola cha mavwe. <sup>27</sup> Hava kava leta, chivava leta havusu vwe nkuta. Mupurisita yo hanzi nava vuzola impuzo, <sup>28</sup> nacho, “Tumi ha mulandu wa kusa ruta mweli zina, imi, chimwe zusa Jerusalema ni ntuto zenu, niku tavera ku leta malaha ozu mukwame hetu.” <sup>29</sup> Kono Pitolosi ni vapositola nivetaba, “Tulukera ku kuteka Ireeza insinyi vaantu. <sup>30</sup> Ireeza uveshetu ava kuzi Jesu, imuve hayi ni kumu hanzika hesamu. <sup>31</sup> Ireeza ava mukuzikizi kwi yanza lyakwe lya chilyo kuva mwaana' simwine ni muhazi, kuha kuliwamba zivi kwa Isiraere, niku kwatila zivi. <sup>32</sup> Tu mpaki zezi zintu, imi ni luhuho lu Jolola, ulo lwavahi kwavo vamu kuteka.” <sup>33</sup> Lyahanu inkuta hai zuwa izi. Vava vengi nikusaka kwi haya vaapositola. <sup>34</sup> Kono mufalisi yava kusupwa Gamaliele, muruti wa mulao, yava kukutekwa ku vantu vonse, chazima niku laera vaapositola ku zwila hanze kaninizana. <sup>35</sup> Linu chati kuvali, “Vakwame valsiraele, Mutwalize minahano kuchimusaka kutenda kwava vaantu. <sup>36</sup> Chenako ya kumasule, Teudiyasi avavuki nalibboka kuvaumwi, imi impalo yavakwame, valikana myanda yoone, nivenjila kwali. Nehaiwa, nivonse vavali kumu kuteka vava hasanywa ni kusa vachimwi. <sup>37</sup> Kuzwa kozo mukwame, Judasi wa Galileya navuka

mumazuva achipalo nikuhindikisa vamwi vaantu mwisule lyaankwe. Naye chehaililwa, nivonse vakumu kuteka vava hasanywa. <sup>38</sup> Hanu ni mi wambila, muzwe kwava makwame, ni kuva siya vovona, ilikuti uwu muzezo kapa mutendo wa vaantu, muulyatililwe. <sup>39</sup> Kono heba wa Ireeza, kete muwole ku u lyatilila, mu wola kuli wana kuti chi mu kwete mulwisa Ireeza.” Imi chiva susuwezwa. <sup>40</sup> Linu ni va supila vaapositola mukati, nikuva kavoola ni kuva hambiliza kusa kawamba mwi zina lya Jesu, ni vava siya kuti vayende. <sup>41</sup> Chiva siya inkuta niva tabuluhite mukuti vavavalilwe kuku nyandisizwa che Izina. <sup>42</sup> Kuzwaho chezuva, mwi tempere ni chenzubo, ninzuvo, vava ku lutirire ni kutaza Jesu kuva Keresite.

## Inkauhanyo 6

<sup>1</sup> Lyahanu mwaanu mazuva, linu impalo ya valutwana haiva kukabwinjiha, impiraero ya Magerike va Majuda chiyatanga Kulwisa Maheveru, kakuti imberwa zavo zivali kuketululwa mwizuva ni zuva lya kuholiswa kwa zilyo. <sup>2</sup> Vena ikumi ni vovele chivasupi chinavungi cha varutwana kuvali ni kuti, “kakwina hande kwetu kuti tusiye liinzwi lye Ireeza niku taha he ntafule. <sup>3</sup> Mu swanera lyahanu kuketa, vakwaluzuvo, bakwame vakwana iyanza ni vovere mukatikenu, bakwame vene vuhalo vulotu, ve zwile luhuho ni vutali. Avo watuwola kuketa mwei impisinisi. <sup>4</sup> Haili iswe, katuzwire havusu mwi intapero ni mukukutaza liinzwi.” <sup>5</sup> Zi wambo zavo ziva tavisi chinavungi chonse. Linu chivaketa Sitefani, mukwame yowizwire intumelo ni Luhuho Lujolola, ni Filipi, ni Porokoras, ni Nikonora, ni Timoni, ni Parmemasi, ni Nikolasi muprositelite yozwa kwa Antiyoke. <sup>6</sup> Varumeri vavaleti ava vakwame havusu vwa vapositola, vava lapeli ni ku tula mayanza avo havali. <sup>7</sup> Chovulyo linzwi lya Ireeza liva weli; imi impalo ya varutwana ivayekezehi mwa Jerusarema nikuhitiliza; mi impalo yingi ya vapurisita ivakezi kukuteka intumelo. <sup>8</sup> Lyahanu Sitefani, avezwile chisemo ni maata, ava kupanga inkezo zikomokisa ni imboniso mukati kavaantu. <sup>9</sup> Kono chikweza kuzimana vantu wa wila kumasinagoge asumpwa masinagoge alukuluhite, va kwa Serina ni Alexandriya, nivamwi vazwa kwa Silicia ni Asia. Ava vaantu vava kukandekisana ni Sitefani. <sup>10</sup> Kono kana vava kuwola kuzimana kulwisanisa vutali ni Luhuho ulu lwa vakuwamba chalo Sitefani. <sup>11</sup> Linu che inkunutu chiva susuweza vamwi vakwame kuwamba, “Twazuwa Sitefani na wamba maanzwi akunyefula Mushe ni Ireeza.” <sup>12</sup> Vava vengisi vaantu, vakulwana, ni vañoli, mi chiva yenda kwa Sitefani, ni kumukaheeka, ni kumuleeta kunkuta. <sup>13</sup> Vava leti impaki zamapa, vava wambi, “Uzu mukwame kaleki kuwamba maanzwi alwisanisa chivaka chichena ni mulao. <sup>14</sup> Kakuti tuvamuzuwi nawamba kuti Jesu wa Nazareta usaka kushinya ichi chivaka ni ku chincha milawo yavaleti Mushe hansi kwetu.” <sup>15</sup> Vaantu vonse vavekele munkuta vava twalite menso avo kwali mi chivavona chifateho chakwe ni chikola ili chifateho che Iñeloi.

## Inkauhanyo 7

<sup>1</sup> Mu prista mukulwana chacho, “izi zintu zeniti?” <sup>2</sup> sitefana chacho, “va nchizyangu ni ve shangu, muteke kwangu: Ireeza we nkanya ava voneki kwe shetu Abrahama hava kwina mwa mesopotamia,

naseni ku kekala kwa haran; <sup>3</sup> chacho kwali, 'siye inkanda yako ni mahasi yako, mi uyende mu nkanda yete ni kutondeze.' <sup>4</sup> Cha siya inkanda ya makaladani niku ke kala kwa karani; kuzwaho, hava fwili isi, Ireeza cha muleta mweyi inkanda, mumuhala hanu. <sup>5</sup> kakwina chavahi kwali chokuyola, ne, kena chivali chikando kuti alyate itende hateni. kono ava sepisi- nanga aho Abrahama kena aveni kuva kale mwana-ilikuti ahinde inkanda kuva chiluvo chakwe ni lusika lwakwe kuzwa kwali. <sup>6</sup> Ireeza avali kuwamba kwali vuti, ishika lyakwe mulikahale inako zana mwi nkanda isali yayo, mi vene ve nkanda vaka va vike muvuhikana niku va nyandisa ke mianda yone. <sup>7</sup> imi muni atule inkanda mwete vakave vahikana; chawamba Ireeza; mi chizamanezo kavazwe mwateni nikuni lapela mwechi chivaka; <sup>8</sup> mi avahi Abrahama chilikani cho mupato, cwale Abrahama cheza kuva isi wa Isaka niku mutwala ku mupato kamazuva amana iyanza ni tunwe to tatwe. Isaka cheza kuva isi wa Jakovo, mi Jacovo isi wa vana ve kumi nivo vele. <sup>9</sup> Vayendi vava susuwezwe cho muuna kwineku Iya Josefa mi chiva muwuza kwa Egepita, mi Ireeza ava kwina naye, <sup>10</sup> mi chamulukulula ku manyando akwe onse, nikumuha chisemo ni butali havusu bwa Pharaoh, mulena wa Egepita. Pharaoh chamupanga ngambela mwa Egepita ni mwinzuvo yakwe yonse. <sup>11</sup> Linu aho chikweza inzala monse mwa Egepita ni kanana, Ni manyando makando mi veshetu kena vavawani zilyo. <sup>12</sup> Kono jakovo hazuwa kuti kwina mundale mwa Egepita cha tumina veshetu va veshetu che ntanzi. <sup>13</sup> cho uvveli Josefa chalivonahaza ku vakwame; mi mahasi a Josefa chiveza kwi ziveka kwa Pharaoh. <sup>14</sup> Josefa cha vona vamukulwe kuti vakasumpe Jamusi isi wakwe kwiza kwa Egepita, ni mahasi akwe onse, makumi amana iyanza ni makumi ovele ni vantu va mana iyanza. <sup>15</sup> Cwale Jakovo chayenda mwa Egepita; cha kafwa, iye ni vasukulu va vasukulu. <sup>16</sup> Vava twalwa kwa shecham nikuka lazikwa mwi vita ilyo Abrahama lyavawuli ke ntenko mwa silivela ni vana va hamor mwa shecham. <sup>17</sup> Sina inako ye nsepiso hachiyina hafuhi, insepiso yava pangi Ireeza kwa Abrahama, vantu vava kuli niku hweza mwa Egepita, <sup>18</sup> haisi hakuva kezi zumwi Simwine mwa Egepita, uzu murena yasena va kwizi chintu kuamana ni Josefa. <sup>19</sup> Murena yoswana uzu ava chengeleli vantu niku nyandisi va sukulu vave sukulu, vavahi vana vavo kwi nkozi niva hupula kuti kavahale. <sup>20</sup> Keyo inako Mushe ava pepwa, sekeli mulotu havusu bwe ireeza, mi ava kuvikitwe mwi nzuvo ivesi cha mwezi yo tatwe. <sup>21</sup> hava ku vikitwe hanze, mwana Pharaoh ava muañuli niku mulela sina njiwakwe. <sup>22</sup> Mushe ava kwina inzivo mwintuto zonse za Egepita; mi avana ziho mu manzwi ni mumitendo. <sup>23</sup> kono hachavali kuchutile kuzilimo ze kumi zone, chiya keza munkulo yakwe kuti akapotele va mukulwakwe, vaana va isilaele. <sup>24</sup> kuvona mu isilaele na sikululwa, Mushe chamu lamulela ni ku vozekeza yava ku lwisa isilaele: <sup>25</sup> Ava kutele kuti va mukulwe kava zuwisise kuti Ireeza che yanza lyakwe ava kuva haza, kono kena vava zuwisisi. <sup>26</sup> Izuva lyitatama cheza kuvamwi ma Isilaele vavakwete kupanga inkani; avaliki kuva vika mwinkozo hamwina; chacho; vakwame, muva kwaluzuvo, chinzi hamu lizuwisa kuchisa?' <sup>27</sup> kono yava fosekezi zumwi chamu timba, nikucho,' yava kupangi muyendisi ni muatuli hewulu lyetu? <sup>28</sup> kana usaka kunihaya,

sina movehaili ma Egepita izona? <sup>29</sup> Mushe chatiya hamana kuzuwa izi; cheza kuva muyendi mwinkanda ya midian, uko kwavavi isi wa vaana vo vele. <sup>30</sup> zilimo ze kumi yone hazihita, iñiloi chilyeza kuli vonahaza mwihalaupa lya mount sinayi, mu mulilo mukando muka zuka. <sup>31</sup> Mushe ha vona mulilo, cha komoka ha vona izo; mi hava ku chunine kuka vona izo, chikweza inzwi lye Ireeza, kuwamba, <sup>32</sup> njime Ireeza wa veshako, Ireeza wa Abrahama, niwa Isaka, niwa Jakovo,' Mushe cha chachalika mi kena va liki ku lola. <sup>33</sup> Ireeza cha wamba kwali, 'chupule insangu zako, kaho chivaka cho zimene hachili chivaka chi jolola. <sup>34</sup> Niva voni luli manyando avantu vangu se vena mwa Egepita; niva zuwi intongosi zavo, mi niva kezi kwiza kuva haza; cwale wize, kani ku tume kwa Egepita.' <sup>35</sup> Uzu Mushe uvava kani, havava wambi,' njeni yava kupangi muyendisi ni muatuli?' - njeye Ireeza yava tumi kuva zonse muyendisi ni mulukululi. Ireeza ava mutumi ke yanza lye ñiloyi lyiva voneki kwa Mushe muka zuka. <sup>36</sup> Mushe chava zwisa mwa Egepita, hamana kupanga imakazo ni zisupo mwa Egepita mi nikwiwate lyempi, mi nimwihalaupa ke zilimo zimana makumi one. <sup>37</sup> Nji Mushe yoswana yava wambi kuvantu va Isilaele,' Ireeza ka vuse mu polofita wenu mukati kava mukulwenu, mupolofita ya swana neme.' <sup>38</sup> Uzu nji mukwame yava kwina muchikwata mwi halaupa ne ñiloyi lyiva wambi naye kwi rundu lya sinai. Uzu njimukwame yava kwina niva sukulu vava sukulu; uzu njimukwame yava amuheli manzwi ahala zwiza kutuha. <sup>39</sup> Uzu nji mukwame uzo va sukulu vava sukulu vava kani kwichilila; vava mutandili kule navo, mi mwinkulo zavo vava voli kwa Egepita. <sup>40</sup> Keyo inako chiva wamba kwa Aruni,' Tupangile va zimu vete va tuyendise. haili kuzu Mushe, yava tuzwisi mwinkanda ya Egepita, katwizi chapangahala kwali.' <sup>41</sup> Cwale chiva panga iñombe mwao mazuva nikuleta chitavelo kwecho chizimu, niku tava cho musevezi wa mayanza yavo. <sup>42</sup> Kono Ireeza cha sanduka niku va siya kuti va lapele inkani mwiwulu, sina mwiñolelwemwi mbuka ya mapolofita,' kana muva nihi iñombe ni chitavelo ke zilimo zimana makumi one mwi halaupa, inzuvo ya Isilaele? <sup>43</sup> muva zumini i tabernakele ya moleki ni nkani ze zimu rafani, nizi vupiwa zi muvapanji kuti muzilapele: Mikani mihinde kwi mihitiliza kwa babilona.' <sup>44</sup> Va sukulu vava sukulu sevena itabernaka yo vupaki yo mwihalaupa, Sina Ireeza mwava laeli hava kuwamba ni Mushe, kuti aipange sina chivupeho chava voni. <sup>45</sup> Ichi njichintu va sukulu va vasukulu, mwinzila yavo, kuleta munkanda ni Joshuwa. Ichi chiva pangahali havavezi kwinjila nikuluwa mwinkanda izo Ireeza zava zwisi havusu bwava sukulu vava sukulu. Ivakwina vulyo mbwita mu mazuva a Davida, <sup>46</sup> yava wani chisemo mumenso a Ireeza; ava kumbili kuwana chivaka chamekalo cha Ireeza wa Jakovo. <sup>47</sup> Kono Solomoni ava zakili Ireeza izuvo. <sup>48</sup> Nihakuva bulyo, yohanzi kekali mumazuvo okuzaka ni, mayanza; iswana sina mupolofita ha wamba, <sup>49</sup> Iwulu chihuna changu, mi ifasi malyatilo amatende angu. Inzuvonzi yowola kuni zakila? Simwine uwamba: kapa chivaka chamapumulelo angu chinahi? <sup>50</sup> kena kuti iyanza lyangu lyipangi izi zintu zonse?' <sup>51</sup> Inwe vantu va zuminine insingo nive inkulo zi sena mumupato ni matwi, mukaninanga Luho Lujolola; mupanga sina muvava kupangira va sukulu vava sukulwenu. <sup>52</sup> Njeni kuva porofita va sukulu vava

sukulwenu isena uvavanyandisi? vavehayi maporofita vava voneki ku matangiro okukeza kuyo jolola; mi hanu chimweza kuva vaveteki ni vehayi vakwe nemwe, <sup>53</sup> Inwe vantu muva amuheli milao ivatangwa ku mañiloyi, kono kena muva ichilili.” <sup>54</sup> Linu va kwame ve nkuta hava zuwa izi zintu, vava fundwa kwinkulo, chiva suma meeno avo kwa sitefani. <sup>55</sup> Kono iye, kakwizula luho lu jolala, chalolelela kwi wulu chokutokomela mi chavona inkanya ye Ireeza; mi chavona Jesu na zimene kwiyanza lya chilyiso lye Ireeza. <sup>56</sup> Sitefani chawamba, “lole, nibwene mawulu eyalukite, mi mwana muntu uzimene kwiyanza lye chiliso lye Ireeza.” <sup>57</sup> Kono ve nkuta chiva huweleza mwinzwi lyikando, nikwiyalala matwi avo niku muhwelela hamwina vonse; <sup>58</sup> vava muzindiri hanze yo muleneñi nikumu pwachola: mi impaki chiza zala zi zwato zavo za hanze ha matende a muswisu wa muhwile yo supwa Saule. <sup>59</sup> havavali kupwachola sitefani, avazwili havusu kusumpa kwa Simwine ni kuwamba,” Simwine Jesu, tambule luho lwangu.” <sup>60</sup> Cha kuvama hansi niku huwa ke linzwi ikando, “Simwine, kanji ukwati ichi chivi kuvali.” hacha mana kuwamba izi, chalala.

## Ikauhanyo 8

<sup>1</sup> Saule avena mukuzuminzana ni ifu lya kwe. Imi kuzwa yelyo izuva chikwazwa kunyandiswa ahulu kwe kerenke ivena mwa Jerusalema; imi vavazumini vose vava hasa neri muzi vaka za Judeya ni Samariya, mbwita vulyo va apositola. <sup>2</sup> Vakwame vavazumini ni kusepahala vava ziki Sitefani ni kumulira ahulu. <sup>3</sup> Kono Saule ava nyandisi ahulu inkerenke; ava kuyenda mwi nzuvo ni nzuvo ni kuzwisa mo vakwame ni vanakazi, ni kuba vika mutorongo. <sup>4</sup> Kono vava zumini vavali kuhasane chiva yenda ni va kutaza linzwi. <sup>5</sup> Filipi ava yendi kumuleñi wa Samariya ni kuka kutaza kuvali za Keresite. <sup>6</sup> Chinavungi chavantu havazuwa ni kuvona zisupo zava pangi Filipi, vava tekerezi ahulu hamwina kuza vali kuwamba. <sup>7</sup> Imi ku vantu vangi vava zizuwi, ihuho zisa chenete zibazwi hanze cho muhuwo mukando; ni vangi vava zuminine luñañali ni ziyanga vonse vava hozwa. <sup>8</sup> Mi kuvena ahulu kusangwa muwuna muleneñi. <sup>9</sup> Kono kuvena mukwame zumwi mowu muleneñi yavali kusupwa Simoni, uzo yavali kupanganga mabivo kumatangiro; avali ku komasanga ahulu vantu va mwa Samariya, lyinu avali kulihinda kuva muntu yo tompeha. <sup>10</sup> Vonse vena Samariya, kuzwa kumunini ni kumukando, vavali kumuteka ahulu; vava wambi, “Uzu mukwame je ziho ze Ireeza zi supwa vukando”. <sup>11</sup> Vava tekereze kwali, kakuti avali kuva komosa ahulu che nako inde ni mavivo a kwe. <sup>12</sup> Kono aho hachi vazumine izo zavava kutazi Filipi kuyamana ni evangeli yo muvuso we Ireeza ni zina lya Jesu keresite, vava kolovezwa, vonse vanakazi ni vakwame. <sup>13</sup> Imi ni Simoni naye vulyo ava zumini: hacha mana ku kolovezwa, cha zwira havusu ni va ni Filipi; hacha vona imakazo ni mitendo ni ipangiwa, ava komokiswa ahulu. <sup>14</sup> Linu haveza kuzuwa va apositola mwa Jerusalema kuti vena Samariya vava tambuli linzwi lye Ireeza, chiva tumina kuvali Pitorosi ni Johani. <sup>15</sup> Hachiva shetumukere kuvali, chiveza kuva laperera, kuti vawole ku tambula Luhuhu Lunjolola. <sup>16</sup> Kakuti bwita heyo inako, Luhuhu Lunjolola kena luveni kukeza hewulu lyavo; vavali kukolovezwe vulyo mwi zina lya Simwine Jesu.



<sup>17</sup> Linu Pitorosi ni Johani chiva vavika mayaza avo hewulu lyavo, mi chiva tambula Luhuhu Lunjolola. <sup>18</sup> Linu Simoni hacha vona kuti Luhuhu Lunjolola luva hewa cho kuvikiwa cho kuvikiwa cha' mayaza, ava apositola chava newira ishereñi. <sup>19</sup> Cha wamba, “Munihe izi ziho, name, iri kuti yense uni kambika manyanza hali a tambule Luhuhu lunjolola.” <sup>20</sup> Kono Pitorosi chata kwali, “I silivera yanko i sinyehe nawe, kakuti u hupula kuwana impo ze Ireeza cha mashereñi. <sup>21</sup> kawina chiyemba chimwi mwezi zintu, kakuti inkulo yanko kayina hande ni Ireeza. <sup>22</sup> Cwale he uvake kovu vuvi bwako, mi ulapere kwa Simwine, iri kuti mwendi mwa wondere kumi nahano ye nkulo yanko. <sup>23</sup> Kakuti ni kubwene kuti wina chifanu chovu vengi ni mumawenge e chivi. <sup>24</sup> Simoni cha mwitava ni kumuti, “Uni laperere kwa Simwine, iri kuti zonse zintu ziwa wamba kanji zipangahali kwangu.” <sup>25</sup> Aho Pitorosi ni Johani haci vamana kuwamba linzwi lya Simwine, chiva vola kwa Jerusalema; mwinzira, vavali kukutaza evangeri mumenzi mingi ya mwa Samariya. <sup>26</sup> Hanu iñiroyi lya Simwine chiya wamba kwa Filipi ni kuti, “Katuke ni kuyenda kwa mbowera kwi nzira iya kuku shetumukera kuzwa kwa Jerusalema kuya kwa Gaza.” ( Iyi nzira ina mwi halaupa.) <sup>27</sup> Ava katuki ni kuyenda. Muvone, kuvena mukwame youzwa kwa Etopiya, chikombwa cho muyendisi mukando Cadesi, mulena wa Etopiya. Avali muvavaleli we chifumu chakwe chose. Avali kwizite kwa Jerusalema kuku laperera. <sup>28</sup> Chavali kuvola mi ave kere mwi kochikara ya kwe, mi avali kuya vuvala mwi vuka yo muporofita Isaya. <sup>29</sup> Luhuhu chilwa ti kwa Filipi, “Yende kwali mi wi kale hafuhi ni kochikara yakwe.” <sup>30</sup> Linu Filipi cha tilira kwali, ni kumuzuwa na vala Isaya muporofita, ni kuti, “Mane uzuwisisa cho kwete kuvala?” <sup>31</sup> Mu Esopiya chati, “Niwola vule, mwendi zumwi ani tondeze?” Ava kumbiri Filipi kwiza kwi chira naye mwi kochikara ni kwi kala naye. <sup>32</sup> Linu vuvali vwe ñolo lyavali kuya vuvala mu Esopiya avali ili, “Avali twaliwa uvu imberere kukwi hayiwa; mi uvu imbere havusu i totwere havusu bwa funwayo, ka zasumuni kaholo kakwe: <sup>33</sup> muma sukuluko a kwe i katulo yakwe iva zwiswa kwali: Jeni yata wambe lusika lwakwe? vuhalo bwakwe vuva hindwa hansu.” <sup>34</sup> Linu mu Enuke cha vuza Filipi, “Ni kukumbira, jini yavali kuwamba muporofita? avali kuwamba iye mwine, kamba avali kuwamba zumwi muntu?” <sup>35</sup> Filipi cha tanga kuwamba; ava tangi neli iñolo mwa Isaya kukutaza kuyamana ni Jesu kwa li. <sup>36</sup> Sina ha vavali kuya vuyenda munzira, vava kezi ha menzi; mu Enuke chati, “Vone, hena menzi hanu; chizi chini kanina kuku kolovezwa?” <sup>37</sup> Linu mu Etopiya cha laya i kochikara ku zimana. <sup>38</sup> Chiva yenda hasi mumezi, bonse Filipi ni muenuki, imi Filipi cha mukoloveza. <sup>39</sup> Hava zuvuka hanze ya menzi, Luhuhu lwa Simwine chi lwa hinda Filipi; mu enuki kena ava muvoni hape, mi ava yendi mwi nzira yakwe na sangitwe. <sup>40</sup> Kono Filipi ava ka voneki kwa Azotusi. A vakayendi mwe zina zikiriti ni kukutaza Ivangeri kumi leneñi yonse, mbwita hakasika kwa Caseriya.

## Inkauhanyo ya 9

<sup>1</sup> Kono Saule, usiwamba zokutiza ni kwihaya balutwana ba Simwine, cha yenda ku mupurisita mukulwana <sup>2</sup> ni kuka kumbila mañolo ama Sinagoge mwa Damaseka, ili kuti chawana babakuwila mweyo inzila,

kapa mukwame kapa mwanakazi, pona chokabaleta niba suminwe kwa Jerusalema. <sup>3</sup> Haba kukabuyenda, kuba tendahali kuti heza kusika hembali ni Damaseka, hahobulyo chikweza kuboneka iseli lingi libakuzwa mwiwulu; <sup>4</sup> mi chawila hansi ni kuzuwa linzwi liwamba kwali, “Saule, Saule, chinzi ho ni nyandisa?” <sup>5</sup> Saule chetaba, “njewe ni, Simwine?” Simwine chati, “Njeme Jesu yokwete kunyandisa; <sup>6</sup> kono zime, winjile mu muleneñi, mi mowambilwe zo swanela kutenda.” <sup>7</sup> Bakwame baba kuyenda ni Saule chiba zima nikubula maanzwi, ni bazuwile linzwi, kono ni basabwene muntu. <sup>8</sup> Saule chabuka hansi, mi heyalula menso akwe, kakwina chabakubona; chiba mukwata kwiyanza niku muleta mwa Damaseka. <sup>9</sup> Abahindi mazuba otatwe nasaboni, mi kena aba kulya ni kunywa. <sup>10</sup> Linu Kubena mulutwana mwa Damaseka yaba kusumpwa Aneniyasi; mi Simwine aba wambi kwali chempono, “Aneniyasi.” cha wamba, “Bone, ime zunu, Simwine.” <sup>11</sup> Simwine cha wamba kwali, “Zime, uyende mwi kululu lisumpwa Kuotoloka, mi kwi nzubo ya Judasi buze mukwame yozwa kwa Tarese yosumpwa Saule; yokwete kulapela; <sup>12</sup> mi ababoni impono mukwame yaba ku sumpwa Aneniyasi nakeza kwali kwiza kumubika maanza, ilikuti atambule kubona kwakwe.” <sup>13</sup> Kono Aneniyasi chetaba, “Simwine, ni bazuwi kubangi kuamana nozu mukwame, inkolofalo isika hayi yabatendi kubantu bako bajolola mwa Jerusalema. <sup>14</sup> Wina maata azwa ku mukulwana wa maprisita ku sumina bonse kunu ba sumpa he zina lyako.” <sup>15</sup> Kono Simwine chawamba kwali, “Yende, mi uzu uketetwe kuba chisebeliso changu, kuhinda izina lyangu habusu bwa chisi chingi ni malena ni bana ba Isilaele; <sup>16</sup> mi kani mutondeze mwete a sukulukile chebaka lye zina lwangu.” <sup>17</sup> Cwale Aneniyasi chayenda, ni kwinjila munzuvo. Kuka muvika maanza hakwe, chati, “Mukwangu Saule, Simwine Jesu, yaba boneki kwako he nzila hamuba kukeza, wakanituma ili kuti zo tambule kubona kwako mi wizule luho lu jolola.” <sup>18</sup> Hahobulyo zintu zikola maamba zibawi mumenso a Saule, mi chatambula kubona kwakwe, aba zimi ni kukolobezwa; <sup>19</sup> abali nikuwana ziho. Abekali ni balutwana mwa Damaseka chamazuba alikene. <sup>20</sup> Haho chaha bupaki bwa Jesu muma Sinagoge, nata kuti uzo mwana wa Ireeza. <sup>21</sup> Bonse baba zuwi baba komokwa ni kuwamba, “kanjiyena uzu mukwame yaba sinyi abo mwa Jerusalema baba kusumpa heli zina? mi abakezi kunu ili kuti abalete zeba suminwe kumu kulwana wa maprisita.” <sup>22</sup> Kono Saule abezi kwinjihilwa ziho, aba leti filikana mukati ka ma Juda baba kuhala mwa Damaseka chakutondeza kuti Jesu ni Keresite. <sup>23</sup> Hakuhita mazuba mangi, ma Juda chibalela hamwina kuti bamwihaye. <sup>24</sup> Kono mulelo wabo chiwezibeka kwa Saule. Baba kugantela milyango musihali ni masiku ilikuti bamwihaye. <sup>25</sup> Kono balutwana bakwe baba muhindi masiku kumushilsa imota, shetumwina muchitanda. <sup>26</sup> Hakeza kusika mwa Jerusalema, Saule abaliki kukopana ni balutwana, kono bonse baba kumutiya, nibasa zumina kuti mulutwana. <sup>27</sup> Kono Barnabasi abamuhindi ni kumutwala ku bapositola. Mi Chaba wambila mwaba boneni Saule Simwine he nzila ni kuti kuti Simwine aba wambi naye, ni kwa Damaseka Saule mwa bakutazi chakusatiya mwizina lya Jesu. <sup>28</sup> Aba kopani nabo hababa kukeza ni kuzwa mwa Jerusalema. Abawambi chakusatiya mwi zina lya Simwine Jesu <sup>29</sup> aba wambolisani

ni ma Gerike bama Juda; kono baba zwili habusu ni kulika kusaka kumwihaya. <sup>30</sup> Linu baakwetu habeziba izi, chiba mulate hansi kwa Sesaria nikumu tumina kwa Tarese. <sup>31</sup> Cwale linu, Inkeleke zonse mwa Judea, Galilea, ni Samaria babena inkozo imi ibazakite; ni, kuyenda niba tiite Simwine ni mukuombwa-ombwa kwa luhuhu lu jolola, inkeleke chiza yekezeha chabungi. <sup>32</sup> Linu kubezi tendahali kuti, Pitrosi haba kukabuyenda muchikiliti chonse, aba kezi kuba lumeli baba kuhala mwi tolopo ya Lida. <sup>33</sup> Uko abakawani mukwame zumi wezina lya Enea, yabena kabulo bwakwe chezilimo zilimo zimane iyanza ni zotatwe, aba kuzuminine luñañali. <sup>34</sup> Pitrosi chati kwali, “Enea, Jesu Kereste waku hoza. Buke mi uzale bulobwako.” hahobulyo cha zimana. <sup>35</sup> cwale bonse baba kuhala mwa Lida ni mwa Saroni bababoni mukwame ni ba sandukila kwa Simwine. <sup>36</sup> Linu mwa Jopa kubena mulutwana ya ba kusumpwa Tabita, itoloketwe kuti “Dorkasi.” Uzu mwanakazi abezwile mitendo milotu ni zitendantu zizwile chishemo zaba pangili bahumanehi. <sup>37</sup> kubezi kauba kuti mwawo mazuba kuti abezi kulwala ni kufwa; hachi babamanite kumushanza, baba mulaziki munzubo yokwiwulu. <sup>38</sup> Sina Lida haiba kwina hembali ni Jopa, mi balutwana babazuwi kuti Pitrosi kwabakwina, chibatumina bakwame bobele kwali, kumu kumbila kuti, “Wize kwetu nikusena kuliyeha.” <sup>39</sup> Pitrosi chazimana ni kuyenda nabo. Hakasika, chibamutwala kwi nzubo ya kwiwulu. Mi imbelwa zonse ziba kuzimine kwimbali yakwe ni zilila, niba mutondeza majansi nizi zizwato zababa pangi Dorkasi nasina nebo. <sup>40</sup> Pitrosi chaba zwisikiza bonse hanze ye nzubo, cha fukama, ni kulapela; haho, cha sandukila kumubili, chawamba, “Tabita, buke.” Che yalula menso akwe, mi habona Pitrosi che kala. <sup>41</sup> Pitrosi linuchamuha iyanza lyakwe ni kumu zimanika; mi hasumpa balumeli ni mbelwa, abamuleti na hala kubali. <sup>42</sup> Iyi indaba chiyezibeka ahulu mwaJopa yonse, imi bantu bangi baba zumini kwa Simwine. <sup>43</sup> Kubazi kuba kuti Pitrosi abekali mazuba mangi mwaJopa ni mukwame yosumpwa Simoni, yaba kusuka madalo.

## Inkauhanyo ya 10

<sup>1</sup> Linu kubena mukwame ya ba kuhala mu muleneñi wa Sesalia, Kornile che zina, mukulwana wa Masole yi ba kusumpwa Italiya. <sup>2</sup> I bali mukwame, zumwi ya bakulapela Ireeza ni be nzubo yakwe; aba hi masheleñi mangi ku bantu ba Majuda mi inako yonse a bakulapela Ireeza. <sup>3</sup> Chi ku ba kuatumela inako ya bulobañwi ye zuba, a ba boni hande mumpono iñeloi lye Ireeza nilikeza kwali. Iñeloi ni lyati kwali, “Kornele;” <sup>4</sup> Kornele ni chadunamena iñeloi imi abatite hahulu ni chati, “Chinzi fumwangu?” Iñeloi ni lyati kwali, “Intapelo zako ni mpo zako kuba saliwaneli ziba yendi kwiwulu sina kuzeza za chitabelo che Ireeza. <sup>5</sup> Linu utume bakwame ku muleneñi wa Jopa kukaleta mukwame we zina lya Simone yo sumpwa Pitrosi. <sup>6</sup> Wikele ni yo suha madalo yo sumpwa Simoni, uzo inzubo yakwe yina hembali yelizo lyewate.” <sup>7</sup> Linu iñeloi liba kuwamba kwali ni chilyayenda, Kornele ni cha sumpa bahikana bobele benzubo yakwe, ne sole liba kulapela Ireeza mukati kamasole nabo babali kumusebeleza. <sup>8</sup> Kornele ni cha bawambila zonse zintu ziba chitahali mi ni chabatuma kwa Jopa. <sup>9</sup> Linu mwizuba lichilila chibakuatumela inako ya busilela, sina

hababena mumusipili wabo mi babena hafuhi ni muleneñi, Pitrosi ni chayenda kunzubo ya kwiulu kuka lapela. <sup>10</sup> Mi haho ni chafwa inzala mi ni chasaka chimwi chintu cha kulya, kono bantu babakwete kwihika zilyo, ni cha hewa impono, <sup>11</sup> linu na bona iwulu nili yaluka ni chibya chimi chi bakuswana sina ijira ikando li ba kusuuka hansi, ne liiza cha makona one. <sup>12</sup> Mulili kubena mifuta yonse ya zinyoloji zina matende one ni zimwi zintu zi kokoba hansi, ni zizuni za mwiulu. <sup>13</sup> 'Linu Inzwi ni lya wamba kwali. "Buuke, Pitrosi, wi haye mi ulye." <sup>14</sup> Kono Pitrosi nati, "Kahena njo bulyo; Simwine; Chokuti kena ni bali chimwi chi sajolwele ni china ikwe." <sup>15</sup> Kono inzwi ni lyeza kwali hape lwa bubeli: "Cha bajoloji Ireeza, kanji uchisumpi kusa jolola." <sup>16</sup> Izi zibatendahali totatwe; linu chibya hahobulyo ni chabozwa kwiwulu. <sup>17</sup> Linu Pitrosi haba kuchi lyangene kuamana ni impono ya baboni kuti italusanzi, mubone, bakwame babatumwa kwa Kornele ba bazimene kumulyango, habamana kubuza inzila yabo iya kunzubo. mi ni chibasumpa ni kubuza kapa Simoni, Ya ba kusumpwa hape kuti nji Pitrosi <sup>18</sup> Imi ni vahuweleza Simone, yava ku sumpwa Pitrosi, kwa ba kuikala. <sup>19</sup> Pitrosi ha ba sikwete kuhupula kuamana ni impono, Luhuhu ni lwa wamba kwali, "Bone, bakwame botatwe bakwete bakulola. <sup>20</sup> Uzimane mi uyende hansi mi uyende nabo. Kanji uhakanyehi ku yenda nabo, kakuti naba tuma," <sup>21</sup> Cwale Pitrosi ni chayenda hansi ku bakwame imi ni chati, "Ime zunu ye mukwete kusaka. Chinzi ha mwakeza?" <sup>22</sup> Ni chibati, "Mulauli wa masole wezina lya Kornele, mukwame yo lukite mi yo lapela Ireeza, imi uwambwa kunkanda ya Majuda, aba wambilwa kwi ifneloi lijolola lye Ireeza kutuminwa kwako kuti uyende kunzubo yakwe, ili kuti akateke kumulaezo uzwa kwako." <sup>23</sup> Linu Pitrosi chabamema kuti benjile mukati ze bekale naye. Izuba lichilila ni chazima ni kuyenda nabo, imi ni bamwi bakwame bazwa mwa Jopa ni chi bamusindikiza. <sup>24</sup> Izuba lichilila ba bakezi kwa Sesarea. Kornile a babalindile, a basumpi hamwina bazalwa ni bo ni balikani bakwe. <sup>25</sup> Kubezi kutendahala kuti linu Pitrosi chengila, Kornele ni cha musanganya imi abafukami hamatende akwe ku mulapela. <sup>26</sup> Kono Pitrosi chamutusa, nawamba, "Zime! name bulyo ni muntu." <sup>27</sup> Haho Pitrosi aba kuwamba naye, ni chayenda mukati mi ni chawana bantu bangi ne bakungene hamwina. <sup>28</sup> Ni chati kubali, "Inwe mubene mwizi kuti kahena mulao kuti muntu wa Majuda a li kopanye kapa apotela zumwi yozwelela kumushobo ungi. Kono Ireeza a banitondezi kuti kanji ni sumpi muntu zuhi no zuhi kuti kajolwele. <sup>29</sup> Nji bakalyo ha na keza kusena kukanana, ha ni batuminwa. Linu ni mibuza chinzi ha mwa ni tumina." <sup>30</sup> Kornele ni chati, "Mazuba one abamani chehola iswana na yoyi, Ni bakulapela, chehola yabulobanwi munzubo yangu; mi ni chinabona, mukwame na zimene habusu bwangu muzizwato zibenya. <sup>31</sup> Ni chati, 'Kornele, intapelo yako iba zuweki kwe Ireeza, imi impo zako kubabotana zi ba zezisi Ireeza kuamana na we. <sup>32</sup> Linu, utume muntu kwa Jopa, aka kusumpile mukwame we zina lya Simone yo supwa Pitrosi. <sup>33</sup> Wikala munzubo ya yo suha madalo wezina lya Simone, wikala hafuhi ni mbali lyewate. <sup>34</sup> Linu Pitrosi che yalula kaholo kakwe mi ni chati, "Cheniti, ni lemuha kuti Ireeza kahindi zumwi che nketululo. <sup>35</sup> Chobulyo, Mu mushobo ni mushobo ni zumwi ni zumwi yo lumbeka

ni kuchita inkezo zilukite u amuhelwa kwali. <sup>36</sup> Mwizi iñusa lya batumine kubantu ba Isilaele, haba lemusa ze iñusa lye inzwi iloto kuamana ni nkono chakuya cha Jesu Kreste, ili iye Simwine wa bonse - <sup>37</sup> inwe mubene mwizi ikezo zi bachitahali, ziba tendahali munkanda yonse ya Judeya, kutangila mwa Galileya, kuzwa ku nkolobezo ya balemusi Joani; <sup>38</sup> inkezo ziamana ni Jesu wa Nazareta, ka mo Ireeza mwaba musingili oli cha Moya ujolola ni cha maata. Aba yendi kuamana ni kuchita bulotu ni kuhoza bonse ba bakakatizwe kwa diabulosi, kokuti Ireeza abena naye. <sup>39</sup> Tumpaki ya zintu zonseza ba tendi munkanda zonse za Majuda ni mwa Jerusalema - uzu Jesu iye ye babehai, kumuhanzika ha chikuni. <sup>40</sup> Uzu mukwame uzo Ireeza a bamubusi mwizuba la butatu ni kumuha kuti ezibekane, <sup>41</sup> isiñi kubantu bonse, kono ku mpaki ziba ketwa kumatangilo che Ireeza-iswe tubene, babalyi, ni kuñywa naye amana kubuka kubafwile. <sup>42</sup> Aba tulaeli kukutaza ku bantu ni kupaka kuti uzu njiyena ybva ketwa kwe Ireeza ku va muatuli wabahala ni bafwile. <sup>43</sup> Njikwakwe kuti ba polofita bonse babe impaki, kokuti yense yo zumina kwali a tambule inswalelo ya zive che zina lya kwe.” <sup>44</sup> Haho Pitrosi nasikwete kuwamba izi zintu, Luhuhu Lujolola ni lwa wila ku zumwi ni zumwi kwabo baba kutekeleze kwi ñusa lyakwe. <sup>45</sup> Bantu baba kuwila ku chikwata chi wila kumupato ilichikwata chizumine- Bonse abo babakezi ni Pitrosi- babakomoketwe, mukuti impo ya Luhuhu Lujola lbetilwa vulyo niku chisi chingi. <sup>46</sup> Mukuti, babazuwi aba basiangi, ni bawamba cha mishobo ingi ni kulumbeka Ireeza. <sup>47</sup> Linu Pitrosi ni chetaba, “Kana kwinazumwi uwola kukanisa menzi kwabo bantu kuti kanji ba kolobezwa, aba bantu ba ba amuheli Luhuhu Lunjola sina motubatendeli swe?” <sup>48</sup> Linu naba laela kuti ba kolobezwe mwi zina lya Jesu krete. Ni ba mukumbila kwi kala nabo chamazuba mangizana.

## Inkauhanyo ya 11

<sup>1</sup> Linu bapositola niba mwabo ba bena mwa Judeya chibazuwa kuti ba Sikunze chibatambula inzwi lye Ireeza. <sup>2</sup> Linu Pitrosi hakeza kwa Jerusalema, abo bena muchikwata chamupato chiba munyansa; <sup>3</sup> Chibati. “Ubali kopanyi ni bakwame basena mupato ni kulya nabo!” <sup>4</sup> Kono Pitrosi chatanga kubatolokela chakwizula; 'chati, <sup>5</sup> Nibali kulapela mu muleneñi wa Joppa, imi chinaba ni pono yachintu chikeza hansi, sina isila ikando likeza hansi kuzwa kwiwulu lina tukokolwa tonee. Chichakeza kwangu. <sup>6</sup> China chilolisisa ni kuchizezisa. Chinabona zinyolozi za matende onne zamu inkanda, zibatana, ziyendisa mabumo, ni zizuni za mwiwulu. <sup>7</sup> Linu china zuwa inzwi liwamba kwangu, “zimane, Pitrosi; wihaye mi ulye!” <sup>8</sup> Chinati, “nee; Nanta kanjobulyo, Simwine: kakwina chintu chisachenete kapa china chive chisenjili mukaholo kangu.” <sup>9</sup> Kono izwi chilyetaba kuzwilila kwiwulu, “Chalukulula Ireeza chijolola sanzi ucho kuti chinekwe.” <sup>10</sup> Izi zibatendahali totatwe, imi linu zintu zonse chizabozwa kwiwulu hape. <sup>11</sup> Kamulole, hahanu kwina bakwame botatwe bazimene habusu bwe zubo hatwina; ba bakatumitwe kwa Caesarea kwiza kwangu. <sup>12</sup> Luhuhu Lujolola Iwanilaela kuti ni yende nabo, imi sanzi niloli kutibenabule. Aba bakwame balikana iyanza niyenke babayendi name, imi tubayendi ni kwinjila muzubo yamukwame.

13 Chatuwambila mwababoneni Iñeloyi ha tuwambila mwaba boneni iñiloi ni lizimene munzubo yakwe ni kucho, “Tumine bakwame kwa Joppa imi mukaboze Simone yo supwa Pitrosi. 14 Mwa wambe kwenu lizwi lyete limihaze - Iwe ni bezubo yako bonse. 15 Hani tanga kuwamba kubali, Luhuhu Lunjolola chilwasukila kubali, sina njikwetu lwetanzi. 16 Nibazezi mazwi a Simwine, mwaba wambili, “Joani chabusakusima abakukolobeza chamenzi; kono inwe muswanela kukolobezwa cho Luhuhu Lunjolola.” 17 Linu haiba Ireeza ababahi impo ziswana ni zetu hatuzumina kwa Simwine Jesu Kreste, njemeni, kuti ni kangisane ni Ireeza?” 18 Habamana kuzuwa izi zintu, kakwina chibaba wambi kulitabilila, Kono ba balumbeki Ireeza ni kuchokuti, “Imi Ireeza abahibulyo inswalelo ya buhalo kubalichaba nabo.” 19 Linu babo babahasani bakeñi cha masukuluka abezi chebaka lyefu lya Sitefani, libahasani mane kutwala kwa Fonisiya, Sipera, ni Antioke, kono chibakutaza linzwi lya Jesu feela ku Majuda. 20 Kono bamwi kubali, bakwame bakwa Sipera, ni Sirene, chibeza kwa Antioke, imi chibawamba bulyo ni ku Magerike, ni ku bawambila mazwi malotu kuamna ni Simwine Jesu. 21 Imi iyanza lya Simwine libena nabo; bungi bwabo bubazumini ni kubola kwa Simwine. 22 Iñusa kuamana nabo chilyeza mumatwi ye Kereke ya mwa Jerusalem: imi chibatuma Barnabasi kuyenda kule kwa Antioke. 23 Hakeza ni kwiza kubona impoo ye Ireeza, aba sangi; imi chaba susuweza bonse kwikala ni Simwine chenkulo zabo zonse. 24 Imi abali mukwame yabena sinte wizwile Luhuhu Lunjolola ni tumelo, imi bungi bwabantu baba ekezehi kwiza kwa Simwine. 25 Barnabasi linu chayenda kwa Tarese, ku kasaka Saule. 26 Hamuwana, cha muleta kwa Antioke. Chikweza kubakuti, mwaaka onse chibali kunganya hamwina ne Kereke hamwina ni kuluta bungi bwabantu. Balutwana babakusumpwa Makereste lwetazi mwa Antioke. 27 Linu mwa anu mazuva bamwi bapolofita chiba sezumukila kwa Jerusalem kwa Antioke. 28 Umwina kubali, Agabusi, chezina chazima ni kupolofita cha Luhuhu kuti inzala inkando mwi ikanda yonse. Izi ziba kutendahala mumazuba a Klaudiya. 29 Njokuti, balutwana, sina zumwi ni zumwi habakuwola, chahupula kutumina intuso kubamwakwe mwa Judeya. 30 Babatendi bulyo, baba tumini mashelenyi kuba kulwana bakeleke chamanza a Barnabasi ni Saule.

## Ikahanyo 12

1 Linu mwezo inako Simwine Heroda avali kusebelisa inguzu zakwe kusumina vava kuzwila mwikeleke mukuti avasukulule. 2 Abehayi Jakovo mwache wa Joani cha mukwale. 3 Kuzwaho chinga bona kuti zisangisa majuda, nichazwila hansu nikusumina Pitorosi naye. Linu ayo avali mazuva achikwa chisena mulungo. 4 Hmana kumusumina, nicha mubika mwitolongo linu nicha bika zikwata zone za masole kumu mamela; Avali kuzeza kumuleta kubatu kumasule Epaseka haimana. 5 Linu Pitorosi ava bwikitwe mwitolongo, Imi balumeli kana ba bali kusiya kumu kumbilila kwa Ireeza mwikereke. 6 Izuva lichilila Heroda avakuya ku kumuzwisa hanze. Awo masiku aswana Pitrosi avalele hakati kamasole bovere, nasumwinwe ichaini; vaganteli habasu bya chiyato niba mamele itolongo. 7 Muvone, Iñiloyi lya Simwine inakozana chillya libonahalisa, linu mu moni chiwa

munika mwizuvo yetolongo. chilya vakula Pitrosi he mbali niku muvusa,"buke chakulitahanela' Imi ichaini chizawa kumayaza akwe. <sup>8</sup> Iñiloyi chilyawamba kwali nichinilyati, lizwatike zizwato, Imi zwate nimakatulo" Pitrosi cha chita vulyo. Iñiloyi chi lyati kwali, zwate zizwato za hanze unichilile <sup>9</sup> Linu Pitrosi niche chilila Iñoliyi ni kuzwa haze, kana abezi kuti zipangahala zakusakusima zilipanga Iñiloyi, Abakutele uvwene ipono, <sup>10</sup> Hava hitilila mugateli we intazi ni wa buveli, Nichibakeza kumulyango wesipi ubakuya mwitolopo; nichu we yaluka uwo wine. nichu bazwa haze nikuya mu mungwangwa, Iñiloyi nichu lyamusiya haho. <sup>11</sup> Linu Pitrosi chinga volelwa mano, chawamba kuti," hanu chabusakusima chine ziva Simwine aba tumini Iñoloyi lyakwe ni kwiza kuni sumununa mu mayaza a Heroda, mane nizintu ziva va livelele vantu va majuda. <sup>12</sup> "Hamana kuzeza izii, Nicha yenda kuzubo ya Maria inyina wa Joani izina livesi ba vali njiva Mareka; vangi vazumina baba kungene momo nivakwete kurapera. <sup>13</sup> Chinga ngongota ha mulyango werapa, muhikana wamukazana wezina lya Roda hakeza kukwi tava. <sup>14</sup> Halemuha kuti izwi njilya Pitrosi, kuzwililila kuku sanga chakangwa kwiyalula mulyango; kuhita, nicha tilila muzubo; nicha kava wambila kuti Pitrosi uzimene hamulyango; <sup>15</sup> Linu nichu vanta kwali,' umbulumuka," Nicha tundamena kuti njimona bovulyo. Nichu vata kwali, "Iñiloloyi lyakwe." <sup>16</sup> Linu Pitrosi nicha zwila havunsu niku ngongota, chinga veyalula mulyango, Nichu vamubona niku komokwa, <sup>17</sup> Pitrosi nicha vatondeza kama yaza kuti vantotole. Linu nicha vawambila Simwine mwava muzwisikizi mwitolongo. Ni chati, "mukawambile inzi zintu Jakovo niva mwakwe," kuzwaho nicha vasiya nikuya kuchimwi chivaka. <sup>18</sup> Linu chinga lyaza izuva. Nichu kwava nikulyangana kungi mukati kamasole, kuamana nichu vapangahali kwa Pitrosi. <sup>19</sup> Kumasule Heroda chinga mungana linu kana aba muwani, Nichavuza ba ngatela nikuha itaelo kuti vehayiwe. Kuzwa aho ni chazwa mwa Judea nikuya mwa Sesarea niku ke kala mwateni. <sup>20</sup> Linu Heroda nicha vengela vantu va Tire ni Sidoni. Nichu vayenda hamwina kwali. Nichu vaka wola Blasto mutusi wa Simwine, mukuti avatuse. Kuzwaho nichu kumbila ikozo, Mukuti ikanda yavo ivatambuli zilyo zayo zizwa kwa simwine weyo ikanda. <sup>21</sup> Mwizuva livatomwa Heroda nicha zwata zizwato zakwe zavu simwine nikwikala hachihuna chavu Simwine; Nicha wamba kuvali. <sup>22</sup> Linu batu chiva ngalumuka, "nikuta kuti ilzwi lya muzimu, isinyi lya muntu;" <sup>23</sup> Pona hahaha Iñiloyi lya Simwine chilya mukava, Mukuti kana avahi Ireeza ikanya; Nicha liwa masene niku nfwa. <sup>24</sup> Imi izwii lye Ireeza chilya kula ni njihekana. <sup>25</sup> Linu Barnabasi ni Saule chinga vama musevesi mwa Jerusalema, nichu vabolela haho, nivahinda Joani, Izina livesi va vali njiva Mareka.

## Inkauhanyo ya 13

<sup>1</sup> Linu mwi kereke ya Antiyoke, kuvana vaporofita ni maruti. Vavali Barnabasi, Simiyoni (Niga), Lusiyasi wa kwa Sirene ni Manaeni (yavali mulikani wa kuvu hwile wa Heroda we tetarachi) ni Saule. <sup>2</sup> Havavali kukwete ku zimba niku lumbeka Simwine nikuli nyima zilyo, Luho Lujolola chi lwawamba kuti, "Munivikile kumbali Barnabasi ni Saule, vapange musevezi univa vaysumpili". <sup>3</sup> Havamane ku linyima zilyo ni kulapela, chiva vavika mayanza avo hava vakwame, niva va tuma.

<sup>4</sup> Mi Barnabasi ni Saule vavali kuteki Luhuhu Lujolola chiba yenda kusezumuka kwa Silusiya; kuzwaho chi vayenda cha chisepe mu chiwoli cha Sipurasi. <sup>5</sup> Hava vena mwi toropo ya Salamisi, chiva kutaza linzwi lya Simwine mu masinagoge a Majuda. Vavena ni Joani Mareka avali mutusi wavo. <sup>6</sup> Linu hava valiku yenda muchiwoli choonse cha Pafosi, chi vawana mukwame wa mavivo, muporofita wa mapa wa Mujuda; izina lyakwe avali nji Bar- Jesu. <sup>7</sup> Uzu iñanga yavali kwina chizwale kumuyendisi wa chikiliti Sergiusi Paulusi, mukwame yavali kutalifite. Cha ngongota Barnabasi ni Saule, kakuti avali kusaka kuzuwa inzwi lye Ireeza. <sup>8</sup> Kono Elimasi, “wa mavivo” (bulyo inzina lyakwe mulivali kutolokelwa) chalika kuvakanisa, chalika ku kuzwisa muyendisi mwi ntumelo. <sup>9</sup> Kono Saule yavali kusumpwi Paulusi, yave zwile Luho Lujolola, chamu lola kakumu luvukila. <sup>10</sup> ni chati, “Iwe mwana wa muswisu wa Javulusi, wizwile vuchengi ni muhupulo muvi. U chila chenzila zonse za kuruka. Kete nosiye kutezeka inzila ziwolokete za Simwine, ko siye? <sup>11</sup> Hanu ulole, iyanza lya Simwine lina hewulu lyako, mi move u chivofu. Kente uvone izuva mwi nakozana”. Hahobulyo cha wilwa kavundu ni kaffi; chakala kuzimbuluka ni kukumpila vantu kuti bamukwate kwiyanza. <sup>12</sup> Linu muyendisi havona bulyo ku chiva tendahali, cha zumina, kakuti ava komokiswa ka mulutilo kaza Simwine. <sup>13</sup> Haho Paulusi ni va valikani vakwe chiva lilonga niku zuha kuzwa mwa Pafosi ni kwiza mwa Perga yamwa Pamflia. Kono Joani cha vasiya ni kuvola kwa Jerusalem. <sup>14</sup> Paulusi ni valikani chivayenda kwa Perga ni kwiza kwa Antiyoke ya Pisidia. Umo chi vayenda mu masinagoge mwizuva lye Nsavata ni kwi kala hansi. <sup>15</sup> Ha kumanwa kuvola za mulawo ni vaporofita, mi vayendi va ma masinagoge chiva tumina iñusa libalikuti, “Mizwale, chikwina liñusa lya kulisuweza kuamana ni vantu vena hanu, mui wamba.” <sup>16</sup> Mi Paulusi cha zimana ni kunyanganisa iyanza; ni kuti, “Bakwame va Isiraele ni nwe mutompa Ireeza, mutekeleze. <sup>17</sup> Ireeza wa vaantu va Isiraele avaketi waveshetu ventanzi mi ava pangi chisi chivekali mwi nkanda ya Egapita, mi cheyanza lyakwe lina mata avava zwisi mwateni. <sup>18</sup> Ka zilimo za makumi one nakwate inkulo yakwe chabo mwihalaupa. <sup>19</sup> Kuzwaaho ne haya mishobo ivali kukwana iyanza ni yobebe mwinkanda ya Kanana, chaha vaantu vetu inkanda yavo kuti ive chiyolo. <sup>20</sup> Zonse zintu ziva pangahali mu zilimo zina myanda yone ni zilimo zichita makumi eyanza. Hakumana zonse izo zintu, Ireeza na vaha vaatuli mane kusika muporofita Samwele. <sup>21</sup> Linu vaantu chi vavuzi Simwine, mi Ireeza na vaha Saule mwana wa Kishi, mukwame yavali kuzwa mulusika lwa Benjamine; kuva simwine ka zilimo za makumi one. <sup>22</sup> Kuzwa aho Ireeza na muzwisa havu simwine, Na zimika Davida kuti ave simwine wavo. Avali nji Davida wava wambi Ireeza, 'Na wana Davida mwana wa Jese, ave mukwame wina kwinkulo yangu, u tenda zonse zini suni kuti azitende.' <sup>23</sup> Kuzwa mulusika lozu mukwame Ireeza na letela Isilaele muhazi, Jesu, sina kamwa vasepizize ku tenda. <sup>24</sup> Ichi chivakali kutendahala lili, pili Jesu na seni kusika, Joani sapili avezivahazi ze nkolovezo ya kuvaka ku vantu vonse va Isiraele. <sup>25</sup> Aho Joani avali kumaniniza mutendo wakwe, chata kuti, 'Uzeza kuti njeme ini? Kanjime uzo. Kono mutekeleze, uzo yokezite mumasule angu, makatulo aku matende



akwe kani swaneli ku a sumununa.”<sup>26</sup> Vamwangu, vaana vazwa muluzuvo lwa Abrahamu, navo mukati kenu valapela Ireeza, nji kwetu uwu mulaezo we mpuluso ku uvatuminwa.<sup>27</sup> Linu avo vahala mwa Jerusalem, niva yendisi vavo, kena vava mulemuhi, mi nive zuzilikiza zivali kuwambiwa kuva porofita kakuti zi valiwa i Nsabata ni NSabata zivali za kumunyasa.<sup>28</sup> Nihakuba vulyo kena vava wani ivaka ilotu liyelele ifu lyakwe, niva kumbila Pilato kuti amwihaya.<sup>29</sup> Havamana ku tenda zintu zonse zi ñoletwe zi amana naye, chiba mususa kwi samu, ni ku mulalika mwi vita.<sup>30</sup> Kono Ireeza na muvusa ku vafwile.<sup>31</sup> Ava vonahali kamazuva mangi ku vonse vavali kwiza naye kuzwa kwa Galileya kuya kwa Jerusalem. Avo vaantu nahanu vavavi impaki zakwe ku vaantu.<sup>32</sup> Linu tuka miletete mulayezo mulotu we nsepišo iva tendahali kuva zazi ventazi.<sup>33</sup> Ireeza ave zuzilizi insepiso kwetu, vana vavo, mukuti vulyo ava avavusi Jesu kumuvoza kuvuhala. Sina haku ñoletwe mwa Lisamu wa vu veli: 'U mwanangu, sunu nava njime veso.'<sup>34</sup> Hape cha vuniti bwakuti avamuvusi ku bafwile ili kuti muvili wakwe kanzi uvoli, cha wamba buti: "Kani kuhe kujolola ni mboyoti zeniti za Davida.'<sup>35</sup> Izi njizi vawambiwa muzumwi Lisamu, 'Kente uzuminine vako va jolola kuvola.'<sup>36</sup> Kuzwa aho Davida hava ni lusika lwakwe ava valekeli intakazo ya Ireeza, cha lala mi na lalikiwa ni vesi, mi ava voni kuvoli,<sup>37</sup> kono uzo Ireeza ya vuse kente na vone kuvola.<sup>38</sup> Linu musiye izizintu zi zivahale kwenu, vakwangu, mozu mukwame ku kwizibaheze kwenu kuwondelwa kwe zivi.<sup>39</sup> Kakwe yense yozumina kwali mwalukululwe muzintu zonse za milawo ya Mushe usena uvali kulukulula.<sup>40</sup> Imi haho mutokomele kuti zintu maporofita zi vavali kuwamba kanzi zitendahali kwenu:<sup>41</sup> 'Muvone, inwe vanyazeleza, mu mukomokwe mane musinyehe; Kakuti ni tenda mutendo mu mazuva anu, mutendo usete ni muzumine, ni haike muntu niha wiziva haza kwenu.'<sup>42</sup> Imi Paulusi ni Barnabasi havakatuka, vaantu chi vava kumbila ahulu kuti ni vawole kuwamba izo ziwambo ziswana mwi Nsabata ikeza.<sup>43</sup> Linu mukopano mu masigoge hau mana, vungi bwa maJuda ni ma Sandika chive chilila Paulusi ni Barnabasi, vava wambi kubali ni kuva susuweza kuti bazwile habusi ni chisemo che Ireeza.<sup>44</sup> Kulye Nsabata lichilila, ha haho itoropo yonse ivakopani hamwina kwiza kuzuwa inzwi lya Simwine.<sup>45</sup> Mi maJuda havavona chisi, chive njililwa muuna ni kuwamba zivilala kwineku lya Paulusi ni kumutuka.<sup>46</sup> Kono Paulusi ni Barnabasi chi wamba ni basatiyi, "Kuwoleka kuti inzwi lye Ireeze liwambwe sapili kwenu. Kulolelela mumu liñahikila kule nanwe ni kulihinda inwe muvene kuti kamuswaneli vuhalo bwakuya kwile, muvene katu vole kuva kuhanze.<sup>47</sup> Linu Simwine avatu leyeli, kakuta kuti, 'Ni vamiviki umo sina kaliseli ku va hanze, kuti mulete mpuluso ku zibaka zonse cha hansi.'<sup>48</sup> Mi bakuhanze hava zuwabulyo, chi vasanga ni kutanga kutemba inzwi lya Simwine. Sina vungi havava ketelwe kuvuhalo vusa mani chiba zumina.<sup>49</sup> Inzwi lye Ireeza chilya hasana mu chisi chonse<sup>50</sup> Kono maJuda chiva susuweza vanakazi ba tompeha ni kukola, mane vulyo ni vakwame vayendisira itoropo. Izo chizi wekeza ku nyandisa Paulusi ni Barnabasi ni vasohela hanze kule kwenyinda ye toropo.<sup>51</sup> Kono Paulusi ni Barnabasi chiba ba kukumwini isuko kumatende avo kuvali. Linu chi vayenda kwi toropo

ya Ikone. <sup>52</sup> Mi barutwana vavali kwizwile kusanga ni cha Luho Lujola.

## Inkauhanyo 14

<sup>1</sup> Chikwasika inako mwa Ikone, Paulusi ni Barnabasi chivenjila hamwina muma Sinagoge a Majuda, vava wambi mumukwa uchita kuti ma Juda ni Magerike vangi vava zumini. <sup>2</sup> Kono ma Juda vasena vavali kukuteka, chiva lyanganisa mihupulo ya va chisi niku letisa kuti vavengele va mwavo. <sup>3</sup> Linu chivekala mo mazuva mangi, Nivawamba cha kukola cha ziho za Simwine, mi chaha vushupi cha linzwi lya chisemo. Mi chachita ichi cha kuzuminina zimakaza ni zikomokisa kuti zichitwe cha mayanza a Paulusi ni Barnabasi. <sup>4</sup> Kono vungi bwa vantu vamwi toropo vava kauhene hakati: vamwi vantu vavali kuzima kuma ma Juda mi vamwi kuva Apositola. <sup>5</sup> Mi vonse vasikunze ni ma Juda havavali kulika ku susuweza mihupulo yava yendisi vavo kuti va nyandise niku govola Paulusi ni Barnabasi, <sup>6</sup> Chiva lemuha mi chivatilila kumi leneñi ya Laikoniya, Lisitira ni Derbe, ni zikiliti zi zimbulukite, <sup>7</sup> mi uko vavali kuka luta linzwi. <sup>8</sup> Kwa Listra zuwi mukwame ave kele, kana avali kwina ziho kumatende akwe, avena vuyanga kuzwila mwi vumu liva nyina, asena ava yendi. <sup>9</sup> Uzu mukwame cha zuwa Paulusi na wamba. Paulusi avamulolelele ahulu mi chavona kuti wina itumelo yaku hozwa, <sup>10</sup> Linu chawamba kwali che nzwi ikando, “Zimane chatatende ako.” Mi mukwame cha lotoka mwi wulu niku zimbuluka. <sup>11</sup> Mi chisi hachi vona chava tendi Paulusi, chivanyemuna manzwi avo, chiva wamba muchi Laukosiya, “Vazimu vakeza hansi kwetu muchizimo chavantu.” <sup>12</sup> Chiva sumpa Banabasi “Zeyuisi” ni Paulusi “Hemesi” kakuti ivali nji muwambi. <sup>13</sup> Mu Prisita va Zeyusi, we tempele ivena kunze kwe tolopo, chaka leta mapulu ni zingalangala ze mpalisa kumulyango. Iye ni chisi vavali kusaka kuha zitavelo. <sup>14</sup> Linu va apositola, Barnabasi ni Paulusi, havazi zuwa, chivahalula zizwato zavo mi haho vulyo chiva ya mu chisi, nivakavulila cha kuhuwa, <sup>15</sup> mi nivawamba, “Vakwame chinzi hamuchita izi zintu? Naswe tuvantu sina njenwe ni maikuto aswana ni enu. Twaka mi letela makande malotu, akuta kuti muzwe kwezi zintu zisena intuso muvole kwe Ireza yo hala, ya va vumbi iwulu, inkanda, ni mawate mane ni zonse zina mwateni. <sup>16</sup> Mwinako zakale avazuminine inkanda zonse kuyenda mwi nzila zavo. <sup>17</sup> Mi nihakuva vulyo, kana avali siyi nikusena vushupi, mwezo avachiti vulotu mi avamihi invula kuzwa kwi wulu niku mi ha inako indotu, kwizuza inkulo zenu cha zilyo ni kusanga. <sup>18</sup> Mane ni cha a manzi Paulusi ni Barnabasi vava woli ku kanisa chisi kuva chitila chitavelo haluzala. <sup>19</sup> Kono ma Juda vavali kuzwa kwa Antioki ni Ikone chivakeza ni kwiza ku susuweza chisi. Vava govoli Paulusi cha mabwe ni kumu kwitila kunze kwe tolopo, cha kuhupula kuti avafwi. <sup>20</sup> Mi va varutwana havavali kuzimine niva muzimbulukite, cha zimana nikwinjila mwi tolopo. Izuva lichilila, chaya kwa Derbe ni Barnabasi. <sup>21</sup> Havamana ku ruta linzwi mwi toropo ni kutenda varutwana vangi, chivavola kwa Lisitira chikuya kwa Ikone. Mi chikuya kwa Antioki. <sup>22</sup> Vava kwete kukoza luhuho lwava zumini ni ku vasusuweza kuzwila havusu mwi tumelo, niva wamba kuti, “Tuswanela kwinjila mwi puso ye Ireza cha manyando mangi.” <sup>23</sup> Hamana kuva ketala vakulwana mwi

inkeleke sonze, mi vava lapeli cha kulinyima zilyo, chivava vika muma yanza asimwine uvava zumini kwali. <sup>24</sup> Chiva hita inzila ya Pisidiya kwiza kwa Pampiliya. <sup>25</sup> Hava mana kuwamba linzwi mwa Pega, chiva sezumuka kuya kwa Atilia. <sup>26</sup> Chiva yenda kwa Antioki cha chisepe, kuvavali kususwezwe ku chisemo che ireza cha musevezi uvava kuzwa kuku mana. <sup>27</sup> Hava kasika mwa Antioki ni ku kopanya inkereke hamwina. Chiva kaviha zintu sonse Ireza zava veleki chavo, ni mwaveyalwiri Ireza mulyango we intumelo kuva sihanze. <sup>28</sup> Chivekala inako inde ni va lutwana.

## Inkauchanyo ya 15

<sup>1</sup> Vamwi vakwame va vali ku zwa mwa Judea ni kuluta vakwavo, chivati, “Kuandakuti upangwe mupato kuzwa ku mulao wa Mushe, ko woli ku hazwa.” <sup>2</sup> Linu Paulusi ni Banabasi ha veza ku va kalimela ni kuli kananisa navo, Vakwavo chi va zumizana kuti Paulusi, Banabasi ni vamwi va yende kwa Jerusalema ku va apositola ni va kulwana che iyi impuzo. <sup>3</sup> Ni hakwinavulyo, cha ku tumwa ni inkeleke, chiva hita mwa Phoenicia ni Samaria ni kwi zivisa che iyi indava ya chisi chingi. Chi valeta ku sanga ku vonse vamwavo. <sup>4</sup> Linu ha vakeza mwa Jerusalema, va va tambulwa ni inkeleke ni va apositola ni vakulwana, mi chiva viha zintu zonse Ireeza chiti navo. <sup>5</sup> Kono vakwame vamwi va va zumini, va vali va chikwata cha Mafarisi, chi vazima ni kuti, “Kulukele kuti va chitwe mupato ni ku va laela ku mamela mulao wa Mushe. <sup>6</sup> “Linu va apositola ni va kulwana chi va kungana ha mwina ku zuminzana he iyi indava. <sup>7</sup> Hakumana wambisana kungi, Pitolosi cha zimana ni ku wamba kuvali, “Vakwetu, mwizi kuti Ireeza ava liketeli mukati kenu, kuti cha mulomo wangu Vasikunze va zuwe linzwi lya makande malotu, ni ku zumina. <sup>8</sup> Ireeza, wizi inkulo, upaka ku vali, cha ku vaha Luhuhu Lujolola, si na mwa vachitili kwetu; <sup>9</sup> mi kana ava chiti ku chi nchana mukati ketu navo, ku panga inkulo za vo ku jolola che intumelo. <sup>10</sup> Hanu ni ha kwina vulyo chi nzi hamulika Ireeza, kuti muvike ijokwe he nsingo za valutwani liti nanga veshetu kapa iswe kena tuvali woli kuli kulika? <sup>11</sup> Kono tuzumina kuti katu hazwe ku zwillila ku chisemo cha Simwine Jesu, sina mu va vekalile.” <sup>12</sup> Chisi chose chi chatontola ni va tekeleze kwa Banabasi ni Paulusi kuviha zisupo ni zi komokisa Ireeza za vapangi mukati ka Vasikunze ku zwillila ku vali. <sup>13</sup> Ha va siya ku wamba, Jakovo chetava, chati, “Vakwetu mutekeleze kwangu. <sup>14</sup> Simoni ava wambi umo Ireeza ku matangisizo mwava heli musa ku tusa Vasikunze cha ku hinda vantu mukati kavo che zina lyakwe. <sup>15</sup> Mi manzwi ava apositola chi a zuminzana nezi, sina mukuñolelwe, <sup>16</sup> Chikwa mana izi zintu ka nivole, Mi kanizake itente lya Davida hape, li va wili hans; Ka ni li zimike ni ku vozekeza ku shinyeha kwa lya hape, <sup>17</sup> cho kuti vantu vasikeza va zimene va sake Simwine, ku kopanya vulyo ni Vasikunze vonse va sumpitwe che zina lyangu. <sup>18</sup> Ichi cha wamba Simwine chiti, ya va pangi zintu zonse zive zi vachele ku zwa kwi nako zakale. <sup>19</sup> Niha ku va vulyo, mu nahano wangu kanzi tukatazi Vasikunze vola kwe Ireeza; <sup>20</sup> kono cha ku va ñolela kuti vazwe ku ku lisinya ni zibumbantu za manza, kuzwa ku vusangu, ni zonse zisinitwe, ni ku zamalaha. <sup>21</sup> Ku zwa kwisika lya kwa kale kwina vantu mwi tolopo ni tolopo va kwete ku kutaza ni ku vala Mushe mu masinagoge lwe Sabata ni Sabata.” <sup>22</sup> Linu chi

kwa woneka vutolu ku va apositola ni vakulwana, ni inkeleke yonse, ku keta Judasi yo sumpwa Basabasi ni Silasi, va vali va kulwana ve inkeleke, mi ni kuva tuimina kwa Antioch ni Paulusi ni Banabasi. <sup>23</sup> Chiva ñola izi. “Va apositola, va kulwana ni vakwetu, ku Vasikunze vakwetu mwa Antioke, ni Siria ni Silisia, intumeliso. <sup>24</sup> Tu va zuwi kuti vamwi va kwame va tu sana tuvahi mulao, va vazwi kwetu ni ku mi kataza ni intuto zi kataza ihuho zenu. <sup>25</sup> Linu chi kwa woneka vutolu kwetu tu vonse ku keta va kwame ni ku va tumina vasakiwa kwetu Banabasi ni Paulusi, <sup>26</sup> vantu va va viki vuhalo bwavo movukavo che zina lya Simwine Jesu Kirisite wetu. <sup>27</sup> Tu va tumini ni ha ku vavulyo Judasi ni Silasi, vese va mi wambile navo zintu ziswana. <sup>28</sup> Mi ni kwavoneki sinte ku Luhuhu Lujolola ni kwetu, ku sa vika hewulu lyenu muzio mukando, kwanda zintu zi na intuso: <sup>29</sup> kuti musiyiye zintu za zi tavelo za zivumbantu za manza, malaha, zintu zi dinkitwe, mi ni za vusangu. Haiva ni mulizwisa mwezi muvene, mu ku shiame kwenu. Kulaeza.” <sup>30</sup> Linu he, ha chi va lukululwa ni ku sezumukela mwa Antioke; ha vamaana ku kunganya china vungi hamwina, ni vatambika iñolo. <sup>31</sup> Linu ha va livala, chi vasanga che ivaka lye nsusuwezo. <sup>32</sup> Judasi ni Silasi, mane ni vapolofita, ni va susuweza vana kwavo ni manzwi mangi ni ku va koza. <sup>33</sup> Ha va mana kwi kala inako zana aho, va vatuminwa mu inkozo ku vakwavo va va vatumite. <sup>34</sup> Kono ku vavoneki ku va hande kwa Silasi ku shala mwateni. <sup>35</sup> Kono Paulusi ni Banabasi ni vekala mwa Antioke hamwina ni vungi bwa vamwi, umo ni valuti ni ku kutaza linzwi lya Simwine. <sup>36</sup> Ha ku hita mazuva Paulusi nati kwa Banabasi. “Tuvole hanu mi tukapotele bakwetu mwi tolopo ni tolopo mutu va ku wambite linzwi lya Simwine, mi tuvone kuti vena vule. <sup>37</sup> Banabasi avali ku sunite ku yenda ni Joani ya vali ku sumpwa Mareka. <sup>38</sup> Kono Paulusi cha zeza kuti ka kwina hande ku hinda Mareka ya vaka vasiyi mwa Pamfilia mi kena ava zwili havusu navo mu musevezi. <sup>39</sup> Linu chikwa vuka ku sa zuminzana kukando, mi kuti mane chi va kauhana hakati, mi Banabasi cha hinda Mareka ni ku zuha naye ku ya kwa Sipera. <sup>40</sup> Kono Paulusi cha keta Silasi ni ku yenda, ha mana ku mu muhewa ni vakwakwe cha musa wa Simwine. <sup>41</sup> Mi ava yendi ku hita mwa Siria ni Silisia na ka vu koza makeleke.

## Inkauhanyo ya 16

<sup>1</sup> Paulusi hape ni cheza kwa Derba ni Listra; mi mulole, mulutwana zumwi yo sumpwa Timotea kwabena, mwana wa muswisu wa Mujuda wa mwanakazi ya bazumine; beesi ba bali Magerike. <sup>2</sup> A ba kuwambwa neenza ku bakwake ba vena kwa Lisitra ni Ikone. <sup>3</sup> Paulusi a bakusaka kuyenda naye; ni chamuhinda ni ku ku mutwala kumupato chevaka cha majuda ba vena muchibaka echo, chakuti bonse ba vezi kuti beesi ba vali Magirike. <sup>4</sup> A ba vakuyenda mwinzila zabo kuya mwitolopo ba bali ku ya vuha inkeleke intayelo ye ba vakuswanela kwichilila, intaello i bañolwa kwa baapositola ni bakulwana venkeleke mwa Jerusalema. <sup>5</sup> Chobulyo inkeleke i va kolete che ntumelo mi i ba li kwinjiha chenamba mwizuva. <sup>6</sup> Paulusi ni bachikwata chakwe ba vali kuya muzikiliti za Frigia ni Galatia, chokuti ba vakaniswe cha Luhuhu Lujolola kukutaza inzwi muchivaka cha Asia. Havazwa mwa Masia, babaliki ku ya kwa Bitiniya kono Luhuhu lwa Jesu ni chi lwabakanisa. <sup>7</sup> Chakuhita kumbali ni Masia, ni chibalika ku ya kwa Betenia, kono

Luhuhu Lwa Jesu ni chilwavakanisa. <sup>8</sup> Chakuhita kumbali ya Misia, ni chiveza kwitolopo ya Troasi. <sup>9</sup> Impono ivavoneki kwa Paulusi masiku: mukwame wa kwa Masondonia avali kuzimene aho, namu sumpa na wamba, “Wize kunu mwa Masondoniya ni kututusa.” <sup>10</sup> Linu Paulusi haca bweene iyo impono, yahaho chitwa nyemuka kuyenda kwa Mesondoniya, kuzumina kuti Ireeza watusupira kuka kutaza i evangeri ku vali. <sup>11</sup> Ni chibahinda lwendo nihakubabulyo kuzwa kwa Troasi, ni chi twakatuka kuyenda feela kwa Samotrasi, mi izuva lichilila ni chitweza kwa Neapolisi; <sup>12</sup> Ku zwa ko ni chitwaya kwa Filipi, I bali itolopo ya Masedonia, Itolopo i vali yabutokwa mwi chilalo ni mwikoloni ya Maroma, mi tubekali mwitolopo yo mazuva mangizana. <sup>13</sup> Mwizuva lye Sabata ni chitwayenda hanze ya mulyango cha lwizi, ko tuvahupuli kuti kwina chivaka cha kulapelela. Ni chitwekala ni kuwamba ku banakazi ba bakezite hamwina. <sup>14</sup> Mwanakazi zumwi ya bakusumpwa Lidia, muuzi we pulipela kuzwila kwitolopo ya Tiatira, ya bakulapela Ireeza, ni chatekeleza kwetu. Simwine ni cheyalula inkulo yakwe kutekeleza kuzintu zi ba kuwambwa nji Paulusi. <sup>15</sup> Hamana kukolobezwa ni venzubo yakwe, ni cha tukumbila ni chati, “Chokuti u ba ni atuli ku ba yasepahala ku Simwine, mwize munzubo yangu, ze mwikale mwateni. Mi a ba tuhambilizi. <sup>16</sup> Ni chi kwachitahala buti, ha tu bakuya kuchivaka cha kulapelela, mwanakazana zumwi ya vena luhuhu lwa bunuhi ni cha tukatana. A ba leteli nfumwe chifumu chingi chakunuhelela za bufumu. <sup>17</sup> Uzu mwanakazi ne chilila Paulusi mwisule naswe na huweleza, na ti, “A ba bakwame ba hikana be Ireeza Yo Hanzi. Ba wamba kwenu inzila ye mpuluso.” <sup>18</sup> A ba kuchita bulyo mu mazuba mangi. Kono Paulusi, a ba nyezwa ahulu, na chebuka mi na wamba kuluhuhu, “Ni kulaela che zina lya Jesu Keriste u zwe mwali.” Mi ni lwa zwa hohwaho. <sup>19</sup> Kono nfumwakwe ha bona kuti insepoye ya chifumu cabo chi yamana, ni bakwata Paulusi ni Silasi ni ku bakokolwela muchibaka cha ku uzikiza habusu bwa babusi. <sup>20</sup> Ha ba baleta ku baatuli, ni ba cho, “A ba bakwame Majuda mi baleta mifilifili mingi mwi tolopo yetu. <sup>21</sup> Baluta zintu zi sa zumininwe kwetu kuti tu zi tambule kapa ku zi chilila u bu Maroma.” <sup>22</sup> Linu chisi ni cha ziimana hamwina kulwisa Paulusi ni Silasi; ba atuli ni ba natula zi zwato zabo ni ku laela kuti ba shupwe ni mbazi. <sup>23</sup> Ha bamana ku balindola chamañindi mangi, ni ba va sohela mwi ntolongo ni kulaela muganteli ku ba gantela ahulu. <sup>24</sup> Ha mana ku wana i yi intaelo, muganteli na basohela mu intolongo ya mukati ni kusumina matende a bo ha zi sindimwa. <sup>25</sup> Mukati ka masiku Paulusi ni Silasi ba va kulapela ni ku zimba izimbo kwa Ireeza, mi basuminwa bamwi ba va li ku batekeleze. <sup>26</sup> Haho ni kwa ba ni nzikinyeho i nkando, mukuti ni mitomo ye ntolongo ni ya nyanganya, mi hohwaho milyango ye ntolongo ni ye yaluka, mi mawenge a zumwi ni zumwi ni a sumunuka. <sup>27</sup> Mulibeleli ha vuka mwi ñonzi na bona milyango ye ntolongo ni iyalukite; na hinda i sabule lya kwe mi cha ba kulihaya, kakuli cha ba kuzezete kuti basuminwa chi ba loboka. <sup>28</sup> Kono paulusi cha huwa chenzwi ikando, na ti; “Konji u lisasamisi, kakuti kutwina twense.” <sup>29</sup> Muganteli a sumpisa mamonyi mi a hwelela mukati mi, a chachalika cha kutiya, na wila habusu bwa Paulusi ni Silasi, <sup>30</sup> mi na ba zwisikiza hanze mi na cho, “Batompei, chi ni swanela kuchita nje chihi kuti ni hazwe?” <sup>31</sup> Ni bati, “Zumine mwa Simwine Jesu, mi ka

u hazwe, iwe ni ve nzubo yako.”<sup>32</sup> Ni ba wamba inzwi lya Simwine kwali, hamwina ni bonse mu inzubo.<sup>33</sup> Linu muganteli cha bahinda mwi inako iswana ya masiku, mi chasambisa zilabi za bo, mi iye ni bonse be nzubo yakwe ni ba kolobezwa hohwaho.<sup>34</sup> Na leta Paulusi ni Silasi mwi nzubo yakwe ni kubika zilyo habusu bwabo. Chasanga ahulu ni be nzubo yakwe bonse, mukuti bonse ba bazumini kwa Ireeza.<sup>35</sup> Linu ha ku ba musihali, muatuli a tumina iñusa ku muganteli liti, “Siye a bo bakwame bayende.”<sup>36</sup> Muganteli cha biha indaba kwa Paulusi, na ti, “Baatuli ba tumina inzwi kwangu kuti ni misiye muyende: linu he muzwe, mi muliyendele che nkozo.”<sup>37</sup> Kono paulusi ni chati kubali, “Ba batukabi he nkaza, bakwame ba sanyazitwe cha chi Roma, mi ni vatusohela mwi intolongo; mi linu hanu batuzwisa cha kuli wungula? Kamu kwikalile bulyo tota; mu basiye abo bene beze ze batuzwise.”<sup>38</sup> Baganteli ni ba biha aa manzwi ku ba atuli; ba atuli ba ba tiyi ha bazuwa kuti Paulusi ni Silasi Maroma.<sup>39</sup> Baatuli chibeza ni kubakumbila; mi ha ba bazwisa mwintolongo, chi bakumbila Paulusi ni Silasi kuzwa mwitolopo.<sup>40</sup> Linu paulusi ni Silasi chi bazwa mwi ntolongo mi ni baya kunzubo ya Lidia. Linu Paulusi ni Silasi ha ba bona ba mwabo ni ba ba susuweza ni kuzwa mwitolopo.

## Inkauhanyo ya 17

<sup>1</sup> Linu haba hita mwi tolope ya Anfipolisi ni Apolonia, ni beeza kwi tolopo ya Tesalonoka, ku beena i sinagoge ya Majuda.<sup>2</sup> Paulusi, ka chizo chakwe, naya kubali, mi mu mazuba o tatwe e nsabata na li kumbulusa nabo ku zwilila muma ñolo.<sup>3</sup> Abali kwi yalula mañolo ni ku toloka kuti kubali kwa bu tokwa kuti Kilisite a nyande ni kubuka hape kuzwa kwaa bana bafwile. Nacho, “Uzu Jesu uni wamba kwenu njeye Kilisite.”<sup>4</sup> Ba mwi Majuda baba zumini ni kuli kopanya ni Paulusi ni Silasi, mane ni Ma gelike babali tombwele kwali, bungi bwa banakazi baba hitile ni chichaba chikando.<sup>5</sup> Kono Majuda basana bali kuzumina, chaku yendiswa muuna, na hinda ba nakwame ba sena sinde muma uzikizo, na kunganya chicaba hamwina, mi na bika i tolopo mwi laata li lyanganisa. Ni ba ngundunganya i nzubo ya Jasoni. Babali kusaka kuleta Paulusi ni Silasi hanze ku bantu.<sup>6</sup> Kono haba sana baba bawani, ni ba tundanisa Jasoni ni bamwi bakwame habusu bwa ba sepahali be tolopo, kulila, “Aba bakwame ba chiba futumuna inkanda beeza kunu nabo.”<sup>7</sup> A baba kwame Jason baba tambuli ba tenda chaku sandukila intaelo ya Sesare, ba cho kuti kwina zumwi simwine- Jesu.”<sup>8</sup> Linu chichaba ni ba sepahali be tolopo haba zuwa izi zintu, baba katazehete.<sup>9</sup> Haba mana kuhinda intuwelo ye nsilelezo kwa Jasoni ni bamwi, ni baba lekeza kuti baliyendeze.<sup>10</sup> Ubo busiku ba mwakwe ni ba tumina Paulusi ni Silasi kwa Beria. Haba sika kwateni, ni be njila mu masinagoge a Majuda.<sup>11</sup> Linu a ba bantu babali ku sepahala kuhita abo bamwa Teselonika, mukuti baba tambuli inzwi ca maano a litukiseze, ku tatuba mañolo mwi zuba kubona kapa izi zintu muzibekalile.<sup>12</sup> Kuzwaho bungi bwabo baba zumini, ku bika ni basusuwezi ba Ma Gelize ba bana kazi mane ni bungi bwa bakwame.<sup>13</sup> Kono ma Juda ba Teselonika habeziba kuti Paulusi naye abali kuwamba inzwi lye Ireeza kwa Berea, ba ba yendi ko ni kubusa musunga ni ku kataza bungi bwa bantu.<sup>14</sup> Linu haho bulyo, ba

mwaakwe ni ba tuma Paulusi kuya kwi iwate, kono Silasi ni Timetea abo niba shala kwateni. <sup>15</sup> Abo baba sotweze Paulusi ni bamu twala uko kwi tolopo ya Anseni. Ha basiya Paulusi kwateni, ni ba tambula intaelo yakwe ya Silasi ni Timotea ya kwiza kwali cha kuhwela muku wolekela. <sup>16</sup> Linu mukuti Paulusi haba kuba lindile mwa Anseni, luuho lwakwe ni lwa katazaha mwali ha bona i tolopo i zwiile ziswaniso zi lapelwa. <sup>17</sup> Mi na zeza zeza mwa sinagoge ni Majuda na bo ba bali ku lumbeka Ireeza mi mane na bo ba bali ku likopanya nabo izuba ni zuba mu cibaka ca musika. <sup>18</sup> Kono hape bamwi ba li tutite ba Ma epikulia ni ma Sitoiki ni bali kopanya naye. Mi bamwi nibati, “Uzu yo wamba ahulu u lika ku tii nzi? Bamwi ni bati,” Uboneka kuba muluti wa milimu iseni kubonwa, “kakuti abali kuluta za Jesu ni za ku buuka. <sup>19</sup> Ni bahinda Paulusi ni kumu leta kwa Areopagusi, ni bati, Tusaka kwi ziba uwu mulutilo seke wo wamba? <sup>20</sup> Ka kuti u leta zintu zi seni kubonwa mu matwi etu. Linu tusaka kwiziba kuti izi zintu zi talusa nzi.” <sup>21</sup> (Linu bonse ma Ansenia ni mabuu kwenda babali kuhala mwa teni ni be kaala ni kusena ziba tenda kwanda ku wamba ni ku tekeleza zimwi zihya.) <sup>22</sup> Kuzwa aho Paulusi na zimana mukati ka ma Aeropagusi mi nacho, “Inwe muba kwame ba Anseni, ni bwene kuti mwi zwile ahulu bu mulimu mwi nzila zonse. <sup>23</sup> Sina ha ni bali ku hitite ni ba boni zintu zi mu lumbeka, Ni ba wani kataala kena uwu miñolo, “Kwa Ireeza ya se zibenkene.” Icho linu chimu lapela mu kuseziba, ni chi mi wambila. <sup>24</sup> Ireeza ya ba bumbi i nkanda ni zonse zina mwateni, mukuti njeye simwine we iwulu ni hanshi, ka haali mwi i tempele i ba bumbwa ni mayanza. <sup>25</sup> Nandi ku sebelezwa cha mayanza a muntu, mane ubu kwina cha saka, mukuti iye mwine njo ha bantu bu halo ni luhuhu ni zintu zonse. <sup>26</sup> Mi kuzwa ku muntu yenke a ba pangi cisi cha bantu ba hala hanshi, mi ni ku akaleza ku ketwa kwe nako ni museto wa zibaka mu bahala. <sup>27</sup> Kuzwa aho, ba lukela ku gana Ireeza mukuti pona chiba sika kwali ni ku muwana, mi luli, kena kule ni yense wa kwetu. <sup>28</sup> Mi mwali tuhala ni ku yenda ni kuba ni buntu bwetu, sina mu iti imwi i mpwetele yenu i ba cho, “Cho kuti naswe tu ba luzubo lwakwe. <sup>29</sup> Kuzwa aho, sina hatuli tu ba luzubo lwakwe, katu swaneli ku zeza kuti bulimu bu swana ni gauda, kapa chilivela, kapa mabwe, zi bezetwe ni ka bu ma pangapanga ni kuzeza kwa muntu. <sup>30</sup> Kuzwa ho Ireeza na shila cha menso i nako ya ku li lyanganisa, kono hanu a ba laeli bantu bonse konse konse ku baka. <sup>31</sup> Ichi cha kuti aba bakanyi izuba lwete na atule inkanda mu kuluka ca muntu yaba keeti. I reeza aba hi bupaki bozu muntu ku yense cha ku mu busa kwabana ba fwile.” <sup>32</sup> Linu bantu ba Ansena ha bazuwa za ku buka kwa ba fwile, bamwi ni ba sheununa Paulusi; kono bamwi ni bati, “mutu te keeleze kwako hape kwa amana niyi indaba.” <sup>33</sup> Kuzwa aho, Paulusi, na ba siya. <sup>34</sup> Kono bamwi bantu ni ba likopanya naye ni kuzumina, mane bulyo ni Dionisuisi wa kwa Areopagite, mwanakazi ya bali ku sumpwa Damaris, mi ni bamwi ba bena na bo.

## Inkahanyo 18

<sup>1</sup> Ha kumana izi Paulusi nazwa mwateni ni kuya kwa Atene kwa Korinte. <sup>2</sup> Na kawana Mujuda we zina lya Akila, ya bali ku pepiwa mwa Pento ka mushobo; Njabali kukazwa kwa Italia ni mwi habwe Pulisila, ni Kilawudiya nalayera ma Juda bonse kuti vazwe mwa Roma;

Mi Paulusi ava kezi kubali. <sup>3</sup> Paulusi Abali kuseveza musevezi uswana navo aba kali navo. Vavali bvapangi vama tente. <sup>4</sup> Linu Paulusi lwe sabata ni lwe sabata abali ku yanga mu masinangonge. Avali kuhambirikiza vonse majuda ni Magerike bazumene. <sup>5</sup> kono Sila ni Timotea habasika kukazwa kwa Macedonia. Paulusi avali kuyendiswe Luhuhu kuwambira ma Junda kuti Jesu jiyena Keresite. <sup>6</sup> Aho Majunda hava mulwisa ni kumutuka, Paulusi cha zikutula chizwato chakwe ni kuwamba kuvali, “Malaha enu ave he wulu lye mitwi yenu; Kanina mulandu. kuzwa hanu muniyende ku Bamachava.” <sup>7</sup> Nakatuka aho naya muzumbo ya Tetius Justusi mukwame yavali ku lapela Ireeza. Inzubo yakwe yibene hafwihi ni sinagoge. <sup>8</sup> Krisiposi, muyendisi we sinangonge ni vonse vo luhasi lwakwe mwa Simwine. Vungi bwa Makorite vava zuwi Paulusi vava zumini ni kukolovezwa. <sup>9</sup> Simwine na wamba kwa Paulusis masiku mu chiloto, “Kanzi utiyi, kono u wambe kanzi u ntontoli. <sup>10</sup> Ka kuti nina nawe, mi ka kwina yete aku holofaze, kakuti nina bantu bangi mowu muleneñi.” <sup>11</sup> Paulusi a ba hali mwa teni chilimo ni myezi imana iyanza ni ka mwina na luta linzwi lya Ireeza mukati kabo. <sup>12</sup> Kono Galio haba mubusi wa Akaiya, Majuda ni ba zimana ku lwisa Paulusi ni ku muleta ha busu bwa chipula cha mu atuli; <sup>13</sup> Nibawamba “Uzu mukwame ukwete kushonga vantu kulapera Ireeza yasa yendereri ni mulao.” <sup>14</sup> Mi Paulusi si hacava kuti awambe, Galio mubusisi nawamba kumajuda nati,”inwe Majunda, haiva initi ivali indava yo mulandu kamba vuvangamwa, nikuva zuweki kumiha mulandu. <sup>15</sup> Kono sina inzi ipuzo ze ziyambo ni mazina ni milao yenu, muzi wambole inwe muvene. kani saki kuva muatuli wezi indava.” <sup>16</sup> Galio chava zwisa hanze ye chipura che inkatulo. <sup>17</sup> Cwale vonse ni chivakwata Sositene, muvusi we sinagoge, ni kumu kabila havusu bwe chipura che nkatulo. Kono Galio kena ava vileli chi va ba pangi. <sup>18</sup> Pauluci cinga e kala kwateni mazubazana, cha siya vakwakwe ni kuzuhira kwa Siriya ni Purisila ni Akwila. Naseni kuyenda irizo, Senichiriya, ava ngukisi i sunki zakwe kakuti ava hindite vuitamo bye chi Nazareta. <sup>19</sup> Hachiva sika mwa Maefese, Paulusi cha siya Purisila ni Aquila mwateni, kono iye cha yenda mwi sinangonge ni kuka ambolisana ni Majunda. <sup>20</sup> Hachiva kumbire Paulusi kwi kala navo kavaka zana, chakana. <sup>21</sup> Kono hacha yenda kwi pumulo, ava wambira, “Kanika mi vole hape kwenu haiva itato ye Ireeza.” Linu cha zuha kuzwa kwa Maifese. <sup>22</sup> Paulusi haka sika he rizo lya Caseriya, chayenda ni kuka lumerisa inkereke za mwa Jerusalema mi hape cha kwa Atiyoki. <sup>23</sup> Hache kere inko zana kwateni, Paulusi cha katuka nayenda mukanda muzikiriti za Galatia ni Firigiya ni kususuweza varutiwa vonse. <sup>24</sup> Kubena mujuda ya va pepelwa mu Alexandria we zina lya Apolosi, avakezi kwa Maefese. Mi mukwame ya vali kwamba hande ni kwiziva mañolo. <sup>25</sup> Apolosi avali ku rutitwe mwi tuto za Simwine. Kwi ziva muluhuhu, ava wambi ni kuruta hande zintu kuamana Jesu, kono avali kwizi vulyo inkolobezo ya Johani. <sup>26</sup> Apolosi chatanga kuwamba cho vundume muma sinangonge. Kono Purisila ni Aquila hava muzuwa, chivali panga chilikani naye ni kumutorokera ze zira ye Ireeza cho kumu swanelelela. <sup>27</sup> Linu hali takaleza kuya kwa Akiya, va na kwakwe ni va mususuweza ni ku ñolela valutiwa mwa Akaiya kuti va mu tambule.



Hasika, na tusa ahulu vava zumine cha chishemo. <sup>28</sup> Apolosi he nkanza cha komokisa Majunda cha ziho zakwe ni vuchaziva, cha kutondeza cha mañolo kuti Jesu avali nji Keresite.

## Inkahanyo 19

<sup>1</sup> Kubatendahali buti kuti Apolosi nena kwa Korinte, paulusi abahiti kwiulu lyekanda mi abezi kwa Efese, mi nicheza kuwana barutwana bamwi kwateni. <sup>2</sup> Paulusi nichati kubali, “Mubatambuli luhuhu lujolola na hamubazumini?” Chibamucho kuti, “Nee, kakwina mane ni chitubazuwi kuamana ni Luhuhu Lujolola.” <sup>3</sup> Paulusi abati, “Linu mubakolobezwa muchinzi?” Ni chibati, “Munkolobezo ya Joani, <sup>4</sup> Linu Paulusi netaba, “Joani abakolobezi chenkolobezo yenswalelo. Abawambili bantu kuti bayelele kuzumina kumuntu yokeza mwisule lyakwe, kokuta kuti, nji kwa Jesu.” <sup>5</sup> Bantu habazuwa bulyo, nibakolobezwa mwizina lya Simwine Jesu. <sup>6</sup> Imi linu Paulusi habatula mayanza hewulu, Luhuhu Lujolola nichilwabenjila mi nibawamba mundimi zisiyenesiyene mi nibatanikiza zikezite. <sup>7</sup> Kuhindilila bonse ibali bakwame babali kulikana ikumi ni bobele. <sup>8</sup> Paulusi nenjila mwisinagoge mi nawamba chabundume munako ikwanisa nyezi yotatwe. Abaetelele ziambantu ni ku kutolokla bantu kuti bazuwisise kuamana nimubuso we Ireeza. <sup>9</sup> Nihaike majuda kana babakuzuwisisa nikusatwaliza cibatanga ku wambi zivi ni kulyefula Kreste. Paulusi cabasiya nikuzwila habusu nibabazumini. Catanga kuwamba izuba nizuba munzubo yakulutila ya Tyrannus. <sup>10</sup> Abazwili habusu kuwamba zilimo zobeke kuti mane nibantu bekala mwa Asia, Judea ni mwa Greek bazuwe linzwi lye Ireeza. <sup>11</sup> Ireeza aba kupanga zimpangaliko zijolola ca mayanza a Paulusi, <sup>12</sup> mane ni balwala babali kuhola, Niluhuhu lubilala luba kuzwa kubali, Habahinda kataulo ni ka apron hamubili wa Paulusi. <sup>13</sup> Kubena Majuda baba likwina mulieto lya kuyabuyenda muzilalo kulola babahindi izina lya Jesu kulisebelisa mubasakila abobene, Baba kukabuiwamba kubantu bana bana luhuhu lubilala feela; Cibawamba, “Nimilaela cha Jesu yabali kuwambiwa kwa Paulusi kuti muyende.” <sup>14</sup> Baba tendi izo babali bakwame batenda iyanza ni bobele bana ba mupurita mukulwana wa majuda, wezina lya Sceva. <sup>15</sup> Luhuhu lubilala lubabetabi, “Nizi Jesu, ni Paulusi; cwale iwe njewe ni?” <sup>16</sup> Luhuhu lubilala lubena kumuntu cilwa mukoma kumubulisa ziho cawila hanzi ni kubakaba. Cibazwa munzubo nibasazabele hamubili ni kuholofala. <sup>17</sup> Iyo indaba ciyezibahala kubantu bonse, nibahala mwa Judea, mwa Greek, nimwa Efese. Imi baba tiyi ahulu, mane nizina lya Simwine Jesu ciba tanga kulikuteka. <sup>18</sup> Imi hape, bantu bonse babazumini kubakela zive nikuzumina kuzintu zibi zibaba pangi. <sup>19</sup> Bonse babali kupangite za mabibo cibaleta invuka zabo imi cizahisiwa mumenso abantu bonse. Haba zibala zonse, inteko yatani ibabi makumi amayanza azikiti zaziemba emba ze silivela. <sup>20</sup> Njikuti linzwi lye Ireeza liba ambalakani munzila ikolete. <sup>21</sup> Paulusi hamana musebezi wakwe mwa Efese, cahupula caluhuhu lujolola kuti ahite ya Macedonia ni mwa Achaia munzila yakwe yakuya mwa Jelusalema; Cawamba, “Acinazwa munu, niswanela kukabona kwa Roma.” <sup>22</sup> Paulusi catuma batumiwa bakwe bobele baba mutusi, Timothy ni Erastus kwa Macedonia. Kono iye abali kusikala mwa Asia inako. <sup>23</sup> Mweyo inako cikwabuka cifoyoyo

mwa Efese kuamana ni Nzila. <sup>24</sup> Demetrius yopanga isilivela ya Diana, Cikwaba ni bisinisi kubantu babeza. <sup>25</sup> Cakopanya babeleki bonse bamusebezi wa kubeza ni kuwamba, “Nfumwangu, wizi kuti mowunu musebezi tupanga masheleni mangi. <sup>26</sup> Mubwene ni kuzuwa kuti, kanji mwa Efese monke kono ni mwa Asia yonse, Paulusi caba kukuweza niku bawambila. kuti kakwina Ireeza yopangiwa ca mayanza. <sup>27</sup> Imi kana bukabo bwabo bonke kono niswe zintu zetu kese zisakahale kubantu, mane ni tempele ya mufumahali Diana Ireeza mukando muibule maata. Imi naye mwamaninwe bukando bwakwe mwa Asia ni mwinkanda yonse.” <sup>28</sup> Habazuwa bulyo, bababengi ni kulila, Cibawamba, “Bukando bwina ha Diana yozwa mwa Efese.” <sup>29</sup> Muleneñi onse babalyangani, cibahei kucibaka cazizanino. Paulusi ni basindikizi bakwe mumusipili wabo, Gaius ni Aristarchus bazwa kwa Macedonia. <sup>30</sup> Paulusi abali kusaka kwinjila mukati kenyangela kono batumiwa baba musilelezi. <sup>31</sup> Bonse batompeha ba cilalo ca Asia balikani bakwe cibamutumina liñusa kumukumbila kuti sanzi enjili mucibaka ca zizanino. <sup>32</sup> Bamwi bantu baba kuhuwana cintu conke, mane inyangela ciba lyangene, Bungi bwabo kana baba kwizi kuti cinzi habakeza bonse bonse. <sup>33</sup> Majuda cibaleta Alexander habusu bwe nyangela. Alexander abali kulila mumyanza kutolokela inyangela. <sup>34</sup> kono habeza kulemuha kuti Mujuda, bonse cibalila ca linzwi nyonke inhola zobe, “Bukando nji bwa Diana yozwa mwa Efese.” <sup>35</sup> Muñoli we tolopo hawamba ni nyangela, Cawamba, “Inwe bantu ba Efese, njeni yasezi kuti muleneñi wa Efese mwasebeleza mukando Diana ni ciswaniso cibawili hansi kuzwa kwiwulu? <sup>36</sup> Hamubona izi zintu zipangahala, muswanela kutontola niku sahwelela zintu. <sup>37</sup> Bantu bamwaleta kumulawo kana basa bamwi tempele kapa kuwamba zibi kuamana ni Ireeza wetu. <sup>38</sup> Heba, Demetriusi ni mubeleki yobeza kabazuwani, mulao kuwina wiyalukite. Mubasiye bazekisane. <sup>39</sup> Kono heba kwina zimwi zilukela kuambolwa, muzilukiswe hande comulao. <sup>40</sup> kakuti kwina inkozi kuamana nindaba za pangahala sunu, kakwina intatululo iwambiwe kuamana nei indaba, kese tuwole kuitatulusa.” <sup>41</sup> Hamana kuwamba izo calukulula bantu.

## Inkauhanyo 20

<sup>1</sup> Kunyungana ha ku mana, Paulusi cha tuma batumiwa vakwe ni ku va susuweza. Mi cha balaeza ni kuba siya kuya kwa Macadonia. <sup>2</sup> Linu hacha yendete chahita mukati ke zilalo ni ku susuweza bazumine ahulu, mi chayenda kwa Greece. <sup>3</sup> Ha mana kwi kala mwezi yo tatwe, Majuda chiba hinda mulelo he wulu lyakwe kakuti chaba kuyenda kwa Syria, cha zeza kuti a bole ya mukati ka Macedonia. <sup>4</sup> Baba musindikizi kuya hesi kwa Asia nji Sopater mwana wa muswiswi wa Pyrrhus yo zwa kwa Berea; Aristarchus ni Secundus bose bazumine ba kwa Thessalonica; Gaisus wakwa Berbe; Timothy; Tychicus ni Trophimus ba kwa Asia. <sup>5</sup> Kono aba bakwame baba kali kuyenda kwentu mi baba katulindili kwa Troas. <sup>6</sup> Chitwa zuha kuzwa kwa Philippi haku mana mazuba a chikwa chisena mulungo, mi mumazuba atende iyaza chi twaka sika kubali kwa Troas. Uko chi twa kekala mazuba atenda iyaza ni obele. <sup>7</sup> Ke zuba lya makalo mwisunda, ha tuba kungene tubose kuti tu nkomona cikwa, Paulusi cha wamba

ku bazumine. Chaba ku lela ku katuka izuba lichilila, aba zwili habusa niku wamba hesi hakati kamasiku. <sup>8</sup> Kubema malambi mangi muzubo ya kwiwulu atuba kezi nawo. <sup>9</sup> Hehahulo kuba kwi kele mulobwana wezina lya Eutyclus, yachaba lele iñosi. Sina Paulusi haba wambi inakonde, uzo mulobwana, aba kuchilele, chawa hasi kuzwa habulilo bobutatu mi chiba mutola na fwile. <sup>10</sup> Mihe Paulusi cha suka hasi, cha liwotwelela hali, ni kuzabalana naye. Linu cha wamba, "Kanzi mukomokwa, uchi hala". <sup>11</sup> Linu chayenda kwiwulu hape ni kukagamona chinkwa ni kulya. Hamana kuwamba nabo inako kutwala chitengu, cha yenda. <sup>12</sup> Chibakaboza muswiswi nahala mi babalizuwi neza. <sup>13</sup> Iswe tubene tubayendi habusu bwa Paulusi ni Chikepe kakuzuha kuya kwa Assos, kutuba kaleleli kukahinda Paulusi. Iye mwabalikusakila bobulyo, kakuti abakulelete kuyenda yahasi. <sup>14</sup> Linu hakatuwana kwa Assos, chitwa mulonga muchikepe ni ku yenda kwa Mitylene. <sup>15</sup> Linu chitwa kazuha kwateni ni kukasika izuba lichilila chibabambene ni chida cha Chios. Izuba lichilila chitwa kakwata chida cha Samos, lichilila izuba chitweza mumuleneñi wa Miletus. <sup>16</sup> Kakuti Paulusi iyemwine chabakuzezete kuzuha kuhitilila Ephesus, kuti kazi akahindi inako mwa Asia; kakuti abakuhwelele kukaba kwa Jerusalema izuba lye Pentakota, heba kuti ni kuwoleka kuti atende bulyo. <sup>17</sup> Kwa Miletus natumina bakwame kwa Efese ni kusupila kwakwe bakulwana bekeleke. <sup>18</sup> Habakeza kwali, chawamba kubali, "inwe mubene mwizi, kuzwa izuba lyamakalo kukulyata itende lyangu mwa Asia, inako iniba hindi ninina nenwa. <sup>19</sup> Niba zwili habusu ninisebeleza Simwine mubufokoli bwaboko ni zisozi, ni mumasukuluko aba tendahali kwangu bakeñi chakulelwa kwa Majuda. <sup>20</sup> Mwizi kuti kananibaboleli mumasule kukutumusa kwenu zintu zonse zina ituso, ni muni bakumulutila mwichisi ni kuyenda izubo ni zubo. <sup>21</sup> Mwizi muniba kukalimela Majuda ni Magerike kuti babakele kwe Ireeza ni kuzumina kwe Simwina Jesu. <sup>22</sup> Mihanu, mulole, ni yenda nilinyongamine mu Luhuhu Lujolola kwa Jerusalema, ninisezi zintu ziwola kukatendahala kwangu kuna, <sup>23</sup> konzi Luhuhu Lujolola nji paki zangu muleneñi uhi no uhi kuwambwa kusuminwa ni manyando anilibelele. <sup>24</sup> Kono kanihupuli kuti buhalo bwangu bwabutokwa kwangu, kuti ni mane isiyano wangu ni misebezi iniba tambuli kuzwa kwa Simwine Jesu, kuba ipaki yeñusa lyabutokwa lyachisemo cha Ireeza. <sup>25</sup> Mihanu, mulole, nizi kuti inwe mubone, banibayendeli kukaluta za mubuso, kesenimubone ipata yangu hape. <sup>26</sup> Hakwina bulyo ni mipakila mwelinu izuba, kanina mulandu wamalaha a muntu zuhi no zuhi. <sup>27</sup> Kakuti kena nibaboleli mwisule kukutumusa kwenu mulelo wose wetato ye Ireeza. <sup>28</sup> Hakwinabulyo mulitokomele inwe mubene, ni mitapi iyo Luhuhu Lujolola luba mitendi baokameli bayo. Mutokomele kuba balisani bekeleke ye Ireeza, yabawuli kamalaha akwe. <sup>29</sup> Nizi kuti chinayenda, bantuhu bakali kabeze benjile mukati kenu, mi keti nibeze bafule mitapi inse. <sup>30</sup> Nizi kuti niheba mukati kenu mubene bamwi bakwame kabeze nikwiza kuwamba zintu ziwula bamwi ikweta, kutendela kuti bazwise balutwana kubali. <sup>31</sup> Chobulyo mutokomele. Muhupule muzilimo zotatwe kuti kana ni basiyi kulaela zumwi ni zumwi wenu ni kulila musihali ni masiku. <sup>32</sup> Mi hanu nimiha kwe Ireeza ni kulinzwi lyakwe lya chishemo, ili yowola kumikoza ni kumiha kuyola mukati

kabo balukite. <sup>33</sup> Kana nibalakazi isilivera yamuntu, ni ngauda ni zizwato. <sup>34</sup> Inwe mubene mwizi kuti aa mayaza abaniwanisi zinisaka ni zibasaka abo babena name. <sup>35</sup> Muzintu zose nibakumiha mutala mumu wolela kutusuza basaliwoleli kakusebeze, ni mumuwolela kuhupulela manzwi a Simwine Jesu, manzwi oa abawambi: “Kwina imbuyoti zingi mukuha kuzamba kuhewa.” <sup>36</sup> Hamana kuwamba mweyonzila, chakubama ni kulapela nabo bonse. <sup>37</sup> Bonse babalili hahulu ni kuwila Paulusi mwisingo ni kumuchuchuna. <sup>38</sup> Babawililwe hahulu chakuhitliza chebaka lyazabawambi, ziti kete nibabone bulubi bwakwe hape. Linu chibamusindikiza kuchikepe.

## Inkauhanyo 21

<sup>1</sup> Hatukahuhana kuvali ni twazuha, tuvahindi inzila iya kumulefi wa Koso, mi halizwa nitwaya kumulefi wa Rode, mi hatuzwa aho nitwaya kumulefi wa Patara. <sup>2</sup> Linu hatuwana chikepe chibali kuya kwa Fenisia nitwechila kuchili ni kuzuha. <sup>3</sup> Linu hatusika muchida cha Siperi, nitwavola kuvumonso, nitwazuha kuya kwa Siria, mi nitwakasikila kumulefi wa Tire, mukuti njoko chikepe kuchivali kulukela kukalongwela zivya. <sup>4</sup> Hatuwana valutwana, nitwekala mazuva amana iyanza ni obele. Ava valutwana ni vati kwa Paulusi chenzila ya Luhuhu Lunjolola kuti senzi akalyatiki itende lyakwe mwa Jerusalema. <sup>5</sup> Linu hatumana mazuba, nitwakatuka ni kuyenda mumusipili wetu. Vonse ni banakazi ni bana vabo, ni vatusindikeza mane ulu hatukazwa mumulefi. <sup>6</sup> Linu nitwakuvama helizo kulapela ni kulilaeza navo. Nitwakechila muchikepe abo havavola kumunzi. <sup>7</sup> Linu hatumana musipili wetu wa kwa Tire, chitwakasika kwa Ptolemais. Uko nitwakalumelisa vaakwakwetu ni kwikala nabo izuva lyonke. <sup>8</sup> Izuba lichilila nitwayenda kwa Sesarea. Mi nitwakenjila munzuvo ya Filipi, yo kutaza iñusa ilotu lya Jesus, yabali zumwi wavantu vama iyanza ni vuvele, imi nitwekala naye. <sup>9</sup> Linu uzu mukwame avena vana vone vavakazana vaseni kwiziva kale vakwame vavali vatanikizi. <sup>10</sup> Sina hatuvena hateni mazuva alikene, chikwakeza mutanikizi yavali kuzwa kwa Judea yavali kusumpwa Agabusi. <sup>11</sup> Nakeza kwetu mi nahinda lutunga lwa Paulusi. Chal- isumina mayanza ni matende akwe, “Vovulyo muluwambila Luhoho Lujolola, “mi vovulyo mweti nivamusuminine vantu vamwa Jerusalem solunu lutunga, mi muva mutamvike mumayaza avantu vamasani ang.”” <sup>12</sup> Linu hatuzuwa izi zintu, tuvonse ni vantu vavakuhala mwe cho chivaka nitwa kumbila Paulusi kuti sanziayendi kwa Jerusalema. <sup>13</sup> Imi Paulusi cheteva, “Mukwete mutenda nzi, kulila ni kuni nicisa kunkulo? Mukuti nilitukiseze, isiñi kusuminwa bulyo, kono ni kufwila izina lya Simwine Jesu mwa Jerusalema.” <sup>14</sup> Sina Paulusi kanaavalikusaka kukukuwezwa, nitwasiya mi nitwati, “Kutendwe chisakwa ni Simwine.” <sup>15</sup> Aa mazuva hamana, nitwahinda zivya zetu ni kuya kwa Jerusalema. <sup>16</sup> Linuhe vamwi valutwana vavali kuzwa kwa Sesara nivayenda naswe. Nivaleta ni mukwame yosumpwa Mnason, mukweme uzwa kwa Siperi, mi nivakeza ni mukwame, mulutwana wamatangilo utuola kwikala naye. <sup>17</sup> Ha chitusika mwa Jerusama, vaakwakwe ni vatutamvula chakusanga. <sup>18</sup> Izuva lichilila Paulusi na yenda naswe kwa Jakobo, ni bakulwana bonse babena hateni. <sup>19</sup> Ha chivamana kuvalumelisa, navavihela chimwi ni chimwi chintu chava

tendendwa ni Ireez muvamasu angu cha mutendo wakwe. <sup>20</sup> Linu hava izuwa, ni vatamba Ireeza, mi nibati kwali, “Ubwene muukwetu, zikiti zongai ziva zumini mukati ka Majuda. Vonse vava kozeze kuvika mulao. <sup>21</sup> Vava wambilwa chako, kuti uluta Majuda vonse vahala mumasi angu kuti va kane Mushe, nikuti uvava wambila kuti kanzi batwali vana vavo kumupato ni kuse chilila chisiyankulu chetu. <sup>22</sup> Tuwola kutendanzi? Mavazuwe chokusima kuti uvakezi. <sup>23</sup> Mukuti utende zitu kuwambila hanu: Twina vakwame vone vava likonki chakuha isepiso. <sup>24</sup> Hinde ava vakwame ni kulijoloza navo vulyo, ni kuva lihila insinyehelo zavo, nikuti vangunke mitwi yavo. Kokuti vezive kuti zintu zivava wambilwa chako kazina vuniti. Muvalitute kuti nawe vulyo mwichilila mulao. <sup>25</sup> Kono kuamana ni vamasu angu vavazumini, tuvañoli ni kuvaha intayelo kuti vali zwise kuzintu zihailwe vazimu, kumalaha, niziva siniwa, niza vuliyendezi.” <sup>26</sup> Linu Paulusi nahinda vakwame, imi izuva lichilila nalijoloza iyemwine ni kujoloza avo vakwame, nikuya mwi templele, kukatumusa mazuva akulijoloza, kukasikila hakuka hewa chitavelo kuzumwi ni zumwi wavo. <sup>27</sup> Linu mazuva akwana iyanza ni obele havena hafihhi ni ku hamana, vamwi Majuda vazwa kwa Asia ni vavona Paulusi mwi temple, imi niya sangisa chinavungi chonse, niva vika mayanza avo hali. <sup>28</sup> Vavali kuhuwa, “Vakwame va Isilaele, mutu tuse. Uzu njimukwame yoluta vaantu vonse kumwi ni kumwi zintu zilwisana vaantu, mulao ne chinu chivaka. Kwandahezo, avaleti Magerike mwi Tempele imi vava silafazi ichi chivaka chijolola.” <sup>29</sup> Mukuti chivava vvene kale Trofimosi Mufalisi naye mumuleneñi, imi nivazeza kuti Paulusi waka muleta mwi tempele. <sup>30</sup> Onse muleneñi uba sangite, imi vonse vantu nivatiya hamwina ni kukakwata Paulusi. Chivaka mukwitulwila kunze ye temple, mi ziyazo nize yaliwa haho. <sup>31</sup> Sina havava kulika kumwihaya, iñusa nilyeza ku muyendisi wa vaganteli kuti Jerusalema yonse nyungana. <sup>32</sup> Haho vulyo nahinda masole ni balauli wa masole niku tilila hansi kuchi navungi chonse. <sup>33</sup> Linu vantu hava vona muyendisi wa masole ni masole, niva siya kundama Paulusi. Linu muyendisi wa masole cheza kuwonda Paulusi, imi nalaela kuti a suminiwe ni mawenge obele. Chavuzwa kuti njini imi chinzi chava tendinzi. <sup>34</sup> Bamwi muchina vungi vava kuhuleza chintu chimwi. Sina muyendisi kana ava kuwola kuwamba chimwi chevaka lyelata, nalaela kuti Paulusi aletwa munzubo ikolete. <sup>35</sup> Linu heza kutantilwa, Masole vava mukatwile kakuti chinavungi chiva kalihite. <sup>36</sup> Mukuti chinavangi cha vantu chiva ve chilile niva kuhuweleza. “Muzwe mumusiye!” <sup>37</sup> Linu Paulusi havena hafwihi ni kwi njizikwa munzubo ikolete, chati ku muyendisi yomanisa, “Ni woli kuwamba chimwi kwako?” Muyendisi chati, “U wamba chigerike? <sup>38</sup> Kena njewe zuna Muegepita, yaba letete inkondo imi uva hindi zikiti kiti zonee zava sandukili kuzitwala munkanda?” <sup>39</sup> Paulusi chati, “Ni Mujuda, ni zwa mumuleneñi wa Tarese mwa Silisia. Ni muzaki wa muleneñi u sephala, niku kumbila, kuti uni zuminine ni wambe ku vantu.” <sup>40</sup> Lina muyendisi hamuha chivaka, Paulusi cha zimana hatantilwa ni kusovola vantu cheyanza, Hakuva tontwile ahulu, nawamba kuvali muchi Heberu, chati,

## Inkauhanyo 22

1-2 “Baakwetu ni batayo, mutekeleze buikalabelo bwangu bweti nihe hanu kwenu. Linu ikunga halizuwa Paulusi nawamba kubali mumushobo wa Chiheberu, nibatotola zii. Nazwilahabusu nati, 3-5 “Ime ni Mujuda, yabahwizumukilwa mwa Terese yamwa Silisia, kono nibawani ituto mounu muleneñi hamatandabalilo a Gamaliele. Nibarutwa chamilao ikolete yenzila ibeshetu betanzi. Nitukufalelwe za Ireeza, mane sina njinwe mubonse sunu. Nibasukululi cheyi Nzila (babalikuzumina Linzwi la Ireeza) kutwala ifu; nibasumini bonse bakwame ni banakanzi ni kubenjiza mutolongo. Muprisita mukulwani ni bakulwana bonse bawola kuba ipaki kuti nibaa-muheli mañolo abalikuzwa kubali abakwetu ba Damasika, kuti niye kwateni. Nibali kukaleta basuminwe kuzwa kwa Jerusalema abo baseyi Inzila (babalikuzumina Linzwi la Ireeza) kuti njebahewe mulandu. 6 Kubatendahali buti kuti hanibena mulwendo nili hembali ni Damasika, izuba nilina hewulu lamutwi inakozana nikweza mumuni uzwa kwiwulu ubezi kumunika kunizimbuluka. 7 Nibawili hansi ni kuzuwa inzwi liti kwangu, 'Saule, Saule, unisukulwilazi?' 8 Nibetabi, 'Njiwe ni, Simwine?' Nati kwangu, 'Njime Jesu wa Nazareta, yokwete kusukulula.' 9 Banibena nabo bababoni mumuni, kono kanababazuwi inzwi liyabali kuwamba kwangu. 10 Ninati, 'Niyelele kutenda nzi, Simwine?' Simwine nati kwangu, 'Katuke ni kuyenda kwa Damasika; kwateni uko kokawambilwe zonse zotameha kutenda.' 11 Kana nibali kubona chebaka labukali bwalumonyi luna, chobulyo ninayenda mwa Damasika ninietelwe chamyanza abana banibena nabo. 12 Kwateni uko ninakasangana ni mukwame yosupwa Ananiasi, mukwame yotokomele chakuya chomulao ni yopakwa ni majuda bonse babali kuhala mwecho chibaka. 13 Abezi kwangu, kwiza kuzima hembali name, mi nati, 'Saule mwinakwetu, amuhele kubona kwako.' Mwihoza iswana ninamubona. 14 Kuzwaho nati, Ireeza ubeshetu betanzi abakusangi kuti wizibe itato yakwe, ubone Yonjolwele, ni kuzuwa linzwi lizwa mukaholo kakwe mwine. 15 Mukuti kobe ipaki yakwe kubakwame bonse kuchobaboni ni kusuwa. 16 Imi linu chinzi holindile? Katuke, kakolobezwe, ni kukasamba zive zako, nosupa izina lyakwe.' 17 Kuzwa hanikabola kwa Jerusalema, mi hanibakwete kulapela mwitempele, kubatendahali kuti ni bahewa ipono. 18 Nibamuboni naniwambila kuti, 'Hwele ni kusiya Jerusalema kapili, mukuti keti ni bazumine bupaki bwangu kwako.' 19 Ninati, 'Simwine, abo bene bezi kuti nibenjizi mutolongo ni kukaba babali kuzumina mwizina lyako mwisinagoge yimwi ni yimwi. 20 Mwiwiza hakuitika malaha a Setefani ipaki yako, name bulyo nibazimene habumbali ninizumina, imi nibali kumamela zizabalo zabana babali kumwihaya.' 21 Kono nati kwangu, 'Yende, mukuti kanikutumine kule, kubantu bamasi angi.' 22-24 Bantu babamuzuminini kuwamba mane kwiza kusika heyo inako. Kono kuzwaho nibahuweleza hakando nibati, “Muntu yoswana nozo azwisiwe mukanda: mukuti kakuyelele kuti ahale.” Hababakwete kuhuweleza, kuzula ni kusohela kuna zizabalo zabo, ni kuganwina ibu muluhuhu, muyendisi mukulwana wamasole nichalaela kuti Paulusi aletwe muzubo ikozezwe. Abal-aeli kuti abuzwe nasupiwa, kokuti iye mwine alizibile kuti chinzi habahuweleza chakwe bulyo. 25-26 Linu heti chibamusumina kuti

ashupwe, Paulusi nichati kumuyenzi wamasole yabazimene hembali naye, “Kena mulao kwako kushupa mukwame yeli Muroma nosaatulwa?” muyenzi wamasole hazuwa bulyo, abayendi kumuyenzi mukulwana wamasole nakamuwambila nati, “Chosaka kuchita chinzi? Mukuti uzu mukwame muzaki wa Roma.”<sup>27-29</sup> Muyenzi wamasole mukulwana abezi kwali namucho, “Honiwambile, kana umuzaki wa Roma?” Paulusi nati, “Ii”. Mulauli mukulwana wamasole netaba, “Ibali chakuliha bulyo mashelefi mangimangi chibaleti kuti niwane buzaki bwekanda.” Kono Paulusi nati, “Nibapepwa ninili muzaki wa Roma.” Kuzwaho bakwame babali kuyelele kumubuza nibamusiya chabuhweluhwelu. Muyenzi mukulwana wamasole naye abakutite, hazuwa kuti Paulusi ibali muzaki wa Roma, mukuti abamusimine kale.<sup>30</sup> Mwizuba litatama, muyenzi mukulwana wamasole abali kusaka kwiziba buniti kuamana ni zibanyasa Paulusi Majuda chazo. Chobulyo namusumununa mumawenge mwabasuminwe ni kulaela maprista bakulwana ni manduna kuti bakopane hamwina. Linu naleta Paulusi ni kumuzimika hakati kabo.

## Inkauhanyo 23

<sup>1</sup> Paulusi na lolelela vayendisi benkuta nikucho, “Bakwangu, niva hali havusu bwa Ireeza mu mihupulo yangu milotu, kuleta sunu hanu.”  
<sup>2</sup> Mupurisita mukulwana cha laera avo vava zimene naye, kumu wopa kumulomo.  
<sup>3</sup> Imi Paulusi nacho kwali, “Ireeza mwaku wope nawe, iwe limota vasitwe ku tuva. Wikere chakuni watula chomulao, mi hape uni laera kuti vani vakule, ku lwisanisa mulao?”  
<sup>4</sup> Avo vava zimene hembali nivati, “Njimona mumu tukila muprurisita Mukulwana wa Ireeza vovuti?”  
<sup>5</sup> Paulusi nacho kuti, “Kana niva kwizi, Bakwangu, kana nivesi kuti mupurisita mukulwana. Mukunti kuñioletwa, “Kanji mu wambi vuvi vva muyendisi wa vaantu venu.”  
<sup>6</sup> Cwale Paulusi ha vona kuti imwina imbali ye nkuta vavali masaduki ni vamwi vafalisi, cha wamba chaku nyamuna liinzwi munkuta, “Bakwangu, ni mu Falisi, mwana wabafalisi. Ivaka lya kuti nina insepo yakuti kuti vafu kavavuuke ini atulwa chayo”  
<sup>7</sup> Ha wamba vulyo, inkani chiza tanga mukati kavaFalisi ni MaSaduki, imi vuungi nivwa liyaba.  
<sup>8</sup> “Mukuti maSaduki vacho kuti kakwina kuvuka kuva vafwile, kakwina mañilo, kakwina luhulo, kono baFalisi va zumina muzonse.”  
<sup>9</sup> Cwale chi kweza ilata ikando, ni vamwi vañoli vawila kuvaFalisi niva ziima kukaanana, nivati, “Katu wani chifosahele kozu mukwame, kwina vule hamwi Luhuhu kamba Iñilo njilya wamba kwali?”  
<sup>10</sup> Hakuva ni nkani inkando, muyendisi wenkondo, ava tite kuti Paulusi mwa halolwe vusasa ku vali, imi cha laera valwi venkondo kuya hansi ni kumu twala chenkaani ku mu zwisa kuvenkuta, ni kumu leta munzuvo ikolete.  
<sup>11</sup> Masiku e chilila Ireeza na ziimana hembali naye, nikumuti, “Siye ku tiya, mukuti uva paki vuniti kachangu mwa Jerusalema, imi uka pake vulyo ni mwa Roma.”  
<sup>12</sup> Haliza ku ñatula, maJuda vamwi chiveza hamwina, niku sumpila chikuto havali veene: chivati, kete valye kamba kunywa chimwi konji chive haya Paulusi.  
<sup>13</sup> Vavali kuhitilila amakumi one vava tendi uwu mulelo.  
<sup>14</sup> Nivayenda ku mupurisita mukulwana, ni kuvakulwana niku kawamba, “Chitwalivika tuvene mu chikuto chikando, kusa lya chimwi konji chitwe haya Paulusi.  
<sup>15</sup> “Cwale, hanu, mu siye inkuta i wambile muyendisi wenkondo,

nikuka muleta kwenu, uvu musaka kusakisisa indava zakwe, imi iswe, mutuve kulitukiseze kumwi haya naseni kusika kunu.”<sup>16</sup> Kono mwana'nchizye wa Paulusi wa chiswisu naa zuwa kuti vava lele chaku lindila, imi ava yendi kukenjila munzuvo isilelezwe nikuta Paulusi,<sup>17</sup> Paulusi cha kumbila zumwi wa vaganteri nikucho, “Mutwale uzu mukwame kuva yendisi ve nkondo mukuti wina chimwi kawola kumu wambila.”<sup>18</sup> Imi niva muhinda mushisu nikumu twala kumuyendisi we nkondo ni kukacho, “Paulusi musuminwa wani sumpila kwali, ni kuni takuti nilete uzu mushisu kwako. Wina cha saka kuwamba kwako.”<sup>19</sup> Mukulwana we nkondo na muhinda kwiyanza ni kuya kuchivaka chi li ungwile ni kumu vuza, “Chinzi cho swanela kuni wamba kwangu?”<sup>20</sup> Mulombwana chamuwambila, “Majuda bazumizana kuti bakukumbile utwale Paulusi izona kukuta, ubu basaka kukabuza chakuya chenako ye indaba yakwe.”<sup>21</sup> Kono kazi ubahi ye, kakuti kwina bakwame bahitilila makumi one bamubandamine. Ba bika chikuto hewulu lyabo, kense balye kapa kunywa hesi chiba mwihaya. Niheba hanu bali ndukiseze, balindile kuti uba zuminine.”<sup>22</sup> Imi mupurisita mukulwana nasiya mushisu kuliyendela, hamana kumu laera, “Kanji uwambili nangati yeke kuti wa wamba izi zintu kwangu.”<sup>23</sup> Cha sumpila kwali vakwame vovere nikuti, “Uhinde valwi venkondo vachita myanda yovere vali tukiseze kuyenda konji kwa Sizeriya ni vatanti ve mbizi vena makumi achita myanda yovere hape, niva milinga vena myanda yovere. Mumu nyamuke hakati kamasiku.”<sup>24</sup> Naava laera hape ku lukisa imbizi Paulusi yawola kwichila hateni, ni kumu twala siinte kwa Felekisi muvusisi.<sup>25</sup> Imi avañoli iñolo chovuti;<sup>26</sup> “Kilaudiyasi Laisiyasi kuyo tompeha muvusisi Felekisi, intumeliso.”<sup>27</sup> Uzu mukwame ava suminwa kuma Juda, imi ava kusaka kwi hayiwa kuvali, hani keza havali ni masole venkondo, nikumu haza, kuzwa hani ziva kuti Muroma.<sup>28</sup> Nivaku saka kwiziva ivaka hava zekiswa, cwale cina mutwala kunkuta.<sup>29</sup> China lituta kuti ukwete ku zekiswa kuamana che mpuzo za mulao wavo veene, ni kuti kakwina zimusumina kutwala ku lufu kamba ku pika.<sup>30</sup> Imi ni kwezibahazwa kwangu kuti kuveena vusandukili kozu mukwame. imi namu tumina hahanu kwako, ni ku laera valwisi vakwe ku leta zivamunyaza chazo havusu vwako. Shale sinte!”<sup>31</sup> Cwale valwi venkondo chiva kuteka intaero zavo: niva hinda Paulusi nikumu leta masiku kwa Antiporisi.<sup>32</sup> Izuva lichilila, vuungi vwa valwi benkondo nivasiya vantanti ve mbizi kuti vayende naye imi avo vene niva voala kuchivaka chisilelezwe.<sup>33</sup> Vatanti vembizi hava sika mwa Sizeriya, niva leta iñolo kumuvusisi, niku tambika Paulusi kwali.<sup>34</sup> Muvusisi hamana kuvala iñolo, na vuuzwa kuti Paulusi uzwa muchikiliti nzi; he ziva kuti uzwa kwa Sisilia,<sup>35</sup> Nati, “Muni zuwe chokwizula vazekisi vako chiveza kunu,” imi cha laera kuti a vikiwe mumuleneñi wa mubuso wa Heroda.

## Inkauhanyo 24

<sup>1</sup> Hakumana mazuva akwana iyanza, Ananiyasi mulena wama-pulisita, nivamwi vakulwana, ni mutoroki yosumpwa Teretulo, vava yendi ko. Ava vakwame vava leti mulandu kuhambiliza Paulusi kumu vusisi.<sup>2</sup> Linu Paulusi hazimana havusu vwa muvusisi, Teretulo chatanga kumu hambiliza imi chati kwa musisi,” Chevaka



lyako twina inkoko inkando; imikuvona kwako kuvaleti kuzakwa chinja mwinkanda yetu; <sup>3</sup> ku litumela kwetu konse tuamuhela zintu zonse zopanga, ukondise Felekisi. <sup>4</sup> Ili kuti senzi niku wiki mwintolongo hape ni kamuta, ni ku kumbila cha vufuhi uniteke cha kuluka. <sup>5</sup> Kakuti twawana uzo mukwame kuti njo memeza yoletiseze majuda mwinkanda yonse kusandukila muvuso. Njyena muyendisi wa Nazarene i keluhite. <sup>6</sup> Ava liki kusitatalisa itempele; cwale cha suminwa. Imi tuva kusaka kumu atula che nkatulo yetu. <sup>7</sup> <sup>8</sup> Kono muyendisi chasika chenkaani chivamuhinda munza etu, hamuvuza Paulusi heyi indava, ni nwe kamuwole kulituta ka chitupa hambilizi kacho.” <sup>9</sup> Majuda nivakopene vava hambilizi Paulusi, navo, michivamba kuti izi zintu ivali kusakusimwa. <sup>10</sup> Kono linu muvusi hasumpa Paulusi kuti zawambe, Paulusi chetava, “Ni zuwisisa kuti kazilimo zingi uvali umuatali weyi inkanda. imi cwale nilitule kulitoloka kwaako. <sup>11</sup> U wola kuvonisisa kuti kena kuva hitilili mazuva akwana ikumi ni wovele chinga niva yendi kukalapela mwa Jerusalema; <sup>12</sup> imi linu havaniwana mwi kereke, kana niva kanani ni muntu, kana niva susuezi chichava, ni haike mumasinagoge, kapa mumuleñi; <sup>13</sup> imi hape kava woli kuleta vupaki kwenu vwe ndava zivava hambilizi hewulu lyangu hanu. <sup>14</sup> Kono ni litumelele izi kwenu, kakuya che nzila iva sumpa kukeluha, mwinzila iswana ni seveleza Ireeza uva kuku wetu. Ni sephala ku zonse za mulao ni ziva ñolwa kuvaporofita. <sup>15</sup> Ni na insepo iswana kwa Ireeza, ili njava vakwame naavo muvayilindile, kukeza kuvuka kwa vaantu vafwile, kuvulukite ni vasalukite; <sup>16</sup> imi mweezi, ni tenda kuti nive nizwalo nikusa nyazahala havusu vwa Ireeza ni vaantu muzintu zonse. <sup>17</sup> Linu hakuhita zilimo zingi china leta intuso kwi nkanda yangu ni impo ya masheleñi. <sup>18</sup> Lyahanu ha nitenda izi, vamwi kumaJuda vazwa mwa Asia chivani wana ni joloza mikiti mwi kereke, insiñi cha chichava kapa chakukamba. <sup>19</sup> Ava vakwame vaswanela kwiza havusu vwako hahanu mi zeva wambe zivani lwisikiza, heva vena chimwi. <sup>20</sup> Heva njovulyo, ava vakwame vaswanela kuwamba vuvi vuva wana kwangu hana zima havusu vwe nkuta ya majuda; <sup>21</sup> haisi konji kuti i amana nechii chintu chonke chini vawambi chakutumusa hanivazimene mukati kavo, kuamana nikubuka kuva fwile kuni kwete kuatwilwa sunu kwenu. <sup>22</sup> Felekisi ava kwizi kuamana ni nzila, imi cha twala havusu intomelo yakwe. Chawamba, “inako ni nako Lysiyasi muyendisi wa masole hakeza hansi kuzwa kwa Jerusalema, kani atule muzeko wako.” <sup>23</sup> Linu mukulwana chalaela mulauli kuti a gantele Paulusi, kono uswanela kumu vavalela, mi kakwina yo swanela kukanisa valikani vakwe kumutusa kapa kumupotela. <sup>24</sup> Hakuhita mazuva, Felexisi chavola ni Durusicila mwihyavwe, wa mujuda, imi chatumika Paulusi imi avazuwi kwa kuamana nintumelo kwa Jesu Keresite. <sup>25</sup> Kono Paulusi havali kulikananisa naye kuamana ni, kuliwendisa umwine, ni inkatulo ikezite, Felekisi chezilwa kutya mi chati, “Muyende uko hanu. Kono chi na wana chivaka chinekalakala, ka nimi sumpe.” <sup>26</sup> Chenako iswana avali kuzeza kuti Paulusi kamuhe masheliñi, inako ni nako ava kutumina kwakwe niku wamba naye. <sup>27</sup> Kono linu zilimo zovele hazihita, Posiyasi Fesitasi cheza kuva muvusi hakuzwa Felekisi, kono Felikisi ava kusaka kuti asakahale ahulu kumaJuda, cwale chasiya Paulusi kuti azwile havusu mwi

ntolongo.

## Inkauhanyo 25

<sup>1</sup> Hanu, Fesitasi avengili mu chikiliti, mi hakuhita mazuva odatwe, ava yendi ku kazwa kwa caesariya mbwita kwa Jerusalema. <sup>2</sup> Mu prisita mukulwana ni machaziva va majuda vava leti inyazo zavo kuamana ni Paulusi kwa Fesitasi, mi vava wambi chokukoza kwa Fesitasi. <sup>3</sup> Mi vava kumbili Fesitasi chisemo kuamana ni Paulusi, kuti awole kumusumpila kwa Jerusalema njokuti va mwihaye mukati kenzila. <sup>4</sup> Kono Fesitasi avetavi kuti Paulusi avali musuminwe mwa kaeseria, mi kuti iye mwine chava kwina hafuhi ni kuvola kwateni. <sup>5</sup> “Cwalehe, avo va wola, cha wamba, vaswanela kuyenda kwateni oko naswe. Haiva kwina chi fosahela ni mukwame, muswanela kumunyasa.” <sup>6</sup> Ha mana kwikala mazuva amana iyanza ni minwe yone kapa mazuva e kumi, chayenda kwa kaisera. Mi kwi zuva lyi chilila, chekala mu chipula che nkatulo ni kulaela Paulusi aletwe kwali. <sup>7</sup> Heza kusika, ma Juda vakwa Jerusalema vava kuzimene hembali, mi vavaleti inyazo mikando mingi isena ivava kuwola ku paka. <sup>8</sup> Paulusi chalizimanina iye mwine niku wamba, “kakwina chinapanga chifosahela kuamana ni mulao wa ma Juda, kapa kuamana ni tempele, kapa kuamana ni caesar.” <sup>9</sup> Kono Fesitasi avakusaka ku wana chisemo ku majuda, mi he chetava Paulusi niku wamba, “Usaka kuyenda kwa Jerusalema mi nikuka atulwa kwangu kuamana nezi zintu kuna?” <sup>10</sup> Paulusi chawamba, “ni zimana havusu bwe chipula che nkatulo ya caesar hani swanela kuka atulelwa. Kena niva fosekezi mujuda, sina mo wizivile hande nenwe. <sup>11</sup> Kono haiva niva fosi, mi niva pangi chiswanela ifu, kani kani kufwa, Kono haiva kuhambiliza kwavo kahena, kakwina yata ni tambike kuvali. Nisumpa caesar.” <sup>12</sup> Fesitasi hamana kuwamba ni venkuta, che tava, “wa sumpa caesar, moyende kwa caesar.” <sup>13</sup> Hanu hakuhita mazuva, Murena Agrippa ni Bernice chiveza kusika kwa caesarea kwiza kumupotela Fesitasi chokusepahala. <sup>14</sup> Hachamana kwikala uko chamazuva mangi, Fesitasi cheza kuzala indava ya Paulusi ku Murena; cha wamba, “mukwame zumwi ava siiwa ku masule kunu nji Felixi sina suminwa. <sup>15</sup> Hani vakwina mwa Jerusalema, mu prista mukulwana ni va kulwana va majuda vavaleti milandu kuamana uzu mukwame kwangu, mi vava kumbili inkatulo hali. <sup>16</sup> Kwezi nivetavi kuti kena mulao ni Maroma kutambika muntu uvu chisemo; kono, muntu yo hambilizwe uswanela kuhewa chivaka chokuyonana navo va muzekisa mi niku lizimanina mu mizeko yakwe. <sup>17</sup> Cwale aho, hava keza hamwina kunu, mi kena niva lindizi, kono izuva lichilila nive kali mu chipula che nkatulo, mi niku laela mukwame aletwe kwangu, <sup>18</sup> Vahambilizi hava zimana niku muhambiliza, seke ni tele kuti kakwina ku milandu iva muhambiliza yo vutokwa. <sup>19</sup> Kono, kuvavi niku salizuwa kuamana ni ntumero zavo ni kuamana ni Jesu yavafwi, uzo Paulusi wata kuti uhala. <sup>20</sup> Niva kuziyelehete kaku sakisisa iyi ndava, mi niva muvuzi heva uwola kuyenda kwa Jerusalema kuka atulelwa kwateni kuamana nezi zintu. <sup>21</sup> Kono Paulusi hava sumpwa kuka vikwa mu mpavalelo ye nkatulo yo Murena, china mulaela kuti akavikwe haisi hasa mutuminwe kwa Caesar.” <sup>22</sup> Agrippa cha wamba kwa Fesitasi, “seni saka neme kuteka koku mukwame.” “Izona,” Fesitasi cha wamba, “ko muzuwe.” <sup>23</sup> Cwale

hezuya iyi chilila, Agrippa ni Bernice vavakezi ni mukiti mukando; vavakezi mumakopanelo ni mapokola niva kwame va sepahala vamwi ve ntolopo. Mi Fesitasi ha wamba intaelo, Paulusi avaletwa kuvali. <sup>24</sup> Fesitasi cha wamba, “Murena Agrippa, nenwe vakwame vena umu naswe, mubwene uzu mukwame; iveza ku zekisa ma juda vangi kwangu mwa Jerusalema no kunu konse chiva huweleza kwangu kuti kasiswaneli kuhala. <sup>25</sup> Niva lituti kuti kakwina ma fosisa a panga aswanela ifu; kono kakuli ava sumpi ku murena, niva atuli kuti va mutumine. <sup>26</sup> Kono kanina chintu chovuniti cho kuñola ku murena. Kelyi vaka, na muleta kwako, sihulu kwako, Murena Agrippa, njokuti nive ni chimwi chingi chokuñola kuama iyi indava. <sup>27</sup> Kaho ku voneka kusava ni vaka kutumina musuminwa mi hape niku sawamba mulandu hakwe.”

## Inkauhanyo 26

<sup>1</sup> Linu Agiripa chawamba kwa Paulusi, “Uwola kuli wambilila.” Lyahanu Paulusi cha wotolola iyanza lyakwe nikuli sileleza. <sup>2</sup> “Nilizuwa kuti nilukuluhite Mulena Agiripa, kutenda indava yangu havusu vwako sunu hewulu lyazintu zonse zivava nihambilizi ma Juda; <sup>3</sup> sihulu, kakuli wichaziva wechizo cha ma Juda ni mpuzo. Linu ni kumbila kuti unizuwe chentokomelo. <sup>4</sup> Cheniti, ma Juda vonse vezi muniva halili kuzwa kuvuhwile vwangu mwi nkanda yangu ni mwa Jerusalema. <sup>5</sup> Vavanizi kuzwa kuma tangilo vawola kuzumina kuti nivahali neli ni mu Falisi, yavali wachiyemba ahulu cha chilumeli chetu. <sup>6</sup> Lyahanu nizimana hanu kuti ni atulwe kakuli ni lolete che nsepiso yaba tendi Ireeza ku veshetu. <sup>7</sup> Cheyi insepiso masika etu ekumi ni tobele vava lisepise kutambula niva kwatilile kulumbeka Ireeza masiku ni musihali. Nji cheyi insepso, Simwine mukando Agiripa, Juda chingi ivanihambiliza. <sup>8</sup> Chinzi zumwi kwenu hazeza kuti kulotu kuti Ireeza uvusa vafu. <sup>9</sup> Ka imwi inako nivazezi kuti niswanela kutenda zintu zingi zilwisanisa izina lya Jesu wa Nazareta. <sup>10</sup> Niva tendi izi mwa Jerusalema. Niva sumini valumeli vangi mwi ntolongo cha maata aniva wani ku mupurisita mukulwana, have haiwa, nivali kuvika inketisa zangu h havo. <sup>11</sup> Niva kuvaha inkoto mwi nako zingi mu ma Sinagoge ni kulika kuva hambiliza kuti vanyanse. Nivava vengeli ahulu nikuva nyandisa nanga mu muleneñi muvasazwi. <sup>12</sup> Anivali kupanga ichi, nivayendi kwa Damaseka ni maata ni ntaelo zizwa kumu purisita mukulwana; <sup>13</sup> linu mwi nzila, musihali, Simwine mukulwana, nivavoni iseli livakuzwa mwiwulu liva kuvenya kuhita izuva imi livatondezi kwetu niva kwame vani va kuyenda navo. <sup>14</sup> Twense hatuwila hansi, niva zuwi inzwi liwamba kwangu mumushovo we chi Heveru, 'Saule, Saule, chinzi honi nyandisa? Ku kukutu kwako ku raha muso. <sup>15</sup> China wamba kuti njewe ni, Simwine? Simwine chetava, njeme Jesu yo nyandisa. <sup>16</sup> Linu vuke uzimane cha matende ako; nji cheli ivaka haniva voneki kwako, kuketa iwe kuva umuhikana ni mpaki kuamana ni zintu ziwizi zangu hanu nizintu zete ni kutondeze chitwe kalakala; <sup>17</sup> imi kani kulamulele kuvantu ni ku machava kuni kutuma, <sup>18</sup> kwiyalula menso avo kuazwisa mwififi ni kuatwala mwi seli ni ku ziho za Satani kwa Ireeza, njikuti vatambule kwa Ireeza maiswalelo ezivi zavo nikuyola zete nivahe ni kuli kauhanya kwangu

che ntumelo ina kwangu. <sup>19</sup> Chikwina vulyo, Simwine mukando Agiripa, kena navikila kwimbali chivono chewulu; <sup>20</sup> kono kwavo vena mwa damaseka che ntanzi, navana vena kwa Jereusalema, ni nkanda yonse ya Judea, ni kumachava, niva kutazi kuti vavakile zivi zavo vavole kwa Ireeza, ni kuvonisa mitendo ivonisa kuvaka kwavo. <sup>21</sup> Cheli ivaka ma Juda vava nisumini niku lika kuni haya. <sup>22</sup> Ireeza avanutusi kusika hanu, cwale niziima nikuha vupaki kuvantu feela niku va tompeha nizimwi zihita zivawambwa kuma porofita ni Mushe kuti muzipangahale; <sup>23</sup> kuti keresite uswanela kunyanda, ni kuta kuti mwave we ntanzi kukuvuka kuvafu niku zimana kupaka iseli kuma Juda ni machava. <sup>24</sup> Paulusi hamana kuli lamulela, fesitusi chawamba chenzwi li katukite, “Paulusi, uvurumuka; intuto yako inkando iku vulumuna.” <sup>25</sup> Kono Paulusi chati, kani vurumuki, hande ahulu Fesitusi; kono cho vundume niwamba manzwi ovusakusima ninisa nywine. <sup>26</sup> Kakuli Simwine mukando wizi izi zintu; njikuti, niwamba kwali nini lukuluhite, kakuli ni susuweze kuti kakwina zi patitwe kwali; mukuti izi kena ziva pangilwa kuliungwiile. <sup>27</sup> Uzumina kuvaporofita, Mulena Agiripa? Nizi kuti uzumina.” <sup>28</sup> Agiripa chawamba kwa Paulusi, “Mu nako infuhi moni susuweze nive ni mulumeli?” <sup>29</sup> Paulusi chati, “Ni lapela kwa Ireeza, kuti kapa munfuhi kapa inde inako, insiñi iwe wenke, kono nivonse vanizuwa sunu, muvave uvu njeme, kono nikusena anu mahaka entorongo.” <sup>30</sup> Linu Mulena chazima mwiwulu, ni muyendisi, ni Bernise naye, ni vonse vavekele naavo; <sup>31</sup> lyahanu hava siya uwo muyaho, vavawambi hamwina nikuti, “Uzu mukwame kakwina zavapangi ziswanela lufu ni ku suminwa.” <sup>32</sup> Agiripa cha wambila Fesitusi, “Uzu mukwame ava kuwola kulukululwa kambe kena ava likumbili kwa Sizare.”

## Inkauhanyo 27

<sup>1</sup> Hachi kuzumi zenwe kuti tuswanera ku zuhira kwa Itali, chiva vika Paulusi ni vamwi vambatiti mwi kamaiso yo muyendisi yavali kusupwa Juliyasi we chisole cha Agustini. <sup>2</sup> Chitwe chira muchisepe chizwa kwa Adiramatiyaumu, icho chichi vali kukatuka cha marizo a Asiya. Cwale chitwa yenda kwi wate. Arisitichesi wa kwa Mateselonika ava yendi naswe. <sup>3</sup> Izuva lichilira chitwa kafweka hamuleñi wa Sidoni, uko Juliyasi avaka pangi hande Paulusi ke chishemo ni kumu zuminina kuti a yende kuvali kani vakwe kuti aka wane ipavaleero yavo. <sup>4</sup> Kuzwa aho, tuva yendi kwi wate ni kuka zuhira kuzimbuka chi oli cha Cypurusi icho civali ku wumbitwe ku luhuho, kakuti luhuho luvali kutu lwisa. <sup>5</sup> Hachitu zuhite kuluta menzi ena hafuhi ni Chilisiya ni Pamiliya, chitweza kwa Myra, muleneñi wa Lycia. <sup>6</sup> Uko, muyendisi ava wani chisepe chizwa kwa Alexandria icho chivali kuya kwa Itali. Chatu vika muchili. <sup>7</sup> Hachitu zuhite cho kulyehisa chama zuva mangi mi kumamani chitwa kasika cho vukavo he mbali ni Cnidusi, luhuho kena luva tuzuminini kuyenda mweyina inzira. Chitwa zuha kumbali ni marizo a Crete, kumbali ni Salmone. <sup>8</sup> Chitwa zuha kumbali ni marizo cho vukavo, kusikira hatwiza kusika hachivaka chimwi chi supwa Mawulu Hande, china he mbali ni muleneñi wa Lasea. <sup>9</sup> Chitu vali kuhindite i nako nde, inako yo kulinyima zilyo ya Majuda nayo chiyi va hitilire, mi chikuvali kwi zite

vukavo kuku zuha. Cwale Paulusi chava laya, <sup>10</sup> ni kuti, “Vakwame, Ni wvene kuti chisepe chitu swanera kuhinda muchive ni nkolofalo ni shiyehero ahulu, isiñi vulyo ye zibya ni chisepe, kono mane vulyo ni vuhalo bwetu.” <sup>11</sup> Kono muyendisi ava tekerezi ahulu kumu kulwana ni ku mwine we chisepe kuhita kuzintu inzo zavali ku wamba Paulusi. <sup>12</sup> Kakuti irizo kena livena hande kuti twi kale hateni muma liha, vungi bwa vantu vavena mo chiva yerezwa kuzuha kuzwa ho, mwendi chomukwa wumwi mutu wole kukasika kumuleneñi wa Phoenix, kuti tuke kale kwateni maliha. Phoenix irizo lina mwa Crete, mi lilorere kwa mbowera wiko ni mutulo upa. <sup>13</sup> Ihuho lizwa kumbali yokuchi monso halu tanga kuhunga che konzo, vazuhi chiva nahana kuti chiva wana chivalali kusaka. Cwale chiva tatuya mandinda ni kuzuhira kuya Crete, kumbali ni riso. <sup>14</sup> Kono hakuhita kavaka zana liñungwa lye huhu, linsupiwa Ihuho lyo kwiyaza lye Chimonso, chilya tanga ku dama hetu kuzwa mwishirya lye chioli. <sup>15</sup> Aho chisepe hachiza kuwondwa kumutwi mi kena chivali kuwola ku zuhira kulolera ihuho, chitwa siya kululi mi chilwa tu timba. <sup>16</sup> Tuva tiyiri kwi mbali ni minzunde yo kwimbali ye kawoli zana kasupwa Cauda; mi chovukavo tuva woli kuvavaleru mato o vuhalo. <sup>17</sup> Hachi va katwire, vava severisi mihara yateni kusumina mutwi we chisepe. Vavali kutiyite kuti mutu tirire mwiseke lya Syrtisi, mi chiva sumununa hihara ye chisepe mi tuva vuviswa vulyo. <sup>18</sup> Tuva chimbolwa ku luhuhu, cwale havusa vazuhi chiva tanga kuzindira zibya hanze. <sup>19</sup> Mwizuva lyo vutatu vazuhi chiva zindira hanze zisipi ze chisepe chamanza avo. <sup>20</sup> Cwale izuva ni nkani kana ziva muniki hewulu lyetu cha mazuva mangi, mi i huhu ikando livali kusi dama hetu, kena kuvasina i sepo yo kuhazwa kwetu twense iva tumanini. <sup>21</sup> Ha chiva hindite inako inde niva sali zilyo, linu Paulusi ava zimani mukati ka bazuhi ni kuwamba. “Vakwame, saka muswanera kuteka kwa ngu. mi nikusa zuha kuzwa kwa Crete, sina kwiza kuwana iyi kolofalo ni shiyehero. <sup>22</sup> Mi hanu nimi susu weza kuti mukole, kakuti ka kwina zumwi yate a siyeherwe vuhalo mukati kenu, kono mbwita fera i sinyehero ye chisepe. <sup>23</sup> Kakuli masiku a mana Iñiroyi lye Ireeza uko kuni wanika, uzo hape uni lapera - iñiroyi lyakwe lyeza kuzimana hembali name <sup>24</sup> ni kuwamba, “Kanji u tiyi, Paulusi. Uswanera kuka zimana ha vusu bwa Caesar, mi vone, Ireeza mumuvuso wakwe waha kwako vonse vayenda nawe. <sup>25</sup> Cwale he, Vakwame, muve ni vundume, kakuli ni sepa Ireeza, kuti kaipangahale sina muya wambirwa kwangu. <sup>26</sup> Kono tuswanera kuzimana ha tuwoli tumwi.” <sup>27</sup> Hakwiza kusika masiku e kumi ni minwe yone, sina hatuvali kutimbirwe mweyi nzira ni kuti mwi wate lya Adriatic, mwinako yaha kati ka masiku va zuhi chivalali kuhupula kuti chivalali kusika he mbali ne rizo. <sup>28</sup> Chivahinda milumo ni kuwana makumi overe yo kutunga. <sup>29</sup> Vava tiyite kuti muva chaise mumabwe, mi civa susa mabwe one kuchi sepe ni kulapera kuti kakusasani kwize chokuhwera. <sup>30</sup> Vazuhi vavali kusaka inzira yo kutiyira chisepe mi chiva sumunwina kato zana mwi wate, ni kupanga uvu vasaka ku zindira ikora mwi wate kuvusu vwe tusi. <sup>31</sup> Kono Paulusi cha wambira muyendisi wa masole ni masole, “Mbwita ava vakwame chive kala mu chisepe, kase muwole ku hazwa.” <sup>32</sup> Cwale masole chiva kosola mihala ya kasepe zana ni kukasiya ka kuke. <sup>33</sup> Cwale izuva halivali kuñatula, Paulusi chava kumbira vonse kuti

vallye zilyo, Chati, “Ili izuva de kumi ni minwe yo ne ni mulindire mi kamuli; kakwina chimwi chimwalya. <sup>34</sup> Cwale ni mi kumbira kuti mulye chimwi, kakuti ichi cho kuhala kwenu; imi kakwina nanga lusuki lonke lwe mitwi yenu lwese luzove.” <sup>35</sup> Hacha manite kuwamba izi, cha hinda vuroto ni kulitumera kwe Ireeza havusu bwa vantu vonse. Mi cha chi jamona chikwa ni kutanga kulya. <sup>36</sup> Imi vonse vava susuwezwa mi hape chiva hinda zilyo. <sup>37</sup> Tuvali kwina 276 vantu muchi sepe. <sup>38</sup> Hachi vamanite kulya kwikuta, chiva zwisa zi lema muchisepe cho ku zindira zikwa zavo mumenzi. <sup>39</sup> Hachili ñatwire inzuba, kena vava lemuhu icho chivaka, kono vavoni irizo ni kamba, mi chiva kandekisana kambe vawola kutwala chisepe hateni. <sup>40</sup> Mi civa kosola mihara ikwete akori ni ku zisiya mwi wate. Mwi nako iswana chiva sumununa mihara akwete mapuranga oku sikululisa chisepe ni kuzimika i seiri ikando kuluhuho; mi chiva liva he rizo. <sup>41</sup> Kono chiveza hachi vaka aho mezi u kwimbali zovere avali kukopanera, mi chisepe chicha mina kuya hansu, ni tako lye chisepe chilya kakatira hateni ni kushala kusa woleka kuzwa ho ni kuchoka lya kuvusu, kono chisepe chicha tanga kuñatoka vakeñi cha mandinda avali kukalihite. <sup>42</sup> Mulero wa masole ubali okwihaya vasuminwa iri kuti kanji kuwaniki yo wola kusamba ni kulovoka. <sup>43</sup> Kono mukulwana wa masole avali kusaka ku haza Paulusi, imi cha kanina muhupulo wavo; mi cha layera avo vavali kuwola kusamba kuti va chirukire mumezi ni kusambira kwi rizo. <sup>44</sup> Cwale vakwame vonse muve chilire, vamwi ha mapuranga, vamwi hanzimwi zintu zi chimboka zina muchisepe. Mweyi inzira chikwa wanika kuti tuvonse tuva kasiki hande herizo.

## Inkauhanyo 28

<sup>1</sup> Hatuva letwa siinte vulyo, tuva lituti kuti chiwoli chiva kusupwa Maluta. <sup>2</sup> Vaantu vasecho chilalo nivaha kwetu isi ka chisemo cha vulyo vulyo, kono vava muniki mulilo ni kutu tambula twense, chevaka lya vungi vve nvula ni mpeho. <sup>3</sup> Kono linu Paulusi ha kunganya zisamu ni kuzi vika ha mulilo, chihiri nica bbuluka kevaka lyakuhisa, ni ku lizingila kwiyanza lyakwe. <sup>4</sup> Vene vecho chilalo hava vona chinyoloji chidenga kwi yanza lyakwe, nivacho ku zumwi ni zumwi, “Uzu mukwame kanti mwihayi yavaka lovoki kwi wate, kono mulao kana uvali kumu zuminina ku hala.” <sup>5</sup> Kono cwale na zukutwila nyoloji mumulilo imi kana ava holofali. <sup>6</sup> Vavamu lindile kuti eezule ifivere kamba kufwa. Kono havamana kumulolelela inako inde ni kuvona kuti kakwina chivonahala vuvi kwali, niva chincha minahano yavo ni kuta kuti nji Ireeza. <sup>7</sup> Haho muchivaka china hafuhi kuveena inkanda zvakulwana vachiwoli, mukwame yava kusumpwa Pabuliyusi. Naatu tambula nikutu lela mazuva otatwe. <sup>8</sup> Iva chitahali kuti isi wa Pabuliyusi ava ku lwazikwa ifivere ni musululo. Paulusi hayenda kwali, avalapeli, kuvika mayanza akwe hali, ni kumu hoza. <sup>9</sup> Hakumana ku chitahala ichi, vaantu voonse vamu chiwoli vava kulwala navo chiveza nikwiza kuhozwa. <sup>10</sup> Vaantu hape nivatu kuteka chamikutekero mingi. Hatuva kulitukiseza ku zuha, niva tuha zituvali saka. <sup>11</sup> Hakuhita myezi yotatwe, nitwa zuhila muchisepe cha Alezandiriya, chivena hamaliha kuchiwoli, chiva kuswana sina mambili. <sup>12</sup> Hatuka siika mumuleneñi Sirasuse, tuve kalimo mazuva otatwe. <sup>13</sup> Kuzwaho chitwa zuha nikuka sika mumuleneñi wa

Regiyumu. Hakumana luzuva lonke luhuho luzwa kuvumonso nilwa huunga, mumazuva overe nitweza kusika mumuleneñi wa Putewoli. <sup>14</sup> Umo tuvaka wani baswisu bazalwa hamwina imi vava memetwe kwikala navo mazuva ahinda iyanza niovere. cheyi inzila nitweza kusika kwa Roma. <sup>15</sup> Kuzwaho vantu vazalwa hamwina, hava zuva zetu, niveza kutu katana kusika KuMusika wa Apiyusi ni Ku Mitaveni yotatwe. Paulusi havona vazalwa hamwina, nalitumera kwa Ireeza ni likoza. <sup>16</sup> Hatwinjila mwa Roma, Paulusi ava zumininwe kuhala kachakwe ni valwi venkondo vavaku mugantela. <sup>17</sup> Imi nikweza hakuti hakumana mazuva otatwe Paulusi nasumpa hamwina avo vakwame vavali vayendisi kuma Juda. Haveza hamwina, nacho kuvali, “Bakwangu, nihanisana niva pangi zisalukite kuvantu kamba kumulao uvesikulwenu, nivaletwa chakuva musuminwa kuzwa kwa Jerusalema nu mayanza avaRoma. <sup>18</sup> Hava mana kuni vuza impuzo, niva tabela kuni lukulula, kakuli kana kuveena livaka mwangu kuatulelwa kwihayiwa. <sup>19</sup> Imi cwale maJuda havatanga kuwamba kusandukila intakazo zavo, china hambilizwa kuka kumbila kwa Sizare, nihaikenge kahena kuti kuvali kunyansa chisi changu. <sup>20</sup> Chakuya che nkupo yangu, linu, nakumbiila kukuvona kuti ni wambe nawe. Ivaka lyakuti Isiraere iina insepō yakuti ni kakatiile mumahaka. <sup>21</sup> Linu nivaacho kwaali, “Kana tuva tambuli mañolo akazwa kwa Judea kuamana nanwe, imi kakwina nanga mukati kenu muzwale yava kezi kuviha kamba kuwamba chintu chivi kuamana nenwe. <sup>22</sup> Kono ni saka kuzuwa kwenu mumu hupulela kwechi chiyemba, kakuli kwi zivehele kwetu kuti chiwambitwe kuhi no kuhi.” <sup>23</sup> Hava mana ku lukisa izuva lyakwe, vaangi vaantu vava kezi ku munzi kwa vali kuhala. Cha tambika indava kuvali, niku wamba za vulotu bwa Muvuso wa Ireeza, nalika susweza kuamana ni Jesu, vonse vaku mulao wa Mushe niku vaporofita, kuzwa kuseni kutwala chitengu. <sup>24</sup> Vamwi baba zuwisisi chazitu ziva wambiwa, imi vamwi kena vava kuzumina. <sup>25</sup> Hava sana vava lizumini mukati kavo, niva yenda Paulusi hamana vulyo kuwamba ili liinzwi lyonke. “Luhuho Lujolola luva wabi initi cha muporofita Isaya kuve sikulwenu. <sup>26</sup> Nacho,”Uyende kwava vaantu nikukati, chaku zuva kamuzuwe, konokete muzuwisise; Niku vona kamuvone, imi kete muvoniseze. <sup>27</sup> Mukuti inkulo yava vaantu chiya voola hansi, Matwi avo chi azuwa chavukavo, vava zimi menso avo; nikuzuwa cha matwi avo; kavati chi tambula cha meenso avo, ni kuzuwa cha matwi avo, niku zuwisisa che nkulo zavo, ni ku sanduka hape, nikuti kani va hoze.” <sup>28</sup> Chovulyo, iwe wizive kuti impuluso ya Ireeza chi iva tuminwa ku machava, imi muva zuwe. <sup>29</sup> Hamana kuwamba, maJuda nivaliyendela, nivava ni inkaani mukati kavo vene. <sup>30</sup> Paulusi avahali zilimo zovele munzubo yakwe ya kulihila, nikuti avali ku tambula vonse vavali kwiza kwaali. <sup>31</sup> Avali ku ruta muvuso wa Ireeza ni ku ruta zintu kuamana ni Simwine Jesu Keresite cha kuli tombola konse. Kakwina yava kumuzimika.

## Maroma

<sup>1</sup> Paulusi, muhikana wa Jesu Kreste, yava sumpwa kuva mu Apositola, niku kauhanyezwa hembali che ivangeli ye Ireeza. <sup>2</sup> Iyi nje ivangeli yava sepisi inako ni seni kusika ca ma porofita mumanolo a njolola. <sup>3</sup> Ku amana ni mwanakwe, yava zalwa kwi shika lya Davida chokuya ke nyama. <sup>4</sup> Cho kuvuka ku vafwile, ave zibahazwa kuva iye Mwana we Ireeza we ziho cho Luhuhu loku jolola- Jesu Kreste Simwine wetu. <sup>5</sup> Chakwe tuva hewa chishemo ni vu apostola cho kusepahala kwe ntumelo mwi fasi lyonse, chevaka lye zina lyakwe. <sup>6</sup> Mukati kezi inkanda, nanwe vulyo muva sumpwa kuti muve kwa Jesu Kreste. <sup>7</sup> Ilyi ñolo njilyavo vonse vena mwa Roma, va sakiwa ve Ireeza, va sumpwa kuva vantu va jolola. Chishemo chive kwenu, ni nkozo izwa kwe Ireeza Ishetu ni Jesu Kreste. <sup>8</sup> Chentanzi, ni litumela kwe Ireeza ka Jesu Kreste henu muvonse, kakuti i ntumelo yenu ya wambwa mwi nkanda yonse. <sup>9</sup> Kaho Ireeza impaki yangu, ini seveleza mu Luho lwangu mwi evangeli ya mwana, muni zwile havusu kuwamba zakwe. <sup>10</sup> Inako ni nako ni kumbilanga mwi ntampelo zangu kapa mwinzila yonse kumamani mani nive yo zwila havusu hanu ke ntato ye Ireeza mwikwiza kwenu. <sup>11</sup> Kaho ni tavela kukuvona, kuti ni mihe mupuzo za Luhuhu, kuti ni mikolise. <sup>12</sup> China njichi, ni nungwa kuva yo susuwezwa mu kati kenu, ke ntumelo yetu tu vonse, yenu ni yangu. <sup>13</sup> Hanu kani saki kuti kanzi muvi va sezivite, va kwaangu, kuti niva kusakanga kwiza kwenu, kono niva vinditwe haisi hanu. Niva kusaka izi kuti muve ni miselo mukati kenu sina hamwina mukati ka machava. <sup>14</sup> Ni mukoroti hamwina kuma Greeki mi niku mazwahule, hamwina kuvana vutali niva holo. <sup>15</sup> Cwale kwangu, nilitukise kuwamba evangeli nikwenu mwina mwa Roma. <sup>16</sup> Kaho kani swaveli evangeli, kaho manta a Ireeza ye mpuluso ya vantu vonse va zumina, kaho ma Juda chentanzi ni ma Greeki. <sup>17</sup> Kaho mwateni kujolola kwa Ireeza kuli vonahaza kwi ntumelo ni ntumelo, sina mwiva ñolelwa, “Va jolola kava hale che ntumelo.” <sup>18</sup> Kaho ku venga kwe Ireeza kulivonahaza kuzwa kwi wulu kwavo vasali ve Ireeza niku vantu vasa jololi, avo mukusa jololi va kakatiza vuniti. <sup>19</sup> Ilyo njivaka kuti icho chiziveka kwe Ireeza chivoneka kwavo. Kaho Ireeza avavahi iseli. <sup>20</sup> Kaho zisa voneki zakwe zivoneka hande kuzwa fela hakuvubwa kwe nkanda. Zi zuwahala che zintu ziva vubwa. Izi zintu nji manta akwe okuya kwile ni mukwa wakwe mulotu. Che nkalavo, ava vantu ka vena mavaka. <sup>21</sup> Ili njivaka, nanga havava kwizi ze Ireeza, kena vava munyamuni chokuva Ireeza, kapa kulitumela kwali. Kono, vavavi zihole mu mihupulo yavo, mi inkulo zavo zi sena mano yavo iva vikwa mwi fifi. <sup>22</sup> Vava kulihinda kuti vena vutali, kona vava sanduki kuva zihole. <sup>23</sup> Vava lichinchi inkanya yoku samana Ireeza cho kuswana chiswaniso yo kumana kwa muntu, ya zizuni, ni zivatana za matende yone, nizi kokova. <sup>24</sup> Cwale he Ireeza ava vahi kwavo ve ntakazo mwinkulo zavo chokusa jolola, kuti mivili yavo kanzi ikutekwa mukati kavo. <sup>25</sup> Njivona vava chinchi initi ye Ireeza cha mapa, mi vava lapeli niku seveleza chiva vumbwa kusiya yava zivumbi, ya hewa intumbo kuya kwile. Amen. <sup>26</sup> Ke vaka lyechi,



Ireeza avava siyi va yende che ntakazo zi swavisa, kaho vanakazi vava chinchi muvekalile kwecho chisa swaneli. <sup>27</sup> Cho mukwa uwo, va kwame va siya mulawo wavo ku vanakazi nikuhyia mwi ntakazo zavo kuhamwina. Ava va kwame vava pangi zintu isali njizona ni vamwi va kwame, mi vava amuheli mupuzo wavo kuzivavapangi. <sup>28</sup> Kakuti kena vava zuminizi kuva ni Ireeza mukapanga kwavo, avavahi ku muhupulo uyangene, njokuti va pange zintu zisena hande. <sup>29</sup> Vava kwizwile kusa jolola, kuva ni lunya, ni ntakazo, ni vuvi. Vezwile muuna, impulayo, inkani, kuchenga, ni zintu zivi. <sup>30</sup> Vasoaha, vanyefuli, niva toyete Ireeza. Zi vangama, vena mwipo, vali nyamona. vatendi va zintu zivi, mi kave chilili va shemi vavo. <sup>31</sup> Kavena inkutwisiso; kena voku sepa, kavena irato, mi kavena chishemo. <sup>32</sup> Va zuwisisa inkatulo ye Ireeza, kuti avo va tenda izo zintu va swanela ifu. Kono kena kuti va panga izi zintu, va zuminiza ni vamwi va panga izi zintu.

## Inkauhanyo 2

<sup>1</sup> Cwalehe, kamwina mavaka, iwe muntu, inwe mu atula, kecho chimu atula muzumwi nanwe muchili atula muvene. kaho inwe mu atula mupanga zintu zi swana. <sup>2</sup> Kono twizi kuti inkatulo ye Ireeza iyenda che niti haiwila kwavo va panga izo zintu. <sup>3</sup> Kono umamele ichi, iwe muntu, iwe u atula avo va panga izo zintu nawe nopanga zintu ziswana. Kowole kulovoka inkatulo ye Ireeza? <sup>4</sup> kapa muhupulela hanini ke chifumu cho vulotu vwakwe, nikuha inkoto kwakwe kuliyehete, ni nkulo yoku lindila? Kamwizi kuti vulotu vwakwe vokuti amitwale mwinila yokuvaka? <sup>5</sup> kono njikuva wina vukukutu niku savaka kwe nkulo kuti ulivikila iwe mwine kuvenga kwe zuva lyo kuvenga, icho njikuti, izuva lyokwiziveka kwe nkatulo ye Ireeza i jolola. <sup>6</sup> Kahe ku muntu ni muntu chokuya ke inkezo zakwe: <sup>7</sup> kwavo va tundamina, mitendo milotu ya wana intumbo, ikute, nikusa lyanganiswa, kahe vuhalo vo kuya kwile. <sup>8</sup> Kono kwavo vali ngana avo vene, vase chilili initi kono ve chilila kusa chena, vuvengi vusa mani niku venga kavwize. <sup>9</sup> Ireeza kalete manyando ni kufilikana haluhuhu lya muntu ni muntu yava pangi chivi, kuma Juda sapili, niku ma Greeke hape. <sup>10</sup> Kono intumbo, ikute, ni nkozo kazize ku muntu yense ya panga zilotu, kuma Juda sapili, niku ma Greeke. <sup>11</sup> Kaho kakwina kuketela muntu kwe Ireeza. <sup>12</sup> Kaho vangi va panga chivi mi hape kava mane nikusena mulao, mi nikuvangi vava pangi chivi niva kuteka mulao kava atulwe cho mulao. <sup>13</sup> Kakuti kena vateki vo mulao vavikitwe kuluka havunsu bwe Ireeza, kono javo fera vapangi vo mulao vasane kava hewe kuluka. <sup>14</sup> Kakuti vamachava, vasena mulao, vapanga che mukwa wavantu zintu zomulao, avo, vali mulao kuvali vene, nagati kuti kavena mulao <sup>15</sup> Chezi vatodeza kuti zitu zisakiwa kumulao ziñoletwe munkulo zavo. Minahano yavo nayo ipaka vulyo kuvali, mi mihupulo yavo kuiva nyazi kamba kuva zimanina kuvali vene <sup>16</sup> mi nikwa Ireeza vulyo. Icho kachipanga hale mwelyo izuva aho Ireeza hasane ka atule inkunutu zavantu vonse, chokuya ke evangeli yangu, chukuya ka Jesu Keresite. <sup>17</sup> Mwendu hamwi mulisupa kuti muma Juda, mupumwira hamulao, kusangwa chokuli kumusa mwe Ireeza, <sup>18</sup> kwiziva chasaka, ni kulika zintu zishutana kuzili, kasamulaho wo kutondeziwa kumulao. <sup>19</sup> Mi mwendi mwina inwe muvene ni muyendisa chivofu, iseli kwavo vena

mwififi, <sup>20</sup> musikululi we zihole, mi nihakuli kuti mwina mumulao mukwa we ngana nivu niti. <sup>21</sup> Inwe, linu, varuta vamwi, kamuli ruti inwe muvene? Inwe mukutaza kuti kanji muyivi, muyiva? <sup>22</sup> Inwe muwamba kanji mupangi vushahi, mupanga vushahi? Inwe muyansa maswaniso, muyivira itempere? <sup>23</sup> Inwe mulikumuseza kunyakalala mumu lao, kana munyasa Ireeza choku chola mulao? <sup>24</sup> Kutu “inzina lye Ireeza linyasahala mukati kava Machava vakeñi chenu,” sina yovulyo mulivañolerwe. <sup>25</sup> Kakuti mupato chovuniti umi wanisa haiva nimwi chilira mulao, kono haiva umucholi wo mulao, mupato wako usanduka kusava mupato. <sup>26</sup> Haiva, lyahanu, muntu yasena mupato ne chilira inswanero zo mulao, kete kuve kuti kusaya mumupato kwakwe kuvoneke uvu yavayi mumupato? <sup>27</sup> Iri ivaka lyokuta mwina mañolo a ñoletwe mi mupato hape jivo vasechilili vo mulao! <sup>28</sup> Kakuli kena Mujuda luli iyemwine hanze vulyo; mi mupato luli konji upangiwa hanze mwinyama. <sup>29</sup> Kono Mujuda njiyena mwine luli mukati, mi mupato jowuna we nkulo, muluhuhu, isiñi cho muñolo. Kutembwa kozo uswana muntu kakuzwi kumuntu kono kwe-Ireeza.

### Inkauhanyo 3

<sup>1</sup> Vulotu nzi Majuda vava Kwete? Intuso nzi ina hamupato? <sup>2</sup> Inkando kuhi no kuhi. Chentanzi kuzonse, Majuda vava vikiwa manzwi azwa kwa Ireeza. <sup>3</sup> Cwale kambe Majuda kana vavena Intumelo? Nji kuti kusa zumina kwavo mukufosise ku sepahala kwa Ireeza? <sup>4</sup> Kenzi kuvi vulyo. Kono, musiye Ireeza a wanike kuva wina initi, Niha kuva kuti muntu ni muntu wina mapa. Sina hakuva ñoletwe, ili kuti muvoniswe kuluka mu manzwi enu, ni kukoma chimweza kuatulwa. <sup>5</sup> Kono heva kusa luka kwetu niku tondeza kuluka kwe Ireeza, tuwola kuwamba nzi? Kana Ireeza kalukite hanyandisa cha kuvenga? Niwamba cha kuya ka mano a muntu. <sup>6</sup> Sanzi nikuvi vulyo! Hakuva vulyo Ireeza ka watule vule inkanda? <sup>7</sup> Kono heva vuniti vwe Ireeza cha mapa angu vuleta kulumba Ireeza kusamani, chinzi hanisi atulwa kuva ni muezalivi? <sup>8</sup> Chinzi kusa wamba, sina hatuwambiwa cha mapa kuwamba, mi sina vamwi havazumina kuti tuwamba, “Tupange vuvi, nji kuti vulotu vwize?” Inkatulo havali ilukite. <sup>9</sup> Linu chinzi? Tulizwisa kuvamwi? Nanta, Chituva hambilizi kale ma Juda ni ma Gerike vonse, cha kuva mwi konde lya chivi. <sup>10</sup> Ichi china vuti kamuchi va ñolelwe: “Kakwina yolukite, nanga yenke. <sup>11</sup> Kakwina yo zuwisisa. Kakwina yogana Ireeza. <sup>12</sup> Vonse vava sanduki. Hamwina vava sanduki kusava ni ntuso. Kakwina yopanga vulotu, nanta, nanga yenke. <sup>13</sup> Mimino yavo ivita lyi yalukite. Malimi avo ava chengi. Chifanu che nzoka china kungsi ye milomo. <sup>14</sup> Tuholo twavo twizwile zikuto ni vuvi. <sup>15</sup> Matende avo mahuvilila kukwi tila malaha. <sup>16</sup> Insinyeho ni masukuluka zina mwi nzila zavo. <sup>17</sup> Ava vantu kaveni kwiziva inzila ye nkozo. <sup>18</sup> Kava tiyi Ireeza mumenso avo.” <sup>19</sup> Hanu chitwizi zonse ziuwamba mulawo, uwamba kuvena mwi konde lyamulawo. Ili nji vaka lyo kuta kuti tuholo tonse twi yale, ili kuti inkanda yonse ive ni vuikalavelo kwa Ireeza. <sup>20</sup> Chelyo ivaka kakwina muntu nihaiva yenke yete avikwe yo lukite cha mitendo ya mulawo mu menso akwe. Cha mulawo kwiza mano achivi. <sup>21</sup> Kono kunde ya mulao kulika kwa Ireeza kuve zivahanzwa. Kuva pakwa mulawo ni maporofita, <sup>22</sup> uko, njikuluka

kwe Ireeza che ntumelo kwa Jesu Kelesite ku vonse vazumina. kakuli ka kwina muva fapene. <sup>23</sup> Vonse vava pangi chivi ni kwiza kusa wana hande ikanya ya Ireeza <sup>24</sup> Vavikitwe cha kuluka feela cha chishemo chakwe cha kuhazwa kwina mwa Kelesite Jesu. <sup>25</sup> Ireeza ava leti Keresite Jesu kutiawe chitavelo che ntumelo mumalaha akwe. Ava hi Keresite kuti a ve vupaki vo kuluka. kakuli kana va loli zivi <sup>26</sup> zo kuma sule cha vuiswalo vwakwe. Izi ziva pangahali che mboniso zakuluka kwakwe mweinu inako. Izi zivena vuti ili kuti atondeze kuluka kwakwe, ni kutondeza kuti ushemuva zumwi ni zumwi che ntumelo ya Jesu. <sup>27</sup> Kulitemba kwina kuhi? kuvazwisiwa. Cho wuhi mulawo? Ya mitendo? Nanta, kono cha mulawo we ntumelo. <sup>28</sup> Tu kolwa kuti muntu uvikwa yo lukite che ntumelo nikusena mitendo yo mulawo. <sup>29</sup> Kapa Ireeza nji Ireeza wa ma Juda vulyo? Kapa kana njiyena Ireeza wa machava? Eni, wa machava navo. <sup>30</sup> Heva, initi, Ireeza yenke, vavayi mumupato kavapange valukite che ntumelo, ni vasena vavayi mumupato che ntumelo. <sup>31</sup> Nji kuti tumana mulawo che ntumelo? Kete ni kuve vulyo, Kono, tukoza mulawo.

## Inkauhayo 4

<sup>1</sup> Chizi cwale mutuwambe kuti Aburahama, isukuzwetu chokuya che nyama, avawani? <sup>2</sup> Kakuti haiva Aburahama ava shemuviwa che misevezi, navavi nevaka lyo kuwola kuli temba, kono isiñi havusu bwe Ireeza. <sup>3</sup> Kono awamba nzi mañolo? “Aburahama ava zumini Ireeza, mi ivavalirwa kwali kuva yo lukite.” <sup>4</sup> Lyahanu kwali yoseveza, ituwero zavo kazisupiwa uvu chishemo, kono uvu icho chava wana. <sup>5</sup> Kono kwali uzo yasa sevezi kono iye uzumina muyenke yo shemuva vapanga zivi, itumero yakwe avali uvu ilukite. <sup>6</sup> Davida naye ava wambi imbuyoti ha muntu kozo Ireeza wavala kuluka nikusena misevezi. <sup>7</sup> Ava wambi, “Imbuyoti javo zivi zavo ziva wonderwa, mi zivi zakwe za bwikwa. <sup>8</sup> Imbuyoti njo mukwame uzo Simwine kete avalire chivi.” <sup>9</sup> Linu inzi imbuyoti zivawambwa vulyo havo vavayi mumupato, kamba nikwavo vasana vavayendsi mumupato? Kakuti tuwamba, “Itumero ivava lirwa kwa Aburahama sina yolukite.” <sup>10</sup> Cwale ivavalirwa vule? Aho Aburahama havali mumupato, kamba naseni kuya mumupato? Kena ivali mumupato, kono naseni kuya mumupato. <sup>11</sup> Aburahama ava tambuli chisupo cho mupato. Ichi ivali iswayo lyo kuluka lye tumero iyo yavali kukwete kale aho naseni kupangiwa mupato. Mamanisezo echi chisupo ivali kuti avezi kuva isi wavonse avo vazumina, nangati kuti vena mukusaya mumupato. <sup>12</sup> Ichi kotalusa kuti kuluka muku valilwe ku vali. Iyi italusa kuti Abrahamama avezi kuva isi wo mupato kwavo veza isiñi fela kwavo vakwazwa ku mupato, kono nikwavo ve chilila mihato ye shetu Abrahamama. Mi iyi nji ntumeloyava kwina nayo kuvava seni va panga mupato. <sup>13</sup> Kaho kena ivali cho mulao kuti insepiso iva hewa kwa Abrahamama niku vana vakwe, iyi nsepiso kuti kavave va yoli ve nkanda. Kono, ivali choku kuluka kwe tumero. <sup>14</sup> Lyahanu haiva avo vawira kumulawo vayoli, itumero ipangitwe mukungulu, mi isepiso chiyavuzwa ziho. <sup>15</sup> Kakuti mulawo uleta vukali, kono aho hasena mulao, kamba kuva ho kusechilira. <sup>16</sup> Cheli ivaka ichi chivapangahali che tumero, iri kuti iwole kuva che chishemo. sina mamanikizo, isepiso jovu niti

luli ku lusika lonse. Mi ululusika kaluhindilire isiñi vulyo avo vezi mulao, kono vulyo navo vazwa kwi tumero ya Aburahama. Kakuti ji shetu tuvonse, <sup>17</sup> sina haiñoletwe, “Niva kupangi isi we kanda zingi.” Aburahama avali kwina havusu bwakwe uzo wava sepete, ili uzo, Ireeza, uha vuhalo kuva fwire niku supa zintu zisakwina kuku va kwateni. <sup>18</sup> Nihakuva vulyo onse masukuluko ahanze, Aburahama chovundume ava sepete Ireeza kuzo kuvusu. Cwale cheza kuva isi wekanda zingi, chokuya kwecho chiva wambwa, “Ilyo jeteve ishika lyako.” <sup>19</sup> Kena avali ku fokola mwitumero. Aburahama avazuwisisi kuti muvili wakwe iyemwine kena uvali kuwola kuva ni mwana (kakuti chavali we zirimo zo mwanda zava hali). Hape avazumini kuti ivumo lya Saara kena livali kuwola kuhinda mwana. <sup>20</sup> Kono chevaka lye sepiso ze Ireeza, Aburahama kena ava hakanyehi mukusa zumina. Lyahanu, avali kukozetwe mwi tumero ni kuha milumbeko kwe Ireeza. <sup>21</sup> Avali kuzumine luli kuti icho Ireeza cha va sepisi, naye ava woli kwizuzirikiza. <sup>22</sup> Hakwina vulyo ichi nacho chiva valilwa kwali uvu yo lukite. <sup>23</sup> Lyahanu kena ziva ñolerwe chevaka lyazasa wane, izo zivavalirwa kwali. <sup>24</sup> Ivali kuñoletwe vulyo ni kwetu, kwavo vete ivalilwe, iswe tuzumina mwali uzo yava vusi Jesu Simwine wetu kwavo vafwire. <sup>25</sup> Uzu jiyena avali kuherwe chezivi zetu mi ava vuswa kutu panga vashiyeme.

## Ikauhanyo 5

<sup>1</sup> Linu bulyo tutendetwe bashiyeme chetumelo, twina inkozo ni Ireeza ka mfumwetu Jesu Kreste. <sup>2</sup> Chakwe hape tuwola kuwana itumelo mwe chishemo chituzimene kuchili. Tusanga chesepo yatuha Ireeza mukuya kubusu, isepo yete ni tuli yabele mwi kanya ya Ireeza. <sup>3</sup> Nanta kanjezi bulyo, kono tusanga ni mumasukuluko etu. <sup>4</sup> Twizi kuti masukoluko aleta kulikoza. Kulikoza kuleta kusepahala imi kusepahala kuleta isepo yaku busu. <sup>5</sup> Iyi isepo kailleti maswabisisa, mukuti ilato lye Ireeza libe tiwa mwi nkulo zetu che Luhoho Lujolola, luba hewa kwitu. <sup>6</sup> Munako hatusana tubena ziho, chenako iswanela Kreste aba fwile basazuni ze Ireeza. <sup>7</sup> Kokotalusa kuti, kukabo kuti zumwi awole kufwila zumwi muntu yoshiyeme. Njichona ichi, mwendi zumwi mwa sake kufila muntu yoshiyeme. <sup>8</sup> Kono Ireeza a batondezi ilato lyekwe kwetu, mukuti hatubachili batendi chive, Kreste aba tufwili. <sup>9</sup> Kuekeza aho, linu, hahanu kakuli tobajolozwa cha malaha akwe, katuba tupulwiswe chawo kubukali bwe Ireeza. <sup>10</sup> Kakuli heba kuti, atubachili tuzila, tubabozinsani inkulo ni Ireeza chefu lya mwanakwe, kuekeza hezo linu, hatumana kuba babozinsane inkulo, kana katube ba pulwise chebuhalo bwako. <sup>11</sup> Isiñi cho bulyo, kono tusanga hape ni Ireeza cha Simwine wetu Jesu Kreste, chakwe tuba tambuli kubozinsana kwe nkulo. <sup>12</sup> Nihakwina bulyo, chive muchibe njilili muchisi cha mutu yenke, cheyo inzala ifu libenjili che chive. Imi ifu nilya hasana kubantu bonse, mukuti bonse babatendi chive. <sup>13</sup> Kulindila kutwala haisi mulao, chive chibena muchisi, kono kana kubena kuli zuminina chive kokuti kakwina mulao. <sup>14</sup> Nahakuba bulyo, ifu liba kuyendisana kuzwa kwa Adama kuya kwa Mushe, nanga abo basana baba tendi chive ubu nji Adama chokubula ikute kwakwe, yabali mutala wozo lyaba kwiza. <sup>15</sup> Kono ni hakwina bulyo, impo

yakuhewa bulyo kaikoli ubu kuluta mulao. Mukuti che mwilandu ya yenke bangi baba fwi, nihakulibulyo zingi zibatendwa kechishimo che Ireeza imi ni mpo ka chishemo cha muntu umwina, Jesu Kreste, chi njihile bangi. <sup>16</sup> Mukuti impo kaikoli ubu chintu chizwa kuchatendwa muntu watenda chive. Munzila imwi, inkutulo yaku nyanswa ibakezi chebaka lya chive cha muntu umwina. Kono munzila imwi, impo itubahewa bulyo ibezi cha kubonisa buniti mumasule ezive zingi. <sup>17</sup> Mukuti haiba, cha chive cha muntu umwina, ifu liba busi cha muntu umwina, kukeza aho kana bana bete bawane kwinjiha kuamana ni mpo ya chishemo imi impo yakuluka ibusa cha buhalo bwa umwina, Jesu Kreste. <sup>18</sup> Linuhe, cha chive cha umwina bonse bantu baba atulwa, ni hakuba bulyo cha mutendo wonke wa chishemo uba lite intukuluho yabuhalo bwa bantu bonse. <sup>19</sup> Mukuti chokubula inkutwiso kwa muntu umwina bungi bwabo baba babatendwa batendi bazichive, ni hakuba bulyo che nkutwisiso yamuntu umwina bungi bwabo baba tendwe basheyeme. <sup>20</sup> Kono mulao uba kezi bulyo nawo, mukuti chive pona chi wole kwi njaha. Kono hena chive chingi, chishemo chi kanduha ni kuhitiliza. <sup>21</sup> Izi ziba tendahali mukuti, ubu chive hachiba busi mwifu, Nikuba bulyo chishemo pona chiwole kuyendisa cha busakusima mubuhalo bukeza ka Jesu Kreste Simwine wetu.

## Ikauhanyo 6

<sup>1</sup> Linu katutende chihi? Kana tuzwile habusu mu chive ili kuti chishemo chitwinjihile? <sup>2</sup> Sanzi kubi bulyo. Iswe tubafwili muchive, chinzi hatusiwola kuhala muchili? <sup>3</sup> Naa kuti katwizi kuti bonse baba kolobezwa mwizina lya Jesu Kreste baba kolobezwa ni mwifu lyakwe? <sup>4</sup> Tuba zikiwa, linu, naye chenkolobezo ye fu. Ichi chibatendahali kebaka lyakuta kuti Kreste aba buki kuba fwile ke kanya ya Tayo, linu naswe tuswanela kuhala buhalo buhya. <sup>5</sup> Mukuti heba chitwakopana naye mukutabela ifu lyakwe, mutu kakopane hamwina nimwi nzuho yakwe. <sup>6</sup> Twizi izi, kuti zive zetu zonse ziba kokotelwa naye, kutendela kuti mubili we chive usinyiwe. Izi zibatendahali ili kuti sanzi tusebeliswa Chive. <sup>7</sup> Iye yabafwi natenda zilukite mukukuteka mu chive. <sup>8</sup> Kono haiba tubafwi ni Kreste, tuzumina kuti naswe mutuhale naye hamwina. <sup>9</sup> Twizi kuti Kreste ababuswa kubafwile, imi kasifwile. Ifu kalisibusi mwali. <sup>10</sup> Chobulyo kuamana nifu lyabafwi chalyo muchive, abafwi kamwina kuhindilila. Nihakuba bulyo, buhalo bwahala, uhala cha Ireeza. <sup>11</sup> munzila iswana, nanwe mulibike mukufwila muchive, kono muhalile kwa Ireeza mwizina lya Jesu Kreste. <sup>12</sup> Chobulyo sanzi mulekeleli chive kubusa mumibili yenu ifwa <sup>13</sup> Sanzi mutambiki zilama zamibili yenu kuchive, kuti ibe zisebeliso zabana bapanga zisalukite. kono mulitambike kwa Ireeza, sina bafwile ba chibahala hanu. imi mutambike zilama za mibili yenu kwa Ireeza aipange zisebeliso zabana bapanga zishiyeme. <sup>14</sup> Sanzi mulekeleli chive kumiyendisa. kakuli kamuchihali cha mulao, kono chimwina mwikonde lye chishemo. <sup>15</sup> Kuti nzi linu? Naa mutupange chive kakuli twina mwikonde lya mulao, imi mwi konde lye chishemo? Keti kube bulyo. <sup>16</sup> Naa mwizi kuti mulibika mwikonde lya muntu kutenda za laela kakuba bulyo musanduka bahikana bakwe, iye imukuteka? Iyo

initi kapa mubahikana ba chivi chimitwala kwifu, kapa bahikana bamamela zibatwala kuzishieme. <sup>17</sup> Imi tulitumela kwa Ireeza! Chobulyo inwe mubali mubahikana ba chive, imi mubazumini chenkulo zenu zonse nikwichilila kwi ntuto zimubalutwa zimubahewa. <sup>18</sup> Imi muba lukululwa kuchive, imi muba tendwa bahikana batenda zishiyeme. <sup>19</sup> Niwamba chamubili wabantu kebaka lya bufokoli bwa mibili yenu. Chamukwa uwo mubaneli zilama za mibili yenu kuba bahikana kuzintu zisashiyeme nimuzintu zibi, kamukwa uswana, Munele zilama za mibili yenu kuba bahikana batenda zishiyeme kutendela kuti mujolozwe. <sup>20</sup> Chobulyo hamubali mubahikana be chive, mubalukuluhite kumbali yazishiyeme. <sup>21</sup> Cheyo inako, miselo imubawani njeihi kuzintu zimubakutenda zichi zimiswabisa hanu? Imi mupuzo wezo zintu zonse ifu. <sup>22</sup> Imi mubalukululwa kuchive linu cheli mubahikana ba Ireeza, imi chimwina muselo wakujolola. Imi mupuzo buhalo busamani. Imi mupuzo we chive ifu, <sup>23</sup> kono mupuzo wamahala wa Ireeza buhalo busamani mwi zina lya Jesu Krete Simwine wetu.

## Ikauhanyo 7

<sup>1</sup> Kapa kawizi, bakwangu (mukuti, nikwete kuwamba kubantu bezi mulao), mukuti mulao njoyendisa muntu inako yose yahala? <sup>2</sup> Mukuti mwanakazi yosetwe usuminwa chamulao kwamwihyabwe hebanachihala, kono mukwame hafwa, chazwisiwa kumulao wamasenso. <sup>3</sup> Linuhape, cheyoinako mwihiyabwe nachihala, heba nakahala ni wungi mukwame, kasupiwe musangu. Kono heba mwihiyabwe ufwa, ulukuluhute kumulao, linu kena musangu, heba nakekala ni wungi mukwame. <sup>4</sup> Chobulyo, bakwangu, mubatendwa bafwile kumulao chamubili wa Kiriste. Ichi chitendahala bulyo kuti mubemubantu bonke, linuhe, kozo yababuswa kubafwile, kuti tubike zichelantu za Ireeza. <sup>5</sup> Mukuti hatubena munyama, itakazo zechive zibabusuluswa kubamwi bentu chamulao kuleta zichelantu kukati ifu. <sup>6</sup> Konohanu tubalukululwa kumulao. Tubafwi kechina chibatsumine. Ichi china bulyo mukuti tusebeze mubuhya bwaluhuhu imi isini mukusupala kweñolo. <sup>7</sup> Katuwambe nzi linu? Kana mulao uwo wine chive? Kanzi nikubebulyo hape. Nihakubabulyo, ninisana nibezibi chive, heba nikusana kubabi chamulao. Mukuti ninisana nibezibi kuti kulakaza chive hesi mulao hawuwamba, “kanzi ulakazi.” <sup>8</sup> Kono chive chiba hindi chibaka mumulao imi libaleti ilato lisali lyeniti kwangu. Mukuti hebakakwina mulao, chive chifwile. <sup>9</sup> Mwinako yimwi nibakuhala ni kusena mulao, kono mulao hawiza, chive chichahala, imi ime chinafwa. <sup>10</sup> Mulao ubakuleta kuhala ubaleti kufwa kwangu. <sup>11</sup> Mukuti chive chibawani chibaka mumulao, imi chibanichengeleli. Kakuya chamulao chibanihayi. <sup>12</sup> Chobulyo mulao ujolwele, ni taelo ijolwele, yinahande ni kushiyama. <sup>13</sup> Kana chilotu chibabi ifu kwangu? Kanzi ni kubi bulyo. Kono chive, chibatondezi bubi mukati kabulotu, kubaleti kufwa kwangu. Ichi chibabi bulyo kuya chamulao, chive chiwola kuba chintu chibi chisawolwi kupimwa. <sup>14</sup> Mukuti twizi kuti mulao luhuhu, kono ime ninyama. Nibawuzwa kuti nibeni mutanga wechive. <sup>15</sup> Mukuti chonse chinitenda, kanichizuwisisi. Mukuti chonse chinisaka kutenda, kanichitendi, imi chinitoyete, nichitenda. <sup>16</sup> Kono heba nitenda chinisasaki, ni zuminzana ni mulao kuti mulao mulotu. <sup>17</sup> Kono hanu kaichili ime yozitenda, kono chive chihala mukati

kangu. <sup>18</sup> Mukuti nizi kuti china kwangu, njichina munyamayangu, kakuhali chituchilotu. Mukuti itakazo yezilotu yina name, kono kaniwoli kuchitenda. <sup>19</sup> Mukuti zilotu zinisaka kutenda kanizitendi, kono zive zinisasaki kutenda, zinitenda. <sup>20</sup> Linuhanu haba nitenda chinisasaki kutenda, linu kayichili ime yochitenda, kono chive china name. <sup>21</sup> Niwana, linu, mazimo enakwangu akuti nisaka kutenda chilotu, kono chive initi china name. <sup>22</sup> Linu nitabela mulao we Ireeza ni muntu wina name. <sup>23</sup> Kono nibona mazimo angi muzilama zenyamayangu. Zilwisana ni mazimo aboko kwangu. Ziletwa kusuminwa kwa mazimo echive ena muzilama zenyamayangu. <sup>24</sup> Nimuntu yasena ituso! Njeni yese anizwise mowu mubili wefu? <sup>25</sup> Kono kulumela kube kwa Ireeza ka Jesu Krisite Simwine wentu! Linuhanu, ime nimwine nisebeleza mulao wa Ireeza nengana. Nihakubabulyo, mwinyama nisebeleza mazimo echive.

## Inkauhanyo 8

<sup>1</sup> Lyahanu kakwina ku atuliwa kwavo vena mwa Kresite Jesu. <sup>2</sup> Kakuti itayero zo Luhuhu lo buhalo mwa Kresite Jesu iba ni sanduli yo lukuluhite ku milao ye chivi ni ifuu. <sup>3</sup> Kwecho mulao kena uva woli kuchipanga che vaka lyokuti kena uva kwina manta che nyama, Ireeza avakwina. ava tumini mwanakwe muku saka chivi che nyama kwiza ku munewila kuchivi mi ava atulu chivi mwi nyama. <sup>4</sup> Ava pangi izi kuti zitokwahala zo mulao zi wole kwi zuzilikizwa mwetu, iswe tuyenda isiñi che nyama, kono chokuya cho Luhuhu. <sup>5</sup> Avo vahala chokuya che nyama va twaliza muhupulo kuzintu ze nyama, kono avo va hala chokuya ko luhuhu va twaliza muhupulo ko zintu zo Luhuhu. <sup>6</sup> Kaho muhupulo we nyana ifu, kono muhupulo we Luhuhu vuhalo ni nkozo. <sup>7</sup> Iyi njikuti muhupulo we nyama ilwisa Ireeza, kaho kaimwina mumulao wa Ireeza, kapa iwoleka kuva. <sup>8</sup> Avo vena mwi nyama kavawoli kutavisa Ireeza. <sup>9</sup> Nihakuva bulyo, kamwina mwi nyama kono mu Luhuhu, haiva initi kuti Luhuhu lwe Ireeza luhala mwenu. Kono haiva zumwi kena Luhuhu lwa Kreste, kavaliwa kwali. <sup>10</sup> Haiva Kreste wina mwenu, muvili ufwile cho kukuteka chivi, kono Luhuhu luhala cho kukuteka kujolola. <sup>11</sup> Haiva Luhuhu lwakwe yava vusi Jesu kuvafu lyi hala mwenu iye yava vusi Kreste kuvafu kamihe vuhalo mane ni mu mivili yenu cha Luhuhu lwakwe, ya hala mwenu. <sup>12</sup> Cwalehe, vamukulwangu, tu korota, kono isike kwi nyama kahala chokuya ke nyama. <sup>13</sup> Kaho haiva muhala chokuya che nyama, china hafuhi nikufwa, kono haiva cha Luhuhu mwihaya mitendo yo mivili yenu, kamuhale. <sup>14</sup> Kaho vangi va yendiswa Luho lwa Ireeza, ava vaana va Ireeza. <sup>15</sup> Kaho kena muva tambili Luho lo kusuminwa hape kuti mu tiiye. Kono, muva tambuli Luho lo kuañulwa, kowo utu lira, “Abba, Father!” <sup>16</sup> Luho ulo lyine luhindite vupaki ni luho lwetu kuti tuvana ve Ireeza. <sup>17</sup> Haiva tu vana, cwale tuvajovoli, va jovoli ve Ireeza. mi tuva jovoli hamwina ni Jesu, haiva luli tu nyanda naye njokuti tuka nyemunwe naswe naye. <sup>18</sup> Kaho ihinda kuti manyando eyinu inako ka swaneli ku vambañwa ni nkaya yete vonahazwe kwetu. <sup>19</sup> Kokusaka luli zintu zi livelelwe zo kuvumbwazilindile kuvonehala kwa vana va Ireeza. <sup>20</sup> Kaho kuvumbwa kuva kuketetwe, isike cho kusaka kwateni, kono

kwali yava chiketi. Ina mukukola luli <sup>21</sup> kuti kuvumbwa uko kwine kakuhewe kuzwa ku vukova ku vola, mi kailletwe mwi ntukuluho ye nkanya ya vaana ve Ireeza. <sup>22</sup> Kaho twizi kuti kuvumbwa konse kwina mukulira ni misevezi ichisa hamwina nanga hanu. <sup>23</sup> Isike fela izo, kono nanga iswe tuvene, vena miselo ye ntanzi yo Luho-nanga iswe tuvene tulivuza kukati ketu, kulindiza kuañulwa kwetu, kuwulwa kwe mivili yetu. <sup>24</sup> Kaho cho vundume vakwe tuva hazwa. Kono icho chituva ni vundume kuchili ka chipangahale ni chiseni kuvoneka, kaho kozo ulindiza kwecho cha vona kale? <sup>25</sup> kono haiva tuva ni vundume kwecho chitusa voni, cwale tulindza ni nkulo inde kuchili. <sup>26</sup> Mwinzila iswana, Luho lutusa hape mutushekesha. Kaho ka twizi mutu swanela ku lapelera, kono Luho ulo lwine lyitu lapelera. <sup>27</sup> Iye yo saka wizi mihupulo ye Luhuhu, kakuti utu lapelera muchivaka cha valumeli chokuya chentanto ye Ireeza. <sup>28</sup> Twizi kuti kwavo va saka Ireeza, usevya zintu zonse hamwina kuva vulotu, kwavo vava sumpwa chokuya kwali. <sup>29</sup> Kakuti kwavo va vezivi kale, avava hupuleli kale kuva chiswaniso cha mwanakwe, kuti avo we ntanzi mukati ka mizwale vakwe. <sup>30</sup> Avo vava hupuleli kale, avo avava sumpi hape. Avo vava sumpi, avo avava pangi ku jolola. Avo vava joloji, avo hape avava nyemuni. <sup>31</sup> Chinzi hape chese tu wambe kuamana izi zintu? Haiva Ireeza nji wetu, njeni yo wola ku tilwisa? <sup>32</sup> iye yasena va katwi mwanakwe kono ava muhi muchisa chetu, keta wole vule hape naye kutuha zintu zonse? <sup>33</sup> Yate lete kuhambiliza kwavo va keta Ireeza? Ireeza njiyena ya joloza. <sup>34</sup> njeni yata watule? Kreste njiyena yava tufwili, mi niku hita izo, avo vuswa hape. Niyendisa ni Ireeza mu chivaka china ikute, mi njiyena yo tulapelera. <sup>35</sup> Njeni yasa tuzwise kwi rato lya Kreste? manyando, kapa inzala, kapa kusa zwata, kapa inkozi, kapa kasho? <sup>36</sup> Sina mwiñolelwe, “chokukoma kwako twihaiwa izuva ni zuva. tuva kuhindwa sina ingu iya kukwihaiwa.” <sup>37</sup> Mwezi zonse zintu tuvakomi mwali utusaka. <sup>38</sup> kaho niva zumini kuti kapa ifu, kapa vuhalo, kapa ma ñiloyi, kapa mivuso, kapa zintu zina koo, kapa zintu zete zize, kapa manta, kapa vule, kapa vutungi, <sup>39</sup> kapa chintu chimwi cha vumbwa, chete chi wole kuni zwisa kwi rato lya Ireeza, lyina mwa Kreste Jesu Simwine wetu.

## Inkauhanyo 9

<sup>1</sup> Ni wamba vuniti mwa Kreste, kani chengi, mi muhupulo wangu uhindite vupaki name muluho lu Jolola, <sup>2</sup> kuti kwangu kwina kulira kukando niku chiswa ku nkulo kusa mani. <sup>3</sup> Kaho ni sepa kuti ime ni mwine ni kutiwe nikuvikwa ku mbali kuzwa kwa krete che vaka lya vamukulwangu, avo va mushovo wangu chokuya ke nyana. <sup>4</sup> Ma isilaele. vena ku añulwa, inkanya, chilikani, impo zo mulao, kulumbeka kwe Ireeza, ni nsepiso. <sup>5</sup> Va sukukulu vava sukulu kwava kazwi Kreste wa keza ni kute kwi nyama- Iye yali Ireeza konse. Alumbekwe kuya kwile. Amen. <sup>6</sup> Kono kena kuti insepiso za Ireeza za kanga. Kaho kena vonse vena mwa Isilaele vazwa mwa Isilaele. <sup>7</sup> mane ni vaana va Abrahamama vaana vakwe ve niti. Kono, “nji ka Isaac kuti vaana venu kava sumpwe.” <sup>8</sup> Icho njikuti, vaana ve nyama kena vaana ve Ireeza. Kono vaana ve nsepiso va vikitwe nji vaana. <sup>9</sup> Kaho ilyi nji linzwi lye nsepiso: “keyi nako munize, mi mwana



kahewe kwa Sarah.”<sup>10</sup> Isiñi fela ichi, kono haisi Rebecca naye ava zalwa cha mukwame yenke, Ishetu Isaac-<sup>11</sup> kaho vaana kena vavali kuzalitwe mi kena vava pangi chintu chilotu kapa chimbi, njokuti intokwahalo za Ireeza chokuya chokuli ketela chiwole kuzimana, isiñi cha mitendo, koho chevaka lyakwe yo sumpa-<sup>12</sup> iva wambwa kwali, “mukulwana ka seveleze muhwile.”<sup>13</sup> iswana sina muiva ñolelwa: “Jacovo niva kumusaka, kono Esau niva kumutoyete.”<sup>14</sup> Cwale he katu wambe nzi? kwina kusa jolola ni Ireeza? kanji ipangahali.<sup>15</sup> Kaho uwamba kwa Mushe, “kanive ni chishemo kozo yete ninive ni chishemo, mi kanive ni nkumbo kwali yete ninive ni kumbo.”<sup>16</sup> Cwalehe, kena kuti nji kwakwe we ntato, kapa iye yo mata, kono ivaka lya Ireeza, yo vonisa chishemo.<sup>17</sup> Kaho ñolo lyi wamba kwa Pharoah, “kelyi vaka niva kunyemuni, njokuti ni sondeze manta angu kwako, mi hape kuti izina lyangu lyive kuwambwa mwifasi lyonse.”<sup>18</sup> Cwalehe, Ireeza wina chishemo kwavo va saka, mi avo va saka, uvapanga kusa zuwa.<sup>19</sup> Kamuwambe cwalehe kwangu, “chinzi hasi wana zifoso? kaho yense ya vazimani he ntato yakwe?”<sup>20</sup> kwimbali imwi, mukwame, njeweni witava havusu vwe Ireeza? kana china chiva vumbwa kachiwole kuwamba kozo yava chivumbi, “Chinzi hova ni pangi mwinzila umu?”<sup>21</sup> muvumbi kena mulao hewulu lye tope kupanga kwi lambi iswana ni chivikilo cho musevezi wo vutokwa, mi ni chimwi chivikilo chokusevelisa izuva ni zuva?<sup>22</sup> Cwale haiva Ireeza, ya saka ku vonisa vukali niku panga manta akwe aziveke, ava lindizi ninkulo inde yo kuvika vukali vwakwe che nchanganiso?<sup>23</sup> Cwale kape ava pangi izi njokuti ezivahaze chifumu che nkanya yakwe mukati kezi vukilo ze chishemo, yava vikili kumasule inkanya?<sup>24</sup> Cwale kape ava chitupangili naswe, avo vava sumpi hape, isiñi fela mukati ka Majuda, kono hape niku ma Genitiles?<sup>25</sup> Sina ha wamba hape mwa Hosea: “kani sumpe vantu vangu vasena vavali vantu vangu, ni musakiwa wakwe yasena va kusakwa.<sup>26</sup> mi kaive kuti kuiva ka wambwa kuvali iva wambwa kuvali, 'kena muvantu vangu; aho kavasumpwe' vaana ve Ireeza yo hala.”<sup>27</sup> Isaya ulila Isilaele, “haiva i nombolo ya vaana va Isilaele iswana sina ivu lye wate, kaive za shala kwezo ziva hazwa.<sup>28</sup> Kaho Simwine mwahinde linzwi lyakwe he fasi, yahanu niku mana.<sup>29</sup> Mi iswana sina Isaya hava wambi, “haiva Simwine kena va siyi vaana<sup>30</sup> Katu wambenzi cwale? kuti ma Genitiles, kena vave chilili kuchena, kuchena kwe ntumero.<sup>31</sup> Kono Isilaele, vave chilili kuchena ko mulao, kena vava siki koo.<sup>32</sup> Ivaka ncinzi? kakuti kena vava ichilili che tumero, kono che misevezi. Vava nkumi hechwe lyokukuma,<sup>33</sup> sina muivañolelwe, “lole, ni lele mwa Zion ichwe lyokukuma ni hechwe lya mafosisa. iye ya zumina muchili kete aswaviswe.”

## Inkauhanyo 10

<sup>1</sup> Bamwangu, intakazo ye inkulo yangu ni inkupo yangu kwa Ireeza, kuhazwa kwabo. <sup>2</sup> Sina haniha bupaki kuamana nabo kuti bena inchiseho kwa Ireeza, kono isiñi chokuya che inzibo. <sup>3</sup> Kakuti kabezi kuluka kwa Ireeza, imi basaka kuzaka kuluka kwabo bene. Kena babali tuli kungsi yo kuluka kwa Ireeza. <sup>4</sup> Kakuti Kirisite nji mwi zuzilikizi wo mulao cho kuluka kwa zumwi ni zumwi yo zumina. <sup>5</sup> Kakuti Mushe uñola kuamana ni kuluka kuzwa ku mulao: “Muntu yo

panga kuluka kwa mulao kahale cho ku kuluka.”<sup>6</sup> Kono kuluka kuzwa kwi intumelo kuwamba ichi, “Kanji u wambi mwi inkulo yako, 'Njeni yese akambame mwi wulu?’ (cho kuti, kuleta Kirisite hansi);<sup>7</sup> imi kanji uti, 'Njeni yesa shetumukile mwilindi lisena ma manimani?’” (cho kuti, ku zikula Kirisite kuba fwile).<sup>8</sup> Kono iwamba nzi? “Linzwi lina he mbali nawe, mukaholo kako imi ni mwi inkulo yako.” Ilyo nji linzwi lye intumelo, li tuwamba.<sup>9</sup> Mukuti haiba cha kaholo kako uwamba kuti Jesu nji Simwine, imi ni kuzumina mwi inkulo yako kuti Ireeza aba mubusi kuba fwile, kohazwe.<sup>10</sup> Kakuti che inkulo muntu uzumina cho kuluka, imi cha kaholo u lemaha cha kuhazwa.<sup>11</sup> Kakuti iñolo liwamba, “Yense yo zumina kwali kese na swabiswe.”<sup>12</sup> Kakuti kakwina inshutano mukati ka Mujunda ni Mugerike. Kakuti Simwine uswana nji Simwine wa bonse, imi ufumite kubonse basumpa kwali.<sup>13</sup> Kakuti yense yo sumpa he zina lya Simwine ka hazwe.<sup>14</sup> Cwale linu kaba sumpe bule kwali ubasena ba bazumini? Mu ba zumine bule mwali ibasena ba bazuwi? Mu ba zuwe bule nikusena mukutazi?<sup>15</sup> Cwale kaba kutaze bule, kwanda haba tumwa? Sina mukuñolelwe, “Malotu bule mantende abo bawamba makande a zintu zi lotu!”<sup>16</sup> Kono bonse kena ba tekelezi kwi ivangeli. Mukuti Isaya uwamba, “Simwine, njeni ya ba zumini iñusa lyetu?”<sup>17</sup> Linu intumelo iza cha kuzuwa, imi ni kuzuwa cha linzwii lya Kirisite.<sup>18</sup> Kono ni wamba, “Kana baba zuwi?” Eee, cho buniti. “Mulumo wabo ubayendi mwi inkanda zonse, imi manzwi abo ku mamani mani e inkanda.”<sup>19</sup> Nihakubabulyo, ni wamba, “Kana Isiraele kana abezi?” Intanzi Mushe uti, “Kani mitangole cha muna kecho chisali che inkanda. Cha mukwa we inkanda ni kusena kuzuwisisa, kani mi tangole mane mubenge.”<sup>20</sup> Linu Isaya abena bundume ha wamba, “Niba wanwa kwabo basana babali kunigana. Niba libonahazi kwabo basana babani kumbili.”<sup>21</sup> Kono kwa Isiraele uwamba, “Musihali onse ni ba wololi mayanza angu kubasa kuteki ni bantu bamahañi.”

## Inkauhanyo 11

<sup>1</sup> Ni wamba linu, kana Ireeza aba kani bantu bakwe? Kanji ibi bulyo. Kakuti name bulyo ni mu Isilaele, ni mwihwa wa Abrahama, wo kulusika lwa Benjamini.<sup>2</sup> Ireeza kena aba kani bantu bankwe, abo baba kwizi. Kamwinzi icho mañolo achi wamba kuyamana ni Eliya, umo mwaba kumbilili ni Ireeza kuamana ni Isilaele?<sup>3</sup> “Simwine, babehayi batanikizi bako, baba chololi tatala twako. Njime nenke yo shele, mi bakwete kugana buhalo bwangu.”<sup>4</sup> Kono ikalabo ya Ireeza iba wambanzi kwali? “Ni libikile 7000 bakwame baseni kufukamina Baale.”<sup>5</sup> Nihakwina bulyo cwale, heyinu i nako nayo kusina bamwi bashela che baka lyo buketelo bwa chishemo.<sup>6</sup> Kono haiba kuti che chishemo, kaisili ke mitendo. Kusi bulyo chishemo ni chi sena chibabi chishemo.<sup>7</sup> Chinzi linu? Chintu chi baba kugana ma Isilaele, kahena baba chiwani, kono baketetwe baba chiwani, mi bungi buba zuminizi inkulo:<sup>8</sup> Kwina bobulyo sina mukuñolelwe: “Ireeza ababahi lihuho lwa kubula inzimbo, menso ili kuti kanji baboni, ni matwi ili kuti kanji bazuwi, kuleta linu izuba.”<sup>9</sup> Linu Dafita ucho, “Musiyee itafule yabo isanduke ka nyandi ni kaswa, chisitaliso ni bubengiso kuba lwisa.<sup>10</sup> Musiyee menso abo a sihiswe ili kuti kanji ba boni. mi ba ongomane misana inako yonse.”<sup>11</sup> Ni wamba cwale, “Kana

baba chunchuli kuti mane bawe?” Kanji kubi bulyo. Nihakuba bulyo, cha kukangwa kwabo bene, kuhazwa ku bezi kube chisi, ili kuti ba bengiswe cha muuna. <sup>12</sup> Linu haiba kuti kukangwa kwabo njo bufumu bwe yinu inkanda, mi haiba kuti kusinyehelwa kwabo njo bufumu bu ba Chisi, kumana kwabo muku kanduhe bule? <sup>13</sup> Kono hanu ni wamba kwenu be Chisi. Kubona fela kuti ni muapositola kube Chinsi, Ni hinda buikumuso mumutendo wangu. <sup>14</sup> Mwendu muni minyenze cho muna abo bakwangu che nyama. Mwendu mane mutu haze bamwi kubali. <sup>15</sup> Kakuti haiba kukaniwa kwabo joku bozekeza inkanda, ikamuhelo yabo kaibe bule kono buhalo kuzwa kwa bana fwile? <sup>16</sup> Haiba zilyatu ze intanzi zibikitwe, kwina bulyo ni kubusu bwa chinkwa, Haiba mihisi i babalelwe, mukube bulyo niku mitai. <sup>17</sup> Kono haiba kuti imwi mitai iba choki kwateni, haiba inwe, mutai we samu lye Olive lya muzuka, uba nungwa mwenu, mi haiba muba liyabili nabo mubufumu bwa mihisi ye chikuni che olivi, <sup>18</sup> Kanji muli tundumuni hewulu ye mitai. Kono haiba nimuli tundumuna, kanjenwe mutusa mihisi, kono mihisi itusa inwe. <sup>19</sup> Kamuwambe linu, “Mitai iba konsolwa ili kuti ni nungwe kwateni.” <sup>20</sup> Iyo nje niti. Chebaka lyo kusa zumina kwabo baba cholwa kwateni, kono inwe muzimene cho kukola chebaka lye tumelo yenu. Kanji muli hupuli cho kuli hanzika, kono cho kutiya. <sup>21</sup> Kakuti haiba Ireeza kena aba bukelezi mitai inswanela, nangati inwe kakwina mwasa bukeleze. <sup>22</sup> Mulole hateni, linu, mihato ya chishemo ni bukando bwa Ireeza. Kulimwi iyanza, bukando bubezi ha Manjunda ba bawi. Kono kulimwi inyanza, chishemo cha Ireeza chiza henu, haiba ni muzwila habusu ni mukuluka kwakwe. Kusi bulyo nanwe kamu kosolwe kwateni. <sup>23</sup> Mi mane nabo, haiba kuti nibasa zwili habusu ni kusa zumina kwabo, kaba nungwe mwateni. <sup>24</sup> Kakuti Ireeza usi wola kuba nunga mwateni hape. Mukuti haiba muba kosolwa bulyo kwi samu lye olive lya muzuka, mi cha kusaba ni ka mukulukelwa bulyo baba nungwa kwi samu ilotu lye olive, muchi samu chilotu che olive, kakube bule kwa ba Majunda ili abo mitai tato, mwete ba nungwe hape mwi simu lyabo lye olive? <sup>25</sup> Mukuti kanisaki kuti mwi kale ni musezi, bamwangu, kweyi inkunutu, ili kuti kanji mubi batalifite mukuzeza yenu. Iyi inkunutu yakuti imbali imwi yaku kuku tuhalisa iba tendahali mwa Isilaele, kusikila kwizuzilizwa ku be Chisi chikweza mukati. <sup>26</sup> Kobulyo Isilaele yonse mui i hazwe, sina mukuñolelwe: “Kuzwilila mwa Zionu kakube ni Mulukululi. Mwa zwise kusaba ni bumulimu kwa Jakobo. <sup>27</sup> Mi ichi kachibe chilikani changu na bo, china zwise zibi zabo.” <sup>28</sup> Kulimwi iyanza kuamana ni evangeli, abo zila kwi neku lyenu. Kulimwi inyanza chokuya cho buiketelo bwe Ireeza, basakiwa chebaka lya ba zimu babo. <sup>29</sup> Kakuti impo ni kusupiwa kwa Ireeza kaku chichiwa. <sup>30</sup> Sina kumatangilo hamusana muba kuku teka Ireeza, kono hanu chimuba tambuli chishemo chebaka lyo kusazuwa kwabo. <sup>31</sup> Mwi nzila iswana, hanu aba Majunda kana babali kusi zuwa. Mupuzo wakuti kacheshemo chitondezi kwenu nabo hanu kuti niba tambula chishemo. <sup>32</sup> Kakuti Ireeza abe yalili bonse che baka lya kuse chilila, njikuti naba bonise chishemo kubose. <sup>33</sup> Oho, butungi bwe chifumu bonse bwa butali ni bwa maano e Ireeza! Kuwoleka bule kusanganiwa kwe nkatulo zakwe, mi inzila zakwe zina kule ni kwi

zabahala! <sup>34</sup> “Kakuti njeni yabezibi muhupulo wa Simwine? Kamba njeni yaba bi muyelezi wakwe? <sup>35</sup> Kamba njeni chetanzi yabahi chintu kwa Ireeza, ili kuti Ireeza amulihe?” <sup>36</sup> Kono kuzwa kwali, ni chakwe, ni kwali, kwina zintu zonse. Kwali kube inkanya kuya kusa mani. Amen.

## Inkauhanyo 12

<sup>1</sup> Ni misusuweza cwale, bakwetu, ke chishemo cha Ireeza, kuti mulete mibili yenu ubu chitabelo chi hala, chi jolola, chi tambulwa kwa Ireeza. Uwu njo mutendo wenu usakahala. <sup>2</sup> Kanji muyendeleli ne inu inkanda, kono mube ba chinchitwe chobuhya bwa mano enu. Mutende ichi kuti mwi zibe zilotu, zitambuleha, ni kusaka kushiyeme kwe Ireeza. <sup>3</sup> Kakuti ni wamba, chebaka lye chishemo icho chiba kuhewa kwangu, kuti yense wina mukati kenu kanji bazezi kuti ba bobutokwa ahulu kuhita mubaswanela kuhupulela. Kusibulyo, baswanela kuhupula che nzila yo butali, ubu sina Ireeza habahi kuzumwi ni zumwi itikanyo ye tumelo. <sup>4</sup> Sina hatwina zilama zingi mu mubili wonke, kono kahena kuti zilama zonse zina musebezi uswana. <sup>5</sup> Mwi nzila iswana, inswe tubangi tumubili umwina mwa Kresite, mi tuchilama chimwina kuzumwi ni zumwi. <sup>6</sup> Twina impo zi chinchana cho kuya ke chishemo chi tu bahewa. Haiba impo yo zumwi yo butanikizi, kutendahale bulyo kuya nche ntikanyezo ye ntumelo yakwe. <sup>7</sup> Haiba impo yonzumwi ku sebeza, mumu siye a sebeze. Haiba zumwi wina impo yo kuluta, mumusiye a lute. <sup>8</sup> Haiba zumwi impo yakwe kususuweza, mumusiye a susuweze. Haiba zumwi impo yakwe kuha, mumusiye atende bulyo chekulo yonke. Haiba zumwi impo yakwe ku yendisa, musiyeye ayendise che ntokomelo. Haiba zumwi impo yakwe kutondeza chishemo, musiyeye achite cho kusanga. <sup>9</sup> Musiyeye ilato libe nikusena kuliha. Mukane cheli chibi; mukwatilile icho chilotu. <sup>10</sup> Kuamana nilato lya bamwetu, mube nilato ku zumwi ni zumwi. Kuamana ni kute, mukute zumwi ku zumwi. <sup>11</sup> Kuamana ni ntundamo hande, kanji muhakanyehi. Kuamana ni luhuho, mu nyolelwe. Kuamana ni Simwe, mumu tendele. <sup>12</sup> Musange mwi nsepo imwina nayo kuamana ni zisikezite. Mulisante muma sikuluko enu. Muzwile habusu ku lapela. <sup>13</sup> Muliyaabile mu zisakahala kuba zumine. Musake inzila zingi zo kutondeza ikamuhelo. <sup>14</sup> Mufuyaule abo bami nyandisa; mufuyaule mi kanji mukuti. <sup>15</sup> Musange nabo basangite; mulile nabo balila. <sup>16</sup> Mube bo muhupulo uswana ku zumwi ni zumwi. Kanji muhupuli mwi nzila zo kulikumusa, kono mutambule bantu basali wanini. Kanji mutalifi mumi hupulo yenu mubene. <sup>17</sup> Kanji mubozekezi zumwi bubu cho bubu. Mutende bulotu habusu bwabantu bonse. <sup>18</sup> Haiba kuoleka, sina ha kulitingite henu, muhale mwi nkozo ni bantu bonse. <sup>19</sup> Kanji muli lwisi mubene, basakwa, kono muhe inzila kubu kali bwa Ireeza. Sina hakuñoletwe, “Kubozekeza nji kwangu; kani lihise; kuwamba Simwine.” <sup>20</sup> “Kono haiba chila chenu chifwile inzala, mu mulisike. Haiba ufwile inyota, mumuhe cho kunwa. haiba ni mutenda inchi, kamu kunganye makala o mulilo hamuntwi wakwe.” <sup>21</sup> Kanji mukomiwa ku bubu, kono mukome bubu cho bulotu.

## Inkauhanyo 13

<sup>1</sup> Musiye zumwi ni zumwi akuteke ba yendisi bamazimo makando, kakuti kakwina buyendisi kwanda ha buzwa kwa Ireeza. Imi buyendisi bwina kwateni buba ketiwa kwa Ireeza. <sup>2</sup> Kuzwaho iye yokana ubo bunyendisi u lwisanisa intaelo ya Ireeza; imi abo babulwisa kaba wane inkatulo he wulu lyabo bene. <sup>3</sup> Kakuti bayendisi kaba balwisi batenda zishieme, kono kuzitendantu zibi. Kana mulakaza kusatiya iye yo wina ha buyendisi? Pange chi shieme, imi kotambule ku zumininwa kwali. <sup>4</sup> Kakuti iye muhikana wa Ireeza kwako cha kushiana. Kono haiba upanga zibilala, utiye; kakuti iye kahindi mukwale nikusena ibaka. Kakuti iye muhikana wa Ireeza, mubozekezi wo bukali kozo yo panga bubi. <sup>5</sup> Kuzwaho uswanela ku kuteka, isiñi bulyo che ibaka lya bukali, kono hape che ibaka lye zwalo. <sup>6</sup> Ibaka lye chi muliha mutelo nao. Bayendisi ba hikana ba Ireeza, yo tekeleza kwezi zintu cho ku wondelela. <sup>7</sup> Mulife ku zumwi ni zumwi chi kolotwa kubali: mutelo kozo mutelo ku uswanela; chikoloti kozo kuchi kolotwa; kutiya kozo yo tiza; itompo kozo u swanela itompo. <sup>8</sup> Kanji mukoloti zumwi chimwi, kwanda o kusaka zumwi ni zumwi. Kakuti uzo yo saka mwakwe naye wizuziliza intaelo. <sup>9</sup> Milao: “Kanji u pangi busangu, kanji wi hayi, kanji wibi, kanji ulakazi,” imi haiba kwina imwi intaelo nayo, ukungenywe mowu mubamba: “Sake mwako sina molisakila.” <sup>10</sup> Ilato kali holofazi mwako; kuzwaho, ilato li zuziliza mulawo. <sup>11</sup> Chebaka lyezi, mwizi inako, kakuti cheli inako yenu kuti mubuke kuzwa kuku lala. Lyahanu kuhazwa kwetu chikwina hafuhi kuhita hatutanga kuzumina. <sup>12</sup> Masiku chi azwila habusu, imi izuba chilya chuta hafui. Twende linu tubike hembali mitendo ye fifi, imi twende tuzwate zizwato ze seli. <sup>13</sup> Twende tuyende cha kuboneka, sina musihali, isiñi cha kusanga kweinu inkanda kamba kukolwa ahulu; imi kanji tuyendi mu mitendo ya busangu kamba mwi intakazo zisawoleki kusiwa, imi isiñi mwi inkani kamba cho muna. <sup>14</sup> Kono muzwate Simwine Jesu Kirisite, imi kanji muhi chibaka kwi nyama, kwi zuzilikiza intakazo yayo.

## Inkauhanyo 14

<sup>1</sup> Mutambule yense yo fokola mwi intumelo, nikusena kuha inkatulo che inkani. <sup>2</sup> Umwina muntu wina intumelo yo kulya chimwi ni chimwi, zumwi yo fokola ulya vulyo zisihu. <sup>3</sup> Imi uzo yolya zonse kanji a nyansilizi uzo yasalyi; imi uzo yasalyi zonse kanji a atuli uzo yolya zonse. Kakuti Ireeza aba mutambuli. <sup>4</sup> Njewe ni, iwe yo atula muhikana yowila kuzumwi? Njikwali habusu bwa muyendisi wakwe kuti uzimana kamba uwa. Kono ka pangiwe kuti a zime, kakuti Simwine u wola kumu tenda kuti a zime. <sup>5</sup> Umwina muntu ukuteka i zuba limwina hewulu lya limwi. Zumwi ukuteka mazuba onse kulikanyezeza. Musiye muntu yense azuwisise mumuhupulo wakwe. <sup>6</sup> Iye yo kuteka izuba, ulikutekela Simwine. Imi iye yolya, ulyila Simwine, kakuti iye uha buitumelo kwa Ireeza. Iye yasalyi, usiya kulyila Simwine, naye bulyo uha buitumelo kwa Ireeza. <sup>7</sup> Kakuti kakwina kwetu yo lihalila iye mwine, imi kakwina yo lifwila iye mwine. <sup>8</sup> Mukuti haiba tuhala, tuhalila Simwine, imi haiba tufwa, tufwila Simwine. Linu haiba tuhala kapa tufwa, tuba Simwine.

<sup>9</sup> Kacheli ibaka Kiresite abafwi ni kuhala hape, ili kuti abe Simwine wa bonse bafwile ni bahala. <sup>10</sup> Kono iwe, chinzi hau atula mwako? Linu iwe, chinzi hau nyansiliza mwako? Kakuti iswe twense katu kazime habusu bwe chipula che inkatulo cha Ireeza. <sup>11</sup> Kakuti kuñoletwe, “Kubona nihala,” kuwamba Simwine, “kwangu lyonse izwi ni izwi ka lisungame, imi indimi ni indimi kaihe intumbo kwa Ireeza.” <sup>12</sup> Chobulyo linu, zumwi ni zumwi kwetu mwahe buikalabelo bwakwe kwa Ireeza. <sup>13</sup> Kuzwaho, sanzi tuboleli kuatula zumwi ni zumwi, kono chebaka lyobulyo tuzeze izi, kuti kakwina zumwi yeta bike chisitaliso kapa kuteela mwako. <sup>14</sup> Nizi imi nina muchilikani ni Simwine Jesu, kuti kakwina chilijolola icho chine. Kwanda yakwe njowola kuchihinda kuti kachijolwele, kwali kachijolwele. <sup>15</sup> Haiba ibaka lya zilyo mukwako uzuwa kuchisa, aho kosiyendi mwi ilato. Sanzi usinyi cha zilyo zako uzo Kiresite yaba fwili. <sup>16</sup> Chobulyo sanzi uzuminini zohupula kuba zishiyeme kuti ziwambiwe ubu zibi. <sup>17</sup> Kakuti mubuso wa Ireeza kawuami zilyo ni kunywa, kono kuama kushiyama, inkozo, imi ni kusanga Muluhuho Lujolola. <sup>18</sup> Kwali iye yotendela Kirisite cheyi inzila utambulwa kwa Ireeza imi uzuminwa ni bantu. <sup>19</sup> Chobulyo linu, twende tu tundamene zintu ze inkozo ne zina zi tuzaka. <sup>20</sup> Sanzi usinyi mutendo wa Ireeza kebaka lya zilyo. Zintu zonse luli zijolola, kono chibi kozuna muntu yolya imi chimuletela kuwa. <sup>21</sup> Kushiyeme kusalya inyama, kapa kunywa i waine, kapa icho chabona mwako kuti chi fosahela. <sup>22</sup> Intumelo yo kwete, ibike mukati kako ni Ireeza, yo fuyoletwe njozo yasa linyansi iye mwine kucha zuminina. <sup>23</sup> Iye yo akanyeha unyanswa ha lya, kakuli kachi zwi mwi intumelo. Imi zonse zisa zwi mwi intumelo chibi.

## Inkauhanyo 15

<sup>1</sup> Linu kwetu tukoletwe tu swanela ku kutusa bufokoli bu ba fokola, imi ni kusa litabisa tubene. <sup>2</sup> Tusiye zumwi ni zumwi kwetu atabise ya bambene naye kwezina zi lotu, ili kuti a zakwe naye. <sup>3</sup> Mi ni heiba Kirisite kena abali tabisi mwine. Nihakubulyo, ibena bo bulyo sina mukuñoletwe, “Matapa abo ba bamituki aba wili hangu.” <sup>4</sup> Kakuti zonse zi bañoletwe ku masule ziba ñolwa che intaelo zetu, ili kuti che inkulonde ni che insusuwezo ya mañolo tube ni insepō. <sup>5</sup> Linu Ireeza we inkulonde ni insusuwezo a mihe mizezo iswana kuzwilila kwa Jesu Kirisite. <sup>6</sup> A pange bulyo ili kuti cha muzezo umwina ni mulomo umwina mutembe Ireeza ni Isi wa Simwine wetu Jesu Kirisite. <sup>7</sup> Kuzwaho mutambule zumwi ni zumwi sina Kirisite mwa ba mitambwili, chentumbo ya Ireeza. <sup>8</sup> Chingi ni wamba bulyo Kirisite abapangwa buhikana bwa mupato kwi neku lyo buniti bwa Ireeza, cha kwi zuzikiza insepō zi bahewa ku bazazi, <sup>9</sup> mi ku Basikunze ni kuha ikanya kwa Ireeza cha chishemo chakwe. Kwina bulyo sina mu kuñoletwe, “Kuzwaho kanihe ikanya mukati ka Basikunze ni kuzimba intumbo che zina lyako.” <sup>10</sup> Hape iti, “Musange, inwe mu Basikunze, ni bantu bakwe.” <sup>11</sup> Mi hape, “Mutembe Simwine, mubose Basikunze; musiyē bantu bonse ba mutembe.” <sup>12</sup> Hape, Isaya uti, “Kakube ni muhisi wa Jese, mi iye yesa buke ku yendisā hewulu li Basikunze. Basikunze ka babe ni insepō mwali.” <sup>13</sup> Linu Ireeza we insepō amizuze kusanga ni inkozo yonse cha ku zumina, ili kuti mube ni ku kwatinsana munsepō, cha ziho zo Luhuhu Lujolola. <sup>14</sup> Name

ni mwine ni zuwisisa chenu, ba mwangu. Ni zuwisisa kuti nanwe bulyo mwi zwile bulotu, kwizula inzibo yonse. Ni zuwisisa kuti nanwe bulyo muwola kuli nyemuna zumwi ni zumwi. <sup>15</sup> Kono ni miñolela cha bundume bungi kwenu cha zintu zimwi ili ku mihupulisa hape, chebaka lye mpo ibahewa ime cha Ireeza. <sup>16</sup> Iyi mpo ibali kuti ni swanela ku ba ni muhikana wa Jesu Kirisite yo tumitwe ku Basikunze, kuha sina mupurisita ivangeli ya Ireeza. Ni swanela kutenda bulyo ili kuti inubu i Basikunze pona chi itambulwa, ku jolozwa cha Luhuhu Lujolola. <sup>17</sup> Imi kusanga kwangu kwina mwa Jesu Kirisite ni muzintu za Ireeza. <sup>18</sup> Njikuti kese ni wambe chimwi kwande yecho Kirisite cha ba maniselezi kuzwa kwangu cha ku kuteka ku Basikunze. Izi zintu zitendwa cha linzwii ni mutendo, <sup>19</sup> cha ziho za zisupo ni zikomokisa, ni cha ziho za Luhuhu Lujolola. Ichi chi bapangahali bulyo kuti kuzwa mwa Jerusalema, mi ni kuzimbuluka umo mane ku kasika kwa Iliriko, ili kuti niwole kutwala linzwi lya Kirisite cho kwizula. <sup>20</sup> Che iyi nzila, intakazo yangu ibali ya kuwamba ivangeli, kono isiñi kwe zibitwe Kirisite chezina, ili kuti kanzi ni zaki hewulu lya mutomu wa zumwi muntu. <sup>21</sup> Mukwikalile sina mu kuñolwe: “Abo kubali basena ba ba wambilwe zakwe mwize mu mubone, mi nabo basena ba bazuwi kaba zuwe.” <sup>22</sup> Kuzwaho ni ba kaniswa tungi kukwiza kwenu. <sup>23</sup> Kono hanu, ka nisina chibaka mwezi zikiliti, mi ni ba lyolelwe cha zillimo zingi kwiza kwenu. <sup>24</sup> Monse muniyendela kwa Sipeini, ni sepa ku mibona ha nihita, mi ni ku nisindikizwa munzila chenu, hani mana ku likola kuli kopanya nanwe che nako zana. <sup>25</sup> Kono hanu ni kaya kwa Jerusalema kuka tendela ba zumine. <sup>26</sup> Sina hakubali kulotu ku tabisa kwa Masedonia ni Akaya kuha chimwi ku basena mukati ka bazumine mwa Jerusalema. <sup>27</sup> Eee, ku bali kutabiswa kwabo, imi, luli, cho kuti ba bali ku bakolota. Mi heiba Basikunze ba bali abeli muzintu zabo za luhuhu, ba bakolota nabo cha ku batenda muzintu zi boneka. <sup>28</sup> Kuzwaho, ha ni mana uwu mutendo ni ku bona kuti batambula zonse zi baletwa, ka ni yende kwa Sipeini ni ku mipotela hani hita. <sup>29</sup> Nizi kuti ha nikeza kwenu kani ni ze mu kwizula che mbuyoti ya Kirisite <sup>30</sup> Hanu ni mi susuweza, ba mwangu, cha Simwine wetu Jesu Kirisite, imi ni chelato lya Luhuhu, kuti mulike hahulu mubonse name mwi intampelo kwa Ireeza changu. <sup>31</sup> Mulapele kuti ni bukelezwe kwa bana basa kuteki mwa Judea, ili kuti kutenda kwangu mwa Jerusalema ku tambulwe ku bazumine. <sup>32</sup> Mulapele kuti ni ze kwenu che intabo che intato ya Ireeza, ili kuti Ime, hamwina nanwe, ni wane impumulo. <sup>33</sup> Mi Ireeza we inkozo abe nanwe mubonse. Amen.

## Inkauhanyo 16

<sup>1</sup> Nimiha bupaki ka nchizyetu Febe, muhikana we nkeleke ina mwa Senkreye, <sup>2</sup> kutendela kuti mumu tambule che zina lya Simwine. Muchite bulyo sina mubatendela ba zumine, imi mumuzime hembali mumutuse muzintu zonse mwasaka intuso yenu. Kakuti iye mwine kasibili abatusi bantu bangi, mane name bulyo. <sup>3</sup> Mu lumelise Prisila ni Akila niba hikana bangu mumitendo ya Kirisite Jesu, <sup>4</sup> abo chabuhalo bwangu babali tombweli buhalo bwabo chebaka lyangu. Nilitumela kubali, isiñi ime nenke, kono ni benkele zaba Sikunze bonse. <sup>5</sup> Mu lumelise inkeleke ina munzubo yabo. Mu lumelise musakiwa wangu Epaeneto, iye chichelantu chentanzi kuzumina kwa

Kirisite mwinkanda ya Asia. <sup>6</sup> Mu lumelise Maria, yaba misebelezi ahulu. <sup>7</sup> Mu lumelise Androniko ni Juniasi, nchizyangu niba nibena nabo mwintolongo. Bezibahele ahulu mukati ka baapositola, abo babena mwa Kirisite ime niniseni. <sup>8</sup> Mu lumelise Amplias, musakiwa wangu mwa Simwine. <sup>9</sup> Mu lumelise Urbano, mutendi wetu mwa Kirisite, ni Stakisi ini suna. <sup>10</sup> Mu lumelise Apelles, yozuminwa mwa Kirisite. Mu lumelise bena munzubo ya Aristobulusi. <sup>11</sup> Mu lumelise Herodioni nchizyangu, mu lumelise abo benzubo ya Narsiso bena mwa Simwine. <sup>12</sup> Mu lumelise Trifena ni Trifosa, basebeza ahulu mwa Simwine, Mu lumelise ni Persida ini suna, yaba sebezi ahulu mwa Simwine. <sup>13</sup> Mu lumelise Rufus, yoketetwe mwa Simwine, niba nyina ni bangu, <sup>14</sup> Mu lumelise Asinkrito, Flegono, Hermesi, Patrobasi, Hermasi ni bamwabo bena nabo. <sup>15</sup> Mu lumelise Philologus, Julia, Nerea ni nchizye, Olimpa ni bazumine bonse babena nabo. <sup>16</sup> Mu lumelisane cha kuli chunchuna kujolola. Inkeleke zonse za Kirisite zimi lumelisa. <sup>17</sup> Linu ni misusuweza, bamwangu, kuti muhupule abo baleta kukauhanya ni kusitalisa. Chiba hitilila intuto imuba lutwa. Muzwe kubali. <sup>18</sup> Bantu bakola ubu njaba kabasebelezi Simwine Kirisite wetu, kono mabumo abo. Cha buhuba bwabo ni manzwi atu shambwe shambwe bachengelela inkulo ziba sena mulandu. <sup>19</sup> Cha mutala wenu wa kukuteka usika kuzumwi ni zumwi. Nisanga, kuzwaho, henu, kono nisaka inwe kuti mutalife kuzishiyeme, imi ni kusaba ni mulandu kuzi sashiyeme. <sup>20</sup> Ireeza we inkozo mwalyatolele Satani kungsi ya matende enu cha kuhwela. Imi chishemo cha Simwine wetu Jesu Kirisite chibe nanwe. <sup>21</sup> Timotea, ini sebeza naye, umi lumelisa, ni Lusiusi, Jasoni, ni Sosipatere, nchizyangu. <sup>22</sup> Ime, Teriusi yoñola ili ñolo hanzi, mulumele mwa Simwine. <sup>23</sup> Gayusi, kunikala nibe inkeleke bonse, ba milumelisa. Erasto, mutuli wa masheleni e tolopo, umi lumelisa ni Kwato mwakwe. <sup>24</sup> “Imi chishemo cha Simwine Jesu Kirisite chibe nanwe mwense. Amen.” <sup>25</sup> Linu intumbo zibe kwali yowola kumizimika kuya che ivangeli ni inkutazo za Jesu Kirisite, <sup>26</sup> chakuya che insinulo ye inkunutu ibaungwilwe kuzwa ukoo, kono hanu chiya patululwa, kuya cha muñolelo wa chipolofita chize zibahala kwinkanda zonse, kuya che intaelo ya Ireeza wa kuya ku samani, cha kukuteka intumelo. <sup>27</sup> Kwa Ireeza umwina yo talifite, cha Jesu Kirisite, kube ikanya isamani. Amen.



## 1 Va Korinte

<sup>1</sup> Paulusi, ava sumpwa kwa Jesu Kreste ku va muapositola che tanto ya Ireeza, mi ni Sosthene mukwetu, <sup>2</sup> kwi kereke ye Ireeza ya Makorinte, kwavo va va njolozwa ni Jesu Kreste, va supitwe ku va vantu va njolola. Tu ñolela vulyo vonse avo va supa izina lya Simwine Jesu Kreste mu zivaka zonse, Simwine wavo ni wetu. <sup>3</sup> Chishemo ni konzo zi ve kwenu kuzwilila kwe Reeza Muzazi wetu ni Simwine Jesu Kreste. <sup>4</sup> Inako yonse ni litumela kwe Reeza wangu chenu vakeñi cha chishemo che Reeza chi va hewa kwenu cha Jesu Kreste. <sup>5</sup> A vami tendi va vahumi mwi nzila zonse, ni mu zi wambo zonse ni nzivo yonse, <sup>6</sup> sina ha kuva pakiwa za Jesu Kreste zi ve zuzilizwa ku va zeniti mukati kenu. <sup>7</sup> Linu hanu ka mu vulite impo za luhuhu sina ha mu lindile zi ungilwe za Simwine Jesu Kreste. <sup>8</sup> Ka wole ku mi koza ku twala ku ma manimani, kutendela kuti mu vule kusa swaviswa mwi zuva lya Simwine wetu Jesu Kreste. <sup>9</sup> Ireeza u sepahala, ya va mi sumpi kuva mu chilikani cha Mwan'a kwe, Jesu Kreste Simwin"e tu. <sup>10</sup> Linu ni mi kumbila, vakwangu, che zina lya Simwine Jesu Kreste, kuti mwese mu zumina, mi kuti sanzi ku vi ni kauhano mukati kenu. Ni mi kumbila kuti mu kopane ha mwina che ngana yonke ni mutendo u swana. <sup>11</sup> Imi iva vikwa munzila yi zuweka kwangu, va kwangu, cha vantu va Kloe kuti mitendo yavo yi tendahale mukati kenu. <sup>12</sup> Chi ni wamba nje chi: zumwi ni zumwi kwenu ati, "ni wa Paulusi," kapa "wa Apolosi," kapa wa Kefasi; kapa ni wa Kreste. <sup>13</sup> Nji kuti Kreste u kauhene? Kana Paulusi ava kokotelwa ka chenu? Kana mu va kolovezwa mwi nzina lya Paulusi? <sup>14</sup> Ni litumela kwe Reeza kuti kana ni va kolovezi nangati umwina kwenu, kunde a Krispusi ni Gaius. <sup>15</sup> Ku vavi vulyo ku tendela kuti ka kwina nangati umwina yo wamba kuti ava kolovezwa mwi nzina lwa ngu. <sup>16</sup> (Ni va kolovezi vulyo ni vezuvo ya Setefanisi. Kuzwaho, kanizi heva ni va kolovezi vamwi.) <sup>17</sup> Imi Kreste kena avani tumi kwiza ku koloveza kono kwiza ku ruta linzwi. Kena avani tumi kwiza ku ku ruta cha manzwi a vutali vwa muntu, kutendela kuti chifapano cha Kreste sanzi chivuli ziho. <sup>18</sup> Imi ituto kuamana ni chifapano ivonisa vuholo kwavo va chi vafwa. Kono mukati kavo avo va kwete kuhaza Ireeza, ziho ze Reeza. <sup>19</sup> Imi ku ñoletwe, "Mu ni sinye vutali bwavo vena vutali. Mu ni filikanye yi kutwisiso ya wina maano." <sup>20</sup> Winahi muntu muchinu? winahi muñoli? winahi Muwambi we nako zinu za sunu? Kena kuti Ireeza ava sanduli maano e kanda kuva isena intuso? <sup>21</sup> Kuzwila uko inkanda kena ivena maano akwi ziva Ireeza, ku va sangisi Ireeza chavo ziholeluli va sena va vena maano a ku ruta za ku lukulula avo va zumina. <sup>22</sup> Majuda va saka imakazo mi Magerike va saka maano. <sup>23</sup> Iswe tukutaza Kreste ya va kokotelwa, chi sitataliso ku Majuda ni vuholo luli ku Magerike. <sup>24</sup> Kono kwavo vava sumpi Ireeza, vonse Majuda ni Magerike, tu ruta Kreste ziho ni maano a Ireeza. <sup>25</sup> Imi vuholo luli vwe Reeza vwina vutali luli kuhita vwa vantu, mi ku vula ziho luli kwe Reeza ku kolete kuzamba kwa vantu. <sup>26</sup> Mu lole ipinzo zenu, vakwangu, kena vungi vwenu vena maano ena mazimo a vantu. Kena vungi vwenu va vena ziho. Kena vungi vwenu va pepywa nenza. <sup>27</sup> Kono Ireeza ava keti zintu mwi inkanda zivoneka vuhole ku swavisa vatali. Ireeza ava keti zi sena

ziho mwi inkanda ku swavisa vena ziho. <sup>28</sup> Ireeza ava keti zintu ze inkanda hansi ni zikendetwe. Ava keti vulyo ni zintu zi vonahala kuva zi sena tuso, ni zi sa kwina ni zina kwateni ava zitendi ku sa va za vutokwa. <sup>29</sup> Ava tendi vulyo kutendela kuti ka kwina yo swanela kuli katula havusu vwakwe. <sup>30</sup> Vakeñi cha va tendi Ireeza, hanu twina kwa Jesu Kreste, ya va tendwa maano kwetu ke Reeza. Avavi yo shiyeme, yo njolwezwe, ni mu sumununwa. <sup>31</sup> Che kalavo, sina linzwi ha li wamba, “mu siye yo liyemuna, ali nyemune mwi zina ya Simwine.”

## Inkauhanyo 2

<sup>1</sup> Linu, hani za kwenu, vakwangu, Kana na keza ni bulotu bukando vwa ziwambo nanta vwa vutali sina ani wamba vuniti vu liungwile vu amana ni Ireeza. <sup>2</sup> Kokuti ni va liketeli kuse ziva chimwi hani vena mukati kenu kunde a Jesu Kreste ya va hanzikwa ha chi fapano. <sup>3</sup> Mini vena nanwe muvu fokoli, ni mulyowa ni ku cha cha ahulu. <sup>4</sup> Imi mwi ñusa lyangu ni muku wamba kwangu vwangu kana kuvena za kumi koza mu manzwi a vutali. <sup>5</sup> Kokuti itumelo enu kazi ivi ya vutali vwa vantu, kono che ziho ze Ireeza. <sup>6</sup> Hanu, tu wamba cha vutali mukiti kava kulite, kono, isiñi cho vutali vwe kanda, kapa va vusi ve inu' nako, vakwe vafwe. <sup>7</sup> Kono, tuwamba vutali vwa Ireeza mwi niti ili wungwile. Vutali vu unguli Ireeza nako ni seni kuva kwateni kuti iswe tube ni kanya. <sup>8</sup> Ka kwina ku va yendisi ve yi nako vave zi u vu vutali, kambe vava vu zuwisisi ine nako, niva sana vava hanziki Simwine we kanya. <sup>9</sup> Kono kuva ñoletwe, “zintu zisana ziva vav onwa, zi sina zi va zuiwa matwi, ni zi sana zi vezi mu mihupulo. Zintu Ireeza zava lukiseze ava va musaka.” <sup>10</sup> Izi nji zintu za va tutondezi Ireeza cha luhuhu. Kokuti luhuhu lusa kisisa zintu zonse, nanga nezo zintu zi li ungwile ze Ireeza. <sup>11</sup> Njeni wizi mihupulo ya muntu, kunde ya luhuhu lwa muntu lwina mwali? Vulyo hape, kawina wizi zintu ze Ireeza zi li u ngwile kunde a luhuhu lwe Ireeza. <sup>12</sup> Kono kana tuva tumbuli luhuhu lwe kwanda, kono luhuhu luzwa kwa Ireeza. Kokuti twizive zintu ziva hewa fela kwetu cha Ireeza. <sup>13</sup> Tu wamba zhizi zintu mu mazwi a vutali uvo muntu kaoli ku ruta, kono, luhuhu lutu ruta. Luhuhu lutoloka mazwi a luhuhu ni vutali vwa luhuhu. <sup>14</sup> Muntu ya sena luhuhu lwe Ireeza, kaoli kutambula zintu ze luhuhu lwe Ireeza, kokuti kwali za vuholo. Kaoli kwizi ziva kakuli zi patululwa vulyo cha luhuhu lujolola lwe Ireeza. <sup>15</sup> Wina luhuhu lujolola u atula zintu zonse, kono kena inswanelo yaku atula va mwi. <sup>16</sup> Njeni yo ula kwiza muhupulo we Ireeza, yo wola ku mulaya. Kono, twina muhupulo wa Kreste.

## Inkauhanyo 3

<sup>1</sup> Mi ime, vakwanugu, kana ni va kuwola kuwamba kwenu uva vantu vo luhuhu, kono uvu vantu ve nyama uvu muchiche mwa Kreste. <sup>2</sup> Niva milele cha muzilili isiñi che nyama, kana muva litukiseze inyama. Mi, ni heva hanu, ka mulitukiseze. <sup>3</sup> Mi musina mwi nyama, mi kwina ifufa niku sazumi nzana ku sina mukati kenu, kamu hali che nyama, mi ka muyendi cha mazimo avuntu. <sup>4</sup> Mi zumwi hawamba, ni chilila Paulusi, zumwi uti ni chilila Apolosi, kamuhali uvu vantu na? <sup>5</sup> Njeni Apolosi linu, mi Paulusi njeni? Vahikana avo vamu va kuzumina, avo vava hewa musevezi kwa Simwine. <sup>6</sup> Niva vwali,

Apolosi ave tilele, kono Ireeza ava ku kuzi. <sup>7</sup> Mi linu, yo vwala ni yowi tilele kakwina. Kono nji Ireeza yokuza. <sup>8</sup> Hanu, uvwala ni yowitilela umwina. Mi zumwi ni zumwi kalihiwe cha musevezi wakwe. <sup>9</sup> Tuva veleki ba Ireeza, mwiwa lye Ireeza, muzako wa Ireeza. <sup>10</sup> Kuya ka chishemo che Ireeza chi va hewa kwangu che ntuto ya kwi ziva kuzaka, ni va vatangi intungo mi zumwi u zaka hateni. <sup>11</sup> Linu mutokomele zumwi ni zumwi atokomele mwate azakile hateni. Kokuti kakwina yo ola kutunga intungo kunde yo zuna ya va itangi, nji Jesu Kreste. <sup>12</sup> Ha hanu, haiva zumwi na zaka hentungo che gauda, silivera, cha mavwe a sepahala, zisamu, zilyo ze ñombe, kapa lyani, <sup>13</sup> musevezi wakwe ka u putululwe, mwete ni kupatulwe mwi nako ya mulilo. Mulilo kaulike musevezi wava tendi zumwi ni zumwi. <sup>14-15</sup> Haiva misevezi ya zumwi ni zumwi ni izi mana, mwa tambule inkavelo; kono haiva musevezi wa zumwi ni zumwi ni uhiswa, mwa nyande, kono iye mwine mwa puluswe, cha ku vanduka ku mulilo. <sup>16</sup> Kana mwizi kuti mwi tempele ya Ireeza ni kuti Luhuhu lwe Ireeza luhala mwenu. <sup>17</sup> Haiva zumwi na haya itempele ye Ireeza, Ireeza mwe haye zuna muntu. Imi itempele ye Ireeza i jolola, mumu ikalile nanwe. <sup>18</sup> Kanzi kuvi niyo lichenga mwine. Haiva zumwi mukati kenu uhupula kuti wina vutali mwe inu' nako, mu mu siye ave “cihole” mukuti ave yo talifite. <sup>19</sup> Mokuti vutali vwe inu ikanda kwa Ireeza vuholo. Mi ku ñoletwe, “U wonda vatalifite muvu vilala vwavo.” <sup>20</sup> Mi hape, “Ireeza wizi kuti mi hupulelo ya vatali kakwina.” <sup>21</sup> Linu ka kusina kulitemba cha vantu! Kakuti zintu zonse nji zenu, <sup>22</sup> kapa Paulusi, kapa Apolosi, Kefesi, kapa inkanda, kapa vuhalo, kapa ifu, kapa zintu zina kwateni, kapa zintu zi sike zite. Zintu zonse nji zenu, <sup>23</sup> mi muva Kreste mi Kreste we Ireeza.

## Inkauhanyo 4

<sup>1</sup> Nji mona vovuti muntu mwa swanela kutu hindila, sina va hikana va Kreste ni va hikana va humbilwe vuniti vwa Ireeza. <sup>2</sup> Mwe chi chilikani, nji zi zumi ninwe ku va kuti mu ve mu va hikana va sepahala. <sup>3</sup> Kono kwangu chintu chinini kuti ni atulwe inwe kapa muntu vulyo wa mulao. Imi kani atuli ime ni mwine. <sup>4</sup> Ka kwina nangati chonke chinizi kuya cha mulandu uni va hewa, kono ka ku talusi kuti kanina mulandu. Nji Simwine yo ni atula. <sup>5</sup> Kuzwaho sanzi mu atuli chimwi inako ni seni kukeza, Simwine na seni kukeza. Kalete ku njolola ku zintu zi patitwe mwififi mi ni ku patulula musevezi we nkulo. Linu zumwi ni zumwi njete na wane ku tembwa kuzwilila kwa Ireeza. <sup>6</sup> Hanu, vakwangu, Ni va viki kwangu mulao ni Apolosi vakeñi chenu, linu kuti kuzwila kwetu mu wole ku lituta itoloko yi wamba, “Sanzi mu hitilizi kuzwila ha vusu ni chi ñoletwe, “Ku vavi vulyo ku tendela kuti ka kwina kwenu yo linyemuna vakeni cha zumwi. <sup>7</sup> Imi njeni yo vona ku shelana kwenu ni vamwi? Chinzi chi mukwete chi mu sena mu vahewa vulyo? Heva mu vahewa vulyo, chinzi ha mu linyemuna uvu kena mu va tendi vulyo? <sup>8</sup> Chi mwina kale zonse zi mu saka! Chi mwina kale muhumite! Mu va tangi ku yendisami ku shiyeme kunde yetu! luli, ni mi lakaleza ku vusa, kuti tu wole ku vusa ha mwina. <sup>9</sup> Imi ni wana Ireeza ava tuhi va apositola he ñandaleza ya muvamba wa ma manimani mi sina muntu yo kaya kuku hayiwa. Tu va vikwa va liveleli ve inkanda- ku mangeloi, ni vantu. <sup>10</sup> Tuzihole che vaka lya Kreste, kono twina maano kwa Kreste. Ka mwina ziho,

kono tu kolete. Tu showelelwa mi tu shuvulwa. <sup>11</sup> Kuleta kwi inako yinu tu fwile izala mi tufwile inyotwa, tu va njevwe tu chumpwilwe, tu ndamiwa, mi ka twina mekalo. <sup>12</sup> Tu seveza katata, cha manz'a etu. Linu hatusekwa, tu wana imbuyoti. Ha tu nyandiswa, tulikoza. <sup>13</sup> Ni ha tu kendwa, tusi wamba chekulo imwina. Tu va vumbwa sina uvu matakala e inkanda ni inkwe lya zintu zonse. <sup>14</sup> Kani ñoli izi zintu ku mi shwaula, kono ni mi sikulula sina vaan'a ngu vani suni kuhitiliza. <sup>15</sup> Mi ni heva wina chikiti ya va zimanini kwa Kreste, kena kuti wina vazazi vangi. Imi ime njini muzazi wenu cha Jesu Kreste cha Linzwi. <sup>16</sup> Mi ni mi kumbila kwi chilila zini tenda. <sup>17</sup> Chingi ni va tumini kwenu Timotea, yo sakiwa ni ku sepahala ku va mwana Simwine. Mwa mi ku mbuluse inzila zangu kwa Jesu Kreste, sina muni vava rutili zintu zonse ni mwi Kereke imwi ni imwi. <sup>18</sup> Vamwi chi vali kumwise uvu kete ni ni voole kwenu. <sup>19</sup> Kono linu mu ni keze kwenu, heva Simwine na tuvusa. Linu kete ni nizive ku wamba kwavo va lihele, kono muni vone ziho zavo. <sup>20</sup> Imi muvuso wa Ireeza kena ku wamba vulyo kono ziho. <sup>21</sup> Chi mu saka chinzi? Ni keze kwenu che mbazi kapa che lato ni ka luhuhu lu njolola?

## Inkauhanyo 5

<sup>1</sup> Tu zuwile kuti kwina vushahi vwina mukati kenu, vuhule vu tenda kuti ka vu zu mi ninwe ku va machava. Ipiho icho kuti zumwi kwenu u pumula ni mu kulwakazi weesi. <sup>2</sup> Mi mu li kumwise! Ka mu swaneli ku silisa na? Muntu zumwi yo tenda vulyo u swanela ku zwiswa mukati kenu. <sup>3</sup> Imi, ni hakuva kuti muvili wangu ka wu kwina, kono ku nina cha luhuhu, Na mu watula kale muntu ya va tendi vulyo, sina kuti kuni veena, <sup>4</sup> Cwale ha mukopana che zina ya Jesu Kreste, mi luhuhu lwangu ku lyina nenwe mu ziho za Simwine Jesu, ni mu watuli kale uzu muntu. <sup>5</sup> Ni va tendi vulyo ku muha mumanza a Javulusi cha ku sitataliswa muvili, ku tendela kuti luhuhu lwakwe lupuluswe che zuva lya Simwine. <sup>6</sup> Ku linyemuna kwenu ka ku shiyeme. Kana ka mwizi kuti mumela ulikene u fundulusa chikwa chonse? <sup>7</sup> Mu linjoloze ku mumela wa kale kuti muve iñende ihywa, mi kuti muvule mumela. Imi i Kreste, imbelele ye paseka yetu, ava kokotelwa. <sup>8</sup> Cwale tutende mukiti isinyi cha mumela wa kale, mumela wa mikwa mivilala ni inkulo imbilala. Linu, tutende mukiti isi ka mulungo wa kale kono mañende a mulungo u njolola ni vuniti. <sup>9</sup> Ni va mi ñoleli mwi ñolo lyangu kuti sanzi mu li kopanyi ni vasahi. <sup>10</sup> Mwi nzila imwi ni cho ku vashahi ve yinu inkanda, kapa va lakaza vuhumu, kapa lapela vazimu, Mu hale mwi inkanda isinyi kuva ve inkanda. <sup>11</sup> Kono hanu ni mi ñolela isiñi kuli kopanya ni mukwame yo zumina kutendwa vwanakazi, kapa yo nyimana, kapa yonyandiswa, kapa munywavi, kapa mu chengeleli. Mu vindiswa kulya zilyo ni vantu vena vulyo. <sup>12</sup> Imi ni na vule mu ku watula vantu vena hanze ye kereke? Kana, ka mu swaneli ku watula vena mukati ke Kereke? <sup>13</sup> Kono, ka mu swaneli ku watula vena hanze ke kereke? Kono Ireeza u watula avo vena ku hanze. “Mu zwise muntu muvi mukati kenu.”

## Inkauhanyo 6

<sup>1</sup> Wa kwenu hava wina muzeko ni zumwi, kana kete a tiye kuyenda ku chikota chava hedeni havusu muatuli yasa zumini, kuhita havusu

vwa va jolola? <sup>2</sup> Kana ka mwizi kuti ba jolola muva atule inkanda? Mi haivani muatula inkanda, Ka mu woli kumanisa zintu zisena ahulu vutokwa? <sup>3</sup> Kana kamwizi kuti ka tu atule mageloi? wongai vule, linu, tuwola ku atula indava za vuhalo? <sup>4</sup> Cwale haiva mwina ni ku atula kumana ni za vuhalo, chinzi ha mutwala indava zenu kuva vasa zimene chimwi mwi Keleke? <sup>5</sup> Ni wamba izi kuma swavi enu, kakwina yenke mukati kenu yo wina vutali yo wola kutontoza mifilifili mukati ka valikani? <sup>6</sup> Kono niha kuzima vulyo, Mulumeli utwala ni mulumeli nkuninakwe ku chikota, mi utenda vulyo havusu vu vwa muatuli yasa zumini. <sup>7</sup> Kanti za ku zekisana mukati kava lumeli ziva kwomwa kama kwenu. Chinzi ha mu sanyandi cha zivilala? Chinzi hamusa lizumini kuchengwa? <sup>8</sup> Kono muva fosekezi ni ku chenga vamwi, mi vava njiva kwenu! <sup>9</sup> Kana mwizi kuti va tenda za kusaluka kete valikote muvuso wa Ireeza? Sanzi muzuminu mapa, Vu sahi, kulapela va zimu, va vuki, va kwame vava shahi, mu kwame yo zumina ku tendwa mwana kazi, <sup>10</sup> vasa, va nyimana, va nwavi, va pono, ni vachengeleli-ka kwina ku vali yete a yole muvuso wa Ireeza. <sup>11</sup> Mi izo ivali nji vamwi kwenu, kono mu vacheniswa, mu vajolozwa, mu va pangwa hande cha Ireeza mwizina lya Jesu Kresite ni cho luhuhu lwa Ireeza wetu. <sup>12</sup> Zintu zonse zi zumwininwe kwangu, kono keti ni zumuninwe kuvuswa ku chimwi chazo. <sup>13</sup> Zilyo ze ivumu, mi ivumu lya zilyo, “kono Ireeza kave kule ni zonse. Muvili kana uva pangilwa vushahi. Kono, Muvili njiwa Simwine, mi Simwine kalukiseza muvili. <sup>14</sup> Ireeza ava vusu Simwine ni hape katuvuse cha nguzu zakwe, <sup>15</sup> kana mwizikuti mivili yenu zilama za Kresite. kana linu ni wola kuhinda chilama cha Kresite ni ku chi kopanya ku cha vuhule? keti ni wole kuva vulyo! <sup>16</sup> Kamwizi kuti eye Mwine yo kopanwa ku vu shahi usanduka muvili wonke nae? Sina inzwi haliwamba, vo vere muive inyama yonke.” <sup>17</sup> Kono iye yo kopene kwa Simwine mwave luhuhu lwakwe nae <sup>18</sup> Mu tiye vushahi! chivi ni chivi chapanga muntu hanze ya muvili, kono muntu yopanga vushahi u fosekeza muvili wakwe. <sup>19</sup> Kamwizi kuti mivili yenu i Tempere ya luhuhu lujolola, luhala kwe nwe, lu muva hewa kwa Ireeza? Ka mwizi kuti njenwe muvene? <sup>20</sup> Imi muva wulwa ke nteko. Hakwina vulyo mutembe Ireeza cha mivili yenu, ni kaluhuhu lujolola lu wila kwenu.

## Inkauhanyo 7

<sup>1</sup> Hanu ku wamana ni ndava zi mu va ñoli: “Kulotu kuti mukwame sanzi akwati mukurwakazi.” <sup>2</sup> Kono vakeñi cha miliko mingi ya vuvuki, zumwi ni zumwi mukwame ave ni mukurwakazi, mi zumwi ni zumwi mukurwakazi ave ni mukwam'a kwe. <sup>3</sup> Mukwame u swanela kuha iswanelo zakwe ku mukurwakazi, mi ku ve vulyo ni ku mukurwakazi ku mukwam'a kwe. <sup>4</sup> Kena kuti mukurwakazi wina mulao ku muvili wakwe, kono mukwame. Mi kuswana vulyo, ku mukwame kena mulao ku muvili wakwe, kono mukurwakazi. <sup>5</sup> Sanzi mu lichengi inwe muvene, kono cha kuzumizana mi che inako iswanela. Mu tende vulyo kuti muve vena inako ya kulapela. Linu mu volisane hamwina hape, ku tendela kuti javulusi sanzi amiliki kuti mwa vula kulisepa. <sup>6</sup> Kono ni cho izi zintu kwenu sina muhupulo isinyi cha kulaela. <sup>7</sup> Ni lakaza kuti kambe zumwi ni zumwi u swana sina njeme mu ni kalile. Kono zumwi ni zumwi wina impo yakwe izwa kwa Ireeza. Zumwi wina iyi impo, mi

zumwi wina ina. <sup>8</sup> Ku va sa sesetwe mi kwi mbelwa ni cho kuti kwina hande kuti ve kale ni va sa sesetwe, sina mu nina. <sup>9</sup> Kono hava kangwa kuli kwata avo veene, va woola ku sesa. Imi kwina hande kuti ve kale ni vantu kunde ya kwi hayiwa intakazo. <sup>10</sup> Hanu ku va lisesete ni ha uwo mulao- nata ime, kono nji Simwine: Mukurwakazi ka swaneli ku siya mukwam'a kwe.” <sup>11</sup> Kono heva na siya mukwam'a kwe, u swanela kwi kala na sena mukwame kapa vali swalele. Mi” mukwame ka swaneli kukana mwi hyavwe.” <sup>12</sup> Kono ku voose ni cho- Ime, isinyi Simwine - kuti heva zumwi ya sa mukurwakazi ya sa lumere, mi heva na saka kwi kala ni mukwame, ka swaneli ku swaneli ku kauhana. <sup>13</sup> Heva mukurwakazi wina mukwame asa lumere, mi na tavela kwi kala naye, ka swaneli ku muhindika. <sup>14</sup> Imi mukwame ya sa lumere u lukulwilwe vakeñi cha mukurwakazi wakwe, mi mukurwakazi ya sa lumere u lukulwilwe vakeñi cha mulikan'a kwe. Kusicwalo vaana venu ni va vavi va sa njolwele, kono aho va lukulwilwe. <sup>15</sup> Kono heva mulikani ya sa lumere u yenda, mu siye a yende. Mwizila zina vulyo, mulikani wa mukwame kapa wa mukurwakazi kena u su minwe ku mulao. Ireeza ava tusupi kuti tuhale mwi konzo. <sup>16</sup> Imi ka mwi zive vule, mukurwakazi, kapa ka mu puluse va kwame venu? Kapa ka mwi zive vule, mukwame, kapa ka muhaze va kurwakazi venu? <sup>17</sup> Konji ku siya vulyo kuti muhale vuhalo uvo Simwine ava tuhi, ku zumwi uvo Ireeza ava supili. Nji mulao wangu ku kereke zonse. <sup>18</sup> Kana kwina ya va nyi kumupato ha sumpwa kuti a lumere? Kana kwina zumwi ya sena avali kwina mu mupato ha sumpwa kwi tumelo? Sanzi a pangwa mupato. <sup>19</sup> Imi kena kuti konji heva wina mupato kapa ku sa va ni mupato nji vileza. Kono chi sakahala kwi chilila milao ya Ireeza. <sup>20</sup> Zumwi ni zumwi u swanela ku va mu mayemo avali kwina pili na seni ku lumera. <sup>21</sup> Kena uvali u muhikane Ireeza cho kusupa? Sanzi u vileli ku wamana nezo. Kono heva no wola ku va yo sumunikite, u hinde vulotu vwa teni. <sup>22</sup> Mi zumwi cho sumpwa cha Simwine ku va muhikana u lukulwilwe cha Simwine. Kwina vulyo sina zumwi yo lukuluhite cho sumpwa ku ku lumera vuhikana vwa Kreste. <sup>23</sup> Mu va wulwa che ngulo, cwale sanzi muvi vahikana vwa vakwame. <sup>24</sup> Vakwangu, ni ha mu va mu vuhalo vumwi vu muvahiti kuvuli ni museni ku lumera, mu siye twikale vulyo. <sup>25</sup> Hanu kuamana navo vaseni kuseswa, kanina intaelo ya Simwine. Kono ni hitisa maikuto angu, ka chi shemo cha Simwine, chi sepahale. <sup>26</sup> Linu, ni hupula kuti ivaka lya vukavo vukaza, kulotu kuti muntu ekale vo vulyo mwekalile. <sup>27</sup> Musu mininwe ku mukurwakazi? sanzi usaki ku sumununwa kwali. Kolisumine ku mukurwakazi? Sanzi ugani mukurwakazi. <sup>28</sup> Kono niho sesa, ko tendi chivi. Mi haiva mukurwakazi yasa sesetwe na seswa, kana tenda chivi. Kono avova sesa muvave ni manyando mangi mu vuhalo, ni saka ku mi kauhanya kuzili. <sup>29</sup> Kono izi ni wamba, vakwangu: Inako infuhi. kuzwa hanu, misiye avo <sup>30</sup> vena vakurwakazi va ve uva kavena. Avo valila va ve uvu kavalili, mi avo va tavite vave uvu kava tavite, mi avo va wula zintu vave uvu vasa kwete zintu. <sup>31</sup> Mi avo vasevelisa ze inkanda vave uvu kava zili tusisi, kakuti mukwa weyi inkanda kusike hakumana. <sup>32</sup> Ni tavela kuti mu lukuluhe kwi tongosi. Vantu va sa sesete vena chiseho ku wamana ni zintu za Simwine, mu va swanela ku mu lumbeka. <sup>33</sup> Kono va kwame va sesete avo vena chiseho ya ku taviswa va kurwakazi va vo- <sup>34</sup> u kauhene. Va sa sesetwe

va kurwakazi kapa va lyanjo va vilela ku wamana ni zintu za Simwine, mu va swanela ku njololeza mivili ya vo mi mu luhuho. Kono va kurwakazi va sesetwe vena hulu mu ku vilezwa za va kwame vavo mu va swanela ku va taviseza. <sup>35</sup> Ni wamba izi ku tendela kuti mu wane chimwi, mi isinyi ku mi vika mu mulandu. Ni wamba izi imi nji shiyeme, kutendela kuti mu ve va yemukite Kwa Simwine ni ku sena nangati ku sitatala. <sup>36</sup> Kono heva zumwi na hupula kuti katendi hande mulikan'a kwe che kute - heva na hitilile zilimo zakwe za maseso mi ku woleka kuva vulyo- u wola kupanga mwa sakila. kena kuti utenda chivi. Va swanela ku sesa. <sup>37</sup> Kono heva ni va zimene cha kukola mwi kulo zavo, heva na sa chukumiswe kono na wola kuliyeleza muhupulo wakwe, mi heva ava hindi muhato mwi kulo ya kwe wa ku tenda vulyo, ku vikila mulikan'a kwe mivili wa kwe, mwa tende hande. <sup>38</sup> Cwale uzo zumwi yo sesa mulikan'a u panga hande, mi uzo zumwi yo liketela ku sa sesa upanga hande mane ni kuhita. <sup>39</sup> Mukurwakazi u suminwe ku mukwam'a kwe kutwala ma manimani avuhalo vwakwe. Kono heva mukwam'a kwe cha fwa, u lukuluhite ku sesa, kono konji cha Simwine. <sup>40</sup> Imi cha mulao wangu mwa wole ku sanga heva ne kale mwena. Mi Ni hupula kuti na me ni na Luhuhu lwa Ireeza

## Inkauhanyo 8

<sup>1</sup> Linu kuamana ni zilyo ziva nelwa ku va zimu. Twizi kuti “tuvonse twina ingana.” im ingana ileta mwipo kono ilato lizakisa. <sup>2</sup> Haiva zumwi uhupula kuti wizi chimwi, zuna muntu kakwina chezi cha swanela kwiziva. <sup>3</sup> Kono yense yo saka Ireeza, zuna muntu wizi kuti Ireeza u musaka. <sup>4</sup> Kuamana ni kulya zilyo zi vanelwa kuva zimu: Twizi kuti “muzimu we inu inkanda kakwina” mi “kuti kakwina ungi Ireeza kunde ya kwe. <sup>5</sup> Mwendi va tewa kuti vazimu kuvi vwina, konse mwi hulu kapa ni hansu, sina muve njihile “vazimu” ni va “simwine.” <sup>6</sup> Niha kuva vulyo kwetu, “Kwina fela Ireeza yenke ishetu, zonse zintu vizwa kwali, mi nje ye utu hala kali, ni Jesu Krete Simwine yenke, iye umo zintu zonse zihala, iye umo tuhala. <sup>7</sup> Ni hakuva vulyo, iyi izivo kaina ku zumwi ni zumwi. kono, vamwi vava ku lapela ziswaniso, mi va kulya zilyo uvu zi nelelwe ku ziswaniso. Che zwalo lyava lisakolete. <sup>8</sup> Kono zilyo kete zitu zimanine kwa Ireeza. Katu dodovela haiva katulile. <sup>9</sup> kono mutokomele kuti intukuluho yenu kanzi ivi kuti wina intumelo ifokola asitatala. <sup>10</sup> mi pona chi kuwanika kuti zumwi u ku vwene, wina inzivo, kulya zilyo mwi tempele ya vazimu. lizwalo lifokola limu hambilize kuti alye zinelelwe kuva zimu. <sup>11</sup> Linu chevaka lye nkutwisiso kuamana ni vuniti vwa va zimu, va fokola, mukwangu yava fwili Krete, mwe haiwe. <sup>12</sup> Linu hamu fosekeza bakwenu muholofaza izwalo lyavo <sup>13</sup> lifokola, aho mufosekeza Krete. Hakwina vulyo, chilyo cha wisa mukwako, kete nini lye inyama hape, linu kuti kanzi ni letisi mukwangu kuwa.

## Inkauhanyo 9

<sup>1</sup> Kana ime ni lukuluhite? Kana ime ni mupolofita? Kana ni ba boni Jesu Simwine wetu? Kana katu sebezzi hamwina kwa simwine? <sup>2</sup> Heba kana ni mupolofita kubamwi, nanga cho bulyo munibe kwenu. Mihe inwe mwi mpaki zangu muchi polofita cha simwine. <sup>3</sup> Ubu njibona bupaki bwangu kwa bana bani tatuba. <sup>4</sup> Kana katu helwe intukelo

yoku lya ni ku nwa? <sup>5</sup> Kana ka twina intukelo zaku hinda mwanakazi wine ntumelo kuyenda naye, sina bungi bwa bapositola muba ba tendeli, niba kwetu kwa Simwine, ni Kefasi? <sup>6</sup> Kapa nji Barnabasi yenke njo wola kusebeza? <sup>7</sup> Njeni ya ba sebezi nali isole kuli neula mwine? Njeni mubyali wa muomba yasali zi chelantu zakwe? Kapa njeni yowola kulela mutapi nasanwi muzilili uzwa kwayo? <sup>8</sup> Nji ni kwete kuwamba izi zintu che nguzu ya muntu? Kana mulao ka wu wambi bulyo? <sup>9</sup> Mihe muku va ñolelwe mu mulao wa Mushe, “Ka nji mu vwiki ka holo ke mpulu chi ikwete ku lyatoka imbuto. “Kana initi Ireeza uwamba za kubabalela Mapulu?” <sup>10</sup> Kana kuti u wamba kwamana neswe? Kuba ñolelwe iswe, kakuti yo dunduvula mauza a dunduvule chakusanga ni kuli kauhanyeza mukusinza. <sup>11</sup> Heba tuchita zintu zi jolola mukati ketu, kana chintu chisa oleki kuwana zisebeliso kuzwa kwako, <sup>12</sup> Kana bamwi baba lituti ku zwilila kwako, ka twina zimwi zingi? Nihakuba bulyo, kana baba tongoki kuzili. kono, kusepa zintu zonse kuzwila habusu mu zintu zonse Insiñi ku kangisa inzwi lwa Kiresite. <sup>13</sup> Kana ka wizi kuti aba ba sebeleza mwi tempele ba wana zilyo zabo mwi tempele? Kana ka wizi kuti abo basebeza ha katala ba likauhanyeza cha hewa ku katala? <sup>14</sup> Mwi nzila iswana, Ireeza aba laeli kuti ba hasanya inzwi ba swanela ku wana buhalo kwi inzwi. <sup>15</sup> Kono kana ni ba woli ku lihindila chimwi ni chimwi ku ze intukelo. Mi kana ni ba ñoli izo zintu kuti chimwi chi tendahale kwangu. Cho bulyo ni wola ku fwa ku zamba ku chengelelwa kukuli tundula. <sup>16</sup> Mihe ha ni luta inzwi, ka ni na ibaka lya kuli tundula, kakuti ni swanela ku tenda bulyo. Bumayi bwina kwangu heba ka niluti inzwi! <sup>17</sup> Mihe chi na tenda bulyo cha kusaka, ka nibe ni mpo. Kono hani tenda nini sasuni, aho buhikana buni helwe. <sup>18</sup> Chizi haho impo yangu? Linu ha ni kutaza, ni wole ku ha inzwi ni ku sena niku sena chinilihisa mi kanzi u hindi kwi zula kwe tukelo yangu mwi inzwi. <sup>19</sup> Ni hakuba bulyo ni lukuluhite ku zonse, ni babi muhikana wa bonse, kuti ni muna bangi. <sup>20</sup> Ku Majuwishi ni babi ni Majuda, kuti ni luwe Majuda. Kwabo ba bena kungsi ye milao, ni baka bi ubu nji zumwi ya bena mukungsi ka mulao kuti ni mune abo bena kungsi ya mulao. <sup>21</sup> Kwabo bena hanze ya mulao, ni babi zumwi wina hanze ya mulao, ni haku ba bulyo kana ni bena hanze wa mulao we Ireeza ime, kono kungsi ya mulao wa Kiresite. Ni ba tendi bulyo cho kuti ni mune abo bena hanze wa mulao. <sup>22</sup> Kwa bana ba fokola nibabi yo fokola, mukuti ni kome bafokwele. Nibezi kuba ni zintu zonse ku bantu bonse, mukuti monse mu woleka ni be ni mutusi wabo. <sup>23</sup> Ni chita zintu zonse che nzwi bulyo, nji kuti ni be zumwi wa ba tambula infuyolo. <sup>24</sup> Kana ka mwizi kuti bonse ba tiya ba tiya lubilo, kono yenke yo wana impo? <sup>25</sup> U tiye cho kuti u wane impo. Wina mu zizano zakuti abe ni nguzu zo kutiya ku njila mu zizano. Bazi tenda kuti bawane chifumu chi samani, <sup>26</sup> Kono batiya cho kuti ba wane impo zi samani. Niha kuba bulyo kanitiyi ni ku sena ibaka kapa ku dama Luhuhu. <sup>27</sup> Kono ni tenda mubili wangu ku u tenda buhikana, njo kuta kuti heti china mana ku wamba inzwi kubamwi, ime ni mwine sanzi ni zwiswa.

## Inkauhanyo 10

<sup>1</sup> Ni mi suni kuti mwi zibe, bakwangu, beshetu ba bena mukungsi ka makope, mi baba hiti mukati kewate. <sup>2</sup> Bonse chi ba kolobezwa



kwa Mushe mukunsi ka makope ni mwi wate, <sup>3</sup> imi bonse baba lyi ku zilyo zi swana zi jolola. <sup>4</sup> Bonse ba banwi kuzi nyo zi swana zi jolola. Kakuti baba nwi kwi ivwe lijolola, mi ilyo ivwe nji Kirisite. <sup>5</sup> Mihe Ireeza kana a ba ku tabite ni bungi bwa bo, ni zitunta zi ba kuhasene mu muzuka. <sup>6</sup> Linu izi zintu zi bali mutala kwetu, kuti kazi tubi ahulu muchibi ubu mubaba tendele. <sup>7</sup> Kanzi mulapeli ziswaniso, ubu njabo. Ubu muku ba ñolelwe, 'Bantu kabe kale hansi kunwa ni ku lya, ni ku buka ni ku zana.' <sup>8</sup> Kanzi tubi ni busangu, ubu mu baba tendeli. Mwi zuba lyonke, bantu ba tita zikiti za makumi o beli ni zo tatwe chi ba fwa ke baka lyezo nzintu. <sup>9</sup> Lya hanu kanzi tu biki Kirisite he tatubo, ubu bungi bwa bo muba batendeli mi chi ba haiwa inzoka. <sup>10</sup> Mihape kanzi mutongoki, ubu muba batongokeli abo ni ku haiwa ke ingeloi. <sup>11</sup> Linu izo zintu ha zi ba ku tendahala ibali mutala kwetu. Zi ba ñolwa kutu eleza — iswe tukezililwe inako ya ma manimani. <sup>12</sup> Ni hakuba bulyo yo hupula kuti u zimene a tokomele kanzi na wi. <sup>13</sup> Ka kwina miliko yibabi ise zibehele ku bantu. Mihe, Ireeza u shiyeme. Kese na zumine kuti ni mu likiwe ku hitiliza ha musika. Ka muliko ka mihe inzila mwese mu balehele, kuti mu wole kozo za yo. <sup>14</sup> Ni haina bulyo, inwe ba nisuna, mu siye ku lapela ziswaniso. <sup>15</sup> Ni wamba kwenu ubu bantu be mihupulo, kuti ni mu watule zina wamba. <sup>16</sup> Inkomoki ye mbuyoti yitu litumela kayo, kana kuti tuli yabelelanga malaha a Kirisita? Chinkwa chi tu gamona, kana kuti tuli yabalelanga inyama ya Kirisite? <sup>17</sup> Kakuti kwina bulyo chinkwa chonke chi zwile, iswe tubangi twinyama yonke. Twense tu hinda ku chinkwa chonke chi zwile. <sup>18</sup> Mu lole ku bantu ba Maisilaele: kana ibali abo baba lyi kuchitabelo ba bena ha katala? <sup>19</sup> Chizi chi ni kwete ku wamba linu? Kuti chi swaniso chintu? Kapa zina zilyo ze chi tabelo che chiswaniso chintu? <sup>20</sup> Kono ni wamba zintu zi ba tendela chitabelo bahedeni, mihe ba ha nzi zintu ku madimona isini kwe Ireeza. Ka nisuni kuti inwe mube ubu madimona! <sup>21</sup> Ko woli kunwa mwi inkomoki ye Ireeza ni kunwa mwi inkomoki ya madimona. Ko woli kulila he ntafule ye Ireeza ni he ntafule ya madimona. <sup>22</sup> Kapa tu shamaeta Ireeza kuti abe ni fufa? Tu kolete ku muhita nji? <sup>23</sup> Zintu zonse ziya chemilawo, 'kono kana kuti zonse zina intuso.' Zintu zonse ziya che milawo, kono kana kuti zintu zonse zi zakisa bantu. <sup>24</sup> Ka kwina yo swanela ku gana zintu cha kwe yenke. Cho kuti zumwi ni zumwi a gane zintu zi swanela yo bambene naye. <sup>25</sup> Mu wola ku lya zintu zonse zi wuzwa mu mauzikizo, musa bunzi ipunzo ibaka le zwalo. <sup>26</sup> Mihe, "ikanda ye Ireeza, ni zina mwateni zonse." <sup>27</sup> Heba muntu ya sa zumine ha mi sumpila ku zilyo, mini musuna ku yenda, mulye chonse chete ba miletele ni musa buzi impunzo ibaka le zwalo. <sup>28</sup> Kono heba zumwi na wamba kwenu, Izi zilyo zizwa ku chitabelo cha mahedeni, sanzi mu lyi. Ke baka lya zuna wa mi wambila, ni ke baka le zwalo. <sup>29</sup> Ka ni toloki i zwalo lyako, kono izwalo li bamwi. Mihe chinzi ikatulo yangu ha yi atulwa ni zwalo lya zumwi? <sup>30</sup> Heba ni ni lya ni nili tumele, ka ni nyaswe bule ha chintu chi ni bali tumeli? <sup>31</sup> Ni haina bulyo, ni heba mulya kapa munwa, kapa icho chonse chi mutenda, mu tende zonse che kanya ye Ireeza. <sup>32</sup> Kanzi mu hi mulandu ku Majuwishi kapa ku Magirike, kapa kwi Keleke ye Ireeza. <sup>33</sup> Ni suni ku tabisa bamwi bantu mu zimwi zintu. Kani suni ku tenda zintu zi sakwa ime nenke, kono ni zibamwi. Ni tenda izo kuti ba ka puluswe.

## Inkauhanyo 11

<sup>1</sup> Mube muba likanisi, sina hani likanisa Kirisite. Cwale ni mi temba kakuti muni hupula mwi ndaba zonse. <sup>2</sup> Nimi temba kaku tokomela intuto zangu muni ba mi lutili. <sup>3</sup> Cwale ni saka kuti mu zuwisise kuti Krisite njo mutwi wa bakwame bonse, imi ba kwame nje mitwi ya banakazi, sina Ireeza hali mutwi wa Krisite. <sup>4</sup> Yense mukwame yo lapela kapa ku polofita na zwete inkuwani ku mutwi u nyansa mutwi wakwe. <sup>5</sup> Kono mwanakazi yense yo lapela ni ku polofita nasa sumine intaulo ku mutwi u nyansa mutwi wakwe, kakuti cintu chi swana niha gunkite insuki. <sup>6</sup> Heba mwanakazi kali sumini cimwi ku mutwi u swanela ku gunka insuki za kwe ka bufwihi, heba mwanakazi ha gunkwa insuki ku luna, mumu leke a sumine intaulo ku mutwi. <sup>7</sup> Mukuti mukwame ka swaneli ku bika cimwi ku mutwi, sina hali chiswaniso ni kanya ye Ireeza, kono mwanakazi i kanya ya mukwame. <sup>8</sup> Kono mukwame kana aba bumbwa ha mwanakazi, konohe mwanakazi aba bumbwa ha mukwame. <sup>9</sup> Hape mukwame kana aba bumbwa bakeñicha mwanakazi, kono mwanakazi aba bumbwa bakeñicha mukwame. <sup>10</sup> Che swanelo mwanakazi wina ni kuba ni chi supo ku mutwi ci tondeza ku buswa, bakeñicha mangeloyi. <sup>11</sup> Nihakuba bulyo, kwa Simwine, mwanakazi ka lukuluhite ku mukwame, imi ni mukwame ka lukuluhite ku mwanakazi. <sup>12</sup> Kono mwanakazi u zwa ha mukwame, ni mukwame u zalwa ku mwanakazi? Imi zintu zonse zi zwa kwe Ireeza. <sup>13</sup> Muli atule inwe mubene: Kana inswanelo yo mwanakazi kusa lisumina cimwi ku mutwi ha lapela kwe Ireeza? <sup>14</sup> Itu luta kuti mukwame njiwina insuki inde nasa gunki u nyansa mutwi wakwe. <sup>15</sup> Kana tu lutwa kuti heba mwanakazi wina insuki inde, wina ikanya? Sina ha helwe insuki ku wumba mutwi. <sup>16</sup> Kono heba zumwi u suna ku tenda inkani ka mukwa usa kwina kwetu, imi kau kwina ni mwi keleke zimwi ze Ireeza. <sup>17</sup> Kono ni mi lemusa kuti, kani mi tembi, kakuti hamu kopana kamu leti bulotu kono muleta bubi. <sup>18</sup> Indaba ya matangilo njokuti hamu kopana kuma keleke, enu kuba ni kusa zuminzana mukati kenu, mi muchi lama ni zumina. <sup>19</sup> Imi inkauhano zi swanela kuba mukati kenu ilikuti ku bonahale bena buniti. <sup>20</sup> Hamwiza hamwina, kaku talusi kuti mulalilo wa Simwine u mu lya. <sup>21</sup> Chimu lya, zumwi no zumwi ulya zilyo zakwe, bamwi niba seni kuba ni zilyo. Zumwi u fwile inzala, zumwi u koletwe, <sup>22</sup> Kana ka mwina mazubo ku mu lila ni ku munywina? Kapa mushwaula ikeleke ye Ireeza ni ku swabisa basa likwatile? Kani wambe nzi kwenu? Nimi tembe? Kete ni mi tembe kwezo. <sup>23</sup> Kakuti ime niba tambuli kwa Simwine chini bahewa, mukuti Simwine Jesu, ha betekwa masiku aba hindi chinkwa. <sup>24</sup> Hamana kulitumela, cha chi cholola chati “Iyi nje nyama yangu, nji yenu, muchite bulyo njokuti ni muni zeze”. <sup>25</sup> Chenzila iswana hamana mulalilo abahindi inkomoki, chati, “Iyi nje nkomoki ya bulikani buhya bwa malaha angu”. Mutende bulyo chi munywa mwa teni njokuti muni zeze kacho. <sup>26</sup> Che nako yonse hamu lya chinkwa ni ku nywa mwi nkomoki, kamu wambe ifu lya Simwine ku hita hese naka bole. <sup>27</sup> Chebaka ilyo, muntu ni muntu yo lya ku chinkwa ni ku nywina muchinywino cha Simwine kamukwa usa swaneli kabe ni mulandu we nyama ni malaha a Jesu. <sup>28</sup> Muleke muntu ali tatube iye mwine chenzila yakwe mumu leke alye chinkwa ni ku nywa mu nkomoki. <sup>29</sup> Kono yo lya niku nywa

nasa tokomeli ze nyama ya Jesu, kulya ni kunywa ali tatube mwine. <sup>30</sup> Njikuti bamwi mukati kenu ka bena ziho mi ba lwala, imi bamwi kwenu ba ya muñonzi. <sup>31</sup> Kono tuli tatube iswe tubene, kete tu atulwe. <sup>32</sup> Kono hatu atulwa ni Simwine, hatu kalimelwa naye kuti kanji tu atulwa ne inkanda. <sup>33</sup> Mihe, bakwaluzubo, habeza hamwina kukulya, bali lindile. <sup>34</sup> Heba zumwi u fwile inzala mumu siye a lye ku nzubo, mukuti ha mwiza hamwina kanji kumi wanisi mulandu. Imi kezo zintu zi ñoletwe kanize nihe zisupo chineza.

## Inkauhanyo 12

<sup>1</sup> Che mpo zi jolola, ba kwangu, ka ni suni kuti kanzi mwi zibiswa. <sup>2</sup> Ha muba chili muvahedeni, mu ba ku kwitilwe ku ba zimu ba sena manzwi, monse mu muba ku kwitwilwa ku bali. <sup>3</sup> Ni ha kwina bulyo ni suna kuti mwi zibe kuti ka kwina yo wamba ka luhuhu lwe Ireeza yo wamba, “Jesu a nyanswe.” Ka kwina yo wamba, “Jesu nji Ireeza.” konji ka luhuhu lu jolola. <sup>4</sup> Linuhe kwina impo zishutana, kono luhuhu lonke. <sup>5</sup> Mi kwina mitendo i shutana, kono Ireeza yenke. <sup>6</sup> Mi kwina mitendo i shutana, kono kwina Ireeza yenke yo tenda kuti zintu zi woleke kubonse. <sup>7</sup> Hanu zumwi ni zumwi aba hewa i mponinso ya hanze ya luhuhu kuti bantu bonse ba wane inkabelo. <sup>8</sup> Mihe zumwi luhuhu luba muhi ingana, mi zumwi luhuhu luba muhi kwi ziba. <sup>9</sup> Mi ku zumwi aba wani intumelo ku luhuhu, mi zumwi aba wani ingunzu ya ku hoza zilwalo. <sup>10</sup> Zumwi ava hewa ingunzu zaku tenda imakazo, mi ku zumwi ku polofita. Zumwi aba hewa ku keta mukati ka mahuho, zumwi ku malimi mangi, mi zumwi ku toloka malimi. <sup>11</sup> Kono ku zumwi luhuhu luswana luba muhi zintu zonse, liha zumwi ni zumwi impo, mulu sunina. <sup>12</sup> Mihe inyama yonke yina zilama zingi mi zonse zilama zina inyama yonke, nji Kirisite. <sup>13</sup> Ka luhuhu lonke tuba kolobezwa mwi nyama yonke, nihakuba kuti u Mujuda kapa Mugerike, u sumine kapa u lukuluhite, bonse baba tendwa ku nywa muluhuhu lonke. <sup>14</sup> Inyama ka yina chilama chonke, kono zingi. <sup>15</sup> Heba i tende li wamba, “Sina hani sali ni yanza, kana ni chilama chimwi che nyama”, kena kuti ni chilama che nyama. <sup>16</sup> Mi kutwi ka ku wambe, “Ka kuti ka ni linso, kani wa chilama che nyama”. <sup>17</sup> Heba inyama yonse ibabi linso, ku zuwa niku ba zwi hi? Heba inyama yonse ibabi kutwi, ku nuka ni kuba zwihi? <sup>18</sup> Kono Ireeza aba biki chilama ze nyama kuya ka mwa ba ku sunina. <sup>19</sup> Mi kambe chi bali chilama chiswana, inyama niyi babi buti? <sup>20</sup> Nihakuba bulya zilama zingi, kono inyama yonke. <sup>21</sup> Linso kali woli ku wamba kwi yanza, “Ka nina chi nisuna kwanko”. Kapa mutwi ku wamba kwi tende, “Ka nina chi nisuna kwanko”. <sup>22</sup> Kono zilama ze nyama zi boneka kulonda nji zi sakahala. <sup>23</sup> Mi zilama ze nyama zitu hupula kuti ka zina ikute, tu ziha ikute ikando ni zilama zetu tu ziswabela zina ikute. <sup>24</sup> Linu zilama zetu ka kuchina i ntuso ku ziha ikute, ka kuti zina kale ikute. Kono Ireeza aba kopanyi zilama zonse kuzi tenda chonke, mi aba hi ikute ikando kwabo ba sena. <sup>25</sup> Aba tendi bulyo kuti kazi kubi ni kauhanyo mwi inyama, kono zilama zi wole kuli babalela ka ku swana. <sup>26</sup> Mi chilama chonke hachi zuwa kuchisa, zonse chilama zi zuwa kuchisa. Heba chilama chonke chi helwa ikute, zonse zilama kazi sange. <sup>27</sup> Mi chimuli mwi nyama ya Kirisite mi muzilama zimwi zakwe. <sup>28</sup> Mi Ireeza

che ntanzi aba keteli mapositola mwi keleke, cha bubeli mapolofita, cha butatu maluti, niba tenda zintu che inguzu, ni bempo yaku hoza, ni baha tunso, abo ba tenda mitendo ya bu yendisi, ni bena malimi mangi. <sup>29</sup> Kana bonse mapositola? Bonse mapolofita? Bonse maluti? Bonse ba tenda mitendo ye ngunzu? <sup>30</sup> Kana bonse bena impo yaku hoza? Kana bonse ba wamba cha malimi? <sup>31</sup> Kana bonse ba toloka malimi? Muna u suna impo zingi. Mi ka nimi tondeze inzila i ndotu.

## Inkauhanyo 13

<sup>1</sup> Kaku wamba cha lulimi lwa muntu kapa cha mangeloi. Heba kanina chisemo, mu nibe chisupo cha mulangu ulila. <sup>2</sup> Linu heba kanina chisemo, nibabi chisupo cha mulangu upange ilata. Kuswa nela kuti nibe nimpo ya bupolofita niku zuwisisa nzintu zili patite nikuhewa inzibo, cho kuti nibe ni ntumelo ya kuzwisa malundu. Kono heba kanina chisemo, kana ni chimwi. <sup>3</sup> Mi nihaniha zonse zini kwete ku fepa banjebwe kapa kuha mubiliwangu kuti uhiswe. Kono heba kanina chisemo, kani wani chimwi. <sup>4</sup> Chisemo china inkulo inde ni nse. Chisemo ka china muna ni kuli tundula. Ka china mahanyi <sup>5</sup> kapa inkulo mbi. Ka chilitusi icho chine. Ka chili hweleli kuvenga, <sup>6</sup> kapa ku vika chintu chi fosahela. Kachi sangi mu sa jololwe. Isini, chi sanga mubuniti. <sup>7</sup> Chisemo chi zala zintu zonse, chi zumina mu zintu zonse, mi kwina insepo kuamana ni zintu zonse, kono zileta zintu zonse. <sup>8</sup> Chisemo kachi mani. Heva kwina vapolofita, kava mane. Heva kwina malimi, ka amane. Heba kwina inzibo, kayi mane. <sup>9</sup> Mihe katwi zibe imbali mi katu mpolofite imbali. <sup>10</sup> Kono zintu shiyeme chi zenza, zina zisa maninte kazi mane. <sup>11</sup> Hani bali ni muhwile, ni ba ku wamba uvu muhwile, ni ba kuhupula ubu muhwile, ni bakuha mabaka ubu muhwile. Haniba ni mukulwana, ni babiki kwimbali zintu za buhwile. <sup>12</sup> Linu hanu tubonena kwimbali ya chiponi, kono chifateho ka chifateho. Hanu chinizi mwi mbali, hanu linu kani zibe kakwi zula uvu ha nibe zibwa ka kwi zula. <sup>13</sup> Kono inzo zintu nzotatwe zikala bovulyo: intumelo, isempo ni chisemo. Kono chikando kwe nzo chisemo.

## Inkauhanyo 14

<sup>1</sup> Mu zwile habusu ni chisemo mi munungwe impo za luhuhu, sihulu bupolofita. <sup>2</sup> Mihe uzo yo wamba cha malimi kawambi ku bantu kono kwe Ireeza. Mihe ka kwina ni heba yenke yo muzuwa kakuti u wamba zintu zili patite mu Luhuhu. <sup>3</sup> Kono muntu yo polofita u wamba ku bantu cha kuba bumba, kuba susuweza, ni kuba senga senga. <sup>4</sup> Uzo yo wamba cha malimi uli bumba iye mwine, kono yo polofita u bumba inkeleke. <sup>5</sup> Hanu nisuna kuti mubonse mu wambe malimi. Kono ku hite aho, ni suna kuti mube mu bapolofite. Yo pulofita mukando kuyo wamba malimi (konji muntu hayi toloka kuti inkeleke i bumbwe). <sup>6</sup> Kono hanu, bakwangu, heba niza kwenu nini wamba malimi, u wana nzi? Ka niwoli, hesi ha ni wamba kwenu che nsinulo, kapa inzimbo, kapa cha bupolofita, kapa cha buluti. <sup>7</sup> Mwi kwikalile ni ku zintu zi sa huzi zizwisa milomo — sina impala kapa kambuli mi kazi zwiisi milomo isa swani, zumwi muntu ke zibe bule mulililo we impala kapa wa kambuli? <sup>8</sup> Mihe heba impeta hayi lizwa ka wumwi mulililo, muntu ke zibe buti kuti cheli inako ya kuli tukiseza kuya

kwi nkondo? <sup>9</sup> Linu njenwe. Heba nimu wamba chiwambo chisa zuweki, muntu ka zuwe buti chi mwa wamba? Kamu wambe, kono ka kwina muntu yesa zuwe zimu wamba. <sup>10</sup> Mwi ikanda kwina mishobo mingi, kono ka kwina isena intaluso. <sup>11</sup> Kono heba ka nizi intaluso ya mushobo, ka nibe ni muzwahule ku yo wamba, mi yo wamba kabe muzwahule kwangu. <sup>12</sup> Cwale inwe, sina hamu tukufalelwe kwi impo za Luhuhu, munungwe muku zakisa inkeleke. <sup>13</sup> Mihe muntu yo wamba cha malimi u swanela ku lapela kuti a toloke. <sup>14</sup> Mi heba nini lapela cha malimi, luhuhu lwangu nilu lapela, kono kani zuwisisi. <sup>15</sup> Kanti ime ni tenda nzi? Kani lapele ni luhuhu lwangu, kono kani lapele ni ku zuwisisa. Ni zimbe ni luhuhu lwangu, mi kani zimbe nini zuwisisa. <sup>16</sup> Ni hakuba bulyo, heba no temba Ireeza cho luhuhu, muntu ya sena inzibo ka cho bule “Amen” heba no litumela kakuti iye ka zuwi zo kwete ku wamba? <sup>17</sup> Mihe iwe uha buitumelo bwako hande, mi zumwi ka bumbisi. <sup>18</sup> Ni itumela kwe Ireeza ha ni wamba cha malimi ku mi kamba mubonse. <sup>19</sup> Kono mwi inkeleke nisuna ku wamba ni zuwisisa manzwi a tenda i yanza kuti nimilute inwe mubamwi, isini manzwi a tenda zikiti ze ikumi za malimi. <sup>20</sup> Bakwangu, kazi mubi mubahwile mu ku zeza. Chabulyo, chi amana ni chibi, mube mu bahwile. Kono muku zeza mube mubakulwana. <sup>21</sup> Ku mulao ku ñoletwe, “Kani wambe kube chisi za bantu ba malimi ni milomo ise zibenkani. Naho kese niba nizuwe”, ku wamba Ireeza. <sup>22</sup> Ni haku ba bulyo malimi chisupo, isina kuba zumine, kono kubasa zumine. Kono kupolofita chi supo, isini kuba sa zumine, kono kuba zumine. <sup>23</sup> Heba, kuba kuti, inkeleke yonse hayikopana mi bonse ba wamba cha malimi, mi bahanze ni bazumine habe njila kese ba wamba kuti mupehuhite? <sup>24</sup> Kono heba mu bonse ni mupolofita yasa zumine niya sezi habe njila, ka zumine zonse zese a zuwe. Ka atule zonse za wambwa. <sup>25</sup> Zipatitwe mwi nkulo kazi putululwe. Che bakelyo, ka wile hansi ka bulubi ni ku temba Ireeza. A wambe cha kukoza kuti initi Ireeza kwena mukati kenu. <sup>26</sup> Chinzi chi chilila, bakwangu? Heba ni mukopana mu bonse, zumwi ni zumwi nena luzimbo, kamba intuto, kamba zi patuluka, malimi, kapa intoloko. Mu tende zonse zintu kuti mu bumbe inkeleke. <sup>27</sup> Heba zumwi yo wamba che ndimi, ku be bobele kapa botatwe haba liha inako. Mi zumwi u wola ku toloka cha wambwa. <sup>28</sup> Kono heba kuti ka wina yo toloka musiye bantu bonse batontole mwi inkeleke. Mu siye muntu ni muntu a wambe yenke kwe Ireeza. <sup>29</sup> Muleke bobele kapa botatwe bapolofita ba wambe, mi mu leke bamwi ba tekeleze ka ku zuwisisa chi wambwa. <sup>30</sup> Kono heba zumwi ku bekele mwi inkeleke ha hewa kubungutula chintu, mu leke yo wamba a tontoze. <sup>31</sup> Mihe heba mubonse mu wola ku polofita kuti mubonse mulitute ni ku susuwezwa. <sup>32</sup> Mihe luhuhu lwa bapolofita luhuhu lu yendiswa bapolofita. <sup>33</sup> Mihe Ireeza kana Ireeza yo lyangana, kono we kozo. Uwo nji mulao mwi inkeleke zonse zi ba zumini. <sup>34</sup> Banakazi ba tontole mu makeleke. Mihe kaba zumininwe ku wamba. Kono ba swanela ku libika kungsi, muu wambila mulao hape. <sup>35</sup> Heba kwina chimwi chi ba suni ku lituta, ba buze ba kwame ba bo ku mazubo. Mihe ka ku woleki ku mwanakazi ku wamba mwi inkeleke. <sup>36</sup> Inzwi lye Ireeza liba zwi kwako? Kana nji kwenu bulyo ku liba siki? <sup>37</sup> Heba zumwi ni zumwi u hupula kuti iye mupolofita kapa wina luhuhu, a zuwisise kuti zintu zi ni ñolela intaelo izwa kwe Ireeza. <sup>38</sup> Mihe zumwi ha kana ku zumina izo, kanji a zumini. <sup>39</sup> Linu haho, bakwangu, mu twale inkulo zenu ku

ku polofita, mi kani kanisi muntu ku wamba cha malimi. <sup>40</sup> Kono mu leke zintu zonse zi tendahale che swanelo ni kamulao.

## Ikauhanyo 15

<sup>1</sup> Bakwetu, nimi zibisa kuti evengeli ini ba mi wambili imuba tambuli ni ku zimana. <sup>2</sup> Kayo evangeli njimi haza heba muibika kakuti niba imhi, heba nimu wondisa che ziho manzwi aniba kutazi kwenu, chikuna bulyo intumelo yenu kaina intuso. <sup>3</sup> Kakuti, matangilo, zimwi za butokwa zini ba tambuli: Kuti Jesu aba tu fwili bakeñicha zibi zetu, kakuya cha mañolo, <sup>4</sup> kuti aba zikwa, imi aba buswa che zuba lya butatu cha kuya cha mañolo. <sup>5</sup> Mukuti aba boneki kwa Cefasi, niku balutwana bena ikumi niyenke, <sup>6</sup> Cwale aba bonahali ku chicaba china myanda yilikana iyanza cheyo inako. Bamwi kubali basi hala, bamwi cibaba lali. <sup>7</sup> Cwale cha libonahaza kwa James, mi ni kuba Apositola. <sup>8</sup> Ku ma manimani, cha libonahaza kwangu, sina mwana yaba zalwa che nako ifosahale. <sup>9</sup> Njeme nimunini ku ba Apositola mi kani lukeli ku sumpwa Muapositola, kakuli niba nyandisi ikeleke ye Ireeza. <sup>10</sup> Kono ka chisemo che Ireeza njeme chili icho, mi chisemo chakwe kwangu kana niba chi hewa kusena intuso. Mukuti, niba sebezi cheziho ku hita bamwi. imi kana ibali njeme. Kono chisemo che Ireeza china kwangu. <sup>11</sup> Heba ime kapa abo chitu kutaza niku zumina. <sup>12</sup> Linu ku lutwa kuti krisite aba buki fubafu, cwale cinzi bamwi haba kanana kuti kakwina kubuswa ku bafu? <sup>13</sup> Kono heba kakwina kubuswa kubafu, cwale nji kuti ni Jesu kana aba buki kubafu, <sup>14</sup> Imi heba Jesu kana aba buki, cwale inkutazo zetu kazina intuso. mi ni ntumelo yenu kaina intuso. <sup>15</sup> Imi tu wanika kuti tu mpanki za mapa kuamana ni Ireeza. Mukuti tuba paki kuti Ireeza aba busi Jesu, kanti kana aba mubusi, <sup>16</sup> Heba kuti bafu kena babuswa, mini Jesu kana aba buswa kubafu. <sup>17</sup> Kambe Jesu kana aba buswa, intumelo yenu kaina intuso, imi musina mucibi. <sup>18</sup> Abo baba fwi ni Jesu baba fwilili, <sup>19</sup> Haiba tusepete jesu mubuhalo bwetu bu mana, tumaibite ku hita bonse ba fwile. <sup>20</sup> Kono krisite aba buswa kuba fwile ceyo inako, nji chichelo che ntazi kuba fwile. <sup>21</sup> Sina ifu hali bezi cha muntu, imi ka muntu kubuswa kubezi chefu. <sup>22</sup> Kono cha Adama bonse baba fwi, mi hape bonse ka bahale. <sup>23</sup> Muntu ni muntu ka buke che nako yakwe: Kirisite, chililo che ntanzi, imi nabo ba wanika kwa Krisite kabeze ba buswe hete na keze. <sup>24</sup> Imi kaibe nji mamanani, Krisite hete na tambike mubuso kwe Ireeza Tayo. Njinako yete na manise milao, mubuso ne nguzu, <sup>25</sup> Kono u swanela ku busa kuhita zila zakwe chiza ba mwi konde lya matende akwe. <sup>26</sup> Chila cha mamanani ku ku maniswa ifu. <sup>27</sup> Kono, "Iye cha bika zintu zonse mwi konde lya matende akwe", Kono hachi wamba kuti" aba biki zintu zonse", imi zintu zonse ziba bikwa mwi konde lyakwe, ku zuweka iye ka balwa mwa teni. <sup>28</sup> Imi zintu zonse chiza bikwa mwi konde lyakwe, imi ni mwana kabikwe mu mata akwe. Ilikuti Ireeza abe wa zintu zonse kubantu bonse. <sup>29</sup> Kapa ka tende nji abo ba ba kolobezwa kubafu? Heba bafu kete ni ba buswe, heba bafu kaba buki chi haba kolobezwa? <sup>30</sup> Imi chinzi neswe hatu hala mubukabo inako yonse? <sup>31</sup> Ni wamba buniti bakwetu, sina hanina ibaka lya kulitemba kenu kwa Jesu Krisite Simwine wetu, nicho, kuti nina mwi fu izuba ne zuba, <sup>32</sup> Chinzi cini wana ku muntu, heba kuti niba lwi ni zibatana mwa Efese kamukwa wa bantu fela, heba kuti bafu kete niba buke?

Cwale tulye niku nywa, kakuti lye izona katufwe. <sup>33</sup> Kanji mulicengi, kuti itwayelano imbi zi sinya mukwa mulotu, <sup>34</sup> Mulilekule! Mi muhale cha ku luka! Imi kanji mutendi chibi. sina bamwi kwenu habasena inzibo ye Ireeza. Nimi wambila izo kuti muswabe. <sup>35</sup> Kono zumwi mwa ka wambe, “Bafu babuswa ka mubili wina buti?” <sup>36</sup> Kubula ingana kwako! Ili kuli cho byala kachi woli ku mena konji hacifwa. <sup>37</sup> Imi cho byala kanji wona mubili wete ube, kono u byala imbuto isa zwete. Iwola kwiza ka buloto kapa chimwi chintu. <sup>38</sup> Kono Ireeza kahe mubili kaku keta, mi ke mbuto ni mbuto ka mubili wayo, <sup>39</sup> Inyama zonse kazi swani, kono inyama ya bantu ingi, ni imwi nyama ya zinyolozzi, imwi nyama ya zizuni, imwi inyama yenswi. <sup>40</sup> Hape kwina mibili ya kwi wulu, ne mibili ya hansi. Kono ikanya yo mubili wo kwi wulu ungi, ni kanya ya mubili wa hansi ingi. <sup>41</sup> Kwina ikanya yonke ye zuba, ni kanya ya mwezi, ni kanya ye nkani. Kono inkani ne nkani i chinchana kwi kanya. <sup>42</sup> Niku buka kwa bafu kakube bulyo. Mubili u byalwa ni usa boli, imi kau buke nosa boli, imbuto isana iba byalwa hande kai bukile mwi kanya. <sup>43</sup> Kai byalwe ni ifokwele; mi kaibuke ne nguzu. <sup>44</sup> Iba byalwa ka mubili wina bulyo; mi kau buke mumubili wa luhuhu. Heba kwina mubili bulyo, mi kwina mubili wa luhuhu. <sup>45</sup> Imi kuñoletwe kuti, “Mukwame we ntanzi Adama aba bi mubili u hala. Adama wa mamanimani aba hi luhuhu lwa buhalo. <sup>46</sup> Kono luhuhu kena luba kezi lwe ntanzi kono che nyama, chichilila che nyama. <sup>47</sup> Mukwame we ntanzi wa hansi, aba bumbwa he longo. Mukwame wa bubeli uzwa kwi wulu. <sup>48</sup> Mwe kalile wa hansi, ni bahansi mube kalile. Mi mwe kalile we kwiwulu, niba kwiwulu mube kalile. <sup>49</sup> Sina hatu zabele chiswaniso che longo, mutu zabale bulyo ni chiswaniso ca kwiwulu. <sup>50</sup> Linu ni cho kuti, bakwetu, malaha ni nyama kazi woli ku muna mubuso we Ireeza. Mi chi bola kachi woli ku muna chisa boli. <sup>51</sup> Mubone nimi wambila indaba yiba patitwe: Tubonse kete ni tufwe, kono tubonse katu sanduke. <sup>52</sup> Tubonse katu sanduke chaku koba kwe liinso, che mpeta ya mamanimani. Impeta kazi lile, mi bafwile kaba buswe ku bafu. <sup>53</sup> Mi chi bola ci zwate kusa bola, mi cifwa chi zwate kusa fwa. <sup>54</sup> Chi bola keyo inako muchi zwate chisa boli, mi chifwa chi zwate kusafwa, mi kaku tendahale kenzwi ku ñoletwe kuti, imi ifu liba minwa niku shila. <sup>55</sup> Iwe ifu ku shila kwako kwinahi? Iwe ifu, chihaiso chako chinahi? <sup>56</sup> Chihaiso chefu chibi, mi inguzu ze chibi mulao. <sup>57</sup> Kono tumela kwe Ireeza yaba tuhi ku tula kwa Simwine Jesu Krisite! <sup>58</sup> Cwale bakwetu, mukole kanji munyanganiswa. Mi mukole mumisebezi ya Simwine, ni mwizi kuti misebezi yenu kwa Simwine ina intuso.

## Inkauhanyo 16

<sup>1</sup> Linu kuamana ni newo zaba lumeli, sina muni balaelezi inkeleke za Galatia, cwale mutende. <sup>2</sup> Kezuba lya matangilo kwi nsunda, muntu ni muntu kwenu abike chaba hewa kuti inewo kanzi zi pangwa hani keza. <sup>3</sup> Mi hete ni nisike, bonse bamu vazuminini, kani tumine cha mañolo ineo zenu kwa Jelusalema. <sup>4</sup> Mi haiba ku woleka kuti niyende nabo, bawola kuyenda name. <sup>5</sup> Kono kani hite kwenu chinaya kwa Masedonia. ka kuti munihite mukati ka Masedonia. <sup>6</sup> Mwendu kani kale nenwe kapa kumana maliha nanwe, cho kuti muwola kuni tusa mu musipili, konse ku niya. <sup>7</sup> Mihe kani litukiseze ku mi bona

mwi nako ifwihi. <sup>8</sup> Mihe ni hupula kuhinda inako nanwe, haiva Simwine na zumina. <sup>9</sup> kono muni kale mwa Maefese hesi Pentekositi, mihe mulyango mu kando wi yalulilwe ime, mihe ba kanani bangi. <sup>10</sup> Hanu Timosi cheza, mubone kuti wikala nanwe na satite, chokuti utenda musebezi wa Simwine, china yenda. <sup>11</sup> Kazi muleki zumwi ku mushewu nuna. mu. mutuse che nzila ye nkozo, cho kuti uwola kwiza kwangu. Mihe ni mulindile kuti eze ni Bakwetu. <sup>12</sup> Hanu ku amana ni mu kwetu Apolosi, ka kukoza ni mu susuweza kumi potela ni bakwenu. Kono kena ibali kusaka kwa kwe kuti eze hanu, keze inako chi ni yasika. Niha kuba bulyo, keze che nako ya kwe. <sup>13</sup> Mu lolisise, muzime kapili che ntumelo, mu tende sina mukwame, mukole, <sup>14</sup> Muleke zonse zimu chita zi tendwe che chinsemo. <sup>15</sup> Mwizi kuti benzubo ya Sitefaniasi, ba bali ba matangizo mwa Achaia, mi chiba libakanya abo bene cha chilumeli chabo. Linu, nimi susuweza bakwetu. <sup>16</sup> Muzuwe bantu abo ba seveza misebezi iswana ni yetu. <sup>17</sup> Ni nsangiswa kwiza kwa Stephanas, Fortunatus, ni Achaicus. Ba banitusi zimuba kangitwe kuni tusa. Mihe ba ba sisimuni luhuhu lwangu ni lwenu. <sup>18</sup> Imi he, mu zuminine bantu batenda bulyo. <sup>19</sup> Inkeleke za Asia zimi lumelisa. Akila ni Prisila ni nkeleke yabo inkando bami lumelisa ke Ireeza. <sup>20</sup> Bakwetu bonse bami lumelisa. Ku lumelisa zumwi ni zumwi cha kuli chuchuna. <sup>21</sup> Ime, Paulusi, ni fiola izi cha mayanza angu. <sup>22</sup> Cho kuti zumwi kasaki Simwine, ka nyanswe, Simwine wetu, wize! <sup>23</sup> Inse za Simwine Jesu zibe nanwe. <sup>24</sup> Chisemo changu chibe nanwe mu bonse ka Jesu Kresite.



## 2 Makorinte:

<sup>1</sup> Paulusi, muapositola wa Jesu Krete che ntato ye Ireeza, mi Timoteya mukwetu, ku nkereke ye Ireeza ina mwa Korinte, ni kuva zumina vonse vena muchilalo cha Akaiya. <sup>2</sup> Chisemo chive kwenu ni nkozo kuzwila kwe Ireeza ishetu ni Simwine wetu Jesu Krete. <sup>3</sup> Ireeza ni Ishetu, cha Jesu Krete Mfumwetu a tembwe. Nji yena Isii wa chisemo ni Ireeza wavo vonse va ombaombwa. <sup>4</sup> Ireeza u tuombaomba muma sukuluka etu onse, ili kuti naswe tuombaombe bena mu masukuluko. Tu ombaomba vamwi sina Ireeza mwa va tuomba-ombeli. <sup>5</sup> Sina masukuluko a Krete ava letwa chetu, linu niku ombaombwa kwetu kutu leta hamwina cha Krete. <sup>6</sup> Kono ni hatu sukulwa, nji mukuti muwane ku ombaombwa ni impuluso. Imi hatu omaombwa, ku ombaombwa kwenu. Ku ombaombiwa kwenu kuseveza sinte chimuli kauhanyeze masukuluko chenkulo inde sina iswe mutuva sukulukili. <sup>7</sup> Imi insepoyetu kwenu inkando, twizi sina nanwe hamuli kauhanyeza masukuluko, nanwe mulikauhanyeze ku ombaombwa. <sup>8</sup> Linu katusaki kuti kanzi mwi zivi vakwangu, cha masukuluka atuva wani mwa Asiya. Tuva pwacolwa chakuhitiliza ahulu kuhita mutu va kuwolela kuchihindila, mane kana tuva kusepa kuti tusi wola kuhala hape. <sup>9</sup> Chavu sakusima, tuvana inkatulo yefu hetu. Kono, ivali kutu pangila kuti kanzi tulisepi iwe tuvene, kono tusepe Ireeza, yo vuusa vafwile. <sup>10</sup> Njiyena yavatu lamuleli kwi nkozi ivilala, imi, katulamulele hape, Tuva tuli insepoyetu kwali, kuti tulukule kwi nkozi hape. <sup>11</sup> Katende ichi sina inwe hamu tu tusa cha mirapelo yenu. Linu, vungi kavahe vwitumelo cha chisemo chituhelwe 'kwetu che ntapelo zava vangi. <sup>12</sup> Tuli kumusa chechi; vupaki cha lizwalo lyetu. Mukuti mihupulo milotu ni kusepahala kuzwililila kwe Ireeza sina mutu batendeli iswe munkanda. Tuva tendi bulyo cha vungi nanwe- isiñi cha vutali vwe nkanda, kono cha chisemo che Ireeza. <sup>13</sup> Katu miñoleli zintu zi musa oli kuvala kapa kuzuwisisa. Ni sepa ka mutu zuwisise chakwizula, <sup>14</sup> sina hamu va tuzuwi kanini hanu. Linu mwizuva lya Mfumwetu Jesu katuve twi vaka lyenu lya kuli temba, sina mwete mu vile vetu. <sup>15</sup> Mukuti nivena insepoyetu kwa mana nezi, Niva kusaka kukeza kwenu intanzi, linu kuti mutambule mipuzo cha mipotelo yo vele. <sup>16</sup> Ni vaku lela ku mipotela chini kaya kwa Masedoniya. Linu hape ni vaku zeza kumi potela chini kazwa kwa Masedoniya, ni kuti inwe ze munitumine munzila yangu kuya kwa Judeya. <sup>17</sup> Linu hani vali kuhupula buti, niva kuhakanyeha? Kana nilela zintu mukulukela cha buntu, linu niti “Eni, eni.” mi “Awa, awa” chenako iswana? <sup>18</sup> Kono sina Ireeza yo sepahala katuti vulyo zonse “Eni” ni “Awa.” <sup>19</sup> Mukuti mwana e Ireeza, Jesu Krete, ka Silvanasi, Timoteya, ni va kutazi mukati kenu, kena “Eni” kapa “Awa.” kuhita kuti nji “Eni” chenako yonse. <sup>20</sup> Mukuti insepoyetu zonse ze Ireeza nji “Eni” chakwe. Linu, chakwe iye mwine tuti “Amen” kwi kanya ye Ireeza. <sup>21</sup> Hahanu, nji Ireeza yo tunyakisisa nanwe Krete, imi ava tu tumi. <sup>22</sup> Ava tuviki luswayo mi chatuha luhuhu mwi nkulo zetu kuti ive chisupo cha chete natuhe. <sup>23</sup> Kuhita kuti, ni sumpa Ireeza kuti ave mpaki yangu mwi vaka anisena nivezi kwa korinte ivavi kuti nimi

sileleze. <sup>24</sup> Izi kena kuti tusaka kuyendisa entumelo yenu mwi swanela kuvila. Kuhita kuti, tukwete kuseveza nanwe kuti muve nentavo, sina hamu zimene muntumelo yenu.

## Inkauhanyo ya 2

<sup>1</sup> Linu china zeza kalwangu kuti kazi nikezi chezila isasamisa. <sup>2</sup> Heva niva mi sasamisi, vava kuni susuweza nji vona vani vachisi. <sup>3</sup> Na ñola muna ñolela njokuti kanzi ni chiswa kwavo vava kuswanela kuni tavisa. Nina insepō kuamana inwe muvonse kuti intavo yangu njiyona imukwete nenwe. <sup>4</sup> Linu niva miñoleli ni manyando makando, mi ninina mubukavo vwe nkulo, ni zinsozi zingi. kena ni vali kusaka kumi sasamisa. kono, nibali kusaka kuti mwizibe ilato likando lini kwete kwenu. <sup>5</sup> Haiba zumwi waleta kuchisa, kena leta bulyo kwangu, kono kamukwa umwi, noti kwi tula chabukali, kono waleta kwenu mwese. <sup>6</sup> Kuli kene uzo mutu hahewa Inkoto bulyo ku vantu bangi. <sup>7</sup> Lya hanu hasa muha ikoto, mwina noku swalela niku muomba-omba. wina v, unjo nange ehaiwe vukando bwa maswavi akwe. <sup>8</sup> Linu ni misusuweza kuti muwole ku patalaza ilato lyenu kwali. <sup>9</sup> Ili nji vaka hani va ñoli, linu chingi nali kumilika kubona nandi mwi chilila onse. <sup>10</sup> Heba uswalela zumwi, nimu swalela zuna muntu name. China swalela- haiva kwina china swalela-chaswalelwa kwineku lyenu havusu bwa Kreste. <sup>11</sup> Ili kuti Satani sazi atu zwisi mwizila, kaho twizi hande milelo yakwe. <sup>12</sup> Simwine ava ni yalwili mulyango haniya mwi tolopo ya Troas kuka kutaza ivangeli ya Keresite uko. <sup>13</sup> Nanga vulyo, kena ni vena ni nkozo yo muhupulo, ka kuli kena ni vezi kuwana mukulwangu Titi uko. Cwale chi navasiya niku volela kwa Macedonia. <sup>14</sup> Kono vuitumelo vuve kwa Ireeza, umo mwa Kreste utuyendisa mu miliko. Ketu usansaila munko yenzivo yakwe konse. <sup>15</sup> Kakuli twina kwa Ireeza ina munko munati ya Kreste, bonse abo bakwete ku hazwa nabo ba kwete sinyeha. <sup>16</sup> Ku vantu va vasinyehi, mi munko uzwa kwi fuu ni fuu, kwabo va kweta hazwa, mi munko uzwa kwi vuhalo ni vuhalo. Yo swanelwa izo zitu? <sup>17</sup> Mukuti katu swani ni vungi bwa vatu va vali kuwuzwa izwi lya Ireeza cho vu polofiti. Niha kuti, ka kujolola kwa mulelo, tuwamba mwa Keresite, sina hatu kwe tumitwe kwe Ireeza, ha busu bwe Ireeza.

## Inkalulo ya 3

<sup>1</sup> Chitu tanga ku litemba hape tubene? Katu saki mañolo a ku tuzuminina kwenu kapa azwa kwenu, sina vamwi vaantu, tu swanela? <sup>2</sup> Inwe muvene njenwe mu mañolo etu a tu zuminina, añoletwe mwi nkulo zetu, ezivenkwa ni kubaliwa vaantu bonse. <sup>3</sup> Imi mutondeza kuti iñolo lizwa kwa Keresite, libaletwa iswe. Kena libañolwa ni inke kono cha Luhuhu lye Ireeza yo hala. Kena liva ñoletwe ha matapa a bwe, kono ha matapa e nkulo za vaantu. <sup>4</sup> Imi iyi nji sepo itukwete kwe Ireeza ka Keresite. <sup>5</sup> Ka twina bwizivi vuhitiliza mukati ketu kuti tute izizintu zizwa kwetu. Kono, kwiziva kwetu kuzwila kwe Ireeza. <sup>6</sup> Nji Ireeza yava tutendi kuti tuwoli kuva vahikana be chikani chihwa. Ichi chilikani kahena cheñolo kono cha Luhuhu. Mukuti iñolo lihaya, kono Luhuhu luha vuhalo. <sup>7</sup> Hanu isevelezo ivaleti ifu- miñolo i chakwilwe ha mabwe- kuvezi ikanya ku vaantu va Iselaele ichita kuti mane vaantu kana vavali kuwola kulola muchi

fateho cha' Mushe. Ibali ibaka lya nkanya ibena ha chifateho chakwe, inkanya ivali kumana kani kani. <sup>8</sup> Mukusike kuhi kubenya kwe kanya ye nsevelezo ya Luhuhu? <sup>9</sup> Mukuti insevelezo ivali kunyazahala ivena ikanya, mukuvevule kwikanya ye nsevelezo ya kuluka ikwetwa chabungi kwinkanya! <sup>10</sup> Kavuniti, china chi vapangitwe che nkanya, kachi sina mumukwa we nkanya, vakenyi che kanya ihita ahulu. <sup>11</sup> Haiba kuti china chivali kuhita chivena nkanya, mukuve vule kwechina chikalilile kuva ni nkanya! <sup>12</sup> Sina hatwina vulyo insepo, tuzwile habusu. <sup>13</sup> Katuswani sina nji Mushe, yavali vikite isila ku chifateho chakwe, mane kuti vaantu va Isilaele kenavavali kuwola kumulola kakumu tulula kevaka lye nkanya ivali kuhita bulyo. <sup>14</sup> Kono mihupulo yabo iveyelwe. Mane kwiza kusika lunu luzuva kapayi kaswana kasishela cha kuvala chilikani chakale. Kakeni ku wumbuka, kakuti nji kwa Keresita bulyo kukawolwa kuzwiswa. <sup>15</sup> Kono kuli sunu, Mushe havalwa, kapayi kasi zalitwe inkulo zavo. <sup>16</sup> Kono muuntu havola kwa Simwine kapayi ka wumbulwa. <sup>17</sup> Hanu Simwine Luhuhu. Hena Luhuhu lwa Simwine, kwina intukuluhu. <sup>18</sup> Hanu tubonse, tuwumbukite tupayi ha meenso, bone inkanya ya Simwine. Tuba sandulwa mwikanya iswana kakuzwa mwinkalulo ye nkanya kuya muyimwi, sina ku zwililila kwa Simwine, Iye ili Luhuhu.

## Inkaushanyo 4

<sup>1</sup> Linu, mukuti twina ili ikolo, ni sina mutu va tambwiri chisemo, katuzwafi. <sup>2</sup> Ni hakwina vulyo, tuve zivahazi inzila ziswavisisa ni zili wungwile. Katuhali cha ku chengelela, tuwonda inzwi lye Ireeza hande. Chaku zimanina initi, tulileta havusu bwa zumwi ni zumwi cha kuya che zwalo lyakwe mu menso e Ireeza. <sup>3</sup> Haiva i evangeli yetu i umbitwe, i umbitwe feela kwabo basinyeha. <sup>4</sup> Imi kuvali, mulimu we inu inkanda ava hofuhazi kusa zumina kwa mihupulo yavo. Chelo ivaka, kava woli kuvona mumuni wa linzwi we kanya ya Kresite, iye chiswaniso che Ireeza. <sup>5</sup> Katuli zivahazi iswe tuvene, kono Kresite Jesu neli Simwine, mi iswe tuvahikana venu kuchitila Jesu. <sup>6</sup> Mukuti Ireeza nja va wambi kuti, “mumuni kauvenye mwi fifi.” Ava veñyisi mwi inkulo zetu, kuha iseri lyo kwiziva ikanya ye Ireeza mukuva kwa Jesu Kresite. <sup>7</sup> Kono twina ichi chifumu tuhamwe twe rongo, nji kuta kuti ziho zonse kuhitiliza njiza Ireza mi isinyi zetu. <sup>8</sup> Tuwina muvukavo mwinkalulo zonse, kono katu pwachuki, katwizi cha ku panga kono katwizuli kuswava. <sup>9</sup> Tunyandiswa kono katukanwa. Tu wisikizwa hansi kono katusinyehi. <sup>10</sup> Tuhindite ifu lya Jesu mu mi viri yetu inako yonse, jo kuti vuhalo bwa Jesu vuvoneke mumivili yetu. <sup>11</sup> Iswe tuhala tuhindite mumivili yetu inako yonse ifu lya Jesu, njokuti vuhalo bwa Jesu vuvoniswe mumivili yetu ya vuntu. <sup>12</sup> Njokuti ifu likwete kuveleka mwetu, kono vuhalo vukwete kuveleka mwenu. <sup>13</sup> Kono twina luhulo luswana lwe ntumelo kakuya ka chiva ñoletwe: “Niva zumini, mi linu niva wambi.” Naswe tuzumina mi hape tuwamba. <sup>14</sup> Twizi kuti iyemwine yava vusi simwene Jesu, katu vuse naswe ni Jesu. Twizi kuti kaatu hinde nanwe kuya mwena iye. <sup>15</sup> Zintu zonse zichitilwe inwe kuchila kuti, sina chisemo hachi hasene kuvantu vangi. Kutambika vuitumelo kwi njihe kwi kanya ya Ireeza. <sup>16</sup> Linu katuzwafi. Nihakuva vulyo, hanze tukwete ku sinyeha,

mukati tukwete kuvumbwa chihya izuva ni zuva. <sup>17</sup> Mweyi inako zana, manyandozana anu a kwete atuvakanyeza kulema kwe kanya kulikanyezwa kusamani. <sup>18</sup> Katu lolete zintu zivoneka, kono zintu zisa voneki. zintu zivoneka zenakozana, kono zintu zisa voneki za kuya kusamani.

## Ikauhanyo ya 5

<sup>1</sup> Twizi kuti mubili we nkanda mutuhala hausinyeha, twina muzako kuzwa kwa Ireeza. Izuvo isa pangitwe cha mayaza abantu, kono i zuvo isamani, mwi wulu. <sup>2</sup> Mi mweli tete tu tonga, tu shukelwa ku zwatikwa chizwato cha kwiwulu. <sup>3</sup> Tushukelwa i chi chitu mukuti hatu chizwata kete tu wanike kuti katu zwete. <sup>4</sup> Cha kwizula ni twina mweli itete, tu tonga, ni mubukabo. Katu saki kwi kala ni tusazwete. Kuhita, tusaka kuzwata, ili kutu chisafwi chi miniwe buhalo. <sup>5</sup> I ye yaba tu lukisezi ichi chitu nji Ireeza, ya batuhi Luhuhu ili kuti ibe bupaki bwa chikeza. <sup>6</sup> Nihakuba bulyo twina ni kuba ni nsepo. Twina ni kwiziba kuti hetu twina ku munzi mu mibili, tuzwa kwa Simwine. <sup>7</sup> Mi tuyenda chetumelo, isini cha chi voneka. <sup>8</sup> Mi twina insepo. Tu swanela kuzwa mu mubili ni kukava kumunzi ni Simwine. <sup>9</sup> Linu tu panga chi kokwani chetu, kapa twina kumunzi kapa hanze, ku musangisa. <sup>10</sup> Mi twense tu swanena ku boneka habusu bwa chipula che inkatulo cha Keresite, I li kuti zumwi ni zumwi a tambule chitu chaba pangi mu mubili, kapa kubu lotu kapa ku bubu. <sup>11</sup> Niha kuba vulyo, kwi ziba kutiza kwe Simwine, tu susuweza vantu. Mutwi kalile tu bonwa kwa Ireeza. Ni sepa kuti zonse zizuwekete kwi zwalo lyenu. <sup>12</sup> Ka tuliki kumi susuweza kuti mutu bone kuti tusepahala. Kuhita, tumiha ibaka lya kuli kumusa chetu, ili kuti ube ni kalabo kwabo bali kulitemba cha ziboneka isini zina mwi nkulo. <sup>13</sup> Mi heba tuzwile mu mihupulo yetu, njiza Ireeza. Mi haiba twina mu mihupulo yetu ishiyeme, nji kwako. <sup>14</sup> Mi ilato lya Keresite litu susuweza, ka kuti tuli kolwisisa kechi: kuti muntu yeke aba fwili vonse, mi niha kuba bulyo vonse linu ba bafwi. <sup>15</sup> Imi Keresite ava fwili vonse, ili kuti avo bense bahala kazi bahali lwabo, niha kuba vulyo, bahale ka lwakwe iye ya vafwi ni kuvuka. <sup>16</sup> Che libaka, kuzwa hanu kutwala oko katu nyansa muntu kuya ka chizimo cha buntu, niha kuba bulyo naswe mutu bali kuhindila Keresite mwei nzila. Kono hanu katu sinyansi bamwi cheyi nzila ni kamuta. <sup>17</sup> Niha kuba bulyo, haiva zumwi wina mwa Keresite, chibumbatu chihya, zintu za kale ziba mani. Mubone, chiba ba sanduki bahya. <sup>18</sup> Zonse izi zintu zizwa kwa Ireeza. Aba tubonzi kwali cha Keresite, imi aba tuhi ikolo lya ku bolisana inkulo. <sup>19</sup> I li kuti, mwa Keresite Ireeza ukwete u bozekeza ikanda kwali, nasa ba balili milandu yavo. U kwete utuha ifusa lya kubosisana inkulo. <sup>20</sup> Tubasalwa kuti tube bazimanini ba Keresite, ubu Ireeza abali kuli zibahaza chetu. Tu likumbilila nanwe, che baka lya Keresite: “Mubole kwa Ireeza. <sup>21</sup> Aba chiti Keresite kuti ibe chitabelo chetu kechibi. Nji yena ya sena ba tendi chibi. Aba tendi izi kuti tube ba shiyeme kwa Ireeza mwali.

## Inkauhanyo 6

<sup>1</sup> Imi hape, kusebezisana hamwina, tumikumbila kusatambula ikanya ye Ireeza isena musebezi. sina aba wambi, Munako iswanela,

Nibatekikwako. <sup>2</sup> Imi mwizuba lye mpuluso ni bakutusi. “lole hanu chinako iswanela.” Lole hanu izuba lyempuluso. <sup>3</sup> kanzitubiki zisitaliso habusu bwazumwi mukuti kazilete musebezi we Ireeza kushinyeha. <sup>4</sup> Mukuti, tuli kolwisisa tubonse cha misebezi yetu. Mukuti tubahika be Ireeza. <sup>5</sup> Tubahikana bakwe mukutundamena, mukuzwafiswa, mumanyando, mukudamwa, mukusuminwa, mukulwiswa, mumasukuluka, mukulala chilabila, <sup>6</sup> munzala, mukujolola, munzibo, munkulo-nde, mukushiyama, muchisemo, muluhuho lujolola, nimwilato lishiyeme. <sup>7</sup> Tubahikana bakwe ni mwinzwi lyeniti, nimuziho ze Ireeza. imi twina insilelezo inakwiyanza lijolola linakubulyo niku lyachimonso. <sup>8</sup> Tusebeza mwikute, ni mukusakutekeha, ni mukuwambwa bubi, ni mukububekwa. Tunyanswa mukuti tuwamba mapa imi nituwamba ze niti. <sup>9</sup> Tusebeza sina katwizibitwe imi kanti twizibenene. tusebeza sina bayakukufwa, mi mulole tusihala, Tusebeza sina bahindikitwe munkezozetu kono katunyansilizwe mukufwa. tusebeza sina basukulukite kanti inakoyonse tusangite. <sup>10</sup> Tusebeza sina bashebeta, kono kanti tubika bangi kuba bafumite. Tusebeza ni tusawani chimwi kanti katuwane, zintuzonse. <sup>11</sup> Kanti, tuwamba kwenu zonse chabuniti. Makorinte, imi nkulo zetu ziyaluki. <sup>12</sup> Inkulo zenu kazisinene chetu, kono zisinene cha maikuto enu. <sup>13</sup> Hanu, mushelene ni wamba sina yowamba kumuhwile mwiyalule ahulu inkulo zenu. <sup>14</sup> Kanji, musuminwa hamwina nibasa zumini. Linu chinzi balukite abakopana niba tenda zive? Imi kanti chizwale nzii china mwiseli ne fifi? Kuzuminzana kwina abule kwena Jesu ni batenda zibe? <sup>15</sup> Kapa chinzi chali kauhanyeza mulumeli niyotenda zive? <sup>16</sup> Imi intumelelano nzi, ina mukati ke tempele ye Ireeza ni ziswaniso? Sina hatuli twi tempele ihala ye Ireeza, sine Ireeza habawambi: “Kanizake mukatikabo imi niyende mukati kabo. Munibe Ireeze wabo, imi mubabe bantu bangu.” <sup>17</sup> Lyahanu, “Muzwe mukati kabo imi mulikauhanye,” mwatela Ireeza. Kanzi muwondi zintu zisa jolwele, imi muni mitambule. <sup>18</sup> Munibe Ishenu inwe mubebana bangu, imi kamube banabangu baba swisu niba kazana, “Kuwamba Ireeza wina kwilu.

## Inkauhanyo 7

<sup>1</sup> Basakiwa, buti mutwina insepiso tulijolozwe kunzitu zonse zitu panga bena inkwe mumibili ni muluhuho. Tu wonderere kunjolola mukutiya Ireeza. <sup>2</sup> Mutu lukiseze chibaka! kana tubafosekezi umwi. kana tuba holofazi muntu kapa kuchengelela umwi. <sup>3</sup> Kana kumimyaza iyo niwamba. Sina hani bawambi kale kuti mwina mwi nkulo zetu, kwetu kuti tufwe hamwina ni kuhala hamwina. <sup>4</sup> Nina i sepo inkando mwenu, imi nilinuneka chenu. ni zwire ku ombawombwa. Ni zwire kusanga nanga mumanyando etu onse. <sup>5</sup> Hatukeza kwa Masendoniya, mibiri yetu kena ibena impumulo. chebaka lyobulyo, tuba katezwe muzintu zonse che nfapani zibena hanze ni kutiya kubena mukati. <sup>6</sup> Kono Ireeza, yo susuweza ba zwafite, aba tu susuezi cha kusika kwa Tite. <sup>7</sup> Kena ibali chakusika bulyo chaba tususuezi kacho Ireeza. Ibali ni che susuezo yaba tambuli Tite kuzwa kwako. Abatu wambiri kaze rato lyenu, kuwilwa kwenu, ni kubirerera ahulu ime. Imi sanga ni kuhitiliza. <sup>8</sup> Nangati kuti ifnolo

lyangu libezi kukuzuwisa bubu, Kani linyasi chalyo. Kono nibali nyansi hani bona kuti ifiolo lyangu libezi kukuzuwisa bubu. Kono ubalizu bubu che kanako zana. <sup>9</sup> Hanu ni sangite, isifi kuti muba mubazuwile butuku, kono kakuti kusalizuwa hande kwenu buba mleti kulinyaza zivi zenu. Mube zibi maswabi a zamilimu, mi kana muba nyandi cha kusinyehelwa chimwi kabeka lyetu. <sup>10</sup> Kakuti chiliro cha milimu chiletera kubaka iri kuwanisa kuhazwa nikusena kuli nyansa. Chiliro chefasi, nihakuba bulyo, chileta ifu. <sup>11</sup> Bone bukando bwentundamo yamaswabi abuireeza ziabaleti kwako. Ibali inkando vule intundamo mwenu ku konisa kuti kana muvbona mulandu. Ibali kukando vule kubanga kwako, kutiya, indiwulu yako, kulitombola, nikuna kuti busakusimwa bupangwa! Munzintu zonse zimuba bonahazi kuti kamwina mulandu mwi indaba. <sup>12</sup> Nihakuba kuti niba mifoleri, Kena niba ifioli chebaka lyo kupanga bubu, kamba chozo yaba pangu bubu. Niba ifioli iri kuti kusepahala kwenu kwetu kuboneke kwenu habusu bwe Ireeza. <sup>13</sup> Ibaka lyezi tuba susuwezwe. Chokuwelekeza kuwombawombiwa kwetu, tubezi kusanga ni kuhitiliza chebaka lya kusanga kwa Tite, kakuli luhuhu lwakwe lubabiswa buhya chenu mobonse. <sup>14</sup> Mukuti haiba nili tundumuna kwakwe chenu, Kena niba swabisiswa. Ne kena bulyo, sina zintu zonse zitu bawambi kwenu zibali za kusakusimwa, kuli tundumuna kwetu kuamana nanwe kwa Tite kuba bonisi kuba kusakusimwa. <sup>15</sup> Ilatu lyakwe kwenu ikando maswe, sina habazezi ikute lyenu mubonse, mumubezi kumu tambwila chokutiya ni chachalika. <sup>16</sup> Ni sangwa kakuti nina i sepo inzwire mwenu.

## Inkauhanyo 8

<sup>1</sup> Tusaka kuti mwi zibe, balatiwa, kuamana ni chisemo che Irreeza icho ciba hewa kwi ikereke ya Mosodoniya. <sup>2</sup> Mwinako inkando ye miliko ni kunyandiswa, bungu bo kusangwa kwabo ni muku nyanda mubu njebwe bwabo babaleti chifumu chikando ahulu che yumbula. <sup>3</sup> Kakuti niha bupaki kuti babahi chobungu sina mubabali kuwolera. Ni kuzwirira kusi ye nkulo zabo <sup>4</sup> nimu kutu kumbira ahulu kuchibaka cho kuli yabira mowu musebezi niba zumine. <sup>5</sup> Ichi kahena chiba pangahali ubu mutubali hupulere. Lyinu, babatangi kuli ha abobene kwa Simwine. Lyahanu njibeza kuliha abovene kwetu che tato ye Irreeza. <sup>6</sup> Linu tuba kumbiri Tite, yaba tangi kale uwu musebezi, kuti a manisize uwu mutendo wo kuha kwi neku lyenu. <sup>7</sup> Kono mwina buikalabero muzitu zonse- ni mwiwumero, ni mukuwamba, ni mwi ngana, ni mukusepahala konse, ni mwi rato lyenu kwetu. Lyahanu mubone kuti muwonderela munkezo zokuha. <sup>8</sup> Niwamba ichi isifi uba itayero. Kono, Ni wamba ichi iri kulika buniti bwe rato lyenu cho kubu swanisa cho kusaka kwa bamwi bantu. <sup>9</sup> Kakuti mwizi chisemo cha Simwine wetu Jesu Kheresite. Nangati kuti abali kufumite, che baka lyenu aba sandu kanjebwe, iri kuti cho bunjebwe bwakwe muwole kuba bafumite. <sup>10</sup> Mweyi indava kani mihe ikerezo iyo isina kayi mituse. Chirimo chimwina chiba mani, kena mubatangi kupanga chimwi, kono mubali kunyolerwe kuchi panga. <sup>11</sup> Lyahanu mu maniseze. Sina mukubena inchiseho ni takazo yo kuchipanga hana, cwale mule kuchileta kumamanikizo, sina ahulu sina mumu wolera. <sup>12</sup> Sina haiba muhupwire kupanga iyi ikezo, i ndotu mi i

tambulwa. i swanera kuli tinga kamo muntu mwa kwatire, insiñi kamwasa kwatire. <sup>13</sup> Inyi kalulo kayina mumukwa ukuti bamwi bawole kuyimululwa mi inwe mu hambirizwe. Chikwina bulyo, kuswanera kuba niku zumizanwa. <sup>14</sup> Cho kuba nizingi mweyinu inako mukutuse inzo zibasaka. Iyi njikuti nabo zingi zibakwete nizi wole kutusa zimusaka, mi iri kuti nikube niku yenderera. <sup>15</sup> Yina ubu muyi ñolerwe: “Uzo yowina zingi kena ababi nichimwi chiba shali, mi zumwi yabena tuche kena ba tayeri kamba kusaka chimwi.” <sup>16</sup> Kono buitumero bube kwe Ireeza, yaba biki mwi nkulo ya Tite chisemo chikando icho chini mikwatire. <sup>17</sup> Kakuti ka tambuli fera ikupo zetu, kono aba sepahali ahulu kuyamana nacho. Aba kezi kwenu cho kusaka kwakwe. <sup>18</sup> Tuba mutumini naye muzwale yo rumbiwa ahulu mu makereke onse che misebezi yakwe yo kuwamba i evengeli. <sup>19</sup> Insiñi bulyo iyi, kono naye bulyo abali kuketetwe kube kereke kuti tuyende naye muku hinda iyi inkezo yokuha. Iyi njo kurumbiwa kwa Simwine iye mwine ni mukusaka kutusa kwetu. <sup>20</sup> Tukwesi kulika kusiya kuwoleka kuti zumwi kanji a woli kubirera kuyamana naswe kuyamana noku kuha kutu hindite. <sup>21</sup> Tu babalera kupanga icho chi kutekeha, isiñi bulyo habusu bwa Simwine, kono niha bunsu bwa bantu. <sup>22</sup> Tumu tumina nizumwi muzwale nabo. Hangi nitu mulika, mi tuba muboni kuti kutabera misebezi yonse ya hewa na tabite. Mi lyahanu usangitwe chebaka lye sepo inkando yena nayo mwenu. <sup>23</sup> Haili cha Tite, mubereki kuninangu ni mulikanangu kwenu. haili che mizwale yetu, batumiwa mbabe kereke. Basepahala kwa Khresitte. <sup>24</sup> Lyahanu muba ntondeze i rato lyenu, mi mutondeze kwi kereke ibaka lyo kuli tundumuna kwetu kuyamana nanwe.

## Inkauhanyo 9

<sup>1</sup> Kuamana ni mutendo u va zumine, ka kwina intuso kwangu ya ku mi ñolela. <sup>2</sup> Ni zi kuamana ni intakazo zenu, zi ni va li tunduvuli kazo ku vantu va Masedonia. Ni va va wambili kuti ma Achaia va kwete vali vakanya ku zwa chilimo chi va mani. Ku tundamena kwenu ku va susuwezi vungi bwavo ku panga. <sup>3</sup> Hanu ni vatumi vakwetu ili kuti kuli tunduvula kwetu ku ama ninwe kanzi kuvi ni kusava ni initi, mi ili kuti mulitukise, sina Mu ni vateli mo mu swanela ku vila. <sup>4</sup> Kwando vulyo, haiva zumwi ku Masedonia wiza ku miwana ni musali tukiseze, mu tu swave - kесе ni wambe chimwi kwenu-cha ku va ni vuisepo kwenu. <sup>5</sup> Mi chi nazeza kuti kwina intuso kuti mukumbile vakwetu kwiza kwenu mi ni kwiza ku vakanya cha ku litahanela che impo i mu va sepise. Ichi ku lukela kuti va vakanye sina imbuyoti, isiñi sina chimwi chi muhambilizwe. <sup>6</sup> Initi njei: iye mwine yo byala cho vuche mwa sinze cho vuche, mi iye yo byala che ivaka lye mbuyoti naye vulyo mwa sinze che mbuyoti. <sup>7</sup> Mu siye zumwi ni zumwi ahe mwa lelele mwi inkulo ya kwe. Kanzi ahi che iswavite kapa ku ha mbilizwa. Ka kuti Ireeza usuni muhi yo sangite. <sup>8</sup> Mi Ireeza u wola ku tenda imbuyoti yonse ku ekeza chenu, ili kuti, inako yo nse, mu zintu zonse, muve ni zonse zi musaka. Mu kuve vulyo kuti mu ekeza zilotu zonse zitendwa. <sup>9</sup> Vo vulyo sina ha ku ñoletwe. “Ava ava aveli vuhumi bwakwe ku va humanehi. Ku luka kwa kwe kwi kalilile.” <sup>10</sup> Iye yo ha imbuto ku yo lima ni ku byala ni chinkwa cha zilyo, mi naye kaekeze i mbuto yenu ya ku byala. Ka ekeze ku sinza kwenu kwa ku luka.

<sup>11</sup> Ka mu humiswe monse ili kuti muhe cha vungi. Iyi ka ilete kuha vuitumelo kwa Ireeza ku zwilila kwetu. <sup>12</sup> Cha ku hinda uwu mutendo isiñi vulyo ku saka vutokwi ku va zumine. Mi i ekeza muzimpangaliko za kuha cho ku litumela kwe Ireeza. <sup>13</sup> Kakuti cha ku tatuviwa kwenu ni ku vonisisa cheyi mitendo, namwe vulyo ka muhe ikanya kwe Ireeza cha ku kuteka ku wamba ivangeli ya Kirisite. Namwe ka muhe ikanya kwe Ireeza cha vungi bwe impo zenu mi ni ku vonse. <sup>14</sup> Va mi tavele, mi va kwete ku mi lapelela. Vapanga izi che vaka lya musa mungi we Ireeza wina mwenu. <sup>15</sup> Mi vuitumelo vungi vu ve kwe Ireeza cha impo yakwe isa woleki ku tatuluswa!

## Inkahanyo 10

<sup>1</sup> I me, Paulusi, ni mwine ni li kumbilila kwenu, cha kuliboza hansi ni lato lya Keresite. Ni li bozekeza hansi hate nina habusu bwenu kono ni chita cha kukola haiba nina kule nanwe. <sup>2</sup> Ni mikumbila kuti, heti nina hamwina nanwe, kete ni sake kukola cha kulisepa ni mwine. Kono ni zeza kuti ka nibe ni kukola ha ni ku li kangisana babo bazumina kuti iswe tuhala chakuya che nyama. <sup>3</sup> Ni ha kubabulyo ni ha tuyenda che nyama, ka tuhambilizi inkondo kuya che nyama. <sup>4</sup> Chokuti zilwiswo ze tu lwa kazo kahena ze nyama. Kono, beena ziho zijolola zi sinya sinya zi ba zimbulukite. Ka kwina che zi wola kuleta inkani za kuchengelela. <sup>5</sup> Naswe bulyo tusinya chonse chihanzi chizimana kulwisa inzibo ye Ireeza. Tuhinda ni kusumina mihupulo yonse i sakuteki Keresite. <sup>6</sup> Mi tu libakanya ku ha inkoto kwi kezo zonse zi sa kuteki, haho bulyo ikute lyenu ha chi lye zuzilizwa. <sup>7</sup> Mulole chi bonahala sinte habusu bwenu. Haiba zumwi chalikipula kuti chili wa Keresite mu muleke a lihupulise iye mwine kuti sina iye ha li wa Keresite chobulyo mutwina tubonse. <sup>8</sup> Chokuti ni ha ni litundumuna kanini cha bungi kuamana ni inkamaiso, i yo Simwine a va ihi chetu kuti tu mizake kono isinyi kumisinya, kete ne ni swabe. <sup>9</sup> Ka ni saki kuti kubonahale chokuti ni mitiiza cha mañolo angu. <sup>10</sup> Chokuti bamwi bantu ba ti, “Mañolo a kwe a hambiliza ni ziho, kono cha mazimo u fokwele. Manzwi a kwe kaswanelwi ku tekelezwa.” <sup>11</sup> Musiye a bo bantu balemuhe kuti sina mu twikalile mu manzwi a mañolo e tu ni ha tu sa kwina kono mwete ne tubile mu zimpangaliko zetu ha te ne tube uko. <sup>12</sup> Ka tuyendi kule sina kulikunganya iswe tubene kwetu kapa cha ku lilikanyisa kwetu na bo bakwete ku li litemba a bo bene. Kono ha ba bali ku li likanyisa a bo bene cha zumwi ni zumwi ni ku li likanyisa kwa bo zumwi ni zumwi, kakwina chebezi. <sup>13</sup> Iswe, ni ha kwinabulyo, kete tu li tundubule cha kuhitiliza intikanyo. Kusi bulyo, ka tuchite bulyo mwi ntikanyo ya Ireeza ya ba tuhi, intikanyo i wola kusika kule u ko kwenu. <sup>14</sup> Mi kana tu ba lihitalizi tubene ha twiza kusika kwenu. Njiswe ba ba tangi lwetanzi kusika u ko kwenu che ivangeli ya Keresite. <sup>15</sup> Kana tu ba litundumuni chakuhitiliza intikanyo chakuya cha mitendo ya bamwi. Kusi bulyo, tusepa kuti sina intumelo yenu ha ili kuti chibaka chetu cha mutendo kachikule ahulu, mi ni ku ba muintikanyo mu iswanelela. <sup>16</sup> Tu sepa chobuti, tu ka kutaze ivangeli mane ni mu zikiliti zi mi hitilile. Ke te tu li tundumune cha mutendo u chitahala muzibaka zimwi. <sup>17</sup> “Kono musiye u zo yo litundumuna, a li tindumuna mwa Simwine.” <sup>18</sup> Chokuti ka njieye uzo u lipaka iye mwine yo zumininwe. Kusi bulyo, njozo mwine u pakwa kwa Simwine.



## Inkauhanyo 11

<sup>1</sup> Ni li takaleza kuti kambe ni mwa libika mu bumwi buholo bwa ngu. Kono tota mu libika name! <sup>2</sup> Mukuti ni fwa muuna chenu. Nina muuna wa bu ireeza ka chenu, kuzwa ha ni ba mi sepisezi ku ba mu maseso ku mukwame umwina. Ni ba sepisi ku mi tambika habusu ni muli ba kamwale luli kwa Kerisite. <sup>3</sup> Kono ni tiite kuti hamwi, sina inzoka mwi ba chengeleli Eva cha butali tali bwayo, mizezo yenu i wola kumi zwisa mwi nzila ya kuli boza hansi ni kulibika mubu niti bwa Kerisite. <sup>4</sup> Mi mukuti kuti zumwi mweze mi nja wambe za Jesu zumwi kwanda yozo utu ba luti. Kapa mukuti mu tambula lungi luhuhu kwanda lu muba tambuli. Kamba mukuti mu tambula yingi i vangeli kwanda yeyina i mu ba tambuli. Muli bika ahulu mwezi zintu cho kwi zuula! <sup>5</sup> Mi ni zeza kuti kanina hamu koloko wa bana ba lizuwa bunini kuba sumpwa ba apositola ba tota. <sup>6</sup> Kono ni hanisa lutitwe mukuha chiwambo, ka hena ni yasa lutitwe mu maano. Mwinzila zonse ni mu zintu zonse tu be ziba nkanisi ichi kwenu. <sup>7</sup> Kana ni ba tendi chibi cha kuli bozahansi cho kuti inwe mu nyamunwe? mi cha ku lukuluha ni ba kutazi i vangeli ya Ireza kwenu. <sup>8</sup> Ni ba hibili inkeleke zimwi cha ku tambula i ntuso zi zwa ku bali kuti cini mi tendele musebezi. <sup>9</sup> Hani bena nanwe mi ni ba ku bulite, kahena ni ba lemenezi muntu zintu. Mi kubula kwangu ku ba tuswa ba mwangu baba li ku zwilila kwa Masedoniya. Mu zintu zonse ni bali bikite kuti kanji ni ni mi katazi, mi muni zwile habusu ni ku chita bulyo. <sup>10</sup> Sina buniti bwa Kiresite mu bwina mwangu, ku li tundubula kwangu kete ku tontozwe mu zibaka za Achayia. <sup>11</sup> Ibaka? Ka kuti kanimi saki? Ireza njo wizi. <sup>12</sup> Mi zini tenda muni zwile habusu ni ku zi tenda, nji kuta kuti nizwise kuzekelela kwa kuni nyansa mi ni ku zekelela ku basaka ku li tundubula ka teni- kuti nabo ba wani kite ni ba tenda mutendo uswana ni utu tenda. <sup>13</sup> Mi mukuti abo bantu ba polofita ba maapa ni ba tendi ba buchengi. Ba libonekisa abo beene kuti ba Apostola ba Kiresite. <sup>14</sup> Mi iyi ka yi komokisi, kakuti ni haibe satani uli bonekisa kuti ingeloi lye seli. <sup>15</sup> Ka hena indaba inkando i komokisa haiba aba ba hikana nabo bali bonekisa kuti ba hikana ba ku luka. Bu kaabo bwabo ka bu swanele mi tendo yabo. <sup>16</sup> Ni ta kuti hape: kanji kubi niyo zeza kuti ni muholo. Haiba mu mu zezela, muni tambule mu buhole bwa ngu nji kuti ni li tundumune kanini. <sup>17</sup> Chini wamba kakuya cha kuli tundumuna kwa kulizuwisisa kaku nyanswitwe kwa Simwine, kono ni wamba ubu chihole. <sup>18</sup> Sina mukuti bungi bwa bantu buli tundumuna ka kuya che nyama, name muni li tundubule. <sup>19</sup> Mi cho ku tabela muli kopanya ni zihole, mu talifite mu bene? <sup>20</sup> Mu likopanya ni zumwi yo mi tenda ba hikana, ha mi sinyo, cwale ha mi hinda ha bufokoli bwenu, haiba uli bonisa ku hita iwe, kapa haiba uku bakula ha menso. <sup>21</sup> Kani wambe ka cha maswabi etu kuti tu bena bufokoli mu ku chita bulyo. Kono he haiba kwina yo litundumuna- Ni wamba ubu chihole- Name bulyo muni li tundubule. <sup>22</sup> Kana Maheberu? He name. Kana Maisilaele? He name. Kana ba luzubo lwa Abrahamu? He name. <sup>23</sup> Kana ba hikana ba Kerisite? (Ni wamba ubu kana ni ba hena mwi ngana.) Ime nji ahulu. Ni bena mane mu mitendo mingi mi kukutu, mwi ntolongo zingi, mu ku kabwa ku hitilize, ku lolinsana ni bukabo bungi bwe ifu. <sup>24</sup> Kuzwa ku Majuda ni ba wani iyanza ka ku ekeza “makumi onee e mbazi ni kuzwisa kamwina.” <sup>25</sup> To tatwe ni ba shupwa che mbazi. Limwina ni ba goobolwa. Totatwe nini fwilwa

chisepe. Ni ba mani izuba ni busiku mu chisepe chiyalukite. <sup>26</sup> Ni ba kwina mu misipili inako ni nako, mwi nkozi ya lwizi, mwi nkozi ya baasa, mwi nkozi ya bakwangu, mwi nkozi ya ba kunze, inkozi ya mumu leneñi, inkozi ya mwi inkanda, inkozi ya kwi wate, inkozi ya ba mwangu ba maapa. <sup>27</sup> Ni bena mumu tendo mu kukutu ni mu bu halo bukukutu, mu masiku a kusalala, mwi nzala ni mwi nyotwa, mukuli nyima zilyo inako ni nako, mu mpeho ni mu ma mpunu. <sup>28</sup> Kuzwa ku zintu zonse, kwina kusunda kwe izuba ni zuba hangu cha kuli ka lililwa kaze nkeleke zonse. <sup>29</sup> Njeni yasena ziho? mi kanina ziho? Njeni yaba chitwa kuti a we, mi ime kani suntiki? <sup>30</sup> Haibe ni ni li tundumuna, munili tundumune ni zi bonisa bu fokoli bwangu. <sup>31</sup> Ireeza ni Isi wa Simwine Jesu, iye yo tembwa kuya kwi ile, wizi kuti kani chengi! <sup>32</sup> Kwa Damaseka, mubusi mwi konde lya Mulena Aretasi abali ku gantela itolopo ya Damaseka kuti ani sumine. <sup>33</sup> Kono ni ba zwisikizwa he haulo lye mota mu chitanda, mi niba ba banduki mu manza akwe.

## Ikauhanyo 12

<sup>1</sup> Ni swanela ku litundumuna, kakwina chini wana mwateni. Muni yende che pono ni zini ba tondezwa kwa Simwine. <sup>2</sup> Nizi mukwame mwa Keresite ya ba hidiwa zilimo zina ikumi ni zone ukoo kapa mu mubili kapa hanze lyo mubili ime kanizi, Ireeza wizi- yava hidiwa mwi wulu lyo vutatu. <sup>3</sup> Mi nizi kuti uzu mukwame - nji mukati ka mubili, kapa hanze ko mubili, kanizi, Ireeza njiwizi- <sup>4</sup> Aba hindiwa mwi paradaisi ni ku zuwa zintu zi jolola mukuti zumwi ni zumwi a wambe <sup>5</sup> Mu ku zimanina zuna muntu muni litundumune. Kono mukuli zimanina ni mwine kete ni li tundubule kwanda ka bufokoli bwangu. <sup>6</sup> Ni bakusaka kulitundumuna, ni ni sana ni babi chihole, ni naba cha kuwamba bu niti. Kono mo ni lizwise ku ku litundubula, mi kakwina yeta ni hupule ahulu kuhita chibwenwe mwangu kapa kuzuwa zangu. <sup>7</sup> Name bulyo kanizwe mu ku litundumuna bakeni chezo isinulo zi hitilize. Kuzwaho, ne ni sete ne ni balinyamuni ni mwiipo, ni bahewa mwiya mwinyama yangu, mutumiwa yo zwa kwa Satani ku ni kalihila, kuti kanji ni bi ni muipo ahulu. <sup>8</sup> Totatwe ni ni kombelela Simwine ke ci, mu kuti iye achi hinde kwa ngu. <sup>9</sup> Mi na wamba kwa ngu, “Muusa wangu mungi kwa ko, mi maata apangitwe mokulukela muvofokoli.” Chokuti ni ni balitundubuli ahulu mu bufokoli bwangu, njo kuti maata a Keresite nati na hala mwangu. <sup>10</sup> ku zwa aho ni li kolwisisa mu bu fokoli cha Kerisite, mu matapa, in masukuluka, ni mu manyando ni bwikalo bu ziece. Linu chi ni fokwele, nji ni kolete. <sup>11</sup> Chi ni babi chihole, mu bani hambilizi kuba bulyo, mu kuti ni bali ku swanela ku lumbekwa kwenu. Mukuti mi he kana ni babi mwi konde lyabo ba sumpwa ba apositola ba tota, ni hakuba bulyo kani cimwi. <sup>12</sup> Zi supo ze niti za ba apositola zi ba kuboneka mukati kenu che nkulo inde i zwile, zisupo ni mboniso ni misebezi ikolete. <sup>13</sup> Mi he mubena bule basa sepahali kuhita zonse inkeleke, ni hebile kuti kena ni bali ni muziyo kwenu? mu ni wondele ko uu mulandu? <sup>14</sup> Mubone! ni li tukiseze kwiza kwenu lwa butatu. Kete ni be yo milemeze, ka kuti kani saki cheli chenu. Ni saka inwe. Mukuti ba hwile kete chiba wola ku biikila bazazi. Kono bazazi ba bikile ba hwile. <sup>15</sup> Cha kusanga muni sebeze ni ku belekiswa ba keñisa

cha ihwuhu zenu. heiba ni mi suna ahulu, ime ni sunwe ka buche? <sup>16</sup> Kono sina kamukwi kalile, kahena ni ba milemezi. Kono, mukuti ime ni chilokete mukupanga zintu ahulu, nje me ni ba mi kwati cha kucenga. <sup>17</sup> Kana ni ba mihindili muhato wa kumi lyatilila ka cha bana ba ni ba tumite kwenu? <sup>18</sup> Ni ba susuwezi Tite kuti ayende kwenu, mi niba mutumi ni zumwi mwaakwe. Kana Tite aba mi lyatilili? Kena tuba yendi mwi nzila iswana? Kena tuba yendi mu muhato u swana? <sup>19</sup> Muzeza kuti i nako yonse ii tu bali kulihuna kwenu? Ha busu bwa Ireeza? Tubali kuwamba mwa Keresite zintu zonse za kumi koza. <sup>20</sup> Mi ni tite kuti chi neeza pona chini sa mi wana ka muni lakaleza. Ni tite kuti kete chi muni wana ka kuya ka muni lakaleza. Ni tite kuti pona cikuba ni nkaani, muuna, ku beenga ku kando, bu inuneki, kusooha, bu ikumusi ni kusa lukisa sinte. Ni tite kuti china boola, Ireeza wangu pona choni kokobeza habusu bwenu. <sup>21</sup> Ni tite kuti pona chini chiswa kwi nkulo chabana bangi baba chiti chibi pili ku matangilo, mi nabana basana baba bakili ikwe ni busangu ni intakazo mubabenjili ni ba tenda.

## Inkauhanyo 13

<sup>1</sup> Ulu lwa vutatu ni niza kwenu. “Ku nyaswa konse ku swanela ku tanga cha zi vonekete ka che panki zovele kapa zotatwe.” <sup>2</sup> Chini va wambite kale kwa va na va chiti chivi mi ni ku vonse ha ni ve na uko imwi inako ya vuveli, mi ni iwamba hape: Hete ni nize hape, kete ni ni va siyevulyo. <sup>3</sup> Ni mi wambila izi kakuti mukwete ku lola zivoneka kuti Kirisite njo wamba ku zwilila mwangu. Ka vulite ziho ka chenu. Kusivulyo, iye u kolete mwenu. <sup>4</sup> Mukuti a va vambulwa mu ku vula ziho, kono uhala cha ziho za Ireeza. Mi naswe vulyo tu vulite ziho mwali, kono mutuhale naye cha ziho za Ireeza mukati ketu. <sup>5</sup> Mu li tatuve mu vene mu vone haiva mwina mwi intumelo. Mu li like muvene. Ka mulemuhite kuti Jesu Kirisite wina mwenu? Mwe na, konji haiva kena mu va zumininwa. <sup>6</sup> Mi nina insembo ya kuti ka muwane kuti ka tuzumininwe. <sup>7</sup> Hanu tu lapela kwa Ireeza kuti kanji mutendi nanga bumwi vuvi. Ka ni lapeli kuti tu voneke sina tu va hitilili intiko. Kusivulyo, ni lapela kuti mutende chi shieme, ni ha kuvoneka kuti tu vashali intiko. <sup>8</sup> Mukuti ka tu woli ku panga chimwi chi lwisanisa initi, kono vulyo cha initi. <sup>9</sup> Mukuti tusanga mu kuvula ziho mi inwe mukolete. Naswe tulapela kuti mwi zuzilizwe. <sup>10</sup> Ni ñola izi zintu ni ni sena namwe, nji kuti chinina nanwe kanzi ni mi tendi cha vukali cha ku velekiya vuyendisi bwangu-uvo Simwine bwa va nihi, ili kuti ni mizake ku zwila havusu, mi isiñi ku mi vozekeza hanshi. <sup>11</sup> Cha ma manikizo, vakwetu, musange! Mutende cha ku vusulusa, mu su suwezwe, muzumi nzane ha mwina, muhale mwi inkozo. Mi Ireeza we lato ni inkozo ka ve nanwe. <sup>12</sup> Muli lumelise mukati kenu cha kuli chunchuna ku jolola. <sup>13</sup> Vonse va zumine va mi lumelisa. <sup>14</sup> Mi musa va Simwine Jesu Kirisite, ilato lya Ireeza, ni kuli kopanya kwa Luhuhu Lujolola zive nanwe mu vonse.

## Agalatiya

<sup>1</sup> Paulo, Otumiwa- osati otumiwa kucoka ku banthu kapena kutumiwa na umunthu, koma mwa Yesu Kristu na Mulungu Atate, emusha kwa akufwa- <sup>2</sup> na anekwasu onse ali naneo, kuma chalichi yamu Agalatiya: <sup>3</sup> Cisomo kwa mweo na mtendele kufuma kwa Mulungu Atate na Ambuye Yesu Kristu, <sup>4</sup> ezipeleka mumalo mwamacimo yasu kuti atiombole kumukhalidwe uipa wa mtundu uno, mwacifunilo ca Mulungu Atate, <sup>5</sup> kwa yeve ulemelelo osasila. Amen. <sup>6</sup> Nine odabwa kuti muwelela mwamusanga kucoka kwa ekuitanani mwa cisomo ca Kristu. Nine odabwa kuti mwayamba kukonkha ciphunziso ciyakine, <sup>7</sup> osati kuti pali ciphunziso ciyakine, koma pali madoda yaikine oleta musokonezo kwa mweo ndipo ofuna kusintha uthenga wabwino wa Kristu. <sup>8</sup> Koma olokuti seo kapena mungelo ocokela kululu awele kuzolalikila uthenga osiyana nawetelalikila seo kwa mweo, lekani atembeleleke. <sup>9</sup> mwetelabilila poyamba, nalomba pano nulabila soti, “ngati muyakine olalikila uthenga osiyana na wemwelandila, lekani atembeleleke”. <sup>10</sup> niliyekuti lomba nufuna mbali ya banthu kapena ya Mulungu? Nufuna kukondwelesha banthu? Ngati nikali kufuna kukondwelesha banthu ndiye kuti ninelini kapolo wa Kristu. <sup>11</sup> Cifukwa nufuna muzibe, anekwasu, kuti uthenga wenelabila niwa munthu lini. <sup>12</sup> Niliye ulandile kucokela ku munthu aliyense, niliye phunzisiwe na munthu. Koma, cenze mwacivubuluso ca Yesu Kristu paneo. <sup>13</sup> Mwecimvwa za moyo wangu wakale mwaciyuda, mwenenzo mangila chalichi ya Mulungu kupyola muyeso ndipo nenzofuna kuti niononge. <sup>14</sup> Neluta pasogolo muciyuda kuposa wonse benze nthanga yangu, kucokela ku mtundu wangu. Ndiye cidwi cenenze naco pa mwambo wa makolo bangu. <sup>15</sup> Koma Mulungu, ndiye enipatula kucokela mu mala mwamama, ndiye eniita mwa cisomo cake, <sup>16</sup> cemuwamijya kuvumbulushya mwana wake mwaneo, kuti nikalalikile za yeve pa amitundu, niliye fufuze mwamusanga mwathupi na ngazi. <sup>17</sup> Niliye lute ku Yerusalemu kwabala enkhala atumwi neo nikaliye. Mumalo mwake, neluta ku Arabiya nowelela soti ku Damasiko. <sup>18</sup> Pepepita zaka zitatu neluta ku Yerusalemu kuti nimuzibe Kefas ndipo nenkhala naye masiku fiftini. <sup>19</sup> Koma niliye onane na otumiwa aliyense koma Jemusi, mukwao wa Ambuye. <sup>20</sup> Pa vanakulembelani, nikusimikijyilani pamenso pa Mulungu kuti nunamalini. <sup>21</sup> Ndipo neluta ku mizinda ya Asiliya na Silisiya. <sup>22</sup> Nenze nikaliye zibika pa meso kuma chalichi yaku Yudeya ali mwa Yesu. <sup>23</sup> Bengokumvwa vukambika, “Lidoda lenzo manga seo lomba yayamba kulalikila mbili yacikhulupililo cenzo funa kuononga poyamba”. <sup>24</sup> Belemekeza Mulungu kamba ka neo.

## Agalatiya mutu 2

<sup>1</sup> Pepepita zaka fotini neluta soti ku Yerusalemu na Banaba, netola Tito noluta naye. <sup>2</sup> Neluta kamba ka civumbuluso nakuleta kwabeve ulaliki unulalika pakati pa amitundu. Nenzo kamba mwakabisila kwabala benzo oneka olemekeza, kuti nionesheshe kuti nuutuka

lini lubilo lwatyala. <sup>3</sup> Koma ngakhale Tito, enze naneo ndipo enze Mugiliki, aliye kangamijyiwa kucita mudulidwe. <sup>4</sup> Madoda yaboza mwacisinsi bewela kuzoona mtendele utilinao mwa Kristu Yesu. Benzo laka laka kuti tinkhale akapolo, <sup>5</sup> koma tiliyegonjele kwabeve olo pakanthawi katontho, kuti coonadi ca uthenga cikhaliile mwa mweo. <sup>6</sup> Koma ao benze oneka ngati olemekezeka (mulimonse mwebenzelili aliye kanthu kwa neo, cifukwa Mulungu aliye sankho)- ao, binikuti, enzeolemekezeka aliye onjezele kanthu kwa neo. <sup>7</sup> Mosiyana, beona kuti nepasiwa udindo kulalikila uthenga kwaopanda mudulidwe, monga Petulo epasiwa udindo olalikila uthenga kwa amudulidwe. <sup>8</sup> Pakuti Mulungu, esebenza mwa Petulo potumikila kwa ao oduliwa, soti asebenza mwa neo kwa amitundu. <sup>9</sup> Pamene Jemusi, Kefasi, na Yohane, enze na mbili ngati sandamila, pebezindikila cisomo cenze pa neo etilola <sup>11</sup> Lyahanu linu Kefasi henza kwa Antioke, Chi ni mu kanina havusu bwe mpaata ya kwe kakuti ava foseze. <sup>12</sup> Chetanzi vamwi vakwame ni va seni ku sika kwa Jakovo, Kefasi avali kulya ni va Machava. Kono cwale ava vakwame ha va keza, cha zimana mi ni kuva vutavuleni ni va Machava. Cha vali ku tite ava vakwame va vali kusaka mupato. <sup>13</sup> Mane ni vungi bya Majuda ni va kopana ne Kefasi mu kulinyemona. Ikalavo ivaali kuti nanga Barabasi chava yembulwilwe ku linuneka kwaavo. <sup>14</sup> Kono hani vona kuti ka ve chilile vusakusima bye linzwi, ni na waamba ne Kefasi ha vusu byaavo voonse, “Haiva mu Vajuda mi ni mu hala che ikute lya vantu va Lichava vulyo kwaanda a ikute lya Vajuda, mu woola ku hambiliza vule va Lichava kuhala ili Vajuda? <sup>15</sup> Iswe tu maJuda cha ku pepya mi yisini “ve Lichava va tenda ziivi” <sup>16</sup> mwi zive kuti ka kwina na ngati wu mwina yeta njolozwe cha musevezi wa mulawo. Ni hakuvavulyo, va njolozwa che tumelo ya Jesu Kereste. Tu vakezi che tumelo kwa Jesu Kereste cwale kuti tu njolozwe che tumelo kwa Kereste mi yi sinyi cha musevezi wa mulawo kakwina nyama ye te ni njolozwe. <sup>17</sup> Kono heva, ni tusaka Reeza kuti atu njolozwe ka Kereste, tu liwane na swe tu veene kuti tu va yenzalivi, kana Kereste u swanela ku va mutanga we chiivi? Sanzi ku ve vulyo! <sup>18</sup> Heva ni zaaka isempo yangu cha kuya cha mulawo, Isempe ichini va sinyi kaale, ni livonahaza kuti ni mucholi wa mulawo. <sup>19</sup> Ku zwila ku mulawo ni va fwi ku mulawo, ili kuti ni haale che Ireeza. <sup>20</sup> Ni va konkotelwa vulyo ni Kereste. Kayisili me ni haala kono Kereste njo haala kwangu. Vuhalo vuni haala linu mwi nyama ni vuhala che tumelo ya Mwana Reeza, Uzo ya va ni suni ni kuliha yiye mwine kwangu. <sup>21</sup> Ke se ni manise chisemo che Reeza, chokuti heva va lukite vavali kuhala mulawo, linu Kereste ni ku sena za va fwili.

### **Ikauhanyo 3**

<sup>1</sup> Zihole za Magalata! Menso aani mavilala avamileteli inkonzi? Kana kuti Jesu Krisite ava swaniswe na hanzikwitwe habusu bwa menso enu? Kutu kanzi mukuteki initi? <sup>2</sup> Nisa kulituta izi kwenu. Chumuva amuhela luhuhu lujola cha musebezi wamulao kapa chakuzumina chimubazuwi? <sup>3</sup> Muzihole ahulu? Muvatangi mu luhuhu feela ni kumana hanu mwi nyama? <sup>4</sup> Kana muvavi ni nzivo ingi isena chimwi-Heba cheniti ni kusena? <sup>5</sup> Lunu iye yomiha luhuhu ni ku panga imakazo zikolete mukati kanu uzipanga cha mulao kapa cha kuzuwa che tumelo? <sup>6</sup> Abrahama “A vazumine kwa Ireeza ma

a vazumininwa cha kuluka kwakwe.”<sup>7</sup> Mwinzila iswana, kuzuwisana, linu, kuti avo va zumina vaana va Abrahamama.<sup>8</sup> Mi iñolo chakuvona kuti Ireeza kachenise valichava che intumelo. Inzwii nilya wambailwa che ntanzi kwa Abrahamama: “Mwaako mishovao yonse ye nkanda kayi itonolofazwe.”<sup>9</sup> Kuti linu, avo veena itumelo va tonolofezwe ni Abrahamama, yavena intumelo.<sup>10</sup> Avo vahalila ha musebezi wa mulao vena mwikonde lya chikuto. Kakuli ku ñoletwe, va kutitwe vantu vonse vasechilili zintu ziñoletwe mwi mbuka yamulao, kuzipanga zonse.”<sup>11</sup> Hanu kuvoneka cwale kuti Ireeza kachenisi muntu cha mulao, kakuti “Valukite muvahale che intumelo.”<sup>12</sup> Mulao kawuzwi kwintumelo, kono nihakuva vulyo, “Iye yo panga izi zintu chamulao mwahale cho milao.”<sup>13</sup> Kresite ava tuhazi kuchikuto cha mulao heza kuba chikuto chetu. Kakuti kuñoletwe, “Yo kutitwe muntu yense yo dengelela kwi samu.”<sup>14</sup> Vutokwa ivali kuti imboyoti ivena kwa Abrahamama pona chikeza ku chicaba chaa Jesu Keresite. Ili kuti chitutambula insepiso yaluhuho che intumelo.<sup>15</sup> Vaakwaangu, niwamba cha mukwa wa muntu. Nihaike chilikani cha bantu chicha kolela, ka kwina yowola kuchikani kapa kuchi ekeza.<sup>16</sup> Hanu insepiso ziva zivawamba kwa Abrahamama ni lusika lwakwe. Kakuwambi kuti, “kulusika lwakwe,” kuvoza kuvaangi, kono nihakuba bulyo kumuntu yenke, “nikulusika lwenu,” yeli nji Keresite.<sup>17</sup> Hanu ni wamba izi. Mulao, uvekezi mwaaka yina miyanda yone ne makumi otatwe ku masule aho, kaikanisi chilikani chibapangwa kuma masule ni Ireeza.<sup>18</sup> Kakuti chifumu chibakezi cho mulao, ni chisena chibakezi che nzila ye sepiso. Kono Ireeza chakulukuluha ava chihi Abrahamama che isepiso.<sup>19</sup> Chinzi linu mulao ha u vahewa? Uva ekezwa che baka lya mafosisa, mbwita valusika lwa Abrahamama lu vakwiza kwavo vavasepiswe. Mulao uva vikwa cha mañiloi che yanza lya muzimanini.<sup>20</sup> Linu muzimanini uzimanina bantu bahitilila muntu yenke, kono Ireeza yenke bulyo.<sup>21</sup> Kana mulao ulwisanisa insepo ya Ireeza? Sanzi kuwamba vulyo! Cwale mulao heva u bahewa u va kuwola kuha buhalo, valukite vava kuswanela cheniti kwiza cha mulao.<sup>22</sup> Kono nihakuba bulyo, iñolo lisuminine zintu zonse mwikonde lya chivi. Ireeza ava tendi izi kuti insepiso yakwe itutuse che ntumelo mi Jesu Kresite pona cho hewa kwa vo vazumina.<sup>23</sup> Kono intumelo ni seni kusika cha Keresite, tuva suminwe ni ku lyatililwa cha mulao kusikila hakuvezili insinulo ya ntumelo.<sup>24</sup> Cwale linu mulao chi wa keza kuba Muvavaleli wetu kusikila Jesu hasika, ili kuti tu tucheniswe che ntumelo.<sup>25</sup> Hanu intumelo hachiya keza, katusina mwi konde lya muvavaleli.<sup>26</sup> Kakuti muvonse muvana ve Ireeza mwi intumelo cha Jesu Keresite.<sup>27</sup> Muvonse mu kolovezwa cha Kresite muvalizwatiki Kresite muvene.<sup>28</sup> Kakusina kuti uzu mu Juda kapa Mu Gerike, muhikana kapa mulukuluhi, mukwame kapa mwanakazi, kakuti muvonse muchintu chonke kwa Jesu Keresite.<sup>29</sup> Haiva muva Kresite, Linu muva lusika lwa Abrahamama, mikamuyole kakuya che nsepiso.

## Ikauhanyo 4

<sup>1</sup> Ni wamba kuti ya te na yole chanda nji muhwile, iye kakwina ha chinchanela ni muhikana, ni hakuva kuti nji mwine wa chivaka chonse. <sup>2</sup> Ni hakuvavulyo, u siina mwikonde lya muvavaleli ni

kusepwa kusikila inako i vatomwa kwe vesi. <sup>3</sup> Cwale ni iswe vulyo, ne tusili tuvahwile, tuvakwina movuhikana bwe intuto zamulao we fasi. <sup>4</sup> Kono inako yina hande haisika, Ireeza ni chatuma Mwanakwe, ya va pepwa kumwanakazi, ya vapepelwa mwikonde lya Mulao. <sup>5</sup> A vatendi vuti chamulao kulukulula a vo va vena muikonde lya mulao, kuti tuamuhele kuañulwa sina tuvana. <sup>6</sup> Kakuti mvana, Ireeza a vatumini Luhuhu lwamwanakwe mwinkulo zetu, Luhuhu lusumpa, “Abba, Ndanda!” <sup>7</sup> Cheli ivaka kosili umuhikana kono u mwana. Haiva u mwana, linu nawe koyole cha Ireeza. <sup>8</sup> Mwisule, ne museni kwiziva Ireeza mu vali mu vahikana kwavo vasali vavali va milimu <sup>9</sup> Kono hanu ha chimwizi Ireeza, kapa, hanu ha chimwizivitwe kwa Ireeza, chinzi ha chimvolela hape nkwinduto za matangilo, zi fokola, zi satusi chimwi? Muchisaka ku va vehikana konse hape. <sup>10</sup> Inwe chakutokomela mulolelo mazuva a vutokwa, kutasa kwa myezi, inako, ni zilimo. <sup>11</sup> Ni tiya chako. Ni tiya kuti hamwi ni va misevelezi ne kusena intuso. <sup>12</sup> Ni mikumbila, vaakwaangu, mube mo niikalile, name ni ve mo mu mwikalile. Kana mu va ni fosekezi. <sup>13</sup> Kono mwizi kuti ivali ivaka lya kulwala mumuvili chingi ni va wambi inzwi kwenu che tanzi. <sup>14</sup> Nihaike mayemo amuvili wangu a va miviki he ntatubo, kana mu vanihindiki kapa ku ni kaana. Kono muvaniamuheli sina ingeloi lye Ireeza, i mi ivali njime Jesu Kelesite i ye mwiine. <sup>15</sup> Kuhi, chiingi, hanu cheli intavo yenu? Chingi ni paka kwenu kuti, kambe kuwoleka, ne chi muvatuloli menso enu ni kuanaha. <sup>16</sup> Ili kuti, chi ni vavi ni chila chenu kakuli ni miwambila vuniti? <sup>17</sup> Va tukufalelwe kumigana, kono ne kusena zilotu. Vasaka kumizwisa kwangu kuti muvecililie. <sup>18</sup> Inako yonse kushiyeme ku va ni ilato cha mavaka ena siinte, isinyi feela heva nina nenwe. <sup>19</sup> Vana vangu vanini, ni nyandiswa kucisa kwakupepa kwenu hape kutwala Kelesite cha vumbwa kwenu. <sup>20</sup> Ni tabela kukava ko nanwe haho ni kukachincha muwambilo wangu, kokuti ni zizelehethe kwamana nanwe. <sup>21</sup> Mu ni wambile, inwe mulakaza ku ba mwikonde lya mulao, Kamuzuwi mulao zo wamba? <sup>22</sup> Kuñoletwe kuti Abrahamama a vena vana vovele, zumwi i vali wa mwanakazi wa muhikana mi zumwi wa mwanakazi yo lukuluhite. <sup>23</sup> Kokuti, u zu wa muhikana a va pepwa feela chenyama, kono u zu wa mwanakazi yo lukuluhite a va pepwa che sepiso. <sup>24</sup> Izi zintu ziwoleka kutolokwa cha kusevelisa inguli, Cwale a vo vanakazi vaswana sina intumelelano zo vele. Yimwi yazo i zwa he Lundu la Sinai. U pepa vaana va va hikana. U zo nji Hagare. <sup>25</sup> Hanu Hagare nji Ilundu la Sinai, mwa Arabia. Chisupo chi zimanina Jerusalema wa suunu, i ye nji movuhikana ni vaana vakwe. <sup>26</sup> Kono Jerusalema ina mwiulu i lukuluhite, uzo nji, nyinetu. <sup>27</sup> Kakuti kuñoletwe, “Tave, i we mwanakazi wa muumba, iwe yo sa pepi. Luluweze mi uhuwe nce tabo, iwe yo sezi kupepwa kwa mwana. Vungi bwa vahwile vaana va muumba, kuhita vakwe uzo wina mukwame.” <sup>28</sup> Hanu inwe, vaakwaangu, kuswana ni Isaaka, nji vahwile ve sepiso. <sup>29</sup> Cheina inako zuna ya vapepwa chakuya kenyama a va nyandisi ya vapepwa cha Luhuhu. Kuswana bulyo nahanu. <sup>30</sup> Chinzi chiwambwa mwiñolo? “Mutwale kule muhikana wa mwanakazi ni mwaanakwe. chokuti mwaana wamwanakazi wamuhikana kete nayole chaanda hamwina ni mwaana wa mwanakazi yo lukuluhite.” <sup>31</sup> Chovulyo, vaakwaangu, ka tuvana va mwanakazi wa muhikana, kono wa mwanakazi yo

lukuluhite.

## Ikauhanyo 5

<sup>1</sup> Tuba wani intukuluho ku zwililila kwa Jesu kreste ya va tulukululi. Linu muve vakolete mi sanzi mu wondwa hape kwi joko lya vuvi. <sup>2</sup> Muvone, Ime, Paulusi niti kwenu haiva ni muya ku mupato, Kreste kese na mihe mupuzo munzila i mwi ne imwi. <sup>3</sup> Hape ni paka mukwame zumwi ni zumwi mukwame ya va yendi ku mupato linu uswanela kukuteka ni kwi chilila mulao wonse. <sup>4</sup> Inwe mukauhenye ku “zwililila” kwa krest. muvonse mu va wani ku shemuviwa cha mulao. Muva wilile kule ni chisemo. <sup>5</sup> Kuzwililila ku Luhuhu, che ntumelo, linu tulivelele che nsembo ni ku shiyama. <sup>6</sup> Cha Jesu Kereste nanga cha mupato kapa cha kusaya ku mupato kutolokwa chintu chimwina. Kwande ntumelo iseveza che lato nji yiine tuso. <sup>7</sup> Zile mutiya hande. Njeni ya va mizimiki ku kuteka buniti? <sup>8</sup> Ku susuwezwa ku tenda vulyo, ka ku zwili kwali uzo ya va misumpi. <sup>9</sup> Chi vilisa chi nini chi tende muñende kufunduluka. <sup>10</sup> Ni na nsepo kwenu che Reeza kuti ke se muhupule kusanduka munzila imwi ne imwi. Uzo yo milyanganise u swanela inkatulo ya kwe, iye mwine. <sup>11</sup> Va kwangu, heva ni ni si kutaza za mupato, chi nzi hani sinyandiswa? Che yo nzila chi sitataliso cha chifano ka chi shinyiwe. <sup>12</sup> Ni lakaleza avo va mi lyanganisa ka vali kawule avo vene. <sup>13</sup> Chokuti Ireeza ava misumpi, vakwangu, kwi ntukuluhu. Sanzi mu sevelisi intukuluhu yenu sina ha mu wanina ze nyama. Ni hakuvavulyo che lato mutusana ha mwina. <sup>14</sup> Chokuti mulawo wonse wi zuzilikizwe cha mulawo wumwina, “Mu swanela kusaka va mu vambene navo sina mu mu lisakila inwe mu vene.” <sup>15</sup> Kono heva ni musumana ni kulisana ha mwina, mutokomele kuti ka mu liholofazi ha mwina. <sup>16</sup> Niti, muyende cha Luhuhu, mi ke se mwi zuzilikize intakazo ze nyama. <sup>17</sup> Chokuti inyama ine ntakazo nkando yi lwisa Luhuhu, mi Luhuhu lwine ntakazo nkando kuhite nyama. Chokuti inzi zi lwisanisa izo ziine. Inkalabo yi chokuti ka muwoli kutenda chintu chi mulakaza kutenda. <sup>18</sup> Kono heva Luhuhu lu miyendisa, ka musina mwi konde lya mulawo. <sup>19</sup> Linu misevezi ye nyama i bwenekete. Vena vuvuki, vahule, vasa njolwele, ve takazo zihitilize, <sup>20</sup> ni kulapela vazimu, ni vulozi, ni kuli toya, ni kuli fwila muna, ni kuwamba cha kukalimela, <sup>21</sup> ne fufa, ni muna ni vundakwa, ni vulyavi, ni zimwi zi fosahela. Ni mi kalimela, sina muni va mi kalimeleli ku tanzi, kuti avo va tundamena izo zintu ke se ni va yole muvuso we Reeza. <sup>22</sup> Linu zichelantu za Luhuhu i laato, yi ntavo, inkonzo, inkulo inde, chisemo, vulotu, ni tumelo, <sup>23</sup> ni kulishuwa ni kuliyeleza. Linu kakwina mulawo ulwisa nisana nezo zintu. <sup>24</sup> Kwavo vena kwa Jesu Kereste vava kokotelwa ni takanzo ze nyama ni hamwina ni ntakazo zi fosahela. <sup>25</sup> Heva tu hala cha Luhuhu, tu swanela lyaho ku yenda cha Luhuhu. <sup>26</sup> Sanzi tu saki ku vuvekwa ku sene ntuso, kuli shemayeta kapa kuli fwila muna.

## Ikauhanyo 6

<sup>1</sup> Vaakwangu, heva muntu na kwateka mu mafosisa, yinwe mwina luhuhu mu swanela kuvooza zuna muntu mwi nzila yi shiyeme. Mu litokomele inwe muvene, ili kuti sanzi mulikiwa. <sup>2</sup> Mu hindisane miziyo, mi cwale ka mwi zuzilize mulawo wa Kereste. <sup>3</sup> Chokuti heva



zumwi na zeza kuti nji chimwi kono ni ku sena, u li chenga yiye mwine. <sup>4</sup> Zumwi ni zumwi ali tatuve musevezi wa kwe. Linu mwa ve chimwi yiye mwine cheta likumuse kaacho, na sa livaambanyi ku vamwi. <sup>5</sup> Chokuti zumwi ni zumwi ka kulike chiputu cha kwe. <sup>6</sup> U zo ya va lutwa linzwa u swanela kuli yavela zintu zi lootu ni va muluti. <sup>7</sup> Sanzi mu chengelelwa. Ireeza ka shewununwa. Chonse vulyo cha byeala muntu, chete na kutule. <sup>8</sup> Chokuti yiye yo byela lutanga mu vuhalo bya kwe bya chivi mwa ikutule yakwe mwilyangane, kono yiye yo byela lutanga ku Luhuhu, ka kutule vuhalo vu sa maani vuzwa ku Luhuhu. <sup>9</sup> Sanzi tusiyi kupanga ku tende vulotu. chokuti che nako yi shiyeme ka tukutule ikutulo heva ni tu sa voleli mwisule. <sup>10</sup> Cwale linu, chi twina chivaka, tu pange vulotu ku zumwi ni zumwi. Tutende bulotu sihulu kwavo ve nzubo ye intumelo. <sup>11</sup> Mu vone tanku zi kando zi ni ñoleli kwenu cha muñolo wangu. <sup>12</sup> Vavo va sanku ku livonisa vulotu mwi nyama va mi hambiliza kwi njila mu mupato. Va tenda vulyo kuti sanzi va nyandiswa che vaka lya chifapano cha Kereste. <sup>13</sup> Nanga vavo vasa pangitwe mupato ka va kuteki mulawo. Ni hakuvavulyo, va saka inwe ku va mu mupato ku tendela kuti va ve ni kulitemba hewulu lye inyama. <sup>14</sup> Mane sanzi kwi vulyo kuti nili kumusa konji che chifapano cha fumwentu Jesu Kereste. Ku zwila kwali kuti i faasi li va konkotelwa kwangu nime kwi faasi. <sup>15</sup> Kamba kwina mupato kapa kakwina mupato konse. Ni hakuvavulyo, kuvumbwa kuhya kwa vutokwa. <sup>16</sup> Kwavo vonse ve te va haale cheyi mpunso, inkoozo ni chisemo chi ve kuvali, ni ha Isilaele ye Ireeza. <sup>17</sup> Kuzwahanu sanzi ku waniki yo ni kataza, kakuti ni kulikite imaaka ya Kereste ha muvili wangu. <sup>18</sup> Mi chisemo cha Simwine Jesu Kereste chive mu luhuhu lwenu, vaakwangu. Amen.

## Maefese

<sup>1</sup> Paulusi, mu apostola wa Kresite Jesu che ntato ya Ireza, ku vantu ve Ireza va jolola mwa Efesiyasi mi basepahala mwa Kreste Jesu. <sup>2</sup> Chishemo kwenu ni nkozo kuzwa kwa Ireza ishetu ni Simwine Kreste Jesu. <sup>3</sup> Ireza nisi wa Simwine Jesu Kreste wetu a lumbekwe, ava tufuyoli ni mbuyoti zonse zo luhuho muzivaka ze wilu mwa kreste. <sup>4</sup> Ireza ava tuketi kuzwa ku matangilo e fasi, kuti tuve va jolola nikusava ni mulandu mu menso akwe. <sup>5</sup> Ireza avatulukisezi kale ku añulwa uvu vana chakuya ka Jesu Kreste, chokusaka kwe ntato yakwe. <sup>6</sup> Kuañulwa kwetu kuzwilira kukulumbwa kwe nkanya ye chishemo chakwe chatuha kokuva avo vasaka. <sup>7</sup> Mwa Jesu Kreste twina intukuluho cha malaha akwe ni nswalelo ye zivi, cho kuya ko bukando bwe chishemo chakwe. <sup>8</sup> Ava tuhi chishemo chikando ni vutali ni nkutwisiso. <sup>9</sup> Ireeza ava tondezi kwetu mulero wa vali ku patite che ntato yakwe, chokuya kecho chi mutavisa, mi chava vonahazi mwa kreste <sup>10</sup> Musevezi wa kreste ivali mulelo wo kwizula we nako, kuleta zintu zonse hamwina, zintu zonse mwi wulu ni hansi, hansi wo mutwi wonke, nanga Kreste. <sup>11</sup> Mwa Kreste tuva ketiwa kuva va jovoli. Tuva ketwa kwi ntazi muhupulo wakwe yo seveza zintu zonse cho kuya ko mulero wakwe. <sup>12</sup> Ireza wa tu keta kuva va jovoli njokuti tuve va matangilo kuva ni nsepo mwa Kreste, mi tuve va lumba mwi nkanya yakwe. <sup>13</sup> Mwa Kreste, inwe nanwe, hanu va zuwi lizwi lye nit, ivangeri ye mpuluso, mi muva zumini mwali mi muva vikwa chisupo chiva sepiswe cho Luho lu Jolola. <sup>14</sup> Luho lu Jolola chintu chi tometwe ko ku jovola haisi hatutwa ziwana zonse, ke ntumbo ye nkanya yakwe. <sup>15</sup> Kelyi vaka, kuzwa hani va zuwili ze ntumelo yenu mwa Simwine Jesu ne rato lyenu ku ve Reeza va chena, <sup>16</sup> Kena niva siyi kuli tumela kwe Ireza kwenu ni mi wamba mwi ntapelo zangu. <sup>17</sup> Nilapela kuti Ireza wa Simwine wetu Jesu Kreste, Isi we nkanya, kamihe luhuho lwa maano ni kunutu mwi nzivo yakwe. <sup>18</sup> Nilapela kuti menso ye nkulo yenu awole kuvona, kuti mwi zive vundume bwe nsepo kwa misumpila ni chifumu che nkanya yo ku jovola kwavo vantu va jovola va Ireza. <sup>19</sup> Mi mwintapelo zangu ni kumbila kuti mwi zive vukando bwe ziho mwetu va zumina, cho kuya ko kuseveza kwizi makando. <sup>20</sup> Aya nji mazi aswana awo Ireza ava sevezi mwa kreste hava muvusi kuva fwile niku mwi kazika kwi yanza lye chilyo lya mavaka e wilu. <sup>21</sup> Ava mwikaziki kule kuhita kuvusa konse ni vavusi ni nzivo ni kuyendisa, mi ni mazina ava kuvikitwe. Kreste keta yendise fela mweyi nako, kono ni mwi nako zi keza. <sup>22</sup> Ireza ava viki zintu zonse kungsi ya matende a Kreste ni kumuha inchechi kuvusa he wulu ye zintu zonse. <sup>23</sup> Ichechi muvili wakwe, vungi bwakwe yo wizula ni kuizula monse.

## Inkauhanyo 2

<sup>1</sup> Sina kwenu, muba fwire kumilandu yenu ni muzivi. <sup>2</sup> Ibali mwezi zintu kuti mani mubayendi chazo lwazintu zenkanda. Muba kuyenda keswanelo kuya cha Mubusi wepuso ye mbyumbiyulu. Ulu njilu huhu lwa muntu yo sebeza mubana basena ikute. <sup>3</sup> Naswe bulyo imwi

inako tuba kwina kuvali avo basa zumini. Tuba kusebeza kuya che ntakazo imbi yo mubiri yetu. Tuba kupanga misebezi ye nyama ni mihupulo. Chakuya chensimuuloho tubali tubana ba bengerwe sina bamwi. <sup>4</sup> Kono Ireza muhumi kuchisemo chebaka lyakwe lyelato lya tusaka. <sup>5</sup> Haho tuba kufwire mumilandu, Aba tuleti tubonse mubu halo bunhya mwa Christ. Linu kechi semo chakwe tuba hazwa. <sup>6</sup> Ireza aba tunyemuni tubose ni kutupanga kwi kala tuvose muzibaka zokwiulu mwa Jesu Christ. <sup>7</sup> Aba pangi inzi kuti mwinako inkeza atutondeze bungu bwe chisemo cha kwe. Uzi tutondeza izi ka kuya kachi semo mwa Christ Jesu. <sup>8</sup> Kuya ke chisemo muba hazwa che ntumelo, Linu inzi kena zibazwe kwako, impo ye Ireza. <sup>9</sup> Kaizwe kumisebezi kuti zumwi ali tundumune. <sup>10</sup> Mi tuba beleki be Ireza, kubumbwa mwa Christ Jesu kupanga misebezi milotu iyo Ireza yabazezi kale kale uko kwetu, iri kuti tuyende mwa teni. <sup>11</sup> Nihakubabulyo muhupule kuti inako imwe mubali volusika mwi nyama. Linu munsumpiwa”vasena baba yendi kumupato” kakuya icho chinsumpiwa mupato mwi nyama chi pangiwa mayanza umuntu. <sup>12</sup> Mwe ina inako muba kukauhenwe kwa Christ. Mubali bazwa kule ku chisi cha Isilaele. Inwe mubali muba yenzi ku chilikani che nsempiso. Kena mubena i ntukelo ya kubusu. Kena mubena Ireza mwinkanda. <sup>13</sup> Linu mwa Christ Jesu inwe imwe inako muba kwina kule ni Ireza mubaletwa hafuhi ni Ireza ni malaha a Christ. <sup>14</sup> Kakuli njiyena inkozo yetu. Aba kopanyi bobere hamwina. chamubili wakwe aba shiinyi ma mota aba kutukauhanya ni kutu suminina. <sup>15</sup> Linu, aba manisi mulao we ntaelo ni milao kuti a wole kbumba muntu munhya mwali. Aba pangi inkozo. <sup>16</sup> Aba pangi inzi kuvoza hamwina bantu vonse mumubili onke kwa Ireza kuya ke chifapano. Ke chifapano abe hayi kusuminina. <sup>17</sup> Jesu aba kezi nikwiza kuwamba inkozo kwenu mubakena kule, hape inkozo kwenu mubena hafuhi. <sup>18</sup> Kuya ka Jesu tubonse tuzumininwa mu luhuho lonke kwe Isetu. <sup>19</sup> Nihakubabulya, hanu inwe chisi chamasi angi kamusili muba enzi nibazwa kule. Kono inwe mubazaki nabo babikilwe kwi mbali kwe Ireza ni mamembala be nzobo ye Ireza. <sup>20</sup> Linu muba zakwa ha mutomo wa baapositola ni bapolofita. Christ Jesu iye mwine avali musumo. <sup>21</sup> Mwali muyaho onse ukopanyiwa ni kukula ubu inkeleke mwa Simwine. <sup>22</sup> Nji mwali muzakiwa hamwina ubu chibaka chokuhala kwa Ireza mu Luhuho.

### Inkauhanyo 3

<sup>1</sup> Cheli vaka, Ime, Paulusi, ni musuminwa wa Keriste Jesu we nu bachisi cha masi angi. <sup>2</sup> Ni akaleza kuti mubazuwi za mitendo ya chisemo che Ereeza che ni bahewa chenu. <sup>3</sup> Ni ñola chakuya chempono i bezibahazwa kwangu. I cho nji buniti buungwilwe bu ni bañoli chavo chavufuhi mulimwi iñolo. <sup>4</sup> Ha chi mwabala izi, kamuole kuzuwisisa impono yangu mwabo buniti buungwile kuamana Keriste. <sup>5</sup> Mumirahi imwi buniti bo kana bube zibahazwa kubana babantu. Kono hanu chi bu baziba hazwa cha Luhuho kwabaapositola bakwe bajolola ni bapolofita. <sup>6</sup> Uvu vuniti bupatitwe nji kuti Vachisi cha masiangi nabo nji bayola hamwina ni imembala zamubili. Ba va abelwa vonse kwisepiso ya Keriste Jesu che evengeli. <sup>7</sup> Chobulyo nivavi ni muhikana we vangeli chempo ya chisemo che Ireza chi ni bahewa chakuya cha misebezi ye ziho zakwe. <sup>8</sup> Ireza a vahi impo

yi kwangu, nihakuti nji ni munini ka kumaniniza kuvena ikalulo ya chiyembe che Ereeza, impo iyo njiyakuti ni wambe ku va chisi cha masiangi i evangeli ya chifumu cha Keresite. <sup>9</sup> Ni swanela kuwambila vantu vonse kuamana cha mulelo we kunutu ye Ireza. U wo nji mulelo u va humbitwe cha zilimo limo zivamani nji Ireeza, ya va vumbi zintu zonse. <sup>10</sup> Izo zivakwina bulyo linu hanu, cha kuya che keleke, babusi ni mpuso muchibaka chakwiulu moveze vezibe imbali - zingi zi babumbwa cha butali bwe Ireeza. <sup>11</sup> Izi mu zichitahale chakuya chamulelo wakaya - kuire wa vezuzilizi cha Kirisite Jesu Nfumwetu. <sup>12</sup> Mukuti mwa Keresite twina bundume ni kuzumininwa cha isepo ka kuya chetumelo yetu mwali. <sup>13</sup> Linu nihakwinabulyo ni mikumbila kusa zwafa chevaka lyamasukuluko angu chenu. Izo nji kanya yenu. <sup>14</sup> Mokuti chebaka ili ni choola mazwi angu kwa Tayo, <sup>15</sup> uzo kwali masika wonse a kwiulu ni hansi ava sumpwa chakwe. <sup>16</sup> Ni lapela kuti aku zuminense kukuha, chakuya cha chifumu chekanya yakwe, ka kukozwa chenguzu za Luhuhu lwake, lwina kwako. <sup>17</sup> Ni lapela kuti Keresite ahale mwinkulo zenu che ntumelo. Ni lapela kuti ne muzikame mi mukolele mukusakiwa kwali. <sup>18</sup> Mu be mukusunwa kwakwe kokuti muole ku ba ni kutwisiso, hamwina ni bazumine bamwi, njovuhi vule bwa bukando, vule bwa kuya muluhati, vule bwa kuya mwiulu, vule bwa kuya hetako chakusuna kwa lato lya Keresite, lihitalila inzuvo. <sup>19</sup> Ni lapela kuti mwizive bukando bwa kusunwa kwe lato lya Keresite, li hitilila inzibo. Muchite bulyo kokuti mwizuzwe che kwizula kwe Ereeza. <sup>20</sup> Linu kwali yowola kuchita zintu zonse hande, kule heulu ya zintu ze tukumbila kapa kuhupula, chakuya cha maata akwe aseveza mwetu, <sup>21</sup> kwali kube ni kanya munkeleke ni kwa Kelesite Jesu ku masika ya kuyakwile. Amen.

## Inkauhanyo 4

<sup>1</sup> Nihakuvavulyo, sina musuminwa wa Simwine, Nimi susuweza kuyenda kaku shiyama kuamana ninsuupo imu vasupwa. <sup>2</sup> Muhale muvukando vwakulishuwa nichisemo ni nkulonde. Mutambulane muku sakana. <sup>3</sup> Mupange mumuwolela kuvila hamwina muluhuhu niku suminwa chenkozyo. <sup>4</sup> Kwina muvili umwina ni luhuhu lumwina, Sina hamvasupwa che sempo imwina mukusupwa kwenu. <sup>5</sup> Imi kwina Simwine umwina, itumelo imwina, Ikolovezo imwina, <sup>6</sup> ni Ireeza umwina ni Shentu wentu. wina hewulu lyazintu zonse nikuhita muzonse nimukati kazonse. <sup>7</sup> Kuzumwi ni zumwi ava hewa impo ilikanelela nimpo ya Keresite. <sup>8</sup> Sina mwawambila mañolo; “hayenda kwiwulu, Avahindi vava hapitwe niku kava hapa. Avahi impo kuvantu”. <sup>9</sup> Zitalusa chizi izii, “Ava kambami”, “konji heva avyendi muzivaka zakusi mwikanda?” <sup>10</sup> Iye yavashetumuki muntu yoswana niya vakambameli kumawulu. Avapangi izi zintu kwizuziliza zose zintu. <sup>11</sup> Keresite avahi impo ziswana nezi; ma Apostola, mapolofa, Vawambi, Balisani ni varuti. <sup>12</sup> Avapangizi ku kuza vazumine kamutendo wesevelezo, kakuzaka muvili Kerest. <sup>13</sup> Upanga mbwiteli chitwakasika hantu hoke mwitumelo nikwiziva mwana we Reeza. u panga izi mbwiteli chitwa kula sina njavo va vasiki haku kula kumazimo a Kereste. <sup>14</sup> Zipangahala kuti kanji tuvi sina vahwilezana. zipangahala kuti kanji tusandolwa. Zipangahala kuti kanji tuhindwa niluhuhu lwamirutilo, kamanu uvutali vwa

kuchenga. <sup>15</sup> Mukuti, mutua wambe initi mwirato niku kula mwirato lyakwe iye mutwi, Kereste. <sup>16</sup> Kereste ukopanya muvili wonse wava lumeli hawina. nukwete ku kula mukuswanelela inguzu zivahewa chilama nichilama imi uzakiwa mwirato. <sup>17</sup> Nihakuvavulyo niwamba ichi, imi niminyemuna mwa Simwine; Kamusiyendi sina mazwahule vayenda kevuvo lyamizezo yavo. <sup>18</sup> Vasilafezwe mwingana zavo. Imi venakule nivuhalo vwa Ireeza. Vazwile kuvuhalo vwa Ireeza kuvula kwiziva kwavo kevaka lyakukutuhaza ikolo zavo. <sup>19</sup> Kavalizuwi kuswava. Vava likukutuhalisi avovene niku sachena kwamitendo, muzintu zonse zivawola. <sup>20</sup> Imi kanjimonu mu muvarutilwa kuamana ni Kereste. <sup>21</sup> Nisepa muvazuwi kuamana ni zakwe. Imi nizumina kuti muvarutwa mwali, sina vuniti havwina kwa Jesu. <sup>22</sup> muzwise zintu ziamana nimitendo yenu yakale inwali kurunda, muntu wakale. muntu wentazi yoboliswa zintu zichenga. <sup>23</sup> Muchupule muntu wentazi ilikuti muwole kubusuluswa muluhuho lwamizezo <sup>24</sup> yenu. Mupange vulyo mukuti muyole kuzwata muntu muhya, Chakuzwa kwa Ireeza. Zivumbitwe mukushiyama nikunjolola kweniti. <sup>25</sup> Muvike kumbali zakuchenga, “Muwambe chaku shiyamisa, wumwi niwumwi niyavambene naye, “Mukuti tuvantu va hamwina. <sup>26</sup> “Mvenge, kono kangi mupangi chive”. “Imi kanji musiyi izuva nilimina nimusivengete, <sup>27</sup> Kanjimuhi Diavulusi chivaka. <sup>28</sup> Munsa kanji navoleli kwiva hape, chakuti, uswanela kuseveza. uswanera kutendisa mayaza akwe, Ilikuti awole kuliyavela nimuntu yasena. <sup>29</sup> kanji kuzwi chiwambo chivilala mu mulomo wakwe. Imi, kuzwe manzwi ashiyeme enachakuha china mutendo, kuha intuso kwavo vatekeleze. <sup>30</sup> Imi nsazi munyazelezi Luholu lunjola Iwa Ireeza. Kakuli njiyena umuvaswaiwa kali mwiziva lyepuluso imuvawani. <sup>31</sup> Muvike kumbali zivava, kuflikana, kuvenga, ikani, kutukana nizose zina <sup>32</sup> chive. Muve nichisemo kuzumwi ni zumwi, mulizuwile inse. muliswalele, sina nji Ireeza mwa Kereste hamiswaleli.

## Inkauhanyo 5

<sup>1</sup> Nihakuvavulyo muve muvalikanyisi ve Ireeza, sina hamuli vana vakwe vasakahala. <sup>2</sup> Ni kuyenda mwilato, sina Keresite mwavatusakili ni kulihya iye mwine kwetu. A vavi ineo ni chitavelo, kuva mununko u tabisa kwa Ireeza. <sup>3</sup> Vuvi bwa vusangu kapa mikwa mivi yonse ni kulakamina chifumu kanji zi wambwa mukati kenu, kakuti ka ziswaneli ku vazumine. <sup>4</sup> Kapa kuva kuziwamba ziswawisa, kuwamba za vuyanga, kapa musiyemuseki zi sena ntuso, zi sa swaneli. Kono kuve ni za kulitumela. <sup>5</sup> Kokuti muswanela kubona kuti kakwina vubi bwa vuhule, kusachena, kapa vubi bonse, kapa mntu yosaka chifumu, njikuti, ihule, kena chiaanda mumpuso ya Keresite ni Ireeza. <sup>6</sup> Kanji muzumini zumwi kumichenga cha manzwi ena mukungulu. Chevaka lya zintu ezo vukali bwa Ireeza bukeziteni kwa vaana vasena ikute. <sup>7</sup> Chobulyo kanji muvi ni kavelo nabo. <sup>8</sup> Kakuti inwe muvuli ififi, kono hanu chimuli mwiseli kwa Simwine. Chobulyo muyende sina vaana ve seli. <sup>9</sup> Kakuti miselo yeseli i hindilile bulotu bonse, kujolola, ni buniti. <sup>10</sup> Mu wane kuti njechihitavisa Simwine. <sup>11</sup> Kanji muvi ni kavelo kumisevezi yamiselo ye fifi. Mucivaka chakuti, mu vezivahaze. <sup>12</sup> Kakuti zintu zi vava pangi avo mwikunutu ziswawisa hahulu nanga

ku kuziwamba. <sup>13</sup> Zintu zonse, ha zi patululwa cheseli, zi zivahali. <sup>14</sup> Kakuti zintu zonse zi va patulwilwe zi vamaniswa. Nihakwinabulyo kuwambwa kuti, “Mulala, inwe vanamañonzi, mi munyamuke kuzwa ku vafwile, mi Keresite kabenye henu.” <sup>15</sup> Nihakwinabulyo mutokomele mo muyendela, isinyi kuva sina vantu vasena vutali kono sina vatali. <sup>16</sup> Mumamele inako chakuti mazuva chena vuvi. <sup>17</sup> Kanji muvi vaholo. Nihekuvavulyo, muzuwisize itato ye Simwine kuti njehi. <sup>18</sup> Kanji u kolwa kunywa iveine, kakuti i twala kwisinyeho. Nihakwinavulyo, wizuzwe cha Luhuhu Lujolola. <sup>19</sup> Mu kandekisane zumwi kuzumwi chaLisamu ni nzimbo nimu chafela. Muzimbe mi mulumbeke chenkulo zenu zonse ku Simwine. <sup>20</sup> Inako yonse muhe bwitumelo kuzintu zonse chezina la Simwine wetu Jesu Keresite kwe Ireza Tayo. <sup>21</sup> Mulivonze kungsi bamwi kubamwi chetukelo ya Keresite. <sup>22</sup> Vanakazi, mulivike kungsi ku va mwihyenwanwe, sina ku Simwine. <sup>23</sup> Kakuti mukwame nji mutwi wa mwanakazi, sina Kelesite naye hali mutwi wenkeleke. Nji muhazi wa muvili. <sup>24</sup> Kono sina inkeleke ha ina mwikonde la Keresite, chobulyo ni mwanakazi u swanela ku va vulyo kwa mwihabwe mwizintu sonse. <sup>25</sup> Bakwame, musake vanakazi venu sina Keresite mwa sakile inkeleke ni kuliha iye mwine kwili. <sup>26</sup> Avachiti bulyo kokuti a mupange yojolola. Ava muchenisi chaku musambisa ni menzi che nzwi. <sup>27</sup> Avachitibulyo kuti a lihe iyemwine mwikanya yenkeleke, ne kusena vubi nanga kunyana nanga chimwi chiswana necho, kono nihakwinavulyo kujolola kusena mafosisa <sup>28</sup> Chenzila iswana, bakwame waswanela kusaka vanakazi vavo sina mivili yabo. Iye mwine yosaka mwihabwe usaka wakwe mwine. <sup>29</sup> Kakwinwa muntu ya cha vatoyi muvili wakwe. Kono, u vavalela ni kuusaka, sina Keresite naye mwasakile inkeleke. <sup>30</sup> Chakuti iswe twinkalulo ya muvili wakwe. <sup>31</sup> “Chevaka lyo mukwame kasiye besi ni banyina mi kalikopanye kwa mwihabwe, mi vo vele ka vave inyama yonke”. <sup>32</sup> Uvu vuniti bukando buungwilwe, kono ni wamba kuamana niKeresite ni nkeleke. <sup>33</sup> Nihakubabulyo, zumwi ni zumwi kwenu naye asake mwihabwe cha mwalisakila, mi vanakazi bakuteke bakwame vabo.

## Inkauhanyo 6

<sup>1</sup> Bahwile, muzuwe vashemi venu mwa Simwine, kakuli nji swanelo. <sup>2</sup> “Mukuteke veshenu ni vanyinenu” (yeyi nji ntayelo ye ntanzi yine nsepiso), <sup>3</sup> “njokuti kuve hande nenwe mi muhale inako inde he fasi.” <sup>4</sup> Mi, inwe veshetu, kanji musundi vana venu kuti mane vaka nyelwe. Kono, muvalute kukalimelwa ni mwi ntayelo ya Simwine. <sup>5</sup> Vahikana, muve vakuteka va yendisi venu va he fasi ni nkute likando niku chachalika, cho kusepahala kwe nkulo yenu. Muve va kuteka kuvali linu mumu pangila kwa Krete. <sup>6</sup> Muswanela kukuteka va yendisi venu isiñi fela hava milolete kuti muva tavise. Kono, muve va kuteka linu chokuva va hikana va Krete. Mupange intato ya Ireza ke nkulo zenu. <sup>7</sup> Museveze ke nkulo zenu zonse, uvu museveleza Simwine isike vantu. <sup>8</sup> Muswanela kwi ziva kuti chintu chonse chi ndotu chi mupanga muntu ni muntu, ka wane kuvozekezwakwa Ireza, kapa mwi kana kapa ulukuluhite. <sup>9</sup> Nenwe vayendisi, mupange zintu ziswana kuva hikana venu. Kanji muva tizi. Mwizi kuti iye yali Simwine wenu wina kwi wulu. Mwizi kuti kakwina chiyaluluti kwali.

<sup>10</sup> Kumamanimani, muve va kolete kwa Simwine ni mu ziho zo kukola kwakwe. <sup>11</sup> Muzavale zizavalo ze nkondo za Ireza, ili kuti muvole kuzimana kulwisa mihato mivilala ye milelo ya dyavulusi. <sup>12</sup> Kakuti inkondo yetu kailwiwa inyama ni malaha. Kono, ilwisa inkamaiso ni vavusisi ve luhuho ni vayendisi ve luhuho lwe ififi luvilala, kulwisa luho luvilala mu zivaka ze wulu. <sup>13</sup> Cwale haho mutule zi lwiso zonse za Ireeza, linu muzimane chokukola ku lwisa vuvi mwi nako yinu yo vuvi. Hachi mwa mana kupanga zintu zonse, kamu zimane chokukola. <sup>14</sup> Cwale aho muzimane cho kukola. Mupange chi hachi mina kuvika itunga lwe niti ni chisilelezo che chivuva yo kuchena. <sup>15</sup> Mupange inzi chimwa mana kuzwata insangu ze evangeri ye konzo. <sup>16</sup> Muzintu zonse mukwate i teve ye ntumelo, linu kamu wole kuzima masho endimi a wuloka o muntu muvilala. <sup>17</sup> Mi muhinde inkuwani ye tukuluho ni mukwale we luhuho, ilyo linzwi lya Ireeza. <sup>18</sup> Nitapelo yonse ni inkupo, mulapere inako yonse muluhuho. Chowu muhupulo, mukulolelela choku kwatirila ni kulaperela vulumeli vonse. <sup>19</sup> Mi muni lapele name, kuti iñusa lyihelwe kwangu hani yalula mulomo wangu. Mulapele kuti ni wole kwi zivahaze cho vundume initi ilipatite ya evangeli. <sup>20</sup> Ivaka lye vangeli hanili mu apositola mu mawenge, linu kuti muzili ni wola ku wamba cho kulivonahaza sina muni swanela ku wambila. <sup>21</sup> Kono kuti nenwe mwi zive misevezi yangu ni muni vukila, Tychicus, muzwale usakiwa ni muhikana ya sephala wa simwine, keze nezibahaze zintu zonse kwenu. <sup>22</sup> Niva mutuminizi kwenu ke lyinu ivaka, iri kuti mwi zive zintu zi amana iswe, mi awombe wombe inkulo zenu. <sup>23</sup> Inkozo ive ku vazumine, ni rato mi ni ntumelo izwa kwa Ireza isi wetu ni Simwine Jesu Krete. <sup>24</sup> Chisemo chive navo vonse va saka Simwine Jesu Krete ni rato lisa mani.

## Vafilipi

<sup>1</sup> Iswe ba Paulusi ni Timutea, bahikana ba Jesu Keresite, kwabana bonse babakungulwa cha Jesu Keresite bekele kwa Filipi, ni bakulwana ni madikoni. <sup>2</sup> Chisemo chibe nanwe ni kozo izwa kwa Ireeza Ishetu ni Simwine wetu Jesu Keresite. <sup>3</sup> Nilitumela kwa Mulimu wangu munimihupwila monse. <sup>4</sup> Inako ni nako mutapelo zangu zonse kwenu, cabuitumela heti nitenda itapelo zangu. <sup>5</sup> Nileta buitumelo kutumelo yenu kwinzwi la Mulimu kuzwa luzuba lwetanzi mane kusika hanu. <sup>6</sup> Nizumina kwechinu chitutenda, mukuti iye yotanga musebezi mulotu kwenu kazwile habusu kumaniniza kutenda zilotu kukasika izuba la Jesu Keresite. <sup>7</sup> Kulotu kwangu kulizuwa munilizuwila ibaka lenu mubonse kakuli mwina kunkulo yangu. Inwe mubonse mubalikani bangu chamusa hanina mumawenge ni mukusileleza ni kukonzeleza inzwi la Ireeza. <sup>8</sup> Initi Ireeza nji paki yangu, muninyolezwi kumibona mubonse mubutungi bwelato la Jesu Keresite. <sup>9</sup> Mi itapelo yangu njeji: kuti ilato lenu nilinjihe chabungi ni kwinjija chabungi luli muzibo ni kutwisiso yonse. <sup>10</sup> Kanimilapelela kokuti nimusole ni kusala zintu zilukite chakumaniniza. Kanimilapelele kokuti nimube ni inkulo injolola ni isena mafosisa kuya kwizuba la Keresite. <sup>11</sup> Kakube bulyo mukuti kamube mwizwile zichelantu zichenete ziza cha Jesu Keresite, mwikanya ni kubabazwa kwa Ireeza. <sup>12</sup> Linu nisaka kuti mwizibe, bakwangu, kuti zintu zibatendahali hewulu lyangu zibaletisi kuti iivangeli ihasane chokuhwela. <sup>13</sup> Chendabayobulyo, kuba mumawenge kwangu cha Keresite kuzebahali mucibaka chisilelezwe ni kumwi konse, <sup>14</sup> mi bungi bwabakwangu mwizina la Simwine babakukuwezwa hahulu ibaka lakuba mumawenge kwangu kakuwamba inzwi ninisena lyowa mi nilulukuluhite. <sup>15</sup> Ikumbya bamwi mane babezibahazi za Keresite chamuna ni kulikataza, imi bamwi chakusuni bulyo. <sup>16</sup> Bana bezibahaza Jesu chakusuna kwabo bezi kuti nibabikwa munu chakuzimanina inzwi la Ireeza. <sup>17</sup> Kono bamwi bezibahaza za Keresite chabuñwanyama ni mihupulo isena chisemo. Bahupula kuti baniletela bukaabo mumawange angu. <sup>18</sup> Linu chibileza chi? Iwola kuba inzila ihi ne ihi, iwola kuba chakuchenga kapa cheniti, Keresite wizibahazwa, imi cheyi indava ninyakalala! Eni kaninyakalale. <sup>19</sup> Mukuti niizi kuti iyi indava ileta kuti nilulukulwe. Ichi kachitendahale bulyo chebaka le tapelo zenu ni tuso ya Luhuhu Lunjolola lwa Jesu Keresite. <sup>20</sup> Ziyendelela chakuya chetibelelo yesepo ni buniti buta kuti keti niniswabe. Mukucho, chesusuezo yonse, sina inako yonse mane naho hahanu, nina itibelelo yakuti Keresite kabuse mubuli wangu, kapa kaibe kakuhala kapa chefu. <sup>21</sup> Kwangu kuhala nji Keresite, imi kufwa kufuma. <sup>22</sup> Kono heba kuhala chenya kuleta zichelantu kuzwililila hamitendo yangu, linu kanti kanizi chiniswanela kusalwa. <sup>23</sup> Kakuli nikatezwe inketo yachiniswanela kuketa hazobe. Nina itakazo yakufunduka kukekala ni Keresite, ili indava initala hahulu ni kuhitiliza! <sup>24</sup> Imi hape kushala munyama kuyebele chebaka lyenu. <sup>25</sup> Mukuti nina isepo kuamana nechi, nizi kuti kanishale ni kuzwila habusu kuba nanwe mubonse, chebaka lakuzwila habusu



kwenu ni tabo mutumelo. <sup>26</sup> Chebaka lyobulyo, kulumbeka kwenu kwa Jesu Keresite chebaka lyangu kakwinjihe chebaka lakuba kwangu hape mukati kenu. <sup>27</sup> Mukwate fela buhalo bwenu chenzila iyelele ifusa la Keresite. Mutende bulyo njo kuti, kakwina indava kapa nikezite kukumibona kapa kanikwina, niwola kuzuwa mumuzimanine chenguzu chaluhuhu lumwina. Nitabela kuzuwa kuti mwina ni moozo umwina kulika kukwatisana hamwina chebaka letumelo yeñusa. <sup>28</sup> Imi musiye kutizwa zintu zonse zichitwa ni zila zenu. Ichi kwabo chisupo chitondeza kusinyeha kwabo. Kono kwenu chisupo chitondeza ipuluso yenu, imi ichi chizwa kwa Ireeza. <sup>29</sup> Mukuti kwenu chichibahewa kale, chebaka la Keresite, isiñi kuzumina fela kwali, kono ni kumunyandila hape. <sup>30</sup> Mukuti namwe mwina kulilwisa kuswana nokuna kumubaboni kwangu, nokuna kumuzuwa kuti kwina name hanu.

## Inkauhanyo 2

<sup>1</sup> Ni zeza kuti kube ni kukozwa mwa Keresite. Ni zeza kuti kwina kuhumbulizwa mwilato lyakwe, Ni zeza kuti kwina kuhalinsana hamwina koluhuhu. Ni zeza kuti kwina kubabalela kwense ni ka mukekechima. <sup>2</sup> Muni sangise choku nahana buswana, ni mwina ilato liswana, ni mu wondinsene muluhuhu, ni mwina ka kuzeza kumwina. <sup>3</sup> Sanzi u pangi chimwi kuya che inkulo imbi kamba kuvula ingana ka kusa hupula bamwi. Imi bulyo cho livika hansi uhinde kuti bamwi vaku zamba. <sup>4</sup> Siye kwikala no saka zako bulyo, imi usake ni zi bamwi. <sup>5</sup> Muzeze mwinzila yabena nayo Jesu Keresite. <sup>6</sup> Abena muchibumbantu che Reeza, kono kena abahindi kuti ulikana ni Ireeza chachintu chente a tundamene. <sup>7</sup> Imi bulyo, aba lizuuli bu Mulimu. Abezi muchizimo cho buhikana. Cho hinda mazimo abuntu. Cho wanika muchiyemo chomuntu. <sup>8</sup> Cho likokobeza ni kuli kuteka konji ifu, ifu ha chifapano. <sup>9</sup> Cho bulyo Ireeza na munyamuna kamayemo a hitilize. Imi ni chamuha izina lihanzi kumazina onse. <sup>10</sup> Aba tendi bulyo kuti mwizina lya Jesu izwii ne zwii kali fukame, mazwii abena mwiwulu nibena hansi ni mwikonde lya hansi. <sup>11</sup> Linu aba tendi bulyo chokuti indimi zonse kazi lyatilize kuti Jesu Keresite nji Simwine, kenkanya ye Reeza Tayo. <sup>12</sup> Linu, inwe banisuni cha kuhitiliza, sina inako yonse muku kuteka, insinyi feela henti nina kwateni, kono mane hanu nanga chinisakwina, mu belekele ku hazwa kwenu ka kutiya ni kunjanja. <sup>13</sup> Kakuti nji Reeza u kwete ku beleka nenwe chentato ya kutenda kakusunana kwakwe. <sup>14</sup> Mu tende zintu zonse ka kusabilela ni ku sakanana. <sup>15</sup> Mu chite mweyo inzila kuti muwole kuba basa nyazahela ni balukite, bana be Reeza basena katowati. Mupange mweyo inzila njikuti mubelenge siina mamuni a munkanda, murahi ulyangene unyimitwe. <sup>16</sup> Ku kwatilila chenguzu kwinzwi lya buhalo kokuti mube ni baka ninkanya mwizuba lya Keresite. Linu aho kani zibe kuti kena ni batiyi lubilo lwamuhuhu kapa kubelekela waluka. <sup>17</sup> Kono ni haike kanibe ni newo ichunkwa ha chitabelo ni nsebelezo ye ntumelo yenu, muni nyakalale, ni ku nyakalala nanwe mubonse. <sup>18</sup> Kamukwa uswana nanwe munyakalale, ni kunyakalala name. <sup>19</sup> Kono ni sepa ka Simwine Jesu kutumina Timoteya kwenu kapili, chokuti ni susumezwe chokwiziba zintu zenu. <sup>20</sup> Imi kakwina zumwi uswana naye kumikwa, yomi shilila inkulo cha

kwizula. <sup>21</sup> Kakuti bonse basaka bulyo zibatabisa, insinyi zintu za Jesu Keresite. <sup>22</sup> Kono mwizi kuti uyelela chenteko, siina mwana yo tendela beesi, imi aba tendi name mwi Ivangeli. <sup>23</sup> Ni sepa ku mutumina hente ni ni bone kuti zintu zi yenda hande kwangu. <sup>24</sup> Kono nina ni nsepo kwa Simwine kuti ime nimwine muni bole kapili. <sup>25</sup> Kono ni zeza kuti chisakahala ku tumina Epafrodite abole uko kwenu. Mwanawaswisu kuninangu, uni tenda naye, iisole kuninangu, mutumiwa wenu hape muhikana wa zinisuni zonse. <sup>26</sup> Njikuti aba wililwe chenzila chaku chiswa kukando, imi u nyolelwe kuba nanwe mubonse, kono muba zuwi kuti abali kulwala. <sup>27</sup> Ikumbya abali kulwala zeniti mane sake nafwe. Kono Ireeza chaba ninse kwali, iinsinyi kwali yeyena, kono mane ni kwangu bulyo, kakuti sanzi nibi mumaswabi hamwi ni hamwi hape. <sup>28</sup> Chobulyo ni nahahulu insusumezo ya kumu tumina, mukuti hente ni mumu bome ni musangalale ili kuti name ni nibe yosumunukite mukutongoka kwangu. <sup>29</sup> Mutambule Epafrodite ka Simwine mukusanga konse ka kumaniniza. Mukuteke bantu ba swana naye. <sup>30</sup> Chebaka lya mitendo ya Keresite chigi chaba chunine kwifu. Aba biki buhalo bwakwe mubukabo kuti ani tendele mane ni kwizuziliza chi musena mubali kuwola kuni pangila.

### Inkauhanyo 3

<sup>1</sup> Chamamanizo, mizwale musangalale mwa Simwine. Kwangu ime kumiñolela zintu ziswana kaku ni kazikatazi. Izi zintu muzi mibike mubuikeeto. <sup>2</sup> Mulisileleze kubambwa, muliseleleze kuba vereki ba fosahale. mulisileleze kubanokola zilama zavukwame. <sup>3</sup> Kakuli. njeswe tunokola zilama zavukwame. Imi njeswe tulumbeka kaluhuhu lwe Reeza. Imi njeswe tuhinda bwi kumuso mwa Keresite Jesu, hape tusena isepo mwinyama. <sup>4</sup> Niha kuba bulyo, Ime nimwine nivena isepo mwinyama. Haiva umwii uzeza kuva nisepo ye nyama, ni nivavi ni zingi. <sup>5</sup> Imi niba kosolwa inyama yabu kwame ninina mazuba akwana iyaza niyotatwe, nibantu bamwa Isilaele, ba mushobo wa Benjamine, Muheveru wa Maheveru; kuya chekute lya mulawo, ni Mufarisi. <sup>6</sup> Nivena ichiseho yaku nyandisa ikereke. Kaku kuteka kuluka kwa mulao, kana nivena mulandu. <sup>7</sup> Kono zinibali kuhupula kuti bufumu kwangu, niva ziboni kuti kusinyehelwa chebaka lya Jesu. <sup>8</sup> Chabunite, hanu nibala zintu zose kusinyehelwa ibaka ylakupanga sinte kamano akwiziba zintu ka Keresite Jesu Simwine wangu. Kakwe nibalitobohi zintu zose Imi nizilola sina ikwe ilikuti niwane Keresite <sup>9</sup> imi niwanike kwakwe. Kanina kuluka kwangu kuzwa mumulao. Kono nina kuluka kwe tumelo izwakwa Keresite, kakuli kuluka kuzwa kwe Reeza kulizingite he tumelo. <sup>10</sup> Cwale hanu nisaka kumwiziba ninguzu zaku buswa kwakwe ni chizwale cha masukuluka. Cwale hanu nisaka kuchichululwa kuva yoswana naye kuzwila mwifu lyakwe, <sup>11</sup> ilikuti name nikabe nikwiziba kwaku buka kubafu. <sup>12</sup> Kahena inite kuti chini batambwile izi zintu, imi kakutalusi kuti chinakwanisa. Kono nitundamene kuti nika wonde china habusu bwangu ka Keresite Jesu. <sup>13</sup> Mizwale, kani hupuli kuti ime nimwine chini bachikwati. Konokwina choke chitu: ni zibala china kumasule imi nihwelela zina habusu. <sup>14</sup> Nitilila heena chifunda nika wine mupuzo wakusupwa kuwolokete kwe Reeza mwa Keresite Jesu. <sup>15</sup> Tubonse tulukite, tuhupule mweyi izila. Haiba uzeza ka kuchichina nizimwi zintu,

Ireeza naye mwabonise zintu halukanda kwako. <sup>16</sup> Niha kubabulyo, chose chintu chovasiki hachili, mukwatilile kuchili. <sup>17</sup> Mulikanyise ime, mizwale. Hafuhi mulolelele kwabo bayenda chaku likanyisa miyendelo imwina nayo. <sup>18</sup> Bangi bayenda—kuamana nabo banibali kumi wambilanga, hanu nimi wambila kazi sonzi — siina zila zachi fapano cha Keresite. <sup>19</sup> Ma maninizo insi nyehelo. Kakuli bazimu babo nji mabumu abo, hape mungatuko wabo nji maswabi abo. Linu bahupula zintu zekanda. <sup>20</sup> Kono munzi wentu tota wina kwiwulu, kuzwa uko naswe nitulindile muhazi, Iye Simwne Jesu Keresite. <sup>21</sup> Mwa kachiche mivili yetu ibola nikubika mivili yetu kuba sina muvili wakwe ubelenga, kupangwe kenguzu zamata akwe kubikila zintu zonse mwikonde lyakwe.

## Inkauhanyo 4

<sup>1</sup> Kuzwaho, mizwale bangu banisaka, kusanga kwangu nimushukwe, cheinzila muzimane chenguzu Nisimwine, balikani banisuni. <sup>2</sup> Nikumbila Evodia, ni kumbila. Sintike, kuti babe ninkulo imwina kwa simwine. <sup>3</sup> Chabusakusima, nikulaela nawe bulyo, mulikanangu ininyadiswa naye: utuse aba banakazi. Mukuti babanyandi name mukuhasanya evangeli hamwina ni Klementi ni bungi bwabalikani banibali kusebeza nabo, basimazina ena Mumbuka ya Buhalo. <sup>4</sup> Tabele Ireeza inako yonse. Hape muniti, nisangalale. <sup>5</sup> Musiye chishemo chenu chizibwe kubantu. Simwine chiwina hafwihi. <sup>6</sup> Nsanzi ubi nitakazo kuchintu chimwi ni chimwi. Nihakuba bulyo, chimwi ni chimwi chotenda chentapelo ni kukumbila ni kuhempo za kulitumela, usiye inkumpu yako izibwe kwe Ireeza. <sup>7</sup> Imi ikozo ye Ireeza, Ihitiliza kuzuwisa konse, kaibabalele inkulo yako ni muhupulo wako mwizina la Jesu Keresite. <sup>8</sup> Chakumaninikiza, bakwangu, zintu zonse zisimite, zintu zonse zitompeha, chakumanikiza chintu chonse chikutekeha, chakumaniniza chitu chonse chiwolekete, chakumaniniza chitu chonse chijolola, chakumaniniza chintu chonse chisunwa, chakumaniniza mulaezo uzuweka, haiba kwina chintu chishiyeme kakumaniniza, haiba kwina chimwi chiswanela kutembwa, uhupule chezi zintu. <sup>9</sup> Zintu zobalituti, ni zobaamuheli, ni kuzuwa, ni kubona kwangu, utende izi zintu. Imi Ireeza wekozo kabe nawe. <sup>10</sup> Nina mwi nyakalalo Inkando kwa Simwine, kakuli hanu kumamaninizo chimwapangasicha Impilaelo yenu kwangu. Initi luli mubena Impilaelo kwangu kutazi, kono kana mubena Inako yakunitusa. <sup>11</sup> Kahena chintu chitokwahala kwangu kumiwambila ezi nintu. Kakuli mukuti nibalituti kulitumelela chinina zintu zamukwa uhi no uhi unina kuuli. nizi inako yakutokwa chintu. <sup>12</sup> Mihape nizi inako yakuba nizitu zingi. Munzila Ihi ne Ihi nimu zintu zonse nibalituti Inkunutu mukuliwa hahulu ni mukufwilwa Inzala, mwinao yakuba ni zingi ni munako yakutokwa zingi. <sup>13</sup> Ni wola kutenda zintu zingi zingi chenzila yakwe yoniha Inguzu. <sup>14</sup> Hape linu, ubapangi nenza kuba name kumapalelwi angu. <sup>15</sup> Imi mwizi, inwe mubafilipi, kuti kumatangilo a evangeli, inako inisiya Masodena, kakwina nkeleke ibali kunitusa mundaba yakuha ni kwamuhela kunde yako wewena. <sup>16</sup> Nanga hanibena mwa Batesalonika, mubatumini ituso yazinitokwa zonse kuhitilila kamwina. <sup>17</sup> Kahena kuti ni tokwa

impo. Chamukwa winabulyo, nisaka chichelatu cheti chiekeze kuchimuswanela kuwana. <sup>18</sup> Ni batambuli zintu zonse, minina zingi. Nibahewa zintu zonse. Ni bamuheli kuzwilila kwa Epafrodite zintu zizwakwenu. Impalisa ya aloma ina munko mulotu, chitabelo chamuhelwe ni kutabisa Ireeza. <sup>19</sup> Imi Ireeza wangu kezuzize zonse zotokwa kakuya kabufumu bwakwe nikanya ya Jesu Keresite hanukwe. <sup>20</sup> Kwe Ireeza ni Ishetu ni kanya yakuya kwile. Amen. <sup>21</sup> Mulumelise boonse kwa Jesu Keresite. Bakwetu baninanabo bamilumelisa. <sup>22</sup> Balumeli bonse kunu bamilumeli, sihulu benzubo ya Sesare. <sup>23</sup> Chishemo cha Simwine Jesu Keresite chibe niluhuhu lwenu.

## Makolose

<sup>1</sup> Paulusi, mu apositola wa Jesu Keresite che tanto ya Ireza, ni Timotea muzwale wetu, <sup>2</sup> ku va lumere ni mizwale yi sepahala mwa Keresite vena kwa Makolose. Chisemo chive kwenu, ni koozo izwa kwe Ireza i Shetu. <sup>3</sup> Tu ha vuitumero kwa Ireza, Isi wa Simwine we tu Jesu Keresite, mi inako yonse tulaperera inwe. <sup>4</sup> Tuva zuwi ze tumero yenu kwa Keresite Jesu ni ze rato limukwete kwavo vava kauhanyizwa kwe Ireza. <sup>5</sup> Mwina ili lato ivaka lye sepo imulindire ivikirwe nwe kwi wulu. Muva zuwi zeyi sepo ilindirwe piri linzwi lye niti, ivangeli, <sup>6</sup> iyo iva kezi kwenu. Iyi ivangeli i vika misero mi ikwete kukula mu kanda zonse. Ivali kupanga izi ni mwenu vulyo kuzwa he zuva limuva lizuwi ni kulituta kuama ni chishemo che Ireza mu niti. <sup>7</sup> Iyi nji Ivangeli sina hamu va ilituti iyo kwa Efafarasi, yo sakiwa wetu mutanga, ili yo sepahala muhikana wa Keresite ku mbali yetu. <sup>8</sup> Efafarasi ave zivahazi kwetu i lato lyenu mu Luhuhu. <sup>9</sup> Ivaka lyeli i lato, kuzwa he zuva litu va zuwi izi kena tuva siyi kulaperera inwe. Tuvali kukumbira kuti mumwi zuziwe che ngana ya cha saka muvutali vonse ni kutwisiso ya zo luhuhu. <sup>10</sup> Tuvali kulapera kuti mumu yende cho kusepahala kwa Simwine mwi zira zi tavisu. Tuvali kulapera kuti mumu vike misero mwi kenzo indotu ni kuti mumu kule mwi ngana ya Ireza. <sup>11</sup> Tulapera muwole kukoziwa muzintu zonse cho kuya cha mata e kanya yakwe muku kwatisisa konse ni kulindira. <sup>12</sup> Tu lapera kuti mumu sangwe ni kuha vuitumero kwe Shetu, yava mi pangi kuwola kuva ni chivaka muku yola ku va zumina mwi seri. <sup>13</sup> Ava tuhazi kwi kamaiso ye fifi ni kutushimbulwira ku mvuso wa mwanakwe yo sakiwa. <sup>14</sup> Ku mwana kwe twina kupulusiwa, ku wonderwa zivi. <sup>15</sup> Mwana chi swaniso che Ireza yasa vonwa. Nji we ntazi kuzonse ziva bumbiwa. <sup>16</sup> Kakuli cha kwe zintu zonse ziva vumbiwa, izo zina mumawulu nezo za hansi, zivoneka ni zisa voneki zintu. Kamba zipura kamba vuyendisi kamba mivuso kamba ziho, zintu zonse ziva vumbiwa nji ye mi zakwe. <sup>17</sup> Wina havusu bwezitu zonse, mi kwali zintu zonse zikwatana hamwina. <sup>18</sup> Mi nji mutwi wo muviri, i kereke. Nji yena matangiyo ni we mweri kuvamwi va fwire, jokuti wina chi vaka cha matangiyo muzintu zonse. <sup>19</sup> Kakuli Ireza avali kusangitwe kuti konse kulizuziriza kwa kweke mwali, <sup>20</sup> ni kuzumizanisa cho mwana zonse zintu kwali mwine. Ireza ivapangi inkozo cha malaha e chifapano chakwe. Ireza ava zumizanisi zintu zonse kwali mwine, kamba zintu hanu hasi kamba zintu mwi wulu. <sup>21</sup> Mi nanwe vulyo, he nako yimwi, muvuli muma zwahule kwe Ireza ni zila zakwe mwi ngana ni mwi nkenzo zivi. <sup>22</sup> Kono hanu chava mizumizanisi cho muviri wakwe u voneka che fu. Ava pangi ichi iri kuti a mivonahaze ku jolola, kusa nyazahala, ni kusavi ni vuvi havusu bwakwe, <sup>23</sup> haiva ni mu zwira havusu mwi tumero, kuzakwa ni kukozwa, kusa zwiswa kule ni sepo kuliverera kwe ivageri i muva zuwi. Iyi nje ivangeri iva wambiwa ku muntu yense ya vavumbwa mwi konde lye wulu, Iyi nje ivageri iyo Ime, Paulusi, niva sanduki muhikana. <sup>24</sup> Hanu ni sanga muma sukuluko chenu. Mi ni nyemuna mwi wulu mumu viri wangu chinzi chisa mwina muma sikuluko a Keresite che vaka lyo muviri wakwe,

iyoyikereke. <sup>25</sup> Ivaka iyeyi ikereke hanili ni muhikana, cho kuya cha musevezi uzwa kwe Ireza uva hewa kwangu chenu, kwi zuziriza manzwi a Ireza. <sup>26</sup> Iyi nje kunutu ye niti ivali ku patitwe che zirimo zingi ni ku masika. Kono hanu chiye zivahazwa kwavo va zumina kwa li. <sup>27</sup> Nji kuvali Ireza avali kusaka kwi zivahaza vufumu bwe kanya bwe yi nkunutu mukanti kava Machava. Nji yena zuna Keresite wina mwenu, i nsepo ye nkaya i kezite. <sup>28</sup> U zu njiyena utu wamba. Tu wambira muntu yense, mi tu ruta muntu yense cho vutali vonse, iri kuti tuvonise muntu yense kuva hande mwa Keresite. <sup>29</sup> Che chi ni seveza ni kukwatisa kuya che ziho zakwe ziseveza mwangu cha mata.

## Inkauhanyo 2

<sup>1</sup> Kakuli ni saka kuti mwi zive bukando vwa manyando aniva vi ka chenu, chavo kwa Laudesiya, mi vungi kana vava voni chifateho changu mu nyama, <sup>2</sup> Ni seveza njikuti inkulo zavo zi susuwezwe chaku letwa hamwina mwi lato ni mu chose chifumu cha kwi zula nsepo ye nkutwisiso, mu maano a vuniti vuli patite vwa Ireza, nji kuti, Keresite. <sup>3</sup> Mwali vonse vufumu vwa vutali ni maano zi patitwe. <sup>4</sup> Ni wamba ichi iri kuti nanga yenke ye ta mi cenge ca vuwambi vo ku wondelera. <sup>5</sup> Mi niha ni sena nanwe mu nyama, kono nina nenwe mu luhuho. Ni nyakalala ku vona vuiswalo wenu ni ca ziho ze ntumero yenu mwa Keresite. <sup>6</sup> Sina hamu va tambuli Keresite Simwine, mu yende mwali. <sup>7</sup> Mu vyalwe cha kukola mwali, mu zakwe hali, mu simululwe mu ntumero sina mumu va rutirwa, ni ku kwatisa mu ku litumera. <sup>8</sup> Mu vone kuti kakwina yo mi hapa kuya cha buchaziba ni bu chengeleli vwa mukungulu vu letwa chizo za vantu, kwi zuziliza ku mayendero e inkanda, ni kusa li zuziliza kwa Keresite. <sup>9</sup> Kakuli mwali mu hala vutungi vonse vwa muviri we Ireza. <sup>10</sup> Mi mwi zuzizwe mwakwe. Nji mutwi wa ziho zonse ni maata. <sup>11</sup> Mwali muva twaliwa ku mupato u sana uva chitwa cha vantu mu ku zwiswa ku muviri we nyama, kono mu mupato wa Keresite. Muva unywa naye mu nkorovezo. <sup>12</sup> Mi mwali muva zwiswa che ntumero mu maata a Ireza, yava mu vusi ku vamubafu. <sup>13</sup> Mi cwale hamu va fwile kwi nfozo zenu ni mukuya mu mupato we nyama yenu, ava mi pangikuhala hamwina naye ni ku tu swalela zonse infozo zetu. <sup>14</sup> Ava sindi indava zetu zonse za zikoroti ni ntaero ziba tu lwisa. A va zi zwisi zonse ni ku zi kokotela ha chifapano. <sup>15</sup> Ava zwisi maata ni zibo. Che mpatalaza chazi zibahaza ni ku va twala ku koma che nyakalalo cho mukwa we chifapano chakwe. <sup>16</sup> Nji kuti, kanji mu zimini nanga yenke yo mi atula mu kulya kamba ku nya, kamba kaze zuva lya mukiti, kamba mwezi muhya, kamba ka mazuva a mukivero. <sup>17</sup> Izi muzunde wa zintu zi keza, kono mutomo nji Keresite. <sup>18</sup> Kanji mu zuminini yo saka ze nyama ni ku lumbeka kwa mafeloi ku mi atula kuzwa ku mupuzo wenu. Muntu wina vulyo wi njira mu zintu za vaa voni ni ku litunduvula che mihupulo yakwe ye nyama. <sup>19</sup> Ka kwatilili ku mutwi. Chizwa ku mutwi kuti muviri wonse ku sika mwi nuungo ni matefukiro zi tenda ni ku kwatila hamwina; chi kula ni cha mukulilo u herwe nji Ireza. <sup>20</sup> Heva uva fwi ni Keresite cha zitendiso ze nkanda, chizi ho hala che ntamo ze nkanda: <sup>21</sup> “Kanji u kwati, kamba ku sola, kamba ku wonda?” <sup>22</sup> Zonse izi zintu zi twala ku vu lyangelino ni ntuso, cha kuya ka milao ni ntuto za vantu. <sup>23</sup> Iyi

milao ina ku luka kwa kuli pangila chirumeri ni che nyama ni ntakazo za muvili. Kono ka zina vutokwa ku ku li twala mu nyama.

### Inkauhanyo 3

<sup>1</sup> Cwale haiva Ireza ava mivusi ni Keresite, mu gane zintu zo kwi wulu, uko Kerisite wikere kwi yanza lye chilyo lye Ireza. <sup>2</sup> Muhupule cha zintu zina mwi wulu, isiñi che zintu za hefasi. <sup>3</sup> Kakuli muva fwi, mi vuhalo bwenu vupatitwe ni Keresite mwa Ireza. <sup>4</sup> Hate na voneke Keresite, iye vuhalo bwenu, cwale kamu voneke naye mwi nkanya. <sup>5</sup> Muvike kwifu, cwale, zilama zina hasi- vushahi, kusa jolola, kusava ni chishemo, itakazo imbi, ni ku lya ahulu, ili maswaniso. <sup>6</sup> Ivali njezi zintu kuti vukali bwe Irea vu kezite ha vaana swisu vasa zuwi. <sup>7</sup> Njimona mwezi zintu nanwe ha imwi inako mumu va yendi hamuvali kuhala muzili. <sup>8</sup> Kono hanu inwe muswanera kusoha zonse izi zintu- vukali, vuvengi, mihupulo mivi, kutukana ni ziyambo zivilala kuzwa mu milomo yenu. <sup>9</sup> Kanji mukuli chenganga, akubona muva cupuli muntu wakale ni nkezo zakwe, <sup>10</sup> mi ci muva zwati muntu muhya unzo yo chafazwa mwi ngana cho kuya che chiswaniso chozo yenke yava chivumbi. <sup>11</sup> Ichi njaho kakusina Mugerike ni Mujunda, womupato ni yasali wamupato, mubabaria, Sisenia, mutanga, yolukuluhite, kono Keresite nji yense, mi wina muzonse. <sup>12</sup> Muzwate, cwale, sina va ketiwa ve Ireza, kuchena ni sakiwa, vali tovohete, mañeke, kusalitundula, inse, ni kusavenga. <sup>13</sup> Mukwaterane zumwi cha zumwi. Muve ni musa kuzumwi ni zumwi. Haiva zumwi wina impiraero kuamana ni zumwi, muswalere mwi nzira iswana mwava kuswaleleri Simwine. <sup>14</sup> Hewulu wezi zonse zintu, muve ni rato, ili icho chisuminiso che kuvahande. <sup>15</sup> Muzuminine i nkozo ya Keresite kuvusa mwi nkulo zenu. ivali cheyi kozo hamuva sumpiwa mumuviri umwina. Mi mulitumere. <sup>16</sup> Muzuminine linzwi lye keresite lihale mwenu cho vufumu. Cho vutali vonse murute mi mususuweze zumwi ni zumwi cha lisamu ni zimbo ni zimbo zo luhuho. Muzimbe cho vulitumero mwi nkulo zenu kwe Ireza. <sup>17</sup> Mi chose chimupanga, muma nzwi ni mwi kenzo, mupange zonse mwizina lya Simwine Jesu. Muhe vulitumero kwe Ireza ishetu chakwe. <sup>18</sup> Vafumahali, mulivike kusi yiva mwihenwanu, sina haili iswanero kwa Simwine. <sup>19</sup> Veshetu, musake vafumahali venu, mi kanji muvi ni vuvengi kuamana navo. <sup>20</sup> Vahwire, muzuwe ziva miwambira vashemi venu muzintu zonse, kaukili ichi chi tavisa kwa Simwine. <sup>21</sup> Veshetu, kanji muvengisi vanenu, iri kuli kanji va zwafi. <sup>22</sup> Vatanga, muzuwe vamiyendisira cho kuya chenyama muzintu zonse, isiñi cha musevezi wa menso sina vatavisa vantu, kono che nkulo yavuitumero. Mutiye Simwine. <sup>23</sup> Chonse cho panga, usevezekuzwirira kumuhupulo sina kwa Simwine mi isiñi cha vantu. <sup>24</sup> Mwinzi kuti kamu tambule kwa Simwine impo zo kuyola. Ji Simwine Keresite uzo umusevereza. <sup>25</sup> Uzo yense yo mpanga zisalukite zava pangi, mi kakwina chilivonda.

### Inkauhanyo 4

<sup>1</sup> Basimwine, muhe ku batanga chi va swanela ni china sinte. Mwizi kuti nenwe mwina Simwine mwi wulu. <sup>2</sup> Mu zwile havusu cha ku zimana cha kuhwera mu ntapero. Mwi kale cha ku liverera mu iri

ni kuha vuitumero. <sup>3</sup> Mu lapere hamwina chetu neswe, kuti Ireza e yalule mulyango we liinzwi, ku wamba inkunutu ye niti ya Keresite. Ka veka lyezi, Ni hakitwe. <sup>4</sup> Ku lopera kuti ni i pange cho ku jolola, sina mu ni tavera ku wambira. <sup>5</sup> Mu yende mu vutali kuya kwavo vena hanse, ni ku vozekeza inako. <sup>6</sup> Mu siye manzwi enu inako yonse ave ni chishemo. Mu a siye a lungiwe isautu, nji kuti mwi zive mu mu wola kwi tavila zumwi ni zumwi muntu. <sup>7</sup> Cha zintu zini amana ime, Tychicus mwa zi zibahaze kwenu. Mu zwale yo sakiwa, muhikana yo sepahala, ni mutanga kwe Ireza. <sup>8</sup> Ni ba mutumi kwenu che zi, kuti ni mwi zibe indaba ku amana neswe, ni kuti a susuweze inkulo zenu. <sup>9</sup> Ni va mutumini hamwina ni Onesmus, yo sepahala ni muzwale yo sakiwa, Ili zumwi wa kwenu. Muva mi wambile zintu zonse zi va pangahali kunu. <sup>10</sup> Aristrchus, mulikani wangu we bbantiti, u mulueresa, hamwina ni Mareka, mwana wa nchizye wa Barnabus (cakwe muva tambuli intaero; heva wiza kwenu, mumu tambule), <sup>11</sup> ni Jesu yo sumpwa Justus. Izi zonke za mupato balikani vangu vani seveza navo mu mubuso wa Ireza. Vavali va ombi ombi kwangu. <sup>12</sup> Epaphras u mulumeresa. Nji zumwi wenu ni cikombwa cha Keresite Jesu. U likataza chenu mu ntapero, nji kuti mu zime cha kwi zula ni ku sepa kwizwiire mu zintu zonse ze ntato ya Ireza. <sup>13</sup> Kakuli ime nina vupaki vwakwe, mukuti u sebeze tota chenu, ku vena kwa Laodesia, na vo vena mwa Hierapolis. <sup>14</sup> Luka i ñanga yo sakahala ni Demasi va mi lumeresa. <sup>15</sup> Mu lumerese mizwale mwa Laodesiya, ni Nympha, ni nkereke ina mu nzuvo yakwe. <sup>16</sup> Cwale ili iñolo chi lyaka valiwa mukati kenu, mu livale ni mu nkereke i vena Laodesiya, ni ku vona kuti hape nanwe muvala iñolo lizwa kwa Leodesiya. <sup>17</sup> Mu wambile Archippusi, “Lole ku musevezi wo va tambuli kwa Simwine, kuti u wi zuzilize.” <sup>18</sup> Izi intumeriso zina ni yanza lyangu ni mwine-Paulusi. Hupule mahaka angu. Chishemo cive nawe.



## 1 Matesolonika

<sup>1</sup> Paulusi, Silvanus, ni Timotea ku nkereke i vena Matesolonika mwe Ireza Ishetu ni Simwine Jesu Keresite. Chishemo ni nkozo zive nenwe. <sup>2</sup> Inako yonse tuha vu itumero kwa Ireza chenu mwense, chi tu mi sumpa mu ntapero. <sup>3</sup> Tu zeza cha ku sa siya havusu vwa Ireza wetu ni Isi mitendo yenu ye ntumero, mutendo ye rato, ni kuliverera kwe nsepo kwa ku vusu mwa Simwine wetu Jesu Keresite. <sup>4</sup> Mizwale va sakiwa kwa Ireza, twizi ku sumpwa kwenu, <sup>5</sup> mu iveziri ivangeli yetu kwenu isiñi mu liinzwi feela, kono hape ni mu maata, mu Luhoho lu Jolola, ni mu initifazo tota. Mu nzila iswana, nemwe hape mufuta nzi wa vantu mututu ve kalile mu kati kenu ke vaka lyenu. <sup>6</sup> Mu va sanduki valikanyisi vetu ni vwa Simwine, sina ha muva tambuli liinzwi cha vukukutu ni nyakalalo izwa ku Luhuhu lu Jolola. <sup>7</sup> Ku mamani mani mu va sanduki mutala ku vonse mwa Sedoniya ni Achiya va zumina. <sup>8</sup> Mukuti kuzwa kwenu liinzwi lya Ireza li va lili hanze, mi insiñi feela mwa Masedoniya ni Achiya. Konohe, ni ku chimwi ni chimwi civaka i ntumero yenu mwa Ireza mu iva hiti. Ma mani mani, katu suni ku wamba cimwi. <sup>9</sup> Kakuli avo vene va viha mwiziro u tu vena mukati kenu. Va mu rwilwa mu mu veziri kwa Ireza kuzwa ku siswaniso ku tendera yo hala ni we niti Ireza. <sup>10</sup> Va viha kuti mu lindire Mwanakwe kuzwa kwi wulu, yava vuusi ku va fwire. Uzu nji Jesu, u lukulula iswe ku vukali vu kezite.

## Inkauhanyo 2

<sup>1</sup> Chenu inwe muvene mwizi, mizwale, kuti kwiza kwetu kwenu kahena kuvali ku sena intuso. <sup>2</sup> Mwizi kuti ku masule tuva nyandi ni ku swavisiswa mu tuva ka chitirwa kwa Mafilipi, sina ha mwizi. Tu vavi ni vundume kwa Ireza wetu ku wamba kwenu ivangeri ya Ireza mu vukukutu vungi. <sup>3</sup> Sina inkutazo zetu kana zi vali kuzwa mwi sheya, kamba ku ku sa chena, kamba mu vuchengeleli. <sup>4</sup> Ka kuva vulyo, sina mu tu va zimininwa nji Ireza kuva ku sepiwa ni ivangeri, cwale tu wamba. Tu wamba, insiñi ku tavisavantu, kono ku tavisavantu Ireza. Njeye yo tatuba inkulo zentu. <sup>5</sup> Kakuli kana tuva chiti nanga ihi inako ku tendisa maanzwi uvu aku shemba shemba, sina hamwizi, kamba ku uungula intakazo ya vufumu, sina Ireza i mpaki yetu. <sup>6</sup> Kamba ku saka inkanya kuzwa ku vantu, nanga kuzwa kwenu kamba ku vamwi. Kamba ku saka ku tembwa ku vantu sina ka va Apositola va Keresite. <sup>7</sup> Ni kuva vulyo, tu vali kwina sinte mukati kenu sina mushemi o mwanakazi yo humbuliza vane. <sup>8</sup> Mwe yi inzila tu vavi ni ku shiyama chenu. Tu va saki ku kuli avela nenwe insiñi feela i ivangeri ya Ireza kono hape ni vwine vuhalo vwetu. Mukuti chi mu vavi ahulu va sakahala kwetu. <sup>9</sup> Mukuti mu zeza, Mizwale, vukukutu vwa mutendo wetu ni ku li katataza. Masiku ni musihali tuvali ku tenda kuti pona kanji tu lemezi hansi umwi kwenu. Mweyo inako, tu va kutazi kwenu ivangeri ya Ireza. <sup>10</sup> Inwe mu mpaki, ni Ireza naye, u jolola vule, mu ku shiyama, ni kusa nyazahala tuvali santi tuvene kwenu mu zumina. <sup>11</sup> Mu nzila i swana, mwizi vule zumwi ni zumwi wenu, sina isi ni vana vakwe, tuva mi nyamuni ni ku mi susuweza.

Tuva hi vupaki <sup>12</sup> kuti mu yende cha mukwa u lukera Ireza, iye yo mi sumpa ku muvuso wakwe ni mu nkanya. <sup>13</sup> Che ri ivaka naswe tu litumera kwe Ireza cha ku sa siya. Mukuti hamu tambula kwetu vulumiwa vwa Ireza vu mu va zuwi, muva vu tambuli insifi sina cha liinzwi lya vantu. Niha kuva vulyo, inwe muva a tambuli cha mu vuniti mu likalile, liinzwi lya Ireza. Nji cheli liinzwi lina ha ku tenda mukati kenu inwe mu zimina. <sup>14</sup> Chenu, mizwale, muva vi valikanyisi vve kereke ya Ireza zina mwa Judeya mwa Keresite Jesu. Sina nenwe hape muva nyandili zi swana zintu ku vakwenu vantu ve munkanda yenu, sina mu vava chitiri ku ma Juda. <sup>15</sup> I vali ma Juda vave hayi vonse Simwine Jesu ni vaporofita. Ivali ma Juda vava tu tandili hanze. Kava tabisi Ireza. Kono, vava nyandisi vantu vonse. <sup>16</sup> Va tu kanina ku wamba ku va machava kuti avo va puluswe. Mamaninizo nji kuti inako yonse ve zulilile mu zivi zabo. Vukali vuvezi havali ku ma mani mani. <sup>17</sup> Iswe, mizwale, tuva kauhenye kwenu mu nako infuhi, muvuso, insifi munkulo. Tu va liki cha vukando vve nciheho ku vona sifateho chako. <sup>18</sup> Tu va ku saka kwiza kwako, Ime, Paulusi, hamwi ni hamwi, kono Satani ava tu zimiki. <sup>19</sup> Kanti insepoyetu nje ihi ku zi keza, kamba i ntabo, kamba inkuwani ya buikumuso mu vusu vwa Simwine wetu Jesu mu kwiza kwakwe? Kana vavali njimwena ca vungi sina nji vamwi? <sup>20</sup> Kakuti inwe nji mwi nkanya yetu ni ntavo yetu.

### Inkauhanyo 3

<sup>1</sup> Chi kwina vulyo, ha tusa si woli ku i vika, tu va zezi kuti ku vena sinte ku siiwa mwisule lya Athens twenke. <sup>2</sup> Tuva tumini Timoteya, muzwale wetu ni mukwetu kwa Ireza ni mwi ivangeri ya Keresite, ku mi kuza niku mi omba omba ku amana ni intumero. <sup>3</sup> Tuva citi izi kuti kakwina yete a nyanganyiswe cha a masukuluko. Mu kuti inwe muvene mwizi kuti chezi tu ba vikwa ha mutendo. <sup>4</sup> Cheniti, hatu vena nenwe, tuva mi rwiri piri kuti seke nitu lwale ku lyangana, mi chi va chitahali, sina ha mwizi. <sup>5</sup> Cheri ivaka, hani sana niva kusi wola ku zi zimanina, ni va tumini kuti ni zibe ku amana ni ntumero. Mwendu hamwi muliki cava liki kuku lika, mi masukuluko etu avavi a mahala. <sup>6</sup> Kono Timoteya ceza kwetu kuzwa kwenu ni tu letera manzwi malotu e ntumero ni rato. Na tu rwira kuti inwe hañata mwina minahano mi lotu yetu, ni kuti mu virera ku tu vona sina neswe mutu vilaerera ku mi vona. <sup>7</sup> Keli ivaka, mizwale, tu va ombiwa ombiwa kwenu ke ntumero yenu, mu zonse vukavo ni ku lyangana. <sup>8</sup> Cwale hanu tu hala, hamu zimana cha ku kola mwa Simwine. <sup>9</sup> Mukuti vuitumero nzi vutu wola kuha kwa Ireza chenu, cha yonse ntavo itwina nayo kwa Ireza wetu ka henu? <sup>10</sup> Masiku ni mushali tu lapera ahulu kuti mwendi mutu vone chifateho chako ni ku ha chintu chi swanela mu ntumero yenu. <sup>11</sup> Ireza ni Isetu iye mwine, ni Simwine Jesu, a namalaze inzila yetu kwenu. <sup>12</sup> Simwine a mi pange ku ekeza ni ku mi kopanya mwi rato zumwi cha zumwi ni ku vonse vantu, sina mu tu pangila kwenu. <sup>13</sup> A pange ku koza inkulo zenu kusa nyazahala mu ku chena havusu bwa Ireza ni Isetu ha kwiza kwa Simwine Jesu ni vonse vakwe va jolola.

### Inkauhanyo 4

<sup>1</sup> Chamamani mani, mizwale, tumisusuweza ni kumilumerisa mwa

Simwine Jesu. Sina hamuva amuheri intayero kuzwa kwetu kamumu swanerera kuyendera ni kutavisa Ireza, iri kuli mupange vulyo nanga ahulu. <sup>2</sup> Sina hamwizi mirao nzi zituvamihi cha Simwine Jesu. <sup>3</sup> Kakuti iyi nji tanto ya Ireza: kucheniswa kwenu chenu- kuti musiye vushahi, <sup>4</sup> iri kuti zumwi ni zumwi e zive muku vira ni mwihyabwe mu kuchena ni kute. <sup>5</sup> Kanji muvi ni mwihyenwanu che takazo vulyo (sina va Machava vasezi Ireza). <sup>6</sup> Kanji kuvi ni zumwi yo fosa ni kuvengisa muzwale wa kwe mwenzi zintu. Kakuli Simwine nji muvozekezi mwezi zintu zonse, vovuti mutu vamikalimeri ni kupaka. <sup>7</sup> Kakuti Ireza kena ava tusumpiri kukusa jololola, kono kuku chena. <sup>8</sup> Jikuti, iye yo kana inzi u kakani vantu, kono Ireza, yo ha Luhuhu lu Jolola kwenu. <sup>9</sup> Kuamana ni rato lye chizwale, ka kwina ituso yo zumwi kumi ñolera, kakuti inwe muvene murutitwe ji Ireza kusaka zumwi ni zumwi. <sup>10</sup> Chovuniti, mupanga inzi kumi zwale vonse vena mwa Mesondonia yonse. Kono tumi susuweza, mizwale, kupanga inzi ahulu. <sup>11</sup> Tusimi susuweza kuzwira havusu ni kuhala che nkozo, mutoko mere zenu zintu, mi museveze ni manza enu, sina mutu vami layeri. <sup>12</sup> Mupange inzi iri kuti muyende hande mwi kute kwavo vena hanze ye tumero, ni kuti kanji musaki chimwi. <sup>13</sup> Katu saki kuti inwe musiye kutu zuwisisa, mizwale, Kuamana navo valilalize, iri kuti kanji mulichisi muluhuhu sina vonse vasena muhupulo kuzo kuvunsu. <sup>14</sup> Kakuti haiva tuzumina kuti Jesu ava fwi ni kuvuka hape, vovulyo Ireza kaleta ni Jesu avo vava fwiri mwali. <sup>15</sup> Chezi tuwamba kwenu chelinzwi lya Simwine, kuti iswe tuhala, vashere haku keza kwa Simwine, kanji ni tuhitiri avo vava lilalizi. <sup>16</sup> Kakuti Simwine kachiviri ka suke mwi wulu. Kakeze cho muhuwo, ni mulumo we niroyi lye kondo, ni ke mpeta ye Ireza, mi vafu mwa Keresite kava tange kuvuka che tenzi. <sup>17</sup> Cwale inswe va hala, vashere, hamwina katu kungane navo muma kope ni Simwine muluhuhu. mweyi nzira katuve inko yonse ni Simwine. <sup>18</sup> Jokuti, mususuweze zumwi ni zumwi chaya manzwi.

## Inkauhanyo 5

<sup>1</sup> Hanu kuamana ni ze nako ni myaha, mizwale, kamwina itukero yokuti chimwi ch ñolerwe kwe nu. <sup>2</sup> Kakuti inwe kachiviri mwizi hande kuti izuva lya Simwine likezite uvu musa muma masiku. <sup>3</sup> Hava wamba, “Ikozo ni sirerezo,” yahaho i sinyehero ka ikeze havali. Kaku swane uvu kuchisa kuku zala ko mwanakazi yo limisi. Kava ve ni kuvula mapicukiro. <sup>4</sup> Kono inwe, mizwale, kamwina muka zinkwe iri kuti ilyo zuva nili mi hitirire uvu musa. <sup>5</sup> Kakuli inwe mwense mvana ve seri ni vana vomwi zuva. Kena tuvana vomu masiku kamba vaka sikwe. <sup>6</sup> Cwale he, Kanji tu lali uvu vonse muvapangira. Kono, Tuzwire haku tondera ni kuli ntontoleza. <sup>7</sup> Kwavo va lala vapanga bulyo muma siku, mi avo vakolwa vapanga vulyo hama siku. <sup>8</sup> Kono kuvona tuvana ve zuva, tu zwire ha ntonda. Tu vike chizwato che chizuva che tumero ni lato, ni, kuwani, ye mihupulo ye tukuluho ikezite. <sup>9</sup> Kakuti Ireza kena avatu vumbiri ku sinyeha, kono ku tambula i puluso cha Simwine wetu Jesu Keresite. <sup>10</sup> Njiyena yavatu fwiri iri kuti, kamba tutonda kamba tulere, ni tuhale hamwina naye. <sup>11</sup> Cwale he mususuweze zumwi ni zumwi ni kulizaka zumwi ni zumwi, sina nikale hamu kwete kupanga. <sup>12</sup> Tumi vuza, mizwale, kulemuha avo vaseveza mukati kenu

ni vena he wulu lyenu kwa Simwine ni ba mi tondera. <sup>13</sup> To mivuzza kuva kuteka ahulu mwi rato vakeñi che mitendo yavo. Muve he konzo mukati kenu. <sup>14</sup> Tumi yereza, mizwale: mukalimere vasayi cho kwi chilira, mususuweze vachi va vola mwisule, mutuse va katere, muve neza kuvonse. <sup>15</sup> Muvone kuti kakwina yo voza vuvi cho vuvi kwani ne ni. Kono, mwichilire china hande ku zumwi ni zumwi ni kuvonse. <sup>16</sup> Musangwe honse. <sup>17</sup> Murapere ni musa siyi. Muzintu zonse muhe vuitumero. <sup>18</sup> Ka kuti iyi nji tato ye Ireza mwa Keresite Jesu kuvo se. <sup>19</sup> Kanji mu kanini Luhuhu. <sup>20</sup> Kanji mu yanzirizi vu porofita. <sup>21</sup> Mulike zintu zonse. Mukwatirire kuzina hande. <sup>22</sup> Mukanine kuvoneka ko vuvi. <sup>23</sup> MI Ireza we konzo a mipange ahulu ku jolola. Mi luhuhu lwenu lonse, mozo ni muviri u vonekiswe cho kusa nyazahala cho kukeza kwa Simwine wetu Jesu Keresite. <sup>24</sup> Yo sepahala jiyena ya va misumpi, iye hape yasana ka pange ichi. <sup>25</sup> Mizwale, mu tulaperere naswe. <sup>26</sup> Mulumerise mi zwale vonse cho kuchuchuna ku jolola. <sup>27</sup> Ni kumbira kwenu cha Simwine kuti ili ñolo livalirwe mizwale vonse. <sup>28</sup> Mi chisemo cha Simwine Jesu Keresite chi ve nanwe.

## 2 Mateselonika

<sup>1</sup> Paulusi, Siluvinia ni Timoti, kwi keleke ya Mateselonika mwe Ireeza Ishwetu ni Simweni Jesu Kirisite. <sup>2</sup> A chishemo chive na nwe ni inkozo izwa kwe Ireeza Ishetu ni Simwine Jesu Kirisite. <sup>3</sup> Tuswanela inako yonse kuli tumela kwe Ireeza chenu, vakweetu. Ichi chintu chi swanele hande, kakuti ntumelo yenu ikula ahulu, mi ni lato mukati kenu li kwatinsene hamwina. <sup>4</sup> Mi iswe tuvene tu wamba cha kuli kuumusa ku amana namwe mu kati ke keleke ye Ireeza. Tu wamba cha kuva ni inkuloonde ni ntumelo mu masukuluko enu onse. Tuwamba cha ku nyanda ku mwina mu kuli. <sup>5</sup> Ichi chi supo cha Ireeza cha ku luka kwe inkatulo. Mani mani a kuti mwiziviwe cha ku swanela kwa muvuso we Ireeza umu sukulukili. <sup>6</sup> Ku lukite kwe Ireeza ku vozekeza masukuluko kwavo va ku sukulula, <sup>7</sup> mi ni ku mi lukulwila va sukulukite na swe. Kapange ichi ha ku voneka kwa Simwine Jesu ku zwa mwi wuulu ni mañiloi cha maata akwe. <sup>8</sup> Cha malimi a mulilo u bukuka mwa vozekeze kwa va sezi Ireeza ni kwavo va kana ku tambula ivangeli ya Simwine Jesu wetu. <sup>9</sup> Ka va nyande imbazi ye sinyeho ku ya kwile ku zwa ha vusu bwa Simwine mwi kanya ni maata a kwe. <sup>10</sup> Ka chite ichi ilyo zuva chini neza kuti mwelyo izuva na tebwe ni vantu vakwe mi ni ku komokiwa kwavo vonse va muzumini. Ka kuti vupaki bwetu kwenu vu va zuminwa. <sup>11</sup> Keli linu ivaka naswe tulapela cho kusa kosoza ka chenu. Tulapela kuti Ireeza wetu na mivone chi mu swanezi cha ku sumpiwa kwenu. Tulapela kuti mwe zu zilize zi musaka zilotu ahulu ni musevezi we ntumelo cha maata. <sup>12</sup> Tulapela izi zintu kuti izina lya Simwine wetu Jesu li tembwe chenu. Tulapela kuti ka mutembwe chakwe, ivaka lya chishemo che Ireeza wetu ni Simwine Jesu Kirisite.

## Inkauhanyo 2

<sup>1</sup> Linu ku amana ni cha ku iza kwa Simwine wetu Jesu Kirisiti mi ni kuba hamwina kwetu mu kuba naye: tu mi buza, ba na swisu, <sup>2</sup> kuti kanji mu hweli ku sukuluka kamba ku sa lizuwa hande, mane nangati cheluho, cha mulaezo, nandi che ifnolo li boneka ku zwililila kwetu, ku kasika ubu izuba lye Ireeza chi lya sika. <sup>3</sup> Kanji mu zuminini ni heiba u mwina kumi chengelela mwi nzila ihi kamba ihi. Kono kete chi ku pangahala kwanda ku kangwa chi kwa sika, mi mukwame ya seena mulawo chali tondeza, mwana wa bu sinyi. <sup>4</sup> Uzu njeye yo kana nisana ni kuli nyamuna mwine cha kulwisa zonse zi sumpwa Ireeza kamba zi lapelwa. Chelyo i baka, wi kaala mwi itempele ye Ireeza ni kulibonekisa ubu nje Ireeza. <sup>5</sup> Ka mu hupuli kuti hani beena nanwe ni ba mi wambili izi zintu? <sup>6</sup> Hanu mwizi chimu woondete, kuti a boneeke bulyo he inako i shiyeme. <sup>7</sup> Kakuti i kunutu ya yasena mulawo chi i kwete kusebeze kale, kono kwina bulyo zumwi yo mu kaniise hanu mbwita cha zwiswa mu inzila. <sup>8</sup> Ku zwaaho ya sena mulawo mwa boneke, iye Simwine Jesu yete ne haye cho muhuuza wa ka holo ka kwe. Simwine mwa mu lete haseena chaku to ndeza kwa kwiza kwakwe. <sup>9</sup> Kwiiza kuya sena mulawo mu kube cha musebezi wa satani cha maata onse, zi shupo, ni zi komosi za maapa, <sup>10</sup> mi ni ku chenga kwa kwe konse ku sa lukite. I zi zintu ka zibe za bo ba

sinyeha, ka kuti ka na ba batambuli ilato lya bu sakusima kuti ba hazwe. <sup>11</sup> Ka cheli ibaka Ireeza na ba tumina musebezi u fosahele kuti ba zumine maapa. <sup>12</sup> Ma manimani a kuti bonse muba atulwe, abo ba sana baba zu mini busakusima kono ni ba hinda izanina mu zisa shiyeme. <sup>13</sup> Kono tu swanela kuleta buitumelo kwa Ireeza inako yo nse chenu, bana swisu ba sakiwa kwa Simwine. Kakuti Ireeza aba miketi kuba ba zi chelantu zihia che mpuluso mu kujolola kwa Luhuhu ni ku zumina mu bu kusakusima. <sup>14</sup> I chi cha ba mi sumpi kachili ka che ivangeli muwane i kanya ya Simwine Jesu Kirisiti. <sup>15</sup> Ku zwaaho, baana swisu, mu ziime cha kukola. Muhinde chizo chi mu ba lutwa, che inzwi kamba, cha Iñolo etu. <sup>16</sup> Linu a Simwine wetu Jesu Kirisiti iye mwine, ni Ireeza Itayo ya ba tu sa ki ni kutuha ku sa mana kwa ku humbulizwa mani ni bulotu bwa ku lisepa bwa ku buusu cha chi shemo, <sup>17</sup> ku humbuliza ni kutanga inkulo ze nu mumu sebezi mulotu ahulu ni Inzwii.

### Inkauhanyo 3

<sup>1</sup> Lyinu lya hanu, mu tu lapere, kuti lyizwi lya Mulimu li wole ku hwela niku ku tembwa, mu kwi kalile feela ni kweenu. <sup>2</sup> Mu lapele kuti kulukulula ku vuvi ni vatu vavi kakuti kena vatu vose veena i tumelo. <sup>3</sup> Kono mulimu, yese na mu kozo ni kuku vavalela kuyo fosahele. <sup>4</sup> Twina i sepo kwa mulimu chako, kuti mu vose mu pange ni ku zwila ku panga zintu zini mi laela. <sup>5</sup> A Ireeza a yendesa inkulo zenu kwi lato lya mulimu ne ku ku kolera Kelesite. <sup>6</sup> Lyahanu tu mi laela, bana nswisu mwi zina lya mulimu Jeeso Kilisite, kuti mu siye mwana nswisu yo wi kala kere feela ne ku sa yendelela ne chizo chimu wana kwetu. <sup>7</sup> Kakuli inwe muvene mwizi kuti kumu shiyamele kutu ziyanisa. Kana tuva hali mukati kenu uvu ba sena mulao <sup>8</sup> Mi kena tuva lyi zilyo za muntu ni tusa nzi lihile. Kwanda, tu vaseveze masiku ni musihali misevezi mikukutu mu manyando, kuti sanzi tuvi ni muziyo kwenu muvonse. <sup>9</sup> Tuva ku panga inzi isifi kuti katwina mulao. Kwanda, tuva pangi izi kuti tuve mutala kwenu, kuti tu mi ziyanise. <sup>10</sup> Hatu vena ni nanwe, tuva mi laeli, “heva umwi kasuni kuseveza, asazi alyi.” <sup>11</sup> Kakuti tu zuwile kuti vamwi va yenda feela mukati kenu. Kava sevezi kono bali chochomeza. <sup>12</sup> Lyinu vavo tuva laela niku va kooza cho kuwamba mwi zina lya Jeeso Kilisite, kuti va sebeze niva tontwele mi valye zilyo zavo. <sup>13</sup> Kono unwe, vaana nswisu, sazi mu mani i nkulo muku panga vulotu. <sup>14</sup> Heva kwina yasa kuteki ciwambo mwelyi i ñolo, mu mu tokomele mi sanzi mu vi ni chilikani naye kuti a swave. <sup>15</sup> Sanzi mumu hindi kuti chira chenu, kono mumu kalimele uvu mwana nswisu. <sup>16</sup> Mulimu ireeza we kozo iye mwine a mihe i kozo i nako yose, mwi nzila zonse. <sup>17</sup> Mulimu a ve ninwe mwese. U ku nje ku rumeresha kwangu, Paulusi, che yaza lyangu, nje chi supo cangu mwi ñolo lyimwe ne lyimwe. Bo buti muni mu ñolela. <sup>18</sup> Chi shemo nca mulimu Jeeso Kilisite chi ve nanwe mu vose.

## 1 Timotea 1

<sup>1</sup> Paulusi, muapositola wa Chrisite Jesu kuya che intaelo ya Ireeza mu hazi wetu ni Chrisite Jesu i nsepo yetu, <sup>2</sup> kwa Timotea, mwana we niti mwi ntumelo: Chisemo, inse ni nkozo izwa kwa Ireeza Ishetu ni Chrisite Jesu Simwine wetu. <sup>3</sup> Ubu muniba kukumbilili kuti upange hani bakukaya kwa Masedonia, wikale mwa Efese kuti uwole kuha intaelo kubamwi bantu kuti sanzi baruti intuto ingi. <sup>4</sup> Nikusa ntekeleza kuma tangu asa mani amasika. Izi zileta kupanga inkani kuhita kutusa mulelo wa Ireeza, iri che ntumelo. <sup>5</sup> Hanu cwale ma manimani omu lao i rato lizwa kwi nkulo i chenete, kuzwilila kwi izwalo ilotu, ni kuzwililila kwi tumelo ina buniti. <sup>6</sup> Bamwi batu baba kwangi kusika hama manimani kono baba sanduki nokutanga kuwamba zobuhafu. <sup>7</sup> Basaka kuba maruti womu lao, kono kaba zuwi sisi zibawamba kamba ondelelwa hateni. <sup>8</sup> Kono twizi kuti mulao wina hande haiba zumwi usebelisa chenswanelo <sup>9</sup> Mi tuzizi izi, kuti mulao kena uba pangilwa muntu yolukite, konu kubantu ba sena mulao niba kwenuheli, nibantu basena Ireeza, niba panga zivi, mi nabana ba sezi Ireeza niba fosahere. Linu uba pangilwa bana behaya bashemi bavo baba kwame nibanakazi, ni behayi. <sup>10</sup> nibantu bapanga zabushahi, mukwame yozumina kusandulwa mwanakazi, abo bahiba bantu nikubapanga batanga, ba pono, ipanki za mapa, mi nizintu zose zisena initi niku lwanisa intaelo. <sup>11</sup> Izi intaelo ziyendelela ni kanya ye linzi lifuyawile kwa Ireeza ilyo lini bahewa. <sup>12</sup> Nili tumela kwa Chresite Jesu iye Fumweetu. Aba ni konzi, kakuti aba ni hindi kuti ni sepahala, mi nikuni bika ha musebezi. <sup>13</sup> Nibali nimunyazerizi, ni munyandisi nimu kwame yonyandisa. Kono niba tambuli chishemo ka kuli niba kupanga nini sezi nikusazumina. <sup>14</sup> Kono chisemo cha fumwangu chiba kezi kwangu ni tumelo mwi lato lina kwa Christ Jesu. <sup>15</sup> Ili ifusa lisepahala ni kuswanela mi nikuzuminiwa, kuti Christ Jesu aba kezi mwifasi kwiza kuhaza mu eza libi. Ime nji niwa mamani mani kwezi. <sup>16</sup> Mi keli ibaka niba hewa chisemo, kuhitiliza, Christ Jesu u wola kutondeza kuli keta kose. Aba pangi izi nili mutala kwabo basepa kwali mubuhalo bunhya. <sup>17</sup> Linu ku Mulena wakale, ya saboli, ya sabonwa, Ireeza yenke, ikute, nikanya, nikutwala kusa manu mani. Amen. <sup>18</sup> Nibika iyi intaelo ha busu bwenu, Timotea, mwanangu. Nizipanga izi kuyendelela ni chipolofita chiba wambwa kwako, iri kuti kupangila kuti winjile mwindwa indotu. <sup>19</sup> Uzi pange izi kuti ube mwi tumelo ni izwalo ilutu. bamwi batu baba kani izi ni kumina ka kuti lye ntumelo. <sup>20</sup> Baswana sina Imenca ni Alexandere, abo vaniva tambiki kwa Satani iri kuti valutwe kusa yefula.

## Inkauhanyo 2

<sup>1</sup> Hakwina bulyo cha matangilo, Ni mi susuweza kuti inkupo, intapelo, kulapelela, ni bwitumelo zi pangwegirwe vantu vonse, <sup>2</sup> ku malena ni vonse vena mwi nkamayiso, njokuti twikale mwi nkozo ni vuhalo vu ntontwele mwi nzila ya chilumeli ni butokwa bwako. <sup>3</sup> Ichi chi lotu mi chitamwirwe ha vusu bwa Ireeza muhazi wetu. <sup>4</sup> Usaka kuti vantu vonse va hazwe mi veze kukwi ziva vuniti. <sup>5</sup> Kakuti kwina Ireeza

yenke, ni muzimanini yenke fela wa Ireza ni wa vantu, mukwame Kreste Jesu. <sup>6</sup> Ava litambiki iye mwine kuva ntifo ku vantu vonse, sina kuva vupaki he nako iswanera. <sup>7</sup> Chowu mulero, Ime, ni mwine, niva pangwiwa muwambi ni muapositola. Nimi wambila initi. kani chengi. ni muluti we chisi mwi ntumelo ni mwiniti. <sup>8</sup> Chobulyo, ni saka vakwame vonse muzivaka zonse va lapele cho kunyemuna mayanza a jolola ni kusena vu vengi kapa kukanana. <sup>9</sup> sina vulyo, Nisaka vakulwakazi vakuzwata zi zavallo zina hande, va liwonde ni kuli vakanya. kanji va hosi i sunki zo kuwula kapa igauda ni zizwato zi dula. <sup>10</sup> Nisaka kuti va zwate zi voneka hande za vakulwakazi va tondeza zintu za Ireza kuya che misevezi milotu. <sup>11</sup> Mukulwakazi uswanela kuli tuta na tontwere ni mukukwi chilira. <sup>12</sup> Kani zuminini mukulwakazi ku ruta kapa kuha mulawo hewulu lyo mukwame, kono kuhala mu ntotwele. <sup>13</sup> Njaho Adama ava tangwa ku vumbwa, njikwiza eva. <sup>14</sup> Mi Adama kena va chengwa, kono mukulwakazi ava chengwa kuhitilira ni ku panga chivi. <sup>15</sup> niha kuva vulyo, kahazwe cho kupuluha vana, haiva ni va zwila havusu mwi ntumelo ni mwi rato niku jolozwa ni muhupulo u hupula hande.

## Inkauhanyo 3

<sup>1</sup> Muwambilo uwu we niti: Haiva zumwi muntu usaka kuva muruti, ulakaza mutendo mulotu. <sup>2</sup> Imihe muruti uswanela kuva niku-sanyazahala. Uswanela kuva mukwame wamwanakazi umwina. ave niku liwonda, nikuzuwisiza, nikulikuteka, yosaka kutabmula vayene, yowola kuruta. <sup>3</sup> Kanji avi chindakwa cha vunjwala, insi wekondo, kono yolukite, wina inkozo. Kanjavi muntu yosaka mashelefi. <sup>4</sup> Yo yendisa vezuvo yakwe nenza. ni vana vakwe vamuzuwe mi vamuhe ikute liyere. <sup>5</sup> Mukuti haiva muntu kezi kutomela vezuvo yakwe nenza, mwatokomele vule ikeleke ya Ireeza? <sup>6</sup> Imi nsazi avi muntu yozwa hakuzumima, pona cholikumusa mane akawile mwikatulo ya diavulusi. <sup>7</sup> Ave yopakwa nenza nivantu vena hanze, ilikuti kanji awili mumaswavi nikaswa ka diavulusi. <sup>8</sup> Vahikana, kakwiziva, vave nivutali, isiñi vendimi zovere. Kanji vavi zinywi zavunjwara ahulu kamba nikulya ahulu. <sup>9</sup> Vavike ininti ive zivahazwa yetumelo ni zwalo linjolola. <sup>10</sup> Vaswanela kutatuvwa lwetazi, linu valukela kuhewa musevezi kakuli vashiyeme. <sup>11</sup> Nivanakazi chenzila iswana bave nikuzuwisisa. Kanji bavi vasoha. Bave nikuliwonda, imi bave nikulwonda nikusepahala muzintu zonse. <sup>12</sup> Muhikana wekeleke ave ni mwanakazi yeke. Vayendisa hande bana bavo ni mazuvo avo nenza. <sup>13</sup> Mukuti kwavo vavasebezi hande vakwete musevzi mulotu, kavawane mazimo malotu, ninguzu zina mwa Kereste. <sup>14</sup> Niñolela izi zintu kwako, imi nisepa kwiza kwenu hahanu. <sup>15</sup> Linu heva niniyeha, nimiñolera ili kuti mwizive mumuswanela kwi kalila muzubo ya Ireeza, Iliyo Ikeleke ya Ireeza yohala, mutomo ni tuso ihala. <sup>16</sup> Mi Indava isakananwa yive zivahazwa ikunutu yakulapela ikando: “Aba vonahazwa munyama, abavikwa yolukite muluhuhu, abavonwa ni mañiloyi, abawambwa kumansi, abazuminwa mwikanda, imi avahindilwa mwinkanya.”



## Inkauhanyo 4

<sup>1</sup> Linu Luhuhu luwamba cha kujoloza kuti chenako za kuvusu vantu vamwi kavasiye intumelo mi vawonderele kwi huho ichenga ni kuntuto za madimona, <sup>2</sup> cha kuliha kwamapa. Mihupulo yavo vene ka hiswe chensipi ihisa. <sup>3</sup> Ka vakanise kusesa ni kutambula zilyo za vavumbi Ireeza za kuliyavela cho kulitumela mukati kavo vazumine ni bezi initi. <sup>4</sup> Linu zintu zonse zibavumbwa kwa Ireeza zilotu. Kakwina chetuhinda chempo ya kulitumela chiolwa kukanwa. <sup>5</sup> Chakuti i vajolozwa chenzwi lya Ireeza ni tapelo. <sup>6</sup> Haiva no vika izo zintu havusu bwa vakwako, kove u muhikana molutu wa Jesu Kelesite. Chakuti u vabalelwe camanzwi etumelo ni ntuto zilutu zove chilili. <sup>7</sup> Kono ukanine matangu efasi asakwa ku vachembele. Nihakuvabulyo, u lirute umwine chavulapeli. <sup>8</sup> Chakuti ituto ya muvili yina intuso inini, kono intapelo ina intuso muzintu zonse. Ikwete isepiso ya buhalo bwalyahanu ni buhalo buchikezite. <sup>9</sup> Vulumiwa ubu busepahala mi buswanela kuamuhelwa kwizwile. <sup>10</sup> Chakuti nji chona echo hatu yanda ni kuseveza a hahulu. Chakuti twina isepo kwe Ireeza yo hala, i ye yali muhazi wa vantu vonse, kono sihulu avo vazumine. <sup>11</sup> Wambe mi ulute izi zintu. <sup>12</sup> Kanji kuvi ni muntu yo kushuvula chabuhwire bwako. Chobulyo, u ve umutala kwavo vazumine, cha kuwamba, cha kulionda, che laato, che kusepahala ni cha kujolola. <sup>13</sup> Konzi Ha chinasika, u ve kuzakubala, ni ku kususuweza, ni ku kuluta. <sup>14</sup> Kanji u keshevisi impo i na kwako, i vahewa kwako cha bapolofit, chakubikwa mayanza e kopano ya bakulwana venkeleke. <sup>15</sup> U tokomele zintu zi. Ube muzili, chakuti izwelopili yako i lemuhiwe chavantu bonse. <sup>16</sup> U he itokomelo inkando kwako umwine ni kukuluta. U zwilehabusu muzintu zi. Linu chakuchita bulyo, kolihaze u mwine mane bulyo nabo batekete kwako.

## Inkauhanyo 5

<sup>1</sup> Kanji ukalimeri mukwame mukulwana. Kono, umuhinde naye uvu avali nji veso. Uhinde milombwana uvu vache banko ve chikwame. <sup>2</sup> U hinde vakulwakazi uvu vashemi ve chanakazi, mi vakazana uvu bachizyako muku jolola konse. <sup>3</sup> Mukuteke va shaminine, vashamine luli. <sup>4</sup> Kono haiva va shamine vena vana kapa vehwa, muva siye pili va tondeze ikute mu mazuvo avo. Muva siye va vozekeze vashemi vavo, kakuli ichi chi taviswa kwe Ireeza. <sup>5</sup> Kono yo shamine ze niti mi ushele yenke. U vika insembo yakwe kwa Ireeza. Inako yonse ushala ni nkupo ni ntapelo masiku ni kamwi konse. <sup>6</sup> Nihakuva vulyo, mukulwakazi uhala che minyaka ufwire, nanga ha sihala. <sup>7</sup> Mi ukutaze izi zintu ili kuti kanji vavi niku nyazwa. <sup>8</sup> Kono haiva zumwi ka lukisezi va kwakwe, sihulu vana vo mwi nzuvo yakwe, wa sampula intumelo mi uswana fela sina ya seli mulumeli mane ni kuhita. <sup>9</sup> Muzuminine mukulwakazi ku ñoliswa kuva hava ni zirimo zi sena mwikonde yezirimo ziska he kumi lyeminwe ye yaza lyonke ni chonke, yo sestwe kumukwame yenke. <sup>10</sup> Uswanera kwiziveka che mitendo milotu, nangati kuti yo kuvavalera vahwire, kamba avali ku amuhera bazwahule, kamba ava kushanja matende ava vazumini, kamba ava tusi ni kuhoza vanyandiswe, kamba avali kulitulite ku misevezi yonse milotu. <sup>11</sup> Kona kuva fwamini vasiri bahwire, uva kanine kuva ñola ha mukoloko. Kakuli chiva tambika miviri yavo kwi takazo kulwisa

Keresite, va sisaka kusesa. <sup>12</sup> Cheyi inzira baliwana va ni mulandu kakuli chiva chola itayero ya matangiro. <sup>13</sup> Hape valiwana chive na kumilapero ya maswaniso. Vatanga kuya vuzimboka zimboka muma zuvo ni mazuvo. Insiñi fera kusanduka vasekali, kono vasanduka va soha ni valeta i fapano. Vatanga kuwamba zintu ziva swaneri kuwamba. <sup>14</sup> Iri linu nisaka vakulwakazana kusesa, kuzala vana, ku vavalera mazuvo, iri kuli kanji vahi muvilala chivaka cho kutu nyasa mukupanga vuvi. <sup>15</sup> Kakuli bamwi chivava sanduki kuya kwa Satani. <sup>16</sup> Haiva kuvamwi vanakazi vazumine kwina wina vava shaminini, mumusiye ava tuse, iri kuli ikereke kanji i lemezwa ahulu, iri kuli ikereke i tuse vana vasena vava tusa. <sup>17</sup> Uzuminine va kulwana va vusa hande kuti vahewe ikute kovere, sihulu hulu avo vasebeza mu linzwi ni mukuli ruta. <sup>18</sup> Kakuti iñolo liti, “kanji uviki muhala kukaholo ke mpulu chiyi kwete kusinza vuheke,” mi “Yoseveza uswanera itifo yakwe.” <sup>19</sup> Kanji utambuli muzeko u yama muntu mukulwana kwanda yokuti kwina impanki zo vere kamba zo tatwe. <sup>20</sup> U kalimere vapanga chivi havusu bwa vonse iri kuli vamwi valitute kiuvali. <sup>21</sup> Ime ni kulayera havusu bwa Ireeza ni havusu bwa Keresite Jesu mane vulyo nihavusu bwa mañiroyi aketetwe, <sup>22</sup> kuti u kwate inzi tayero nikusena kulikumusa mi kanji upangi chihi ne chihi cheva ni chiyaluluti. Kanji uli yaviri muchivi cho zumwi miuntu. Uvone kuti uli chenisa. <sup>23</sup> Kanji uzwiri havusu kunwa menzi vulyo. linu, u swanera kunwa ni waine inini kupangira ivumo lyako ni kulwalanga kwako. <sup>24</sup> Zivi zabamwi vantu ziziveka niku boneka hanze, mi vayenda muzili kuya mwikantulo. Kono zimwi zivi zichilira inako zana. <sup>25</sup> Chokuswana, Imwi misevezi milotu iyalukite ivoneka hekanza, mi yimwi kaioloi ku ungulwa.

## Inkauhanyo 6

<sup>1</sup> Musiye bahikana vonse vena kwi jokwe kukuteka vayendisi vavo che kute lyulonse. Vaswanera kuchita ichi iri kuti izina lya Ireeza ni tuto yakwe kanji zi nyaziwa. <sup>2</sup> Vahikana vena vayendisi vavo vachi vava zumini kavaswaneli kuva vuza ikute kakuli mizwale. linu, vaswanera kuva severeza monse ahulu. Kuva yendisi va tusiwa che misevezi yavo kuva zumine ni vasakiwa. Urute ni kotalusa izi zintu. <sup>3</sup> Mwendi zumwi uruta zi chichana mi katambuli itayero zetu zi sepahala, nji kuti, manzwi a Simwine wetu Jesu Keresite. Mwendi mane kava tambuli i tuto zitwala kuvu halo bwa Ireeza. <sup>4</sup> Uzo muntu uli kumusa mi kakwina chezi. nihakwina bulyo, u lwala cho kulyangana ni kukanana kuama ziyambo zi sena tuso. Azi ziyambo kazina ituso, ni muuna, ni mukutukana, ni mukuhupulera bantu vuvi, ni <sup>5</sup> hape pahazwa ifapano i mbilala za vantu va maano a volete. Va sanduka kuzwa kwi niti. Vahupula kuti vulaperi nje nzira ifumiza mutu. <sup>6</sup> Linu vulaperi ni kusepa che nkulo chifumu chi kando. <sup>7</sup> Kakuli kakwina chituva leti mwi Nkanda. Hape kakwina chituola kuhinda muili. <sup>8</sup> Linu, tuli tumere che zilyo ni zizwato zitukwete. <sup>9</sup> Hanu avo vasaka kuva vafumite vawiranga mumiiko, mukla swa. Vawiranga muma lava ovu hafu ni muzintu zi holofaza ni muzintu zonse zipanga vantu kuwira mu kusinyeha ni kufokola. <sup>10</sup> Kakuti i rato lya mashereñi njo muhisi we zivilala zonse. Vamwi vantu vazi lakamina ahulu chivavazwi mwi tumero mi chivavali hwezi avo

vene ni masakuluko mangi ahulu. <sup>11</sup> Kono inwe, vakwame va Ireeza, muzwe kwezi zintu. Mungane kuluka, vulaperi, kusepahala, irato, kuwonderela, ni kulikwata. <sup>12</sup> Mulwe inkondo i ndotu inkondo ye tumero. Mukwatirire kwi sepiso iya kuireisa mani iyo imuva supwa. I vaka lyechi kuti muvahi vupaki havusu bwe pankinzingi kwecho chili chiloto. <sup>13</sup> Ni miha iyi itayero havusu Ireeza, yo leta kuti zintu zonse zihale, ni havusu bwa Keresite Jesu, yava wambi chivali che niti kwa Potisi Pilato: <sup>14</sup> muvike hande itayero, nikusena kunyazahala, kusikira ha kuvoneka kwa Simwine wetu Jesu Kiresite. <sup>15</sup> Ireeza kezivahaze kuvoneka kwakwe he nako i swanera - Ireeza, yo Fuyaulitwe, inzo ziho zonke, Simwine yo vunsa, Simwine yo yendisa. <sup>16</sup> Njiyena yenke yasa fwi mi uhala mwi seri lisa loliwa. Kakwina muntu yo mulola kamba kumuvona. Kwali kuve ni kute ni ziho zisa mani. Amen. <sup>17</sup> Uwambire vafumi mweyinu inkanda kanji valikumusi, ni kusa vika i sepo yavo muchifumu, iri zintu zise kalilire. kono, vaswanera ku sepa mwe Ireeza. Utu newira vonse vuniti bwe chifumu kuti tulikole. <sup>18</sup> Uva wambire kuti banpange hande, kufuma mukupanga zintu zilotu, kuli yumbula, ni kusaka kuliavira. <sup>19</sup> Mweyo, inzira, muvali vikire musumo mulotu wezo zikezite, iri kuli niva kwatirire kuvuhalo sakata. <sup>20</sup> Timoteya, uvalalere icho chiva hewa kwako. Uzwe kwi ngambolo zo buholo ni kani zisa tusi chimwi checho chiva supa kuti ingana. <sup>21</sup> Vamwi vantu vawamba inzi zintu mi chivava zwi mwi tumero. Mi chishemo chive nawe.

## 2 Timotea

<sup>1</sup> Paulusi, muapositola wa Jesu Keresite chetato ye Ireeza, chakuya chesepiso ya vuhalo bwina mwa Keresite Jesu, <sup>2</sup> kwa Timotea, mwanangu yo sakahala: Chisemo, inse, ni inkozo izwilila kwa Ireeza Tayo ni Keresite Jesu Simwene wetu. <sup>3</sup> Ni litumera kwe Ireeza, uzo u ni vasebezezi kuzwililila ku basukulu wa vesukulu wetu, chakuya chezwalo lijolola, sina ha ni zwilile habusu kukuzeza mwitapelo zangu musihali ni masiku. <sup>4</sup> Sina mu ni zezera zinsozi zako, ni shukelwe ku kubona, chakuti ni zule chakusanga. <sup>5</sup> Ni vakumbuluswa chetumelo yako ikolete isa yangayi, iva hali chetanzi kubanyokokolo va Loisi ni vanyoko va Eunisi. Mi ni zumina kuti ihala ni kwako bulyo. <sup>6</sup> Ili nji vaka ha ni ku ku kumbulusa utimbe impo ya Ireeza ina kwako chakubikwa heulu mayanza angu. <sup>7</sup> Chakuti Ireeza kana a vatuhi luhuhu lwa lyowa, kono lwa ziho nilwe rato ni lwe kute. <sup>8</sup> Chobulyo kanji u swabeli vupaki bwa Nfumwetu, kapa ime, Paulusi, ni musuminwa wakwe. Nihakuva bulyo, u liyavele mu manyando a evangeli chakuya cha maata a Ireeza. <sup>9</sup> Nji yena Ireeza ya va tuhazi mi ni chatusumpa cha musumpiro u jolola. A vachiti ichi, isinyi cha misebezi yetu, kono chakuya chamihupulo yakwe ikolete. A vatuhi izi zintu cha Keresite Jesu pili inako neiseni kutanga. <sup>10</sup> Kono hanu intukuluhu ya Ireeza iva zibahazwa chakuboneka chamupulusi wetu Kelesite Jesu. I vali nji Keresite, ya vamanisi ifu ni kuleta buhalo busena ma maninizo che seli lya evangeli. <sup>11</sup> Hakwinabulyo ni vaketelwa bukutazi, buapositola ni buluti. <sup>12</sup> Chevakelyo name ni banyandi che zo zintu. Kono kaniswabite, chakuti ni zi uzo ye nizumine kwali. Mi ni bazumini kuti u wola kubika izo ze ni bamuhi kusikila izuba ilyo. <sup>13</sup> Uvike mutala wa mañusa o vazuwi kwangu, chetumelo ni ilato lina kwa Keresite Jesu. <sup>14</sup> Zintu zilotu izo Ireeza aba viki kwako, zivavalele cha Luhuhu Lujolola, luhala mukati kanko. <sup>15</sup> Wizi zintu izi, chakuti vonse vahala mwa Isia ba va ni futatili. Muchikwata echo kwina Figelo, ni Hemogene. <sup>16</sup> Mi Simwine ahe chisemo ku venzubo ya Onesiforo, chakuti hangi a vanikatulusi mi kana a vaniswabeli ha ni vena mumahaka. <sup>17</sup> Chevaka linabulyo, ha vena mwa Roma, a ba tukufalelwe kunisaka, mane na cha niwana. <sup>18</sup> Simwine a muhe kuwana chisemo chizwilila kwali mwelyo izuva. Ni mwinzila zonse za va nitusi mwa Efese, iwe uzizi hande.

## Inkauhanyo 2

<sup>1</sup> Cwale iwe, banangu, mukozwe mu chishemo cha na mwa Krete Jesu. <sup>2</sup> Mi ni zintu zimwa zuwa kwangu hakatu ke mpaki zingi, muzi tambike ku vantu va sepahala vete va wole ku luta vamwi hape. <sup>3</sup> Munyande movukavo - vukukutu neme, sina ili isole lyi shiyeme lya Krete Jesu. <sup>4</sup> Kakwina i sole lyi seveza nili suminwe muzintu zovunu vuhalo, kuti a tavise wina he wulu lyakwe. <sup>5</sup> Mi hape, haiva zumwi wi zuziliza kuva yo tiya, kazwatikiwa i kuwani yo mushukwe haisi ha yenderera ni milao. <sup>6</sup> Mi itukero yo mulimi yo seveza ahulu kuti atambule inkavelo yakwe ye zimelantu kumatangilo. <sup>7</sup> Hupule chini

wamba, kaho Ireeza kamihe inkutwisiso muzintu zonse. <sup>8</sup> Muhupule Kreste Jesu, kuzwa kwi mbuto ya Davida, yava vuse kuvamwi va fwire. Ichi chiya che ñusa lye ivangeli yangu. <sup>9</sup> Kecho ni nyanda mane kusika he nako yo kusuminwa sina ni chisinyi. Kono linzwi lya Ireeza kali suminwe. <sup>10</sup> Yahaho niva nyandi muzintu zonse kwavo vava ku ketetwe, kuti niva wole kuwana impulsu ina mwa Kreste Jesu, ni nkanya iya ku mamanani. <sup>11</sup> Ichi chiwambo chi sepahala: “haiva tuva fwi naye, ka twikale naye hape. <sup>12</sup> Haiva tu wonderela, katu vuse naye hape. Haiva ni tu musampula, katu sampule naye. <sup>13</sup> Haiva katu sepahali, ushala na sepahala, kakuli ka woli ku lisampula iye mwine. <sup>14</sup> Uwondelele kuva hupulisa ke zi zintu. Uva kalimele havusu bwe ireeza kuti kanji va lilwisi ku amana ni ziyambo. Kelyi vaka kakwina chintu chimwi cho vutokwa. Kelyi vaka kwina kusinya sinya kwavo va teka. <sup>15</sup> Pange chi woleka kuti uve zumwi wa zuminwa kwa Ireeza, muveleki u sena cho kuswava, yo luta inako yonse inzwi lye niti. <sup>16</sup> Uzwe kwi ndava zo kuwamba wamba, zimi twala kuku nyazeleza ku mizwisa mwi nzila ina hande. <sup>17</sup> Ku wamba kwavo kaku yende. Mukati kavo va Hymenaeus nima Philetus. <sup>18</sup> Ava nji vakwame va sena vava zuwa vuniti. Va wamba kuti ku vuka kuvafwire ckiva pangahali kale. Va chinca i ntumelo i vamwi. <sup>19</sup> Ni hakuva bulyo, mutomo u kolete wa Ireeza uzimana. Ina nili swayo: “Simwine wizi avo vali vakwe” ni “yense u sumpa izina lya Simwine uswanela kuzwa ku zintu zi sena hande.” <sup>20</sup> Mwi nzuvo i fumite, kakwina fela imponto ze gauda ni silivera. Kwina hape impoto zo kuveza hazi kuni nizo kuvumba he rongo. Zimwi zina musevezi u sepahala, ni zimwi zisa sepahali. <sup>21</sup> Haiva kwina zumwi yoli joloza kuzi sa sepahali, muntu yo sepahala. Uvikitwe ku mbali, wina musevezi kwa Simwine, mi uvikilwe musevezi mulotu. <sup>22</sup> Uzwe kwi takazo zovu jaha. Tundamine zi chena, intumelo, irato, ni nkozo navo va sumpa kwa Simwine kuzwa kwi nkulo ichena. <sup>23</sup> Kono mukane vuhole ni mpuzo zi sena hande. Wizi kuti zi zala inkani. <sup>24</sup> Muhikana wa Simwine ka swaneli ku panga inkani. Kono uswanela kuva yo lukite ku vonse, yo wola ku ruta, ni kuwola ku lindila. <sup>25</sup> Uswanela kuva wa chisemo ku luta vana vasa zumini va mulwisa. Mwendu Ireeza kawole kuvaha kuvaka ke ntuto ye niti. <sup>26</sup> Kavave vena hande hape niku zwa mutuswa twa dyavulusu, kasumulaho okuva kwata che ntato yakwe.

### Inkauhanyo 3

<sup>1</sup> Mi mwizibe izi: muma zuba ama mani mani mukube ni nako inkunkutu. <sup>2</sup> Linu bantu mu baba kulisaka abo bene, basuni masheeleni, kuli tundumuna, kuli kumusa, bakanani, kusaba nikuti kubashemi, kusalitumela, ni kusachena. <sup>3</sup> Kababe nibasena ilato kubamwi, basayendereli, basohi, basaliwondi, benkondo, basasaki zilotu, <sup>4</sup> Kavave baveteki, vazuminine mitwi, vafosahere, vasaka ahulu minyaka isiñi irato lya Ireeza. <sup>5</sup> Kaba be ni mazimo e chi lumeri, kono kavakane maata acho. Uzwe kuvali abo vantu. <sup>6</sup> Mi bamwi kubali bakwame benjila mumazubo ni kuhapa banakazi vazihole. Ava nji vanakazi vezwire chivi mi vayendiswa itakazo zavo zivilala. <sup>7</sup> Aba vanakazi valutitirile inako yonse, kono kavakafwe kwiza kusika he niti ya maano. <sup>8</sup> Mwinzila iswana iyo Janesi ni Jambres yaba zimi kulwisa Mushe. Linu mwinzila iswana baruti ba mapa, bazimana niku

lwisa i niti. Bakwame ba bolete mumi nahano yabo mi bazobete kuze ntumelo. <sup>9</sup> Linu kese bazwile habusu kuya kule. Kabuholo bwabo mubu boneke kubonse, sina wabana bantu. <sup>10</sup> Kono inwe, mube chilili i ntuto zangu, munipangila, munihupulela, tumelo, inkulo inde, ilato, kuli koza. <sup>11</sup> kunyandiswa ni manyando, nezo ziba pangahali kwangu kwa Antioch, kwa Iconium, hape ni Lystra. Nibali kolisi mumanyando. Kuzwa muzintu izi zose, mi Simwine aba nihazi. <sup>12</sup> Bonse abo basaka kuhala mwizila ye Ireeza mwa Chrisite Jesu kaba nyandiswe. <sup>13</sup> Bantu babi ni maapa kaba yende kububi luli. Muba chenge bantu bamwi kono nabo nabo nibachengiwa. <sup>14</sup> Kono iwe, wikale muzintu izo zobali tuti ni kuzozumina muzili. Wizi kozo kobali tuti kwali. <sup>15</sup> Wizi kuti kuzwililila kubunhyile ubezibi mañolo alipatite. Linu izi ziola kuku talifisa mwi ntukuluhu kuya che ntumelo mwa Chrisite Jesu. <sup>16</sup> Mañolo ose aba kenzi cha Ireeza. Mi lina ituso kuku luta, kuku sikuluha, ku kusikiulula, niku luta mwi niti. <sup>17</sup> Iyi ina bulyo kuti mutu wa Ireeza a shiyame, nikuli tukiseza misebezi ina hande.

## Inkauhanyo 4

<sup>1</sup> Nikuha itaela ikolete havunsu bwa Ireeza ni Kreste Jesu, yente na atule vahala ni vafwile, bakeni chaku livonahaza kwakwe mwipuso: <sup>2</sup> Ukutaze Inzwii. Ulitukiseze mukuwoleka niha kusawoleki. Unyanse, Ukalimele, Ususuweze, nikulonde ni mukuruta. <sup>3</sup> Linu inako ikezite iyo vantu muvakangwe intuto yeniti. kono. kavali kunganyize maruti vayenderera ni takazo zavo. <sup>4</sup> kavasike mantwi abo kuti kanjivazuwi vuniti. Kavazwe mukuzuwa initi, imi muvayembulukele kumatangu. <sup>5</sup> kono iwe, ulikwate muzintu zonse. Ulikoze muvukavo, upange musevezi wavu buleli. wizuzilizize isevezo yanko. <sup>6</sup> Kakuli nive tiliwa kale hanze, Inako yangu yakuyenda chiyasika. <sup>7</sup> nivalwi ikondo indotu; nivasiki kuma manizo; niva viki intumelo. <sup>8</sup> Ikuwani yakuluka ivikilwe ime, Ni Simwine yo iye muatuli, yente naka nihe mwelina izuva, kono isinyi ime neke, kono navo bavasaki kuvonahala kwakwe. <sup>9</sup> Upange mo wolela kwiza kwangu cho kulitahanera. <sup>10</sup> Demasi avanisiyi. Kakuli usaka zekanda yahanu imi avayendi kwa Tesalonika. Kresensi avayendi kwa Magatia; imi Tite avayendi kwa Dalmatia. <sup>11</sup> Mbwiteli Luka njowina name. muhinde Mareka mwize naye wina intuso kwangu kuwamana mowu musevezi. <sup>12</sup> Nivatumi Titiko kwa Efese, <sup>13</sup> Uniletele ijasi linibasiyi kwa Troasi kwa Karpo. wize nalyo, ni mbuka, sihulu izo za hamandalo anoletwe. <sup>14</sup> Alexandere mufuli we zintale zekopa avapangi zintu zifosahele kwangu. Ireeza mwa muvozekeze kuyenderela ni mitendo yokwe. <sup>15</sup> Nawe uzwe kwali umutokomere, Mukuti ulwisa mazwi etu. <sup>16</sup> mwina iniva litavilili, vonse vavanisiyi. mi kanji nizi valirwa kuvali mulandu. <sup>17</sup> Kono Simwine avazimani name niku nikoza ili kuti, mukati kangu, ilikuti ku kutaza kwangu kuwole kwizuzilizwa. ilikuti vechinsi vawole kuzuwa. niva hazwa mumilomo ivandavu <sup>18</sup> Simwine mwani lukulule muvuvi vonse mi imi chebaka lyemupuso yewulu. kwali kuve ni kanya kuya uko kusamani. Ameni. <sup>19</sup> Ulumelise Pulisila, ni Akwila, nivezuvo ya Onesiforosi. <sup>20</sup> Erasitusi avashali kwa Makorite. kono nivakasiyi Trifimosi kwa Mileta nalwala. <sup>21</sup> Ulike mo wolera kukeza maliha ni aseni kusika. Eubulo uku lumelisa, Ni Pendenisi, Linasi, kalaundia, ni

mizwale yonse. <sup>22</sup> Imi Simwine ave ni luhuhu lwako, Nichisemo chive nanwe.

## Tite

<sup>1</sup> Paulusi, mutanga we Ereenza ni mutumwa wa Jesu Kereste, ke tumelo ye ereenza ni Vatu Vaketetwe ni zivo ye niti izumizana ni vurumeri. <sup>2</sup> Iva Vena i sepo yo vuhalo vusamani vwe Ereenza, iye a sa chengi, ava sepisi pili izinako niziseni kuva kwateni. <sup>3</sup> Ke nako iswanera, cha patulula lizwi lyakwe lyava nihi kuti ni lilete. Ni va tendi vuti kuya ke tayero ye Ereenza Muhazi wentu. <sup>4</sup> Kwa Tite, mwana mwitumelo ye niti yetu. Chisemo ni nkozo izwa kwe Ereenza Eshetu ni Christe Jesu Muhanzi wetu. <sup>5</sup> Keli evaka niva kusiyi mwa Kerete, kuti uva kanye zintu zisa manite ni keta vayetereri kayedisi mwi tolopo muni va kucho. <sup>6</sup> Muyetereri u swanela kusa nyazahala, mukwame wa mwanakazi umina, ni vana bakwe vaswanela kusepahala basiye kunyaswa cho vuvi ni kuvula ikute. <sup>7</sup> Inswanelo ku muyendisi, muyendise we zubo ye Reenza, kusanyazahala. Uswanela kusa zuweka kapa kulinyemuna. U swanela kusabenga benga, kasaneli kutwaela kunywa iwaine, isinyi wenkondo, ni kusha lya hahulu. <sup>8</sup> Nihakwina vulyo, uswanela kuwola kutambula vene, mulikani wa zilontu. Uswanela kuba utalifite ulukite, vu ireeza, ni yo wolakulikwata. <sup>9</sup> Mi uswanela ku kwata ahuulu kulinzwi lisepehala liva rutwa, cho kuta kuti a wole ku susuwenza vamwi ni intuto ilotu ni kusikulula vose va mulwisa. <sup>10</sup> Kwina vantu vava sandukiri vangi, sihulu avo vo mupato. Mazwi avo kaena ituso. Valichenga ni kuhitisa watu mwi nzila isali njoyo. <sup>11</sup> Mi vaswanela ku zimikwa. Varuta ziva sa swaneli kuruta kutenda bufumu vufosahale ni kuhauhanya masika onse. <sup>12</sup> Umwina kuvali, utalilifite wavo, chati, “Makerete kuvasiyi kuchenga, vuvi ni ziñolozizi zitiza, mavumu makata.” <sup>13</sup> Iyi ndava ye niti, cwale muvasikulule luli kuti va ve ni tumelo izuweka. <sup>14</sup> Musiye kuteeka matangu a ma Juda kapa milayo ya vantu vasandula initi. <sup>15</sup> Kwavo va jolola, zintu zonse jolola. Kwavo va va sachenete ni va sazumini, ka kwina colola. Mi mihupulo yavo ni maikuto avo e zwile vuvi. <sup>16</sup> Vata kuti venzi Ireza, linu vamusapula muzitendantu zavo. Vena mitendo mivi nikusa zuwa. Ni musevezi milotu ivakanga.

## Inkauhanyo 2

<sup>1</sup> Kono iwe, wambe chi swanela itaelo ye tumelo. <sup>2</sup> Vakwame va kulwana va swanela kuli kwata, ni ku kutekeha, vena i nkutwisiso, vena tumelo izuweka, mwi lato, ni mukukola inkulo. <sup>3</sup> Vanakazi vakulite navo lukera kuli likwata, isinyi kusooha. Sanzi valihi ahulu kukunwya i waine ingi. Vaswanera kuruta zintu zishiyeme. <sup>4</sup> kuchitira kuti vawole kuruta vaana kazana muvaswanela kusakira vakwame vavo ni vaana vavo. <sup>5</sup> Vaswanela kuva ruta inkutwisiso, kujolola, kwiziva kuvavalela mazuvo, nikuti valivike kungsi lya vakwame vavo, vaswanela kutenda izo zintu kuchitira kuti linwi lye Ireza sanzi li nyanswa. <sup>6</sup> Mwizila iswana, susuweze valomwana kuti va talife. <sup>7</sup> Mwizila zonse mulivonise kuva vo mutala wa misevesi milotu. Mi horuta, vonise vuntu ni ku kutekeha. <sup>8</sup> Wambe linwi li jolola mi lisanyazahali, kucitira kuti valwisanisa vaswawe, kakuti kakwinazintu zivi ziva wola kuwamba kahetu. <sup>9</sup> Vahikana vakuteka va simwina



vavo muzintu zonse. Vaswanela kuva sangisa isinyi kukanana navo. <sup>10</sup> Sanzi vevi, kono va swanela ku tondeza intumelo indotu. Kuchitirira kuti mwinzila zonse vakutekise ituto lye Reza muhazi wetu. <sup>11</sup> Mi chisemo che Reza chiwa voneki kuvantu vonse. <sup>12</sup> Chituruta kukana vuvi vonse ni mihaliro ya minyaka ya hanshi. Ituruta kuhala cha kuzuwisisa, chaku shiyama, ni cha kulikanyisa ireza mwe zinu inako. <sup>13</sup> Heti tu lolete kuvusu kuti to tambule insepo i fuyaulitwe, kuvoneka kwe kanya ye Ireza wetu mukando ni Jesu Kreste muhazi. <sup>14</sup> Jesu iye mwine avali tambiki kwetu kuchitira kuti atuliulule ku vuvi bwetu ni kutu tenda va jolola, kwali mwine, vantu vavu tokwa vena inyotwa yaku chita mitendo milotu. <sup>15</sup> Wambe mi ususuweze izo zintu. Sikulule cha ziho sonse. Zanzi kuvi ni muntu yoku nyansiliza.

### Inkauhanyo 3

<sup>1</sup> Vahupilise kuli nera kuva yendisi ni mivuso, kuva zuwa, kuli tukiseza kupanga mitendo milotu. <sup>2</sup> Uva hupilise kusa nyefula zumwi, vasiye i nkani, kuzuminina vamwi kuva ni zira zavo, ni kuvonisa chishemo ku vonse vantu. <sup>3</sup> Kakuti hamwi naswe kena tuvali ku nahana zilotu ni kusechilira. Tuvali kuchengetwe ni kuva muzitamo ze minyaka isiyana ni ntakazo. Tuvali kuhala muvuvu ni muna. Tuvali ve zitoyo ni kuli toya zumwi ku zumwi. <sup>4</sup> Kono cwale kushiyama kwe Ireza muhazi wetu ni lato lyakwe kuvantu livavoneki, <sup>5</sup> kena ivali che mitendo ya kushiyama itu va pangi, kono kechishemo chakwe kuti ava tu hazi. A vatuhazi che kushajiwa ko kuzalwa chinja ni kusandulwa vuhya cho Luhuhu lu Jolola. <sup>6</sup> Ireza cho vufumu ava chunki Luhuhu lu Jolola hentu cha Muhazi Jesu Keresite. <sup>7</sup> Ava pangi inchi ili kuti, kuwana kunyemunwa ke chishemo, katu wole kuva vayoli ve sepo yo vuhalo vusa mani. <sup>8</sup> Iri ñusa lisepahala luli. Nisaka kuti u wambe cha vundume kuamana nezi zintu, iri kuti avo va sepete Ireza vave ne sepo hami tendo mirotu yava viki havusu bwavo. Inzi zintu zi lotu ni kuvozekeza ku vonse vantu. <sup>9</sup> Kono usiye inkani zo vuholo ni masika ni kukanana ni kuzeka kuamana ni mulao. Izo zintu kazina intuso mi kakwina chizi vozekeza. <sup>10</sup> Ukanine yense yo leta i kauhano mukati kenu, kuzwa ha yonke kamba zo vere inkalimero, <sup>11</sup> mi wizive kuti uzo yenke chava sanduki kwi nzira i shiyeme mi u panga chivi ni kuli atula iye mwine. <sup>12</sup> Hani tuma Atemasi kamba Tayichisi kwenu, uhwere ni kwiza kwangu kwa Nikopolisi, uko kuni vali keteri kuke kala hamaliha. <sup>13</sup> U hwere ni ku tuma Zenasi, i chaziva mu mulao, ni Apolosi, cho mukwa ukuta kuti kanji vavuli chimwi. <sup>14</sup> Vantu ventu vaswanera kulituta kuva muzintu ze mitendo milotu isaka zintu haho iri kuti kanji ve kali nivasena misero. <sup>15</sup> Vonse avo vena name vaku lumerisa. Ulumerise avo va tusaka mwi tumero. Chishemo chive nanwe mwenze.

## Filimoni

<sup>1</sup> Paulusi, muhikana wa Jesu kereste, ni mukulwe Timoteya ni Filimoni, mulikanetu yo sakiwa, mi ye tuseveza naye, <sup>2</sup> ni Alufeya nchizyetu, ni Alukipusi i sole kuninetu, ni ku nkeleke i kopanela munzubo yako. <sup>3</sup> Chisemo chi ve kwenu ni nkozo kuzwila kwe Reeza Isheetu ni Jesu Kereste Simwine wetu. <sup>4</sup> Ime i nako ni nako ni litumela kwe Ireeza wangu. Ni mi sumpa mwi ntapelo zangu. <sup>5</sup> Ni va zuwi ze lato ni chisemo chi mwina na cho kuzwila kwa Jesu Nfumwetu ni kwavo vonse va zumine. <sup>6</sup> Ni lapela kuti chi likani che ntumelo yenu chive chi kolete che nzivo ya zintu zonse zilotu nzina kwetu cha Jesu Kereste. <sup>7</sup> Cho kuti nive ni kusanga ni kwombwa- ombwa che lato lyenu, vakeni che nkulo za varumeli zi pumulele kwenu, vaa kwangu. <sup>8</sup> Nihaike, nihakuvavulyo ni na ziho cha Kereste ku milaya kutenda zi muswanela kutenda. <sup>9</sup> Vakeni che lato, ni kumbila kwenu - niha kuvavulyo I me, Paulusi, mukulu-kwame linu yo suminwe cha Jesu Kereste. <sup>10</sup> Ni mikumbila kuamana ni mwaanangu Onesimusi, u zo ye ni vapepi ne ni suminwe. <sup>11</sup> kakuti inako imwi kana a vena intuso kwenu, kono hanu chena intuso kutuvonse kwenu ni kwangu, <sup>12</sup> Ni vamutumini kwenu hape, iye yeli inkulo yangu. <sup>13</sup> Ni lakaza kuti ne ni vamuviki kunu kwangu, chokuti a ni na mumawenge chevaka lye nzwi. <sup>14</sup> Kono kena ni vasaki kutenda chimwi ni chimwi kusena maikuto enu. Zile anisaka inkezo zenu zilutu kuzwa kusalukite kono cha maikuto malutu. <sup>15</sup> Kono chovulyo a va kauhanywa kwenu chenako zana, chokuti muwole kumuvoza hape kuyakwile. <sup>16</sup> Kete na ve muhikana hape, kono yo hita muhikana, muukwaangu yo sakahala. Yo sakahala sihulu kwangu, ni ahulu kwako, konse ni mwinyama ni kwa Simwine. <sup>17</sup> Cwale hova name sina umukwangu, u mwamuhele mweti njime. <sup>18</sup> Niheva a va kuchiti vuvi kapa a va koloti chimwi kwako, u chilihise kwangu <sup>19</sup> Ime, Paulusi, ni ñola izi che yanza lyangu: Ka ni kulihe hape. Isinyi ku ni wambila kuti mu ni kolota inwe muvene. <sup>20</sup> Ee Muukwaangu, ni pange che chisemo ku Siimwine; he impumulo mwinkulo yangu cha Kresite. <sup>21</sup> Isepo kuamana ni ikute lyako, Ni kuñolela. Nii zi kuti kaupange mane kuhitilila mo ni kumbilila. <sup>22</sup> Chenako i swana, ni lukiseze inzuvo ya beene, Aho ni na insepo kuti che ntapelo zenu ka nihewe kwenu hape. <sup>23</sup> Epafrasi, mukwangu mwintolongo cha Jesu Kresite, u milumelisa. <sup>24</sup> Ni Mareka, ni Aristarko, Damasi, ni Luka, va likani vangu kumusevezi. <sup>25</sup> Chisemo cha Simwine wetu Jesu Kresite chive ni luhuhu lwenu. Amen.

## Maheberu

<sup>1</sup> Kuntanzi Ireeza abawambi kubashemi betu chabapolofita, chenako ziingi ni munzila zishelene. <sup>2</sup> Kono munzila zamazuba amanmani, abawambi kwetu cha Mwanakwe yabaketi, kuba swaana wazintu zonse. Ireeza hape ababumbi Inkanda chakwe. <sup>3</sup> Nji yobenyisa ikanya ye Ireeza, muchibumbantu chena muchili. Mane uwondise zintu zonse hamwina chalinzwi lyaziho zakwe. Heti chamana kujoloza zive, nekala hansi kwiyanza lyabulyo lya Nfumwetu wakwiwulu. <sup>4</sup> Ababi sina mukando kumañeloi, sina izina lyabayoli halishiyeme kuzamba mazina abo. <sup>5</sup> Chakuti Ireeza kanabachiwambi kumañeloi, “U Mwanangu, sunu chinaba ni Iso?” “Kanibe ni mushemi kwali, imi iye mwabe mwanangu?” <sup>6</sup> Hape, Ireeza haleta bana bentanzi munkanda, nati, “Wonse mañelo a Ireeza atameha kumulapela.” <sup>7</sup> Kuamana ni mañeloi nati, “iye yo litendela luhuhu lwamañeloi akwe, ni malimi amulilo abahikana bakwe.” <sup>8</sup> Kono kuamana ni Mwanakwe abati, Chihuna chako, Ireeza, chakuya kusena mamanmani. Mubuso wako mubuso wakuluka. <sup>9</sup> Usaka kutenda zishiyeme, mi utoyete batenda zibilala. Hakwinabulyo Ireeza, Ireeza wako, yabakusiingi ioli yentabo kuhitiliza bamwenu.” <sup>10</sup> “Kuntanzi, Simwine, ubatendi matangilo enkanda. Iwulu, nje mitendo yamana ako, <sup>11</sup> Kazimane, kono iwe mozwire habusu. Bonse kabasukehe sina kabaali kejila. <sup>12</sup> Kamuzibunge sina ngubo imi kazisanduke sina inkalulo yejila. Kono iwe uswana bulyo. imi zilimo zako kazimani.” <sup>13</sup> Kono nji kwelihi kumañeloi Ireeza kwabawambi chenako ihi ne ihi, “Wikale kwi yanza lyangu lyabulyo kusikila inako yete nitende zila zako chihuna chatatende ako?” <sup>14</sup> Kahena luhuhu lonse lwamañeloi lutusa, mi lutumwa kubabalela kwabo beti nibayole impuluso?

## Inkauhanyo ya 2

<sup>1</sup> Nihakwinabulyo tuswanela kutwaliza hahulu maikuto etu kuzitubazuwi, kokuti kanji tuzwi kuzili. <sup>2</sup> Mukuti haiba mulaezo ubawambwa cha mañeloi uyelele, imi bubi bonse ni kusazumina zitambule inkoto, <sup>3</sup> linu aho mutubanduke bule haiba nitusatokomeli impuluso inkando? Iyi nji mpuluso ibawambwa kuntanzi nji Simwine yabezilikizi kwetu chabo babaizuwi. <sup>4</sup> Chenako iswana Ireeza nezulikiza chachisupo, imakazo, ni chenkezo zikolete, ni chakuabela impo zaLuhuhu Lujolola chakuya chetato yakwe. <sup>5</sup> Mukuti kanaibali mañeloi kuti Ireeza aba biki mwikonde inkanda i keza, kuamana ni zitukwete kuwamba. <sup>6</sup> Nihakwinabulyo, zumwi abapaki kumwi, nati, “Muntu chinzi, kuti mubilaewe chakwe? Kapa mwana muntu, kuti mumutokomele? <sup>7</sup> Ubatendi muntu kuba mwikonde lyamañeloi; ubamuzwatiki inkuwani yekanya ni kukutekeha. <sup>8</sup> Ubabiki zintu zonse mwikonde lyamatende akwe.” Chokuti ibali chakwe Ireeza hababiki mwikonde lyakwe zintu zonse. Kanaabasiyi chimwi chintu nichisena mwikonde lyakwe. Kono hanu katwini kuboni zintu zonse kuba mwinkonde lyakwe. <sup>9</sup> Kono tubaboni umwina yababikwa mwikonde lyamañeloi chenakozana: Jesu, iye, chebaka lyamasukuluka akwe ni fu, abazwatikwa inkuwani yekanya ni kukutekwa. Chobulyo hanu

chachisemo che Ireeza, abatamuni ifu chebaka lyamuntu ni muntu. <sup>10</sup> Mukuti kubayebele kwe Ireeza, kakuli zintu zonse zina kwateni chebaka lyakwe ni chenzila yakwe, kuleta bana bangi kwikanya. Kubayebele kwali kutenda muyendisi wempuluso yabo chenzila yamanyando akwe. <sup>11</sup> Mukuti bonse nozuna yojolozwa nabana bajolozwa bena matangilo aswana. Chobulyo kena insoni ya kubasumpa bakwakwe. <sup>12</sup> Uti, “Kanibabaze izina lyako kubakwabangu, Kanizimbe kuamana nawe kuzwilila mukati kenkopano.” <sup>13</sup> Mi hape, “Kanibe nisepo kwali.” Mi hape, “Lole, Ime zunu ni bahwile abo babanihi Ireeza.” <sup>14</sup> Hakwinabulyo, mukuti bana be Ireeza baliyabela mubili ni malaha, Jesu nayebulyo abaliyabeli zintu ziswana nabo, njokuti chenzila yefu kasiye wina maata heulu lyefu, uzo, nji diyabulusi. <sup>15</sup> Ichi chibabi bulyo kuti nalukulule abo bonse chakutiya ifu babali kuhala buhalobwabo bonse mubuhikana. <sup>16</sup> Mukuti cheniti kahena kuti ubilela chamañeloi; kono, ubilezwa chalutanga Iwa Abrahamama. <sup>17</sup> Chobulyo kubayebele kwali kuti a be sina banakwabo munzila zonse, kokuti nabe ni chisemo ni intumelo sina hali muprisita mukulwana kuyendelela ni zintu ze Ireeza, mi chobulyo mwalete chiamana ni inswalelo yazive zabantu. <sup>18</sup> Kakuli Jesu iye mwine abasukuluki mi abalikwa, uwola kutusa abo bakwete kulikwa.

### Inkauhanyo ya 3

<sup>1</sup> Chobulyo, bakwangu banjolola, basupitwe kuliyaabela zakwiwulu. Muzeze kuamana ni Jesu, mwapositola ni muprisita mukulwana utuliwamba kakwe. <sup>2</sup> Abakusepahala kwa Ireeza, uzo abamuketi, sina ubu nji Mushe mwa basepahalili muzubo ya Ireeza. <sup>3</sup> Mukuti Jesu abali kusepahala hahulu mwikanya kuhita Mushe, kakuti muzaki wezubo ukutekeha hahulu kuhita izubo kasibili. <sup>4</sup> Mukuti izubo yose izakwa muntu, kono yozaka zonse nji Ireeza. <sup>5</sup> Kwiyaza limwi, Mushe abali muhikana yabali kusepahala mwizubo yonse ya Ireeza. Abali ipaki kuamana ni kupaka zakubusu. <sup>6</sup> Kono Christe Mwana njoyelele muzubo ya Ireeza. Twizubo yakwe haiba ni tukwatilila kwisepo yetu ni bwikumuso butuzumina kubuli. <sup>7</sup> Chobulyo, kwina neza sina mulutela Luhuhu Lujolola: “Sunu, haiba nimuzuwa inzwi lyakwe <sup>8</sup> sanzi mukukutuhazi inkulo zenu sina munako zakusandukilwa, mwinako zakulikwa mwihalaupa. <sup>9</sup> Iyi ibali inako ibakuku ubakuku wenu habanisandukila chakunilika, imi linu, muzilimo zina makumi wone bababoni mitendo yangu. Chobulyo kananitabiswa una murahi. <sup>10</sup> Chinati, 'bahitizwe zintu zibilala mukulo zabo inako yonse. Kana babazibi inzila zangu.' <sup>11</sup> Kuswana bulyo ni munibakokeli chakubenga kwangu: 'Kabakafwe kwinjila mwipumulo yangu.’” <sup>12</sup> Mutokomele, bakwangu, chokuti mukati kenu sanzi kuwaniki nangati umwina winjililwa luhuhu lubilala mwikulo lwakusazumina, inkulo ifutata kuzwa kwa Ireeza yohala. <sup>13</sup> Nihakuba bulyo, mususuwezane izuba ni zuba, nihakutewa kuti nji “Sunu,” njokuti sanzi nikuwaniki mukati kenu yokukutuhazwa chakuchengelelwa chive. <sup>14</sup> Mukuti tubabi chiyemba kwa Christe haiba ni tukwatilila kwisepo yetu itwina kwali kuzwa kutanzi kuya kumamanimani. <sup>15</sup> Kono inzi zibawambitwe, “Sunu, haiba nozuwa inzwi lyakwe, sanzi mukukutuhazi inkulo zenu, sina munako yabusandukili. <sup>16</sup> Njibani babamuzuwi Ireeza ni

kumusandukila? Kahena kuti njibona babo babakazwi ni Mushe mwa Egepita? <sup>17</sup> Njibani babo bababengeli makumi azilimo zone? Kahena kuti njibona babo babapangi chive, basimili ifwile ibawili mwiha-laupa? <sup>18</sup> Njikubani kwabawoli kukonka kaluchi kuti ketenibawole kukenjila mupumulo yakwe? <sup>19</sup> Imi tubona kuti kanababali kuwola kwinjila mupumulo yakwe chebaka lyakusazumina.

## Inkauhanyo ya 4

<sup>1</sup> Chobulyo, tutokomele kuti kanji kuwaniki niyobonahala kukangwa kukasika hesepiso ibashali kumasulenu enu kuti mukenjile mupumulo ya Ireeza. <sup>2</sup> Mukuti tubawambilwa makande malotu sina njabo. Kono uwo muleazo kanaubawoli kutusa abo basenababena hamwina mwitumelo nabo babakuteki. <sup>3</sup> Mukuti iswe tubazumini katwinjile mweyo ipumulo, sina mwabawambili, “Sina hanibakoki chabukali, Kufwa bulyo kwinjila mupumulo yangu.” Nihakwinabulyo, mitendo yakubumba ibamani kumatangilo ekanda. <sup>4</sup> Mukuti abawambi kumwi kwamana nizuba Lesabata, “Ireeza abapumuli izuba Lesabata kumise-bezi yakwe yonse,” <sup>5</sup> Hape abawambi, “Mubakafwe benjile ipumulo yangu.” <sup>6</sup> Chobulyo, lisibikilwe kuti bamwi kuti benjile mupumulo, imi sina habali bangi Maisilaele babazuwi makande malotu basanababen-jili chebaka lyakusakuteka, <sup>7</sup> Ireeza hape abacho kubikwe limwi izuba lisupwa, “Sunu.” Kuzwa kumasule amazuba amwi, Abawambi chakusebelisa Davida, Sina habawambi kutanzi nati, “Sunu haiba muzuwa inzwi lyakwe kanjimukukutuhali inkulo zenu,” <sup>8</sup> Mukuti haiba Joshua ababahele ipumulo, Ireeza nasana abawambi kuamana ni limwi izuba. <sup>9</sup> Linuhaho kusina yimwi Isabata yepumulo ibikilwe bantu ba Ireeza. <sup>10</sup> Mukuti yese winjili mupumulo ya Ireeza iye mwine chenjila mupumulo yamitendo yakwe, Sina Ireeza mwabatendeli kuyakwe. <sup>11</sup> Chobulyo, tube nichiseho kwinjila mweyo ipumulo, kokuti kanji nikuwaniki yetenawile mumukwa wakusakuteka ubabatendi. <sup>12</sup> Mukuti izwi lye Ireeza lihala imi lihwela imi lishengete kuhita mukwale ucheka mambali wonse. Lihweza bulyo ni kulukulula mozo ni luhuho, ni kukopanya kuzwila kumuhomo. Liwola kwiziba minahano ni milelo izwililila kunkulo. <sup>13</sup> Kakwina chibabumbwa chilipatite habusu bwa Ireeza. Kunzeyobulyo, zintu zonse ziza hanze ni kwiyaluka habusu bwakwe iye utulitabilila kwali. <sup>14</sup> Chobulyo, kubona twina mupurista mukulwana iye yabahiti kumawulu akwiwulu, Jesu mwana wa Ireeza, tukwatilile kakukola kuchitubazumini. <sup>15</sup> Mukuti katwina muprista mukulwana yasawoli kutufwila inse kabufokoli bwetu. Nihakubabulyo, twina umwi iye yabalikwa munzila zonse sina mutulikilwa, nihakwinabulyo iye kena chive. <sup>16</sup> Linuhaho tuyende kakukola hachihuna chachisemo, mukuti tuwane kutambula inse ni kuwana chisemo chitusa mwinako ichisakahala.

## Inkauhanyo ya 5

<sup>1</sup> Imi yense mupurista, yaba ketwa mukati kabatu, ababikwa kutenda muchisa cha bantu kuamana nimitendo ye Ireeza, mukuti ahe yose mipuzo nizitavelo zazive. <sup>2</sup> Uwola kusezeza kabutali basea chibezi nikuzwila habusu mukuti iye naye uzimbulukitwe nikubola hasi. <sup>3</sup> Chebaka lyezi, naye ulukela kuha zitabelo zazive

zakwe, sina mwapangila zive zabantu. <sup>4</sup> Imi kahena kuti jizakwe kuti zumwi ahinde ikute. kakuli, abasupwa ni Ireeza, sina Aruni mwabena. <sup>5</sup> Munzila iswana, ni haiba Keresite kana abalihi ikute kakulibika mupurista mukulwana. Mukuti, iye yowamba kwali abati, “Iwe umwanangu; sunu naba ni Beso,” <sup>6</sup> Kuswana sina mwabacho muchimwi chibaka, “U mupurista kuya kusamani kuzwa kumusebelezo wa Meluchizedeki.” <sup>7</sup> Mwinako zamazuba abuhya bwakwe, Kresite abahi mwiwulu zonse itapelo nizikumbilwa kaku huweleza hahulu ni zinsozi kwe Ireeza, iye umwina yowola kumuhaza kwifu. Nazuweka chebaka lyense zakwe. <sup>8</sup> Nikwabali mwana, abalituti kukuteka muzintu zabasukuluki. <sup>9</sup> Aba pangwi yolukite imi kuba, wa umwi ni umwi yo mukuteka, iyo ibaletwa inpuluso isamani. <sup>10</sup> Abapangiwa ni Ireeza kuba mupurisita mukulwana kuzwa kumusebelezo wa Meluchizendeki. <sup>11</sup> Twina zingi zakuwambola kuamana ni Jesu, kono kukutu kuzitoloka kakuli chimubasanduki muzitimbi mukuzuwa. <sup>12</sup> Mukuti mweyinu inako mukakuyelela kuba mumaluti, musiswanela kuba nizumwi muntu zamilute matangilo amulaezo wa Ireeza. Musaka muzilili, isinyi zilyo zikolete! <sup>13</sup> Mukuti zumwi yohinda bulyo muzilili keziba ni mulaezo wakuluka, kakuti usili mbumbu. <sup>14</sup> Kono zilyo zikolete zabalukwana. Izii njizabo babo ckokuti kukula kwabo kwina kuzuwisisa kuzintu babalutwa kukauhanya zilotu mububi.

## Inkauhanyo ya 6

<sup>1</sup> Linuhaho, tuhale ka matangilo amulaezo wa Kereste niku yenda habusu bwakuluka. Kanji kuzali hape matangilo akubaka kuzwa kumisebezi ifwile niye tumelo yina kwa Ireeza, <sup>2</sup> kamba matangilo abuluti bwe kolobezo, kukambika mayaza, kubuka kwabantu bafwile, ni katulo iyakusamani. <sup>3</sup> Mutupange bulyo izi haiba Ireeza utuzuminina. <sup>4</sup> Mukuti kese nikuyoleke kwabo baba boniswa, baba sozwa impo zewulu babayabelwe Luhuhu Luchenete, <sup>5</sup> imi abo babasolete bulotu bwezwi lya Ireeza ni nguzu bwazilimo zikeza, <sup>6</sup> kono abo chibawa mukube kukutu kubozekezwa hape kuti bakabake. Ili njibaka kakuli ba kokotela Mwana wa Ireeza abo bene, imi chiba muswabisisa ipatalaza. <sup>7</sup> Mukuti ikanda inywa kuvula iza chenanako kuyili, imi iha kuzala kwezi byalatu zinaituso kwabo baba sevezi-iyi nji ikanda itambula imbuyoti zizwa kwe Ireeza. <sup>8</sup> Kono haiba niyibika miya ni lubangu, kayina intuso imi yina hafuhi ni chikuto. Mamaninizo yina mukujincwa. <sup>9</sup> Kono tuhindwa nizitu zishiyeme kuamana nanwe, ba sakakahala, zintu ziamana ni puluso, nihakuba kuti tuwamba buti. <sup>10</sup> Mukuti Ireeza kahena kuti kashiyeme kuti azibale irato lya misevezi yenu imu ba bonisi mwizina lyakwe, kakuli muba tusi bazumine imi musikwete kubatusa. <sup>11</sup> Hape kunungwa ku kando zumwi nizumwi kwenu atondeze ichiseho kukasika kuma maninizo kuamana nikwizula kwesepo ikolete. <sup>12</sup> Linukuti kanji mubi mubakata, kono mulikanyise abo chetumelo ni inkulo inde baba yoli insepiso. <sup>13</sup> Mukuti Ireeza hapanga isepiso kwa Abrahamama, aba nkoki chakwe mwine, mukuchokuti kana abali kuola kunkoka chazumwi yomuhita. <sup>14</sup> Chati, “Muniwole kukufuyola, imi muni kwinjise chabungi.” <sup>15</sup> Cheyinzila, Abrahamama abawani chabasepiswe

kumasule akulindila ninkulo inde. <sup>16</sup> Mukuti bantu bankoka chozumwi mukulwana kubahita. Kuma manimani azumwi ni zumwi kwiza kukawuhana, kuli sumina kutenda kaku bonisana. <sup>17</sup> Linu Ireeza haliketela kubonisa kabungi kubayola insepiso inamazimo amutendo usenazintu zisa chichululwa, aba zuzilizi chakukonkeleza. <sup>18</sup> Abapangi bulyo kuti zintu zobeze zisa chichululwa-kakuyoleki kuti Ireeza achenge -Iswe, abo tubatilili kumatililo, twina ku inguzu zakukozana chakuondisa chesepo ibabikwa habusu bwetu. <sup>19</sup> Twina iyi inepo itokomelwe imi isepahala ikwete ihuho zetu, inepo injila mukati kachibaka china kumasule yesila. <sup>20</sup> Jesu abanjili mukati kechina chibaka natiya habusu bwetu, chasanduka kuba muprisita mukulwana kuyakusamani kuzwa kumusebelezo wa Meluchizendeke.

## Inkauhanyo ya 7

<sup>1</sup> Ibali njozu Melekisedeke, simwine wa Selemu, muprisita wa Ireeza Yohitilize Kuhangama, yabasangani Abrahamama habola kuzwa kukusinya chakwihaya basimwine mi namutohonolofaza. <sup>2</sup> Ibali kwali kwabahi Abrahamama inkalulo yimwina yazina ikumi yazintu zonse. Izina Lyakwe “Melekisedeke” italusa “simwine wabulotu bumaniniza.” Ilumbatina lakwe limwi nji “simwine wa Salemi,” italusa, “simwine wekozo.” <sup>3</sup> Kena isi, kena nyina, kena bakulubatanzi, kena nanga matangilo amazuba mane nanga mamaninizo abuhalo. Muchibakchobulyo, uswana ni Mwana we Ireeza, kakuli uswala kuba muprisita kuya kusena mamanimani. <sup>4</sup> Mubone mwabubanela uzu mukwame. Bakulubatanzi ba Abrahamama babamuhi inkalulo yimwina yazina ikumi yazintu zonse zabakahindi mukondo. <sup>5</sup> Munzila inwi, bana ba Livi babaamuheli buprisita bena itaelo inzwa kumulao yakutambula inkalulo yimwina yazina ikumi yazintu kubantu, kutalusa kuti, kuzwililila kubanakwabo, nihaike kuti nabo, bulyo, babazwi kumubili wa Abrahamama. <sup>6</sup> Kono chenzila inwi, Melekisedeke, ili uzo lusika lwakwe kanalubawoleki kwizibwa kuluzwa, abaamuheli inkalulo yimwina yazina ikumi yazintu kuzwa kwa Abrahamama, imi abamutohonolofazi, iye yabena isepiso. <sup>7</sup> Kakwina kusapula kuti muntu wamazimo ena kungsi utohonolofazwa kumuntu wina mazimo makando. <sup>8</sup> Mweyi indaba, mukwame yofwile utambula inkalulo yimwina yazina ikumi yazintu, kono chendaba ikola neyo kutiisezwa kuti uzwilahabusu kuhala. <sup>9</sup> Imi, chamazimo akuwamba, Livi, yabatambuli inkalulo yimwina yazina ikumi yazintu, naye bulyo abalihi inkalulo yimwina yazina ikumi kwa Abrahamama, <sup>10</sup> kakuli Livi abena mumubili wamuzazi wetanzi munako ya Melekisedeke hasangana Abrahamama. <sup>11</sup> Linu haiba kuba yobuzwile mubuhalo bwachilumeli chintu chiwoleka chenzila yabuprisita bwa Chilivi (mukuti mwikonde lateni bantu babaamuheli mulao), bulotu nzi buchitokwahala kuba kwateni kwamuprisita zumwi kuba kwateni mumasule enzila ya Melekisedeke, ni kusahewa itokomelo kuba yichilila mikwa ya Aaroni? <sup>12</sup> Mukuti buprisita heti chibwachinchwa, mulao nao utameha kuchinchwa. <sup>13</sup> Mukuti yowambwa chezi zintu ngwamushobo umwi, kusena nanga umwina yabati nasebeza hakatala. <sup>14</sup> Hanu kujolwele, ibali kwa Juda kwaba pepwa Simwine wetu, mushobo uti nanga ubabi Mushe asauwambi kuamana ni maprisita. <sup>15</sup> Imi chituwamba chizuweka haishaiba zumwi muprisita uba kwateni

yoswana ni Melekisedeke. <sup>16</sup> Kanaibali hamutomo wamulao walusika lwenyama kuti abe muprisita, kono ibali chamutomo wamaata abuhalo bwakwe busetinibumane. <sup>17</sup> Mukuti ziñoletwe zimupaka bulyo: “Umuprisita wakuya kusena mamanimani munzila iswana ni mwababili Melekisedeke muprisita.” <sup>18</sup> Mukuti kubena kumanisa kwamulao ubena kwateni kakuli kanaubakolete ni kusaba ni yuso. <sup>19</sup> Mukuti mulao kana ubapangi chilukite. Nihakwina bulyo, kubena matangilo ena kulisepa nenza akubusu chenzila ituswana kwiza kwe Ireeza. <sup>20</sup> Imi inzi kanazibatendahali ni kusena kulikonka chekumbya. Chenzila imwi, abo bamwi bababi maprisita ni kusena kulikonka chekumbya. <sup>21</sup> Kono chenzila imwi, iyi kwateni, Jesu, ababi muprisita chakulikonka chekumbya kozo yabawambi kwali, “Ireeza abalikonki chekumbya mi ketinachinche maikuto akwe: 'Umuprisita wakuya kusena mamanimani.’” <sup>22</sup> Cheyi inzila hape Jesu abahi isepiso yizwile yetumelelano yina nenza. <sup>23</sup> Chenzila imwi, bangi bababi maprisita kakuli chakufwa bakungulwa ni kusazwila habusu. <sup>24</sup> Chenzila imwi, kakuli Jesu ushala kuba bulyo kuya kusena mamanimani, wina mazimo abuprisita asamani. <sup>25</sup> Chobulyo uwola hape kuhuna cheniti beza kwe Ireeza chenzila yakwe, kakuli inako yonse uhalila kubalapelela. <sup>26</sup> Mukuti muprisita mukulwana bulyo njotuswana. Kena chive, kena katowati, ujolola, uzwisizwe kubatendi bazive, imi ababi yohanzi kuhita mawulu akwiwulu. <sup>27</sup> Kakwina chatokwa, kaswani ni muprisita mukulwana, yoha chitabelo izuba ni zuba, kutanga chazive zakwe, mi linu zive zabantu bamwi. Abatutendeli bulyo kamwina tubonse, habalinelu iye mwine. <sup>28</sup> Mukuti mulao ubika bakwame bena bufokoli kuba baprisita bakulwana. Kono linzi lakulikonka chekumbya, libezi mumasule amulao, libabiki Mwana, yabatendwa yolukite kuya kusena mamanimani.

## Inkauhanyo ya 8

<sup>1</sup> Cwale nto yeama seni bulela kise: Nina ni muprisita yomuhulu yabekali kwiyanza lyachilyo lachihuna cha Simwine Yomaniniza mumawulu akwiwulu. <sup>2</sup> Muhikana muchibaka chijolola, itabernakele yeniti ibatomwa ni Simwine, isifi muntu. <sup>3</sup> Mukuti zumwi ni zumwi muprisita mukulwana abahewa chitulo kuha impo ni zitabelo. Chobulyo kuyeleele kuba ni chimwi chakuha. <sup>4</sup> Linu haiba Kresite abena muchisi, kanabali kuswana kuba muprisita, mukuti kwina abo baha impo chakuya camulao. <sup>5</sup> Basebeza muchibaka ni muzunde wazintu zakwiwulu. Kukola fela sina nji Mushe mwabakalimelwe kwe Ireeza munako yasake natange kuzaka itabernakele: “Ubone kuti,” Ireeza nati, “upanga zintu zonse chakuya chamazimo abatondezwa kwako helundu.” <sup>6</sup> Kono hanu Kresite abatambuli ikolo lina nenza ni kuhita. Liswana sina hali hape yokaupa zetumelelano yina neza, izimene hesepiso yina nenza. <sup>7</sup> Mukuti haiba yina itumelelano yetanzi kanaibena bubilala, kana kubali kuyeleele kuti kube ni yimwi itumelelano yabubeli. <sup>8</sup> Mukuti munako Ireeza hawana bubilala kubantu, abati, “Mutekeleze, mazuba akezite — kuwaba Simwinw — heti ninipange itumelelano inhya ni zubo ya Isilaele hamwina ni zubo ya Juda. <sup>9</sup> Ketiniswane ni swane sina nji tumelelano inibapangi ni bazazi babo betazi mwizuba linibahinda chamayana abo kubaetelela



kubazwisa mukanda ya Egepita. Mukuti kanababazwili habusi ni tumelelano yangu, mi nibabasiyi — kuwamba Simwine. <sup>10</sup> Mukuti iyi nji tumelelano yeti ninitende ni zubo ya Isilaele muasule aana mazuba — kuwamba Simwine. Kanibike milao yangu muboko bwabo, imi hape kaniziñole munkulo zabo. Kanibe Ireeza wabo, imi kababe bantu bangu. <sup>11</sup> Ketinibalute zumwi kuyabambene naye ni kumwi kumwina kwabo, nati, 'Izibe Simwine.' Mukuti bonse kabanizibe, kuzwa kuyofokola, kutwala kumukando hahulu mukati kabo. <sup>12</sup> Mukuti kanifwile inse zitandantu zabo zisalukite, imi ketininihupule zive zabo ni kamuta.” <sup>13</sup> Chakuwamba “chihya,” abachiti chilikani chentazi kuba cha kale, mi chisasina mussebezi ni kusupala chichina hafuhi niku mana.

## Inkauhanyo ya 9

<sup>1</sup> Linu ni haiba chilikani chamatangilo chiba kwina milao ya kulapela mane nichibaka chijolola chefasi. <sup>2</sup> Aho i tabenakele iba lukiswe. Chibaka camatangilo, mwi tabenakele, mubakwina matomeno e lambi, i ntafule, chinkwa cha kuba, chibali kusumpwa chibaka chijolola. <sup>3</sup> Kwishilya lya majila abubeli akuhanzika kubena chimwi chibaka, chisumpwa chibaka chijolola ahulu. <sup>4</sup> Chibakwina katale ke gauda ka insense. Hape mubakwina i aleka ya chilikani, chibaku lamitwe chokuizula ni gauda. Mukati kayo kubena kapali mubena maana, inkoli ya Aroni iba tumpite, ni matapa a mabwe a chilikani. <sup>5</sup> He uulu lye aleka ya chilikani, mashurubime ekanya a bwikilize chifupi cha kubolinsana hamwina, chitusawoli kuwamba hanu chakwizula. <sup>6</sup> Hakumana ku bakanywa izizintu, ba purisita inako yonse babali kwinjila muchibaka chakunze che tabenakele kutenda mitendo yabo. <sup>7</sup> Kono kwanda a mupurisita yohanzi njabali kuwola kwinjila kuchibaka cha bubeli kamwina muchilimo, mi isiñi nikusena malaha aba lichitili chitabelo iye mwine mane nibantu baba tendi zibe isi chakulikeza. <sup>8</sup> Luhuhu lujolola luba bonisi kuti inzila iya muchibaka chijolola ahulu kena ibeni ku patululwa kubona fela itabanakele ya tanzi ibakusi zimene. <sup>9</sup> Ichi chibali chisupo che inu inako. zonse impo ni zitabelo zikwete kuhewa lyahanu kaziwoli ku shiyamisa sinte minahano ya balapeli. <sup>10</sup> Batwalize bulyo muhupulo kuzilyo ni kunywa mane nizimwi zintu zishelana shelana za mikiti ya kushanza. Iyi yonse ibali milao chenyama iba helwe kusikila intaelo inhya hete ni babumbwa. <sup>11</sup> Krisite abezi nali muprisita mukulwana wazintu zi lotu zibezi. Abenjili che tabenakele i nkando ni kushiyama ahulu isena iba tendwa chamayanza abantu, iyo isali ye fasi libabumbwa. <sup>12</sup> Kahena ibali cha malaha empene ni a manamani, kono chamalaha akwe mwine abe njili limwina muchibaka chijolola ahulu ni kubukeleza ku uliwa kwetu kwa kuyakwile. <sup>13</sup> Kono haiba malaha empene ni ba mpho mi ni kusansela kwe twe lye nkomwana ya citole habo bababi nikwe awola kuba kungwila kwa Ireeza chakuba joloza mwi nyama, <sup>14</sup> mukusike hi chamalaha aKrisite, iye chaluho lwakuya kusamani aba liihi mwine nikusena chinyansahala kwa Ireeza, kushanza maano etu kumitendo ifwile kutendela Ireeza yo hala? <sup>15</sup> Ka cheli ibaka, muzimanini wachilkani chihya. kwina bulyo nji kuti, kuzwa ifu haliba hindi chibaka chaku sumununa abo babena

muchilikani chamatangilo kuzwa muzibe zabo, bana ba sumpitwe muba tambule inepiso yakuyola kwa kuya kusamani. <sup>16</sup> Aho hena ifu lya nkabelo, ifu lya muntu yaba itendi liswanela ku bonekiswa. <sup>17</sup> Mukuti ifu lye nkabelo li boniswa bulyo haiba chikwaba nifu, kakuti kalina maata haiba walitenda nasihala. <sup>18</sup> Mane nihaiba cilikani ca matangilo kena ciba bumbwa ni kusena malaha. <sup>19</sup> Mi mukuti Mushe haha intaelo ya mulao kubantu bonse, abahindi malaha amanamani ni impene, ni menzi, bwanda busubila, ni haisopa ni kusansela ifu lye pampili ilee mane ni bantu bonse. <sup>20</sup> Kuzwaho nati, “Aa malaha acilikani awo Ireeza aba laeli kwenu.” <sup>21</sup> Mwizila iswana, aba sanseli malaha he tabenakele mane ni ha zi belekiso zonse zibali kutendiswa mwi nsebezezo. <sup>22</sup> Chakuya chamulawo, mukuti bungi bwa zintu zi ba kujolozwa cha malaha. Chikusena kwitila kwamalaha kakwina inswalelo. <sup>23</sup> Kuzwaho kuba kuswanela kuti zintu zikola ubu zamwi wulu zi jolozwe hamwina ni zitabelo za zinyoloji. Nihakuba bulyo, zintu zamwi wulu zine zi swanela kujolozwa nenza ahulu kazitabelo sakata. <sup>24</sup> Mukuti Kresite kana abenjili muchibaka chijolola ahulu chiba tendwa ni mayanza, icho chiswaniswo bulyo chache initi. Kusibulyo abenjili mwi wulu line, kuti hanu ali bonekise mwa Ireeza kwetu. <sup>25</sup> Kena abayi kwateni kuti akalinele tungi tungi, ubu mwabakutendela muprisita mukulwana, ya ba kwinjila muchibaka chijolola ahulu chilimo ni chilimo ni malaha achimwi. <sup>26</sup> Kambe mu kubekalile bulyo, linu ni kubaswaneli kuti anyande tungi tungi kuzwa kuma tangilo a mutomo we nkanda. Kono hanu inako imwina bulyo ku ma manimani azilimo zaba sinulwilwa kuti azwise chibe cha chitabelo chakwe mwine. <sup>27</sup> Zumwi ni zumwi ubikilwe kufwa limwina, mikuzwa aho kwiza i nkatulo. <sup>28</sup> Mwizila iswana, Kresite naye, yaba neelwa limwina ku zwise zibe za bangi, mwaboneke lwa bubeli, isi chakubonana nichibi, kono chempuluso yabana baba mulindili chenkulo inde.

## Inkauhanyo 10

<sup>1</sup> Mukuti mulao munzunde bulyo wezo zintu zilotu zi sikeza, isiñi luli impupeho yezo zintu zine. Abo ba chuna kwe Ireeza kete chiba wola kutendwa sakata zi tabelo zi swana izo Maprisita baba zwili habusu kuleta inako yonse chilimo ni chilimo. <sup>2</sup> Kambesi bulyo awo matabelo kambe na sana aba mani ku letwa? Chikuba bulyo, haiba ba jolozwa li mwina bulyo ni kumana, ba lapela ni basana baba lemuhu ze chibe. <sup>3</sup> Kono chezo zitabelo kwina inkupuzo ya zibe ka chilimo ne chilimo. <sup>4</sup> Mukuti kaku woleki kuti malaha aba mpoho ni impene a zwise zibi. <sup>5</sup> Kresite heza mwi nkanda, abacho, “kahena ibali zitabelo kamba impo zoba tabeli. Chikuba bulyo, mubili umu bani bakanyezi. <sup>6</sup> Mi kahena inubu zonse za ku jicha kamba zitabelo za chibi zimi sangisa. <sup>7</sup> Mi chinacho, 'bone, ime zunu, sina muku ñolelwe changu mwi ñolo, kuchita cimusa saka.” <sup>8</sup> Cha kutanga chati, “kana ibali chitabelo, kapa inewo, kapa chitabelo chonse cha kuhisa, kapa zitabelo ze chibe zimu ba tabeli. Kana muba zi tabeli nanga ka nini. “Izi zitabelo zihewa kakuya cha mulao. <sup>9</sup> Linu chati, “Bone, ime zunu kuchita mo sakila.” u zwise mutendelo wa matangilo mukuti a tome mutendelo wa bubeli, <sup>10</sup> Kache ina intato, tuba jolozwa kache nubu ya mubili wa kelesite kamwina bulyo niku mana. <sup>11</sup> Ku limwi iyanza,

Muprisita zumwi ni zumwi u zimana izuba ni zuba ku tendela Ireeza. Inako yonse u leta matabelo a swana, ni haike kazi woli ku zwisa zibi. <sup>12</sup> limwi iyanza, Kresite abahi chitabelo kamwina cha zibi kuya kusa mani, Abe kali hansi kwi yanza lya bulyo lye Ireeza. <sup>13</sup> U lindile zila zakwe kusikila hete nizibe chilyatilo cha matende akwe. <sup>14</sup> Cha chitabelo chonke aba pangi sinte kuya kusamani kwabo bakwete ku jolozwa. <sup>15</sup> Luhuhu lu jolola nalo lutu pakila. Mi cha ku tanga abati, <sup>16</sup> “Ichi njichi likani chete nini tende nabo chi amana awo mazuba, ku wamba Simwine. Kani bike milao yangu mwi nkulo zabo, mi Kani iñole mumano abo. <sup>17</sup> Mikete chini zeza hape zibi zabo ni bubu bwa bo.” <sup>18</sup> Linu hena inswalelo yezi, kaha sina chimwi chitabelo cha chibi. <sup>19</sup> Kuzwaho, bamwangu, twina insepo yakwi njila mu cibaka chijolola ahulu cha malaha a Jesu. <sup>20</sup> Iyo nji nzila inhya ni ihala yaba tuyalwili kayo ke jila, njikuti, che nyama yakwe. <sup>21</sup> Kakuti twina muprisita mukando he nzubo ye Ireeza, <sup>22</sup> Tu chunine che nkulo ye niti, chakwi zula kwe nsepo ye ntumelo, inkulo zetu ni zi sansaletwe ku jolola ku bubu bwa mihupulo, ni kuba ni mibili yetu ishanjitwe ka menzi a jolola. <sup>23</sup> Tukwatise cha ku kola ku buliwambililo bwe nsepo zetu, nikusena ku hakanyeha, kakuti Ireeza, yaba sepisi, u sepahala. <sup>24</sup> Tuhupule mutu wola ku susuweleza zumwi ku zumwi ku suna ni mitendo milotu. <sup>25</sup> Sanzi tu siyi kuli kopanya hamwina, ubu bamwi mubaba chitili, kusibulyo, muli susuweze ku zumwi ni zumwi ahuluhulu, mi ni ku hitiliza chimu ka bubona mazuba na kwete ku chunina. <sup>26</sup> Heba nitu zwila habusu ku tenda chibi kabomu ni twizi buniti, chitabelo cha zibi kachi sikwina. <sup>27</sup> Kusibulyo, kwina bulyo chimwi chi lindilwe chitiza che nkatulo, mi ni mulilo utiza wete ni umane zila ze Ireeza. <sup>28</sup> Yense yaba kani mulao wa mushe ufwa ni kusena chisemo habu paki bwa bobele kapa bo tatwe. <sup>29</sup> Kana mulandu u hitiliza swanela uzo yaba lyatoki mwana we Ireeza, iye yaba shubuli malaha a chilikani ubu asa jolwele—kachawo malaha abajolozwa—mi nikutuka Luhuhu lwa chisemo? <sup>30</sup> Mukuti twizi ya bati, “Kubozekeza njikwangu’, Kani nilihise.” Mi hape, “Simwine ka atule bantu bakwe.” <sup>31</sup> Indaba i tiza ku wila mu mayanza a Ireeza yohala! <sup>32</sup> Kono muzeze mazuba akwi sule, hamu munikilwa inzibo, mumu bali likozekezi mumanyando makando. <sup>33</sup> Muba letwa he mpatalaza cha ku tukolwa ni ku nyandiswa, mi mubali yabili nabo mu manyando ababa hiti mwali. <sup>34</sup> Mi mubena inse ahulu kubabena mwi ntologo, mi muba zumini nche ntabo ku nyangwa zintu zenu. Muba kwizi inwe mubene kuti mwina zabutuka zi hita izo kubulotu zi samani. <sup>35</sup> Chobulyo kanji musoheli kule insepo, Yina mupuzo mukando. <sup>36</sup> Mukuti musakana kuba ni nkulo inde, njikuti mutambule chaba sepisi Ireeza, hamu mana ku tenda cha saka. <sup>37</sup> “Imi mwi nakozana bulyo, iye yo keza mweze mi kete a liyehe. <sup>38</sup> Bangu ba jolwele muba hale che ntumelo. habola mwisule, Kete ni ni sange chakwe.” <sup>39</sup> Kono iswe kanjeswe abo ba bolela mwisule kuku sinyeha. Chobulyo, njeswe bamwi bena intumelo yo ku bukeleza luhuhu lwetu.

## Inkauhanyo ya 11

<sup>1</sup> Linu, Intumelo kukolwa zintu zosepa chakulibelele. Bupaki buamana ni zintu ziseni kubonwa. <sup>2</sup> Chebakalyakuti bazazi betanzi

baba amuhelwa chetumelo yabo. <sup>3</sup> Chetumelo tuzuwisisa kuti inkanda ibabumbwa chetaelo ya Ireeza, njokuti chibonekete kenezibapangiwa kuzwa hazintu zibabwenekete. <sup>4</sup> Ibali chetumelo kuti Abele apangile Ireeza chitabelo chihita cha Kaine, imi kuzwaho abapangiwa kuba yonjolwele, imi Ireeza abawambi bulotu kuamana ni chachitabelo chakwe. Imi chetumelo Abele usikwete kuwamba, nihafwile. <sup>5</sup> Ibali chetumelo kuti Enoke abahindilwa kwiwulu, njokuti kanababoni ifu.” Kanabawaniki, kakuli Ireeza abamuhindi. “Mukuti naseni kuhindilwa kwiwulu, kubapakiwa kuti abakutabisa Ireeza. <sup>6</sup> Linu chosena intumelo kahenakuhuba kumutabisa. Mukuti kwina nenza kuti zumwi hakeza kwa Ireeza uswanela kuzumina kuti kwena uhala imi kuti njimuhi wamipuzo yabo bamusaka. <sup>7</sup> Ibali chetumelo kuti Nuwe, hamana kuhewa mulaezo kuamana nizintu ziseni kubonwa, chekute lyabuireeza awole kuzaka chikepe kuhuna bezubo yakwe. Chakutenda bulyo, abanyazi inkanda ni kuba muyoli wazinjolola ziyendelela chakuya chetumelo. <sup>8</sup> Ibali chetumelo kuti Abrahama, chosumpwa, abakuteki ni kuzwa nakaya kwabali kukatambwila kuyola chanda. Abazwi nakaya, nasezi kuti ukaya kuhi. <sup>9</sup> Ibali chetumelo kuti abahali kuhala muchisi chesepiso nali muzwahule. Abahali kuhala mumatente ni Isaka ni Jakobo, babali bayoli besepiso iswana. <sup>10</sup> Mukuti abalotele kubusu kumuleneni wina mitomo, utenda kuti mufundeli ni muzaki uswanela kuba nji Ireeza. <sup>11-12</sup> Ibali chetumelo, nihakubabulyo Sarah iyemwine kanabali kupepa, mukuti Abrahama abawani maata akupepa. Izi zibapangahali bulyo, nihakuba kuti chabasupele, sina hakuhupulwa chabusepahali kozi ababahi chibaka chesepiso. Chobulyo, kuzwila kumukwame umwina, chabali kuboneka kufwile, njabazali bantu benjihite sina inkani mwiwulu imi sina isekeseke lyamwiwate, usawoleki kubalwa. <sup>13</sup> Ibali mwiwumelo kuti bonse bafwile kana bababoni isepiso zabo. Linu, kuzwa hakubabona ni kubalumelisa chibasina kule, babazumini kuti bayezi imi bahitite munkanda isali yabo. <sup>14</sup> Mukuti abo bawamba izozintu bawamba chabunite kuti bakabusaka munzi wakwikala. <sup>15</sup> Haiba babali kuzeza inkanda kubabayendi, babakuwola kuba ni nako yakubola. <sup>16</sup> Kono kuya kamukwikalile, ni balakaza inkanda ina hande, ili, yakwiulu. Chobulyo Ireeza kaswabiswa kusumpwa Ireeza wabo, chebakalakuti ababa lukisezi muleneñi wabo. <sup>17</sup> Ibali chetumelo kuti Abrahama, habali kulikiwa, kupanga Isaka chitabelo. Abali njijeke mwana mukwame yabali kuha, iye yabatambuli insepiso. <sup>18</sup> Ibali nji kwa Abrahama kuzibali kuwambwa, “Ibali chenzila ya Isaka kuti behwa babehwa bako kababikwe izina. <sup>19</sup> Abrahama abahupuli kuti Ireeza wina maata akubusa Isaka kubafwile, imi kuwamba buniti, aba mubozekezwa. <sup>20</sup> Ibali chetumelo hape kuamana ni zintu zakubusu kuti Isaka afuyole Jakobo ni Isau. <sup>21</sup> Ibali chetumelo kuti Jakobo, mwinako yakufwa, habafuyoli zumwi ni zumwi wabana ba Josefa. Jakobo abalapeli, nazendamine hekoli yakwe. <sup>22</sup> Ibali chetumelo kuti Josefa, habona kuti mamanani akwe chachunine, abawambi chakufunduka kwabana Baisilaele kuzwa mwa Egepita imi chabalaela kuamana ni zifuha zakwe. <sup>23</sup> Ibali chetumelo kuti Mushe, hapepywa, bashemi bakwe babamuwungwile myezi yotatwe kakuli bababwene kuti mwana mulotu. Kana babatiyi bakeñi chetaelo ya Simwine. <sup>24</sup> Ibali chetumelo kuti Mushe, chokula, chakana kusumpwa mwan'a

wa mwan'a Simwine wa mwanakazana. <sup>25</sup> Chebakalyakuti, abaliketeli kunyanda ni bantu ba Ireeza, kuhita kulikola minyaka ya cheve chenakozana. <sup>26</sup> Abanahani kuti kunyanda kwakwichilila Jesu Christe kuhita chifumu chamwa Egepita. Mukuti ababikite menso akwe kuzetawane. <sup>27</sup> Ibali chetumelo kuti Mushe azwe mwa Egepita. Kanabatiyi bubengi bwasiwine, mukuti abanyandi sina yobwene yasabonwa. <sup>28</sup> Ibali chetumelo kuti abakuteki Ipasaka ni kusanselwa kwamalaha, kokuti musinyasinyi wa mwana wetanzi sanzi akwati bana betanzi bachiswisu ba Maisilaele. <sup>29</sup> Ibali chetumelo hababahiti mwiwate lisubila sina babali kuyenda muzumite. Maegepita habalika kutenda bulyo, babaminwa. <sup>30</sup> Ibali chetumelo kuti mamota a Jeriko habawili hansi, kasumulaho akuzimbulukwa mazuba amana iyaza ni obele. <sup>31</sup> Ibali chetumelo Rahaba wehule hasana abafwi nabana basana babakukuteki, kakuli abatambuli matwela chekoko. <sup>32</sup> Imi chinzi hape chiniwola kuwamba? Mukuti inako kayinizuminini haiba niniwamba kaza Gedioni, Baraki, Samsoni, Japhethah, Davida, Samwele ni ziamana ni bapolofita. <sup>33</sup> Ibali chetumelo hababahapi mibuso, kusebeleza buniti, imi babatambuli insepiso. Babeyali milomo ibandavu, <sup>34</sup> Babazimisi maata amulilo, baba banduki bukali bwamukwale, babahozwa kumatuku, bababi indwalume mukondo imi babakomi impi zakunze. <sup>35</sup> Banakazi bababozekezwa bafwile babo chakubuswa. Bamwi baba nyandiswa, chakusamuhela kulukuluwa kokuti nibawane kubuswa kwina nenza. <sup>36</sup> Bamwi babakuliwa chakushengunwinwa ni kushumpwa, mane ni kuhambwa nisimbi ni kubikwa mutolongo. <sup>37</sup> Babapwacholwa ni mabwe. Babanokolwa zilama zobe. Babehayiwa chamikwale. Babazw ni kuyenda nibazabele makabi embelele ni ipene. Bababotanite, babalyatililwe, kunyandiswa. <sup>38</sup> Inkanda kana ibali kubaswanela. Babali kuyembana mwihalaupa, mumalundu, mumabwe, ni mumalindi mukunsi ke inkanda. <sup>39</sup> Nihakubabulyo bonse bantu babapakwa ni Ireeza chebaka lyetumelo yabo, kana babamuheli insepiso. <sup>40</sup> Ireeza abatuleleli zintu zina hande, kokuti kwande yetu, kete nibatendwe bashiyeme nenza.

## Inkauhanyo 4

<sup>1</sup> Chobulyo, mukuti tuzimbulukitwe ikope lyachisi chepaki zingi, tusiye kumbali zonse zintu zitulemena ni chive china hafuhi naswe. Linu tutiye lubilo chekulonde ibikitwe habunsu bwetu. <sup>2</sup> Tutokomele fela za Jesu, mutangi ni mulukisi wetumelo. Kakusanga kubabikitwe hasu bwakwe, naliwongoza hachifapano, kuhita maswbisa acho, hape na kekala hachihuna chalubona lwa Ireeza. <sup>3</sup> Linu muzeze, iye yabaliwongozi mukulwiswa kuzwa kubatendi bachive balwisana naye, Mukuti kanji mwizilwa kukatala munkulo zenu ni kusiya. <sup>4</sup> Kanamubeni kukana kapa kulwila kulwisa chive mbwiteli kuzwa malaha. <sup>5</sup> Hape chimwazibala insusuwezo imieleza kuti mubana: "Mwanangu, kanjiuzezi kabuhuba ikalimelo ya Simwine, nandi kukatala haiba nakusikulula." <sup>6</sup> Mukuti Simwine ukalimela bonse basuni, mi uha ikoto kuyese mwana yatambula. <sup>7</sup> Mutundamene mukunyando sina mukalimelwa. Ireeza umitenda sinamubana. Kana kwina mwana yasa kalimelwa ni besi? <sup>8</sup> Kono haiba kamukalimelwa, kubaliabela bantu bonse, linuaho mubana bamulyani kamubakwe, <sup>9</sup> Kuwelaho, tubena beshetu bamunyama babali bakalimeli, imi

tubali kubakuteka. Linuaho mutukangwe bule kukuteka Ishetu wehuho kuti tuhale? <sup>10</sup> Mukuti chenzila yimwi, Beshetu batukalimela mumazuba alikene aboneka nenza kubali. Kono munzila yimwi, Ireeza ututendabulyo mukuti tuwana bulotu bwakuliyabela mukujolola kwakwe. <sup>11</sup> Kakwina ikalimelo iboneka bulotu mweyo inako, kono isasama. Nihakwinabulyo kumamaninizo ibika zihantu zekozo yakuluka kwabana babalutwa bulyo. <sup>12</sup> Chobulyo mukoze mayaza enu adengelele ni mazwi enu akatele. <sup>13</sup> Mupangile matende enu inzila ziwolekete, mukuti lichukuta kete nilisikuke kono mulihozwe. <sup>14</sup> Mutundamene kuhala chekozo ni muntu umwi ni umwi, mi hape ni kunjolola haiba kakwinabulyo kakwina yense nabone Simwine. <sup>15</sup> Mutokomele kokuti kanjinikubi ni yetenabule chisemo che Ireeza, nikuti kakwina muhisi wina bubilala wete niukule kuleta bukabo, mukuti bangi kanji basinywa nawo. <sup>16</sup> Mutokomele kuti kanji kuwaniki buhule kapa muntu yasayendi munzila ye Ireeza sina nji Isau, iye yabati kamulalilo umwina abawuzi bukulwana bwakwe. <sup>17</sup> Mi mwizi kuti kuzwaho, halakaza kuyola imbuyoti, abakaninwa, kakuli kana abawani chibaka chakubaka, nihabananisi kazinsozi. <sup>18</sup> Mukuti kanamubezi kwirundu liwolwa kukwatwa, irundu lyamulilo ubbukuka, kelima, kasihwe, ni liñungwa. <sup>19</sup> Kanamubezi kutolombita ilila, nandi inzwi liwamba kwabo bazuwile mbwiteli kwabo batekeleze kutakuti musiye isinyi limwi izwi musiye. <sup>20</sup> Kakukuli kana babakuwola kutundamena itayelo ibabahelwe; “Haiba kuti chinyoloji hachikuma irundu, chiyelele kupwacholwa, <sup>21</sup> “Chebaka lyakutiza hahulu kwecho chibabaka Mushe nati, “Nisuhite mane ni chachalika.” <sup>22</sup> Nihakwinabulyo, “mubezi kwi Lundu lya Siyone ni kumuleneni uhala we Ireeza, Jerusalema wakwiwulu, hape ni kumangilo achita zikitikiti asangite. <sup>23</sup> Mubezi kukopano yabana bentazi, abo babañolwa mumbuka yakwiwulu. Mubezi kwe Ireeza, Muatuli wazonse, ni huho zabazakulukite babapangiwa balukite. <sup>24</sup> Imi mubezi kwa Jesu, musikululi wetumelelano inhya, ni malaha asanseletwe a wamba kuhita malaha a Abele. <sup>25</sup> Mubone kuti kamukani yokwete kuwamba. Mukuti haiba kana babawoli kubanduka habakana uzo yababakalimeli mukanda, naswe ketenituwole kubanduka haiba nitusandukila iye yokalimela kuzwilila kwiwulu. <sup>26</sup> Mwinako yimwi, Izwi lyakwe libanyungi ikanda. Kono hanu abahi isepiso mi nati, “Munako yimwi keteninininyunge fela ikanda, kono mane ni mawulu akwiwulu.” <sup>27</sup> Aa manzwi, “Inako yimwi,” utalusa kuzwisa zimwi zintu ziwolwa kunyungwa, njikuti, kwezi zintu zibabumbitwe, kokuti zimwi zisanyungwa kazishale. <sup>28</sup> Chobulyo, kutambula mubuso usanyanganiswa, tulitumele imi chiyi inzila tulumbeke Ireeza chekute ni kukomokwa. <sup>29</sup> Mukuti Ireeza wentu mulilo uhisa.

## Inkauhanyo ya 13

<sup>1</sup> Muleke ilato lya chikwaluzubo kuzwila habusu. <sup>2</sup> Kanji muzibali inkamuhelo kubene. Mi chobulyo, bamwi ba babonisi inkamuhelo kumañeloi ne basezi. <sup>3</sup> Muhupule bena mwitlongo, sina ili nanwe musuminwe nabo. Muhupule abo basukulwilwe, sina ili nenwe mwina mumibili ya bo. <sup>4</sup> Muleke maseso akutekehe kuzumwi ni zumwi. Muleke bulo bwa maseso ni busena ikwe, chokuti Ireeza ka

atule babuki basaoli kulionda ni basangu. <sup>5</sup> Muleke zitendako zenu zi lukuluhe chakusasaka masheleñi. Mu litumelele kuzintu ze mukwete, chokuti Ireeza iye mwine mwa bawambili, “Kete ne ni kusiye, kapa ime kukukana.” <sup>6</sup> Tu be batokomele chokuti tu be ni bundume bwa kuwamba, “Simwine nji mutusi wangu; kakwina che te ni tiye. Chinzi muntu chawola kunichita.” <sup>7</sup> Muzeze bayendisi benu, abo bawambi inzwi le Ireeza kwenu, mi mutokomele inkalabo za mitendo yabo. Mulikanyise intumelo yabo. <sup>8</sup> Jesu Kereste uswana lyezona libani, ni lyasunu, ni kuya kusena mamaninizo. <sup>9</sup> Kanji muyembululwa che intuto zi chinchana chincha zi sa wondeki. Mi kulutu kuti inkulo yangu iswanela kukozwa chachisemo, isinyi chazilyo zisatusi abo bayenda nezo. <sup>10</sup> Twina kataka kazwilila kwabo basebeza mwitabarnakele kabena intukelo yakulya. <sup>11</sup> Mi malaha azinyolozzi zibehaiwa ke zive zi baletwa cha muprisita mukulwana muchibaka chijolola, nihakuba bulyo mibili ya zo i bahisiwa kunze ye inkamba. <sup>12</sup> Nihakwinabulyo Jesu naye a ba sukuluki hanze ya milyango ya muleneñi, kokuti kujolozwe bantu chakuya chamalaha akwe. <sup>13</sup> Twende lyahanu kwali hanze ye inkamba, ne tuhindite maswabi akwe. <sup>14</sup> Kakuti katwina muleneñi utukonka kunu. Nihakuba bulyo, tulolete ku wonke una usikezite. <sup>15</sup> Chakuya chakwe, linu, inako yonse kuzwise matabelo a kulumbeka Ireeza, kulumbeka nji miselo ya milomo i bezibwa izina lyakwe. <sup>16</sup> Imi sanzi tuzibali kupanga bulutu ni kutusa zumwi ni zumwi, kakuti chakuya cha chitabelo echi, nji chiletela Ireeza ku ba yatabite hahulu. <sup>17</sup> Muteke mi mulibike kungsi ya baendisi benu, ili kuti bazwile habusu kubabalela inhuho zenu, sina njabo bete bahe buikalabelo. mukuteke ilikuti bayendisi benu bachite bulyo ne basangite, isiñi chakufundilila, ku sebe kube ni ntuso kwenu. <sup>18</sup> Mutulapele, kakuti tu hambilizwe kuti tube ni maikuto acheni ni kulakaza kuhala buhalo bushiyeme mwinzila zonse. <sup>19</sup> Ni misusuweza hahulu kuti muchite bulyo, ili kuti ni kabole kwenu hahanu. <sup>20</sup> Lyahanu Ireeza we kozo, yababozi ku bafile mulisana mukundo we mbelele, Simwinwe wetu Jesu, cha malaha asama ni a silikani si sena ma maninizo <sup>21</sup> kamunyazahali muzintu zilutu zonse kupanga chakusaka kwake. Asebeze mwetu. chitabisa hande habusu bwake, cha Jesu Kresite, kwali ku be ni kanya ya kuya kusamani. Kubebulyo. <sup>22</sup> Hanu, ni misusueza, bakwangu, mube ni manzwi e susumezo ao chabufuhi li ni ba miñoleli <sup>23</sup> Mwizibe kuti mukwetu Timotea cha lukululwa i ye yete ni mibone naye heba mwekeze hanu. <sup>24</sup> Mulumelise bayendisi benu bonse ni bazumine bonse. Na bo bena kwa Itali ba milumelisa. <sup>25</sup> Chisemo cheleza chi be nanwe mubonse.

## Jakovo

<sup>1</sup> Jakovo, muhikana we Ireeza ni wa Simwine Jesu Kresite, ku mishovo ikwanisa iyanza ni yovele ahasene: Ni lumelisa. <sup>2</sup> Mwihinde kiti ive kusanga, vakwangu, hamu hita mu matata mangi. <sup>3</sup> Mwizi kuti kulikiwa kwe intumelo yenu kuleta ku lileta. <sup>4</sup> Musiye ku lileta ku maniniza misevezi ya teni, ili kuti muve vakulite luli ni ku maniniza, ili kuti sanzi muvuli chimwi. <sup>5</sup> Kono heva zumi kwenu hasaka vutali, avu kumbile kwa Ireeza, iye yoha chavungi mi nasa kanani, mi kavu hewe. <sup>6</sup> Kono mumu siye a kumbile mwi Itumelo, na sa hakanyehi chimwi. <sup>7</sup> Imi yense yo hakanyeha u kola ili lindinda mwi wate lika vutizwa luhuhu ni li zimbuluka feela. Cwale uzo muntu sanzi ahupuli kuti mwa wane chimi kwa Ireeza. <sup>8</sup> Muntu wina vulyo wina mihupulo yovele, kawondeki mwi nzila zakwe. <sup>9</sup> Misiye mwetu we njevwe alitembe ka chi tulo chikando chakwe, <sup>10</sup> kono muhumane ali tembe cha kulikokoveza kwa chitolo chakwe, Mukuti kafwe sina impalisa ya mwinkanda ina mulyani. <sup>11</sup> Imi izuva lizwa niku hisa ni kuzumisa lyani. Impalisa iwa, mi vulotu vwayo vumani, che nzila iswana, muhumanehi mwa mannine ha kati kamusipili. <sup>12</sup> Wina imbuyoti muntu yo lileta kwi ntantuvo. Mi hakumba intantuvo, ava tambuli mushukwe wa vuhalo, vuva sepiswe kwavo vasaka Ireeza. <sup>13</sup> Muntu halikwa senzi ati, “Na likwa Ireeza,” Mukuti Ireeza kalikwa cha vuvi, Mi kaliki muntu. <sup>14</sup> Kono muntu ni muntu ulikwa che ntakazo yakwe, imu kwita ni kumu chengelela. <sup>15</sup> Linu intakazo haimu chunina, i zala chivi. Mi chivi ha chikula, chizala ifu. <sup>16</sup> Sanzi Mu chengwa, vakwangu va sakiwa. <sup>17</sup> Impo i ndotu ni impo ina hande izwa kwiwulu. i keza hansi kwuzwa kwe shetu we seli. Imi khakwe kakwina kuchinca kapa munzunde vakeñi chaku sanduka. <sup>18</sup> Ireeza ava keti kutuha kupepa cha linzwii lye niti, ili kuti mufuta muselo we ntazi muzintu zonse za vapangi. <sup>19</sup> Mwizi izi, va kwangu vasakiwa: muntu ni muntu azuwe cha vuhwelu, kusa hwela kuku wamba, kulyeha kuvenga. <sup>20</sup> Kuvenga kwa muntu kaku sevezi ka kuluka kwa Ireeza. <sup>21</sup> chelyo ivaka musiyeye zina i kwe zonse, nichisina ko cha lunya. cha vuntu tu amuhele ka chishemo linzwii, liwola kuhaza luhuhu lwetu. <sup>22</sup> Mutende zi lisaka linzwii isinyi ba lizuwa feela, kulichenga muvene. <sup>23</sup> Mi heva zumi uzuwa linzwii kono kalitendisi, uswa uvu muntu yolilola muchimponi chifateho cha va pepwa kacho. <sup>24</sup> Hamana kulivona uyenda kule mi haho uzivala mwekalile. <sup>25</sup> Kono muntu yo lilola chentokomelo kamulao wa kulukuluha, mi uzwila havusu kutenda, isinyi kuzuwa vulyo ni kuzivala, uzu muntu mwa tonolwefazwe ke Inkezo zakwe. <sup>26</sup> Heva zumwi uli hupuela kuti mulumeli, kono ka sikululi lulimwi lwakwe, u chenda inkulo yakwe, mi chilumeli chakwe kachina intuso. <sup>27</sup> Ku chena ni ku sanyazahala kwa chilumeli havusu vwa Ireeza ni Ishetu njovu: Kutusa vasena veshavo ni mbwela mu vukavo vwavo, kuli vavalela kuvuvi vwe inkanda.

## Inkauhanyo 2

<sup>1</sup> Vakwangu, kanzi mu wondi kwi intumelo ina kwa Simwine Jesu



Kreste, Simwine we nkanya, kuketulula vantu vamwi ni kusa tenda vamwi hande. <sup>2</sup> Mukuti zumwi muntu wi njila mwikopano yenu na zwete iseka lye gauda kwi munwe ni zi zwato zilotu, mi kwiza kwi njila injevwe yo zwete zi zwato zina ikwe. <sup>3</sup> Haiva no lola ko zuna muntu yo zwete zi zwato zilotu ni kuta kuti, “Wi kale mu chivaka chi lotu,” kono ku mukwame we njevwe uti, “Zimane kuna,” kapa “Wikale ha fasi a' matende angu,” <sup>4</sup> Kamuli atuli mukati kenu? Kachimwava muvatuli mu mihupulo yenu mivilala? <sup>5</sup> Muteke, vakwangu vasakahala, kena kuti Ireeza ava keti va njemwe veinu inkanda kuva va fumite mwi' tumelo ni kuva vayoli va muvuso wa va sepisi kwa vana va musaka? <sup>6</sup> Kono inwe muva nyefule va njevwe! Imi kanji vona vava mitwali ku chikota? <sup>7</sup> Kahena nji vona va tuka izina ilotu limu wila kulili? <sup>8</sup> Kono hanu, haiva wi zuziliza mulao wa chilena, ku amana ni mañolo, “Usake yo vambene naye sina moli sakila iwe umwine.” u tenda hande. <sup>9</sup> Kono haiva no saka vamwi vantu no ketulala vamwi, u chita chivi, imi u atulwa choku chola mulao. <sup>10</sup> Iye yense yo kuteka mulao, linu haiva no chola mulao umwina chi wachola milao yonse. <sup>11</sup> Iye ya vati, “Kanzi ulundi vusangu,” imi linu avati, “Kanzi wihahi.” Haiva no satendi vusangu, kono haiva niwi haya, chiwa va mucholi wa mulao. <sup>12</sup> Linu u wambe sina nja va vete ni va atulwe cha mukwa wa mulao we ntukuluho. <sup>13</sup> Mi inkatulo ka ize ni kusena chishemo kwa vana va sana vava tondezi chi shemo. Chi shemo chizunda inkatulo. <sup>14</sup> Linu bulotu njovihi, vakwangu, haiva zumwi uta kuti wina intumelo, linu na sena musevezi? kana iyo intumelo mwi muhaza? <sup>15</sup> Tute kuti unizalwa naye wa mukwame kamba wa mwankazi kazwete hande imi nasena zilyo ilyo' zuva. <sup>16</sup> Tute kuti zumwi kwenu uta kuvali, “Muyende chenkozyo, mutukutilwe mutukutilwe imi mwi kuta.” Haiva no savahi zintu zisakahala za muvili, vulotu njo vuhi? <sup>17</sup> Munzila iswana intumelo chayo, Haiva intumelo kaina musevezi, musevezi, ifwile. <sup>18</sup> Niha kuva vulyo zumwi uwola ku wamba, wina intumelo, ime nina misevezi.” Nitondezi intumelo yako mi ime kani kutondezi intumelo yangu cha misevezi yangu. <sup>19</sup> Uzumina kuti kwina Ireeza yenke; u panga nenza. Mi nanga madimona a zumina kuti, mi a chacha. <sup>20</sup> Musaka kwi ziva, mukwame wa chihole, mukuti intumelo isena misevezi kaina intuso? <sup>21</sup> Kana kuti Abrahama ishetu, kana ava chitwa yo sheyemi ka misevezi, che nako yava viki Isaka hi aletare? <sup>22</sup> Mu mbwene kuti intumelo iva sevezi ni misevezi yakwe, mi intumelo yakwe iva kuli cha misevezi yakwe. <sup>23</sup> Mi kuva izuzi likizwe chiva ñoletwe mwi nzwi chata kuti, “Abrahama ava zumini kwa Ireeza, mi ava valiwa yo shiyemi.” Imi ava sumpwa mulikani wa Ireeza. <sup>24</sup> Mubwene kuti che misevezi muntu ava cheniswa cha misevezi insifiñi che intumelo yo nke vulyo. <sup>25</sup> Cha mukwa wina vulyo, Rahaba wa mushahi, ava chitwa yo shiyemi chi misevezi, cha nako ya va tambuli va tumiwa, mi ni kuva tumina che nzila ingi. <sup>26</sup> Sina muvili hau kauhana ku luhuhu u file, mi intumelo mu ikalile haiva kaina misevezi ifwile

### Inkauhanyo 3

<sup>1</sup> Kena vungi vwa vantu, va swanela ku va varuti, va kwangu. Twizive kuti mwi se ni tu tambwile inkatulo ikolete kuhita. <sup>2</sup> Mi twese tu tatalika mwi nzila zingi. Heva zumwi ka tataliki mu zi wambo, nji

kuti mukwame wizwile, yo woola ku yendisa movili wakwe wonse. <sup>3</sup> Hanu heva ni tuvika inkwele mu milomo ye mbizi mi ili kuti zi tuzuwe, tu woola ku yendisa nimivili yazo yonse. <sup>4</sup> Kwina vulyo ni ku zisepe, ni hazili zi kando zi yendiswa luhuhu lukando, zi futumwina kwina muchila munini konse kwa saka yo zi kovocha. <sup>5</sup> Chamukwa wina vulyo lulimi chilama cha movili chinini, mihe lu li kumusa cha zintu zikando. Mu lemuhe hape mulilo munini mu wola ku hisikiza muzuka mukando. <sup>6</sup> Lulimi nalo mulilo, Inkanda ye chivi ivikitwe mu zilama za movili wonse. Lu tampeka movili wonse inkwe ni kutumbika kwi intuto ya vuhalo. Nji lona lwine luli vika mwi lyangalilo. <sup>7</sup> Mi cha mifuta ya zi nyolozzi za mwi Inkanda, zi zuni, zi hahave, mi ni zi vumbantu za mwi wate zi tapiswa mi zi va tapiswa ni vantu. <sup>8</sup> Kono, cha lulimi, kakwina mukati kenu yo wola ku lu tapisa. Ka luwoleki ku luyendisa lwina vuvi, lwizwile chifanu chi fwile. <sup>9</sup> Chalo tulumbeka Simwine ni Tayo, mi chalo tukuta muntu, uzo ava vumbwa cha kuswana ni Ireeza. <sup>10</sup> Kuzwa mu mulomo uswana kuzwa imbuyoti ni chikuto. Va kwangu, izi zintu kazi swaneli ku tendahala. <sup>11</sup> Kana mulonga u wola kwitila ku wi yalukila ku zwisa menzi malotu ni avava? <sup>12</sup> Kana isamu lye feiga, va kwangu, li wola kuleta i oli? Kapa masamu amuwomba, kuvika feiga? Kana ku woleka kuti menzi ena mwinyo kuzwe ena menzi atavusa. <sup>13</sup> Njeni yo talifite ni kutwisiso mukati kenu? Muleke uzo muntu atotendeze vuhalo vulotu cha mitendo ya vuntu cha vutali. <sup>14</sup> Kono heva mwina muna uvava ni kaani, mwi kulo zenu, sanzi mu litembi mi ku chenga ku amana ni vuniti. <sup>15</sup> Uvu kena nji vutali vu zwila kwi wulu. Kono, vwe Inkanda, vwa vantu, vwa vazimu. <sup>16</sup> Mi hena muna ni inkani, nji hena ku lyangana ni misevezi yonse ina ikwe. <sup>17</sup> Kono vutali vuzwa kwiwulu, vunjolola, linu inkozo, kuluka, insoni, chishemo ni zihantu zilotu, ka kwina chishweka ni mwipo. <sup>18</sup> Mi zihantu zi njolola zi vwalwa mwi inkozo mukati kavo valeta inkozo.

## Inkauhanyo 4

<sup>1</sup> Hanu ni mi wambila chizi ha mulilwisa ni ku kanana mukati kenu? Kena kuti mubonse mu suna ku tenda zintu zibi zi mu suna ahulu ku tenda zintu zisa tabisi ba mwenu? <sup>2</sup> Mu shukelwa zintu, mi kamu zi wani. Mwi ihaya bantu ba mi bindisa kuti muzi wane, mi kamu wani zimu suna. Mu lwa ni kukanana. Kono ka muwani zimu suni kakuti ka mu kumbili kwe Ireeza. <sup>3</sup> Niha mu kumbila kamu wani kakuti mukumbililo wenu kana mu lotu, kakuti muzi tendise mu mu sunina. <sup>4</sup> Inwe basangu! Ka mwizi kuti ku suna nze ikanda ku lwisa Ireeza? Ni hakuba bulyo yo suna kuba mulikani wa ze inkanda uli tenda chila cha Simwine. <sup>5</sup> Kapa muwana kuti ka kwina ibaka Ireeza haba wamba bulyo “Luhuhu lwaba biki kwetu luhala lwina ifufa ikando? <sup>6</sup> Kono Simwine utu ha chisemo, mi ifuho liti, “Ireeza u kanina bali kumusa, kono uha chisemo ku bali bika hansu.” <sup>7</sup> Mi mulitule kwa Simwine. Mu tandi satani, mi kazwe kwenu. <sup>8</sup> Mwize hafuhi ni Simwine, mi keze hafuhi nenwe. Mujoloze mayanza, inwe mahedeni, mi mujoloze inkulo zenu, inwe mwina mihupulo yobe. <sup>9</sup> Mu likalilwe, mulile, mi mubokolole! Mu leke ku seka kwenu ku sanduke chililo mi ku sanga kube maswabi. <sup>10</sup> Mulikokobeze habusu bwe Ireeza, mi kami nyamune hewulu. <sup>11</sup> Kanzi muwambi zibi ku ba mwenu, bakwangu. Muntu yo

wamba zibi kwa mwakwe kapa kuatula mu kwako ha wamba chibi hamulao u atula mulao. Heba no atula mulao, kena umu tendi wa mulao, kono umuatuli. <sup>12</sup> Hesi yenke njo ha mulao mi njo atula. Nji yenke yo haza ni kushinya. Njinwe bani, inwe mu atula ba mu bambene nabo? <sup>13</sup> Hanu, mutekeleze, inwe mu wamba kuti “Sunu kapa Izona kantu yende ku muleñeni, mu ka wuze mi muka tende iñambekelo.” <sup>14</sup> Njeni wizi chete ni chitendahale izona, mi buhalo bwenu njo buhi? Mihe mu mume wiza kenako inche ni ku mana. <sup>15</sup> Kambe, muwamba kuti, “Heba Ireeza na suna, heba ni tuchi hala katu tende ichi kapa china”. <sup>16</sup> Kono hanu muli tundula ka mitendo yi mu suna ku tenda. Zonse za kuli tundula bubi. <sup>17</sup> Muntu yense wizi ku tenda chilotu kono ka chi tendi, kwa li chibe.

## Inkauhanyo 5

<sup>1</sup> Mwize inwe mu fumite, mulile, mubokolole cha kunyanda kwenu ku kezite. <sup>2</sup> Chifumu chenu chi bolete, ni zizabalo zenu zi lilwe mafele. <sup>3</sup> Igauda yenu ni silivera yenu zina mafume, mafume azo kaabe bupaki bumi sumina indaba. Imi kazi mane inyama zenu ubu mulilo. Mukunganye chifumu mu mazuba a mamanani. <sup>4</sup> Mubone, intuwelo za ba tendi be mitendo yaku ku sinza mu mawa enu balila kakuti muba ba lili mali abo, mi chililo cha ba sinzi chiba ka siki mu matwi a Simwine wa bantu bonse. <sup>5</sup> Mubahali hanshi cha kulikola zi nunite. Muba nunisi inkulo zenu che zuba lya kwihaya. <sup>6</sup> Muba nyazi nikwi haya muntu yo lukite, mi kana aba kani. <sup>7</sup> Mulindize, bakwangu, hesi Simwine hete neze, mubone mulimi ha lindila lukau lu zwa mwibu. Ulikoza kulindila, kuti a tambule invula ye ntanzi ni ya mamanani. <sup>8</sup> Mi mulikoze mwi nkulo zenu, kakuti kwiza kwa Simwine chi kwina hafwihi. <sup>9</sup> Kanji mubileli, bakwangu chaku bona bamwi mulandu, mubone, inkatulo izimene ha mulyango. <sup>10</sup> Muhinde mutala, bakwangu, kuzwa ku manyando aba Profita baba likozi baba wambi mwi izina lya Simwine, <sup>11</sup> mubone, tuba wambila kuti bena imbuyoti baba woli ku likoza. Muba zuwi kaza Jobo zakusa benga kwakwe, mi muba boni mamanani akwe, mi mwizi ibaka lya Simwine, kakuti wizwile chisemo nense. <sup>12</sup> Muzintu zonse, bakwetu, kanji mukonki che wulu ni ku konka che nkanda kamba ka mukonkelo, uhi no uhi, mukuti muleke chimu “suna” cibe chimu “suni”, chimu “sasuni” cibe cimu “sasuni,” kuti kanji mu wili munkatulo. <sup>13</sup> Kana kwenu kwina yo nyandite? Mumusiye a lapele. Kana kwina yo tabite? Mumu leke a zimbe inzimbo. <sup>14</sup> Heba kwenu kwina yo lwala? Mumu leke a sumpe bakulwana be nkeleke, zebamu lapelele niku musinga oili mwi zina lya Simwine. <sup>15</sup> Intapelo ye ntumelo ihoza muntu yo lwala. Heba aba tendete chibi, Ireeza kamu swalele. <sup>16</sup> Muliwambe zibi zenu kuzumwi ni zumwi, mimu lilapelele kuti muhole. Intapelo za muntu yo lukite zina ziho mu misebezi. <sup>17</sup> Elija abali mukwame sina njeswe. Aba lapeli kuti invula kanji isoki, imi kana iba soki mwi nkanda cha zilimo zo tatwe, ne myezi ina iyanza ni wonke. <sup>18</sup> Mi Elija aba lapeli hape. Iwulu cilya leta invula, mi inkanda chiya leta zichelo. <sup>19</sup> Ba kwangu, heba zumwi kwenu kezi buniti, imi zumwi umu boza, <sup>20</sup> heba kuti muntu u ku sanduka mueza libi mwi nzila yakwe ifosahele, uhaza buhalo bwakwe kwifu, no ku fupika zibi cha bungi.

## I Petorosi

<sup>1</sup> Petorosi, mwapositola wa Jesu Kirisite, kuva yedi ve nako, vava kwetwa, mukati kose ka Potiasi, Magalatia, Cappadocia, Asia, ni Bathiania. <sup>2</sup> Cho kutenda kezivo yokuvusu ye Ireenza Ishetu. Ivali cho kuchenisa ni Luhuwu lo kuzumina ni kwi tilela malaha a Jesu Krisite. Linu chisemo chive ni we, ni kozo yako iyekeze. <sup>3</sup> Ke Ireenza ni Esi wa Jesu Krisite a fulyolwe. Muvukando bwe chishemo chakwe, cha tuha ku zwala chihya ke sepo yo kuyola. Ichi chiyolo chi keza kezila yo kuvuka kwa Jesu Krisite kuva fwile. <sup>4</sup> Kono ichi ciyolo chisa maani, kese chive ni vuvi, kete ni chi mane. chivi kilwe inwe kwiwulu. <sup>5</sup> Mu silelezitwe cha maata a Ireenza che tumero, cho kuhazwa kulivelelwe kuvoneka kumani mani enako. <sup>6</sup> Mi usangite kuamana nezi, ni kuvavulyo kuswanela kuti nova lizuwi vuvi mu kubabo vushutana shutana. <sup>7</sup> Uko kulika itumelo yenu, mi kwina vutokwa ahulu kuhita gaunda isinyeha, ni hailikwa mumulilo. Izi zitendehala kuti itumelo iwanike mwi tumbo, ikanya, ni kute kuku bonahaza Jesus Christe. <sup>8</sup> Kena muvamuveni, kono mumusaka. Kamumu voni hanu, kono muzumina kwali ni mutavite ni tavo isawambiwa, inkanya ye tavo. <sup>9</sup> Kono hanu mutambula kwenu bulyo mupuzo we tumelo yenu, kuhazwa kwo luhuwu lwenu. <sup>10</sup> Vafolofita vava sakisisi ni kwiza ahulu kuamana zo kuhazwa, kuamaana ni chisemo chese chibe cenu. <sup>11</sup> Chiva sakisisa kwi ziva uzo ni lili ni Luhuwu Iwa Krisite haluvali kuwamba kuvali. Inzi ziva pangahali ziva wambirwa havusu kuamaana ni kunyadiswa kwa Christe zitu ze kanya kuzwa aho. <sup>12</sup> Zive zinveki kuva vopolofita kuti hati vavali kulitusa avo vene, kono enwe. Ichi chi vavali kutenda kuamaana ni zitu zi muva wambilwi kamukwa wo Luhuwu Lujolola, uvatumwa kuzwa kwi wulu. Izi zitu nanga magiloyi alakazwa kuvoniswa. <sup>13</sup> Cwale mutende muzezo yenu hande. Musiye kukolwa. Muvike isepo yose muchisemo chileta kwi ziveka kwa Jesu Krisite. <sup>14</sup> Ha tuli tuvana ve chilila, musiye ku swana itakazo nezina zimuvale kwichilile ni musezi niti. <sup>15</sup> Kono iye avamisupi u jolola, inwe, nanwe, mujolole mumaikuto enu wonse. <sup>16</sup> Kakuli kuñoletwe, “Mu jolole, kakuli ime ni jolola.” <sup>17</sup> Mi hamusupa “Ishetu” iye yenke uyatula zwimwi ni ku sena isovozi kuamana ni mutendo wo mutu, muhinde inako mumusipili ni sabo. <sup>18</sup> Mwizi kuti hati kavali ke silivera ni gauda efwa iva muhanzi kuvu holo ye mimitedo imuva lituti kuve ishenu. <sup>19</sup> Hakuli vulyo, u va hazwa ni malaha avutokwa a Krisite, avalu kuswana ni imbelele isena chivata. <sup>20</sup> Krisite ava saliwa pili ni misumo ye kanda, kono hanu chali zivahalisa kwenu mwinako ya manimani. <sup>21</sup> Chakwe muzumina kwe Ireenza, ava muvusi kuvafu mi kuvamwi chavaha ikanya kuti itumero yavo ni sepo ive kwe Ireenza. <sup>22</sup> Muvatendi luhuwu lwenu kujolola choku zumina kwi niti. Ichi chivalikutenda mulelo wo vulikani mwi rato, cwale mulisake ahulu mwi kulo. <sup>23</sup> Linu mu vanzalwa chihya, isini ketanga ivola, kono che tanga isavoli, muvuhalo ni lizwi lye Ireenza likalilila. <sup>24</sup> Ke “nyama yonse iswana sina lyani, ni ikanya yateni yonse iswana nipalisa ya lyani. Lyani lizuma, ni palisa ziwila hasi, <sup>25</sup> Kono lizwi ye Ireenza likalilila kuya kwile. “Ichi makande malotu ave zibiswa kwenu.

## Inkauhanyo 2

<sup>1</sup> Linu muvike kwi mbali vuvi vonse, vuchengereri, kuliha, muuna, nikusooha konse. <sup>2</sup> Sina vambumbu va zwa haku zalwa, mushukerwe muziriri ujolola wa luhuhu, njikuta kuti mukulire mwateni chakuhazwa kwenu. <sup>3</sup> haiva uva liki kuti simwine ushiyeme. <sup>4</sup> Mwize kwali mukuti iye ivwe lihala livakanwa vantu, kono livaketwa kwe Ireza kuti njilyona lya vutokwa kwali. <sup>5</sup> Nanwe vulyo mukoleri mu mavwe ahala akwete ku tendeswa kuku zaka inzubo ya luhuhu, kuchitira kuti muve muva purisita vaha zitavelo za tambula Ireza cha Jesu Kiresite. <sup>6</sup> Iñolo lina ichi: “Vone, ni tuula mwa Siyone ivwe lya mwi nkona, liketetwe mi lyavutokwa. Yense yo zumina kwali kete na swave.” <sup>7</sup> Kukutekwa kwina kwenu mu zumina. “Kono ivwe livakanwa kuva zaki, liba sanduka mutwi we nkona\_” <sup>8</sup> “iñomwe lyachi sitataliso ni nivwe lyachi sitataliso. Ba sitatala, chakusa mamera linzwi, kakuti ku vava lukisezwe. <sup>9</sup> Kono inwe muvantu vaketetwe, lusika lwa vu purisita, inkanda ijolola, vantu ve Reza vali munine, jo kucho kuti kamwi zivahaze mitendo mikando yakwe yava mi sumpi kumi zwisa mwififi niku mi leta mwi seri likomokisa. <sup>10</sup> Hasana muvali muvantu, kono hanu chiri muvantu ve Ireza. Kana muva tambwire chishemo, kono hanu muva tambuli chishemo. <sup>11</sup> Vasakiwa, nimi sumpa ma zwahule, ni vantu vaka vu yambaela kuti mulizwise kwintakazo ze nyama, zi leta inkondo kulwisanisa luhuhu lwenu. <sup>12</sup> Muswnela kuva ni mitendo mi lotu mukati ka Vantu vasezi Ireza, chokuti, hava wamba kahenu kuti muva chiti zintu zivi, Muvavone mitendo yenu milotu, mi lumbe ishenu luzuva lwete neze. <sup>13</sup> Mukuteke vuyendisi bwa vantu vonse chevaka lya Simwine. Mukuteke vu simwine vonse vwina he wulu. <sup>14</sup> Mane ni va Vusisi, va vakatumwa kuti vaha milandu ku va fosa niku temba va chita zilotu. <sup>15</sup> Kakuti icho intato ye Ireza, kuti chaku chita vulotu, mutontoza ziambo za vantu va zihole. <sup>16</sup> Cha vantu va lukuluhite, sanzi mutendisi intukuluhu yenu ku fupika vuvi, kono muve sina va hikana va Ireza. <sup>17</sup> Kuteke vantu vonse. ve niilato kuvamwi, Tiye Ireza. Kuteke simwine. <sup>18</sup> Vahikana, mulivike kukuteka va nfumwenu che kute lyonse. Sanzi mukuteki vulyo va vashiyeme niva va lukite, kono navana va kukutu. <sup>19</sup> Kakuti ichi china mupuzo muntu hali koza mwi nako inkukutu kunyandiswa no chita zishiyeme che vaka lyokwi iziva Ireza. <sup>20</sup> Linu hamulikoza nimukwete ku kabwa che baka lyakufosa mumu tembwe vule? Kono haiva muva chita vulotu, mi unyanda noherwe inkoto, icho china mupuzo kwa Ireza. <sup>21</sup> Cheli ivaka muva sumpwa, Kakuti Kresite naye ava sukulwirwa inwe. Avasiyi mutala kuti mwi chirire mwinzila yakwe. <sup>22</sup> Kana ava chiti vuvi, nanga chiwambo chi fosahere muka holo kakwe. <sup>23</sup> Nihavali kutukwa kana avali kuvoza matapa, nihanyadiswa kana avali kufumbira, kono chali tambika kwali yo atula chaku woloka. <sup>24</sup> Iye mwine ava hindi vuvi bwetu mumuviri wakwe nikuvutwala hachisamu. Kuchitira kuti sanzi tuvi ni chiyemba mu vuvi, kono tutange kuhalira kushiyama. Chakuhalolwa kwa muviri wakwe muvavozwa. <sup>25</sup> Muvonse muvali kuherahera sina imberere zi zovete. Kono hanu muvavoli kumu lisi we mberere ni muvavaleri wa luhuhu lwenu.

## Inkauhanyo 3

<sup>1</sup> Mweyi zira, inwe muli vafumahali muli tule kungsi yiva mwihyenanu. Mupange ichi iri kuli, nanga vamwi vakwame kava zuwisisi kuli zwi, cho kuya che mikwa ya vanakazi vavo, mikwa i wola kuva koma nikusena linzwi. <sup>2</sup> Chiva vavoni mikwa yenu i zwirire havusu che kute. <sup>3</sup> Musiye i kupangiwe insiñi cho mukwa uvoneka kuvena hanze: insuki zi hosetwe, maseka e gaunda, kamba zizwato zo mujoko. <sup>4</sup> Kono, musiye zipangiwe cho muntu o mukati we nkulo, mi vultontu vusa mani bwina hande ni kuntontola muluhuhu, nili chilotu havusu bwe Ireza. <sup>5</sup> Chavanakazi va jolola vavali susuwezi mowu mukwa. Vena i sepo mwe Ireza mi vavali tulite kwi konde liva muhyabwavo. <sup>6</sup> Mweyi zira Sara avali kuzuwa Aburahama ni kumusupa simwine wakwe. Inwe hanu muvana vakwe haiva ni mupanga zina hande ni kusa tiya i nkozi. <sup>7</sup> Cho mukwa u swana, inwe vashetu muswanera kuhala ni vafumahali venu cho kuya che kutwisiso, sina che chiviko chi fokola, mwanakazi. Muswanera kuvaha i kute sina vamwi vayoli ve mpo zo vuhalo. Mupange ichi iri kuli itapero zenu kanji zikaninwi. <sup>8</sup> Cha ma manimani, mwense, muswane mumi hupulo, chishemo, kulisaka sina mizwale, inkulo zina hande ni kuli kokoveza. <sup>9</sup> Kanji muvozekezi vuvi cho vuvi kapa itapa che tapa. Cho kusa yenderera, muzwire havusu ku fuyola, vakeñi chezi muva supwa, iri kuti muyole imbuyoti. <sup>10</sup> “I ye yosaka vuhalo ni kuvona mazuva malotu u siyisa lulimi lwakwe ku vuvi ni milomo yakwe kuku wamba mapa. <sup>11</sup> Mumu siye a sanduke kuzintu zivi ni kupanga zilotu. Mumusiye a sake inkozo ni kuzwira muli. <sup>12</sup> Menso a Simwine avona va shiyamite, mi matwi akwe a zuwa ziva kumbira. Kono chifateho cha Simwine chi vengere avo va panga vuvi.” <sup>13</sup> Jeni uzo yasa mi horofaze haiva ni mulakamina zina zilotu? <sup>14</sup> Kono haiva ni munyanda che vaka lyo kuluka, mufuya ulitwe. Kanji mutiyi ziva tiya. Kanji mu firikani. <sup>15</sup> Kono, muvikire ha mbali Simwine Keresite mwi nkulo zenu sina yo jolola. Honse mulitukiseze kwi tava vonse vami vuza chinzi hamwina i sepo mwa Ireza. Mupange ichi cha mañenke ni kute. <sup>16</sup> Muve ni muhupulo mulotu iri kuli vantu va tukola vuhalo bweni vultontu mwa Keresite vawole kuswava kakuli va wamba cho kumilwisa uvu mane muva pangi vo vuvi. <sup>17</sup> Kwina hande, haiva Ireza ulakamina, kuti munyanda cho kupanga vultontu kuhita kupanga vuvi. <sup>18</sup> Keresite naye ava nyandi hamwina che zivi. Iye yo lukite ava nyandiri iswe, vasina vavali kulukite, iri kuli awole ku tuleta kwe Ireza. Ava vikiwa kwifu mwi nyama, kono ava pangiwa yo hala cho Luhuhu. <sup>19</sup> Cho Luhuhu, ava yendi ni kukakutaza kwi huho yina hanu mwi torongo. <sup>20</sup> Vavali kusa zuwa aho kulindira kwe Ireza kuvali kulindire muma zuva a Nuwe, muma zuva o kuzaka i aleka, mi Ireza a va hazi vantu vache vulyo- ihuhu ye yanza ni to tatwe- cha menzi. <sup>21</sup> Ili nji swayo lye nkorovezo iyo imihaza hanu- isiñi uvu ku shanjiwa kwe ikwe lye miviri, kono sina kovekisa kwe nkulo indontu kwe Ireza- chokuya kuvuka kwa Jesu Keresite kuvafu. <sup>22</sup> Keresite wina kwi yanza lye chilyo lye Ireza. Ava yendi kwi wulu. Mañiroyi, mivuso, ne ziho ziswanera kulivika kungsi yakwe.

## Inkauhanyo 4

<sup>1</sup> Kuzwa ho, kakuli Keresite ava sukuluki ahulu mu nyama, mu

wondese mwense cha munahano u swana. Mukuti iye yense yava sukuluki mu nyama ava zwi ku chivi. <sup>2</sup> Nihakuva vulyo, muntu wina vulyo, cha yonse inako yakwe mu nyama, kasi hali mu ntakazo ya vuntu, kono che ntato ye Ireza. <sup>3</sup> Che nako ilikene ha ihita ku chita chi va va ku saka kuchita va machava- vushyahi, intakazo, vuñyavi, minyaka ye fasi, minyaka ya hansi, ni mitendo mivi ya maswaniso. <sup>4</sup> Va tere vukavo kuti hamu sa vechilili navo mou muunda wa ku lyangana, mi vawamba vuvi ku amana nenwe. <sup>5</sup> Kava hewe mulandu ko zo yo litukiseze atula va hala ni va fwile. <sup>6</sup> Cho u mulelo Ivangeri ivali ku kutuzwa hape ku va fwile, njikuti, nanga vava va atulwa mwi nyama sina ko vuntu, ni va hale sina Ireza mu luhuho. <sup>7</sup> Ma maninizo ezi zintu chi a kezite hafuhi. Cwale muve mu talifa mu muhupulo, muve ni munahanelo ujolola che vaka lye ntapero. <sup>8</sup> He wulu lyazintu zonse, muve ni rato ikando ku zumwi ni zumwi, mukuti irato li yala zingi zivi. <sup>9</sup> Mu litambule vamwi ku vamwi cha kusa tongoka. <sup>10</sup> Sina umwi no umwi wenu ava tambuli impo, mu i sebelise cha ku tendera umwi ku umwi. Mu chite izi sina cha vahikana va sephala za Ireza mu mpo zingi za mahala. <sup>11</sup> Haiva umwi u wamba, mu siye ive ku ziho izo Ireza zaha. Mu cite izi zintu kuti mu nzila zonse Ireza a lumbiwe cha Jesu Keresite. Mi kuve inkanya ya Jesu Keresite ni maata ya kuya ku ile. Amen. <sup>12</sup> Vasakahala, kanji mu hindi cho ku seziba ku likiwa mu mulilo uwo uva citahali kwenu, sina zintu zimu sezi zi va chitahali kwenu. <sup>13</sup> Cwalehe, nikuva vulyo cha kuya ke nzibo mu kwi ziba masukukluko a Keresite, mu nyakalale, nji kuti hape ni muka nyakalale mi mu tabele kwiza kwe nkanya yakwe. <sup>14</sup> Haiva mu tukolwa che zina Iya Keresite, mu fuyoletwe, kakuli Luhuho lwe nkanya ni Luhuho lwa Ireza lwina henu. <sup>15</sup> Kono ku vuleke kwenu nanga yenke yete a sukululwe sina mwihayi, musa, mu tendi wa civi, kamba musinyi. <sup>16</sup> Kono haiva zumwi u sukululwa cha kuva mulumeri, kanji a swabi; kono, mumu leke a lumbe Ireza chelyo izina. <sup>17</sup> Kakuli chi nako ye nkatulo ku tanga cha ve nzubo ya Ireza. Cwale chi yi tanga chetu, mu kuve vule kuzwa kwavo vasa kuteki ivangeri ya Ireza? <sup>18</sup> Ni kuti haiba “muntu yo jolola ka hazwe cha ku kakatiza, mu kuve vuti kuva nyefula ni ku va eza livi? <sup>19</sup> Cwale mu siye avo va sukuluka ke vaka Iya ku saka kwe Ireza va vike inhuho zabo mu vusepahali vwa movumbi mu ku tenda sinte.

## Inkauhanyo 5

<sup>1</sup> Ni lumba va vakulwana mukati kenu, Ime, neme ni mukulwana. Neme ni mpaki ya masukuluko a Keresite, neme ni zumwi mu nkanya yete ni i wulwe. <sup>2</sup> Cwale, ni mi kuteka, vakulwana, mu lise nenza muraka we ngu za Ireza zina mukati kenu. Muzi lole, insiñi kevaka Iya kuti mu saka vulyo, kono akuli nanwe mu saka, che ntato ya Ireza. Mu zi lole, isiñi cha kusa sepa mashelēñi, kono chaku saka. <sup>3</sup> Kanji mu chitì sina muvusa hewulu Iya vantu vena mu mpabalelo yenu. kono, muve mutala ku mutapi. <sup>4</sup> Cwale Mulisani Mukulwana cha wumbulwa, mu mu tambule vu simwine vwe nkanya. <sup>5</sup> Mu nzila iswana, inwe muva hwire, muli voze hansi ku va kulwana vakwame. Mwense vulyo, muli zwatike muvuikokovezo ni ku tusana zumwi cha zumwi. Kakuli Ireza ukanina valikumusa, kono uha chishemo kwa vana vali

kokoveza. <sup>6</sup> Cwalehe mulikokoveze mwikonde lya manza eziho e Ireza iri kuti nawole kumi nyemuna mwinako ikeza. <sup>7</sup> Muvike impiraelo zenu hali, kakuli u virela kuamana na nwe. <sup>8</sup> Muve ni muhupulo u chena, mu tondere. Chila chenu, iye diavulusi, uvu undavu ukwete kulira nazimboka, ku gana zumwi weta halole. <sup>9</sup> Muzimane cho kumulwisa. Muve va kolete mwi ntumero yenu. Mwizi kuti manyando a swana akwete kuhitiwa mu ali kuva lumeri kuninenu mu nkanda. <sup>10</sup> Chimwa mana kunyanda kavaka zana, Ireza we chishemo chonse, yava misupi mwikanya ina mwa Keresite, kami kondise, kumi zimika ni kumi koza. <sup>11</sup> Kwali kuve ni vulena kuya kwi ire ni ire. Ameni. <sup>12</sup> Ni zuminina Silvanus sina muzwale yo sepahala, mi chi ni va miñolera chovu fuhi chakwe. Ni mi lumerisa mi nipaka kwenu kuti ziniva miñoleri njo vuniti bwe chishemo che Ireza. Muzimane mwatani. <sup>13</sup> Mukulwakazi wina mwa Vavilona, yo ketetwe hamwina nanwe, umi lumerisa. Hamwina ni Mareka, mwanangu we chikwame, umi lumerisa. <sup>14</sup> Mulumerise zumwi ni zumwi che michuchuno ye rato. Mi inkozo ive kwenu mwense vena mwa Keresite.



## 2 Pitolosi

<sup>1</sup> Simone Pitolosi, muhikana ni mu apositola wa Jesu Keresite, kwavo vava tambuli intumelo ya vutokwa i swana uvu neswe hatu va i tabuli, intumero mu ku chena kwa Ireza ni Muhazi Jesu Keresite. <sup>2</sup> Chishemo ni nkozo chi werwe cha ku pima mu maano a Ireza ni Jesu Simwine wetu. <sup>3</sup> Zintu zonse ku amana maata a hitilila cha vuhalo ni vu Ireza ziva hewa kwetu cha maano a Ireza, ya watu sumpili che nkanya yakwe ni vulotu. <sup>4</sup> Chezi, ava tuhi insepiso i ndotu ni vukando, njikuti muve mu vatambuli ku nkavero ya vwikalo vulotu, uvu hamuva lovoki ku vuchengeleli vwina mu nkanda kevaka lwa ntakazo imbi. <sup>5</sup> Cheli ivaka, muchite cha kulikoza kuku kondisa che ntumelo yenu, ni cha ku kondisa kwenu, maano. <sup>6</sup> Cha maano enu, mu were kuli yendisa, mi kuku liyendisa kwenu, muwere kuli koza, mi mu kuli koza kwenu, mu were vu ireza. <sup>7</sup> Cha vu ireza vwenu, mu were ku zuminzana chense, mi mu ku zuminzana chense kwenu, mu were irato. <sup>8</sup> Chikuti izi zintu zina mwenu ni ku kula mwenu, kete muve vavulite zintu kamba kusa vika zihantu mu maano a Simwine wetu Jesu Keresite. <sup>9</sup> Kono yense yo vulite izi zintu u vona feela china hafuhi; ka voni. Chava zivali za ku jolozwa kuzwa ku zivi zakwe za kale. <sup>10</sup> Lyahanu, vakwangu, mu wongoze ku chita ku sumpwa kwenu ni buketwa vwenu mu vuli kolwisise. Ha mu chita izi zintu, kete mu chunchule. <sup>11</sup> Cheyi inzila menjililo mu movuso wa kuya kuile ya Simwine wetu ni Muhazi Jesu Keresite mu zi hewe kwenu cha ku fuma. <sup>12</sup> Kuzwaho mu ni kuli tukiseze kumi nahanisa chezi zintu, ni ha kwina kuti mu zizi, mi nanga mu kolete kale mu vuniti hanu. <sup>13</sup> Ni zeza kuti ku shiyeme kwangu ku mi kundunga cha kumi nahanisa chezi zintu, ha ni sina mwelinu itente. <sup>14</sup> Mukuti nizi kuti hahanu kani zwise itente lyangu, uvu nji Simwine wetu Jesu Keresite mwavani tondelezi. <sup>15</sup> Kani li koze chenu kuti muku zeza inako yonse chezi zintu nanga cina hita. <sup>16</sup> Mukuti kana tu ve chilili cha vutali matangu akulipangila hatu va mi wambili za ziho ni kuli vonahaza kwa Simwine wetu Jesu Keresite. Kono, tva paki cha menso za vukando vwakwe. <sup>17</sup> Mukuti ava tambuli kuzwa kwa Ireza Ishwetu ku kutekwa ni nkanya liinzwi haliva letwa kwali che nkanya ikando ni icho, “Uzu mwanangu, u sakahala, cakwe ni sangite sinte.” <sup>18</sup> Tu va zuwi ili liinzwi liva zwi mwi wulu, hatu vena naye he lindu li chena. <sup>19</sup> Twina ili liinzwi lwa chiporofita liva nitihazwa. Mu chita sinte ku twala ko maano. Li kola uvu ilambi li munika mu civaka che fifi hesi hakwiza kakusasani mi inkani ya kakusasana i zwa mu nkulo zenu. <sup>20</sup> Mwi zive ichi tanzi, kuti kakwina chiporofita chete nichu torokwe muntu umwina. <sup>21</sup> Mukuti kawina ciporofita chivati chichiza che ntakazo yo muntu. Kono, vantu va hinditwe cha luhoho lu jolola lu wambitwe kuzwa kwa Ireza.

## Inkauhanyo ya 2

<sup>1</sup> Va polofita va vuchengi niveza ku vantu, ni maruti va vuchengi mu veze kwenu nanwe. Cha vu unguli muveze ni murutulo va vusinyi, mi muva sampule mfumwavo yavava uli. Valiletele cha vuhwelu i nsiyeho he ulu lyavo. <sup>2</sup> Vungi kavwi chilile ze zanina lyavo, mi kachavo

inzila ye niti mu i vule ikute. <sup>3</sup> Cha muliilo muvilala muva pange i kekezo henu cha manzwi ovu chengi. Ku nyansiliza kwavo kete ku hinde i nako inde; i nsinyeho yavo ka i lali. <sup>4</sup> Mukuti Ireeza kena ava kwatili mañiloi ava chiti chivi. Kono a va atambiki kwa Tarutarusi kuti avikwe mumahaka efifi li shulumukite kufitela inkatulo. <sup>5</sup> Naye, kena ava kwatili inkanda yo vukulukulu. Kono, ava hazi Nowa, yavali mu tumwa wo kujolola, hamwina nivamwi ve yanza nitivele, haleta munda he nkanda isena vu mulimu. <sup>6</sup> Ireeza naye ava fukuzi intolopo za Sodoma ni Gomora kwi itwe ni kuva nyansa che nsinyeho, cha mutala wetwe ni uchitahale ku vasena Ireeza. <sup>7</sup> Kono kuyo jolola Lota, yava lyatililwe cha mukwa wa vantu vasena mulao muzintu ze nyama, Ireeza namu punyula. <sup>8</sup> Ka cho zuna mukwame yo jolola, yavali kuhala mukati kavo izuva ni zuva, ava sukululwa muluhuo lwakwe lu jolola chakwe chevaka lya chava voni ni kuzuwa. <sup>9</sup> Simwine wizi mwa lukulwila vantu va lukite kuva zwisa mumi liko, ni mwakwatila vantu vasena vuniti inkoto he zuva lye kantulo. <sup>10</sup> Ichi china vuniti sihulu kwavo va zwila havusu ni intakazo zi sa tavisi ze nyama ni ku shuvula vuyendisi. Vena vundume ni kuli chitila muvasakila. Kava tiyi ku tuka vana va vaumbitwe ikanya. <sup>11</sup> mañiloi ena ziho ahulu ni mata, kono ka valeti i nkatulo za kutukana kwavana kwe Simwine. <sup>12</sup> Kono izi zinyolozzi zisa zezi zivavumbwa bulyo ku pangilwa ku kwatwa ni ku sinywa. Kavezi ziva tuka. Kava sinyiwe. <sup>13</sup> Kava tambule mupuzo wa ma fosisa avo. Va zeza kuti kuhala hande musihali nji kuli tavisa. zi bata ni zi donko donko. Valikola mikwa yavo ya vuchengeleli imi niva kwete kulya nanwe. <sup>14</sup> Vena menso ezwiile vanakazi va sangu; kavali kolwisisa ni chivi. Va chengelela inhuho zisa kolete kupanga zivi, mi vena inkulo zavo zi lutitwe intakazo. Vahwile va chikuto! <sup>15</sup> Vava siyilili inzila i shiyeme. Vava zovi ni kwichilila inzila ya Balamu mwana wa Beori, ya vali kutavela ku tambula intifo ya kuvula vuniti. <sup>16</sup> Kono ava wani i nkalimelo ya mulandu wakwe. Chimumu che ndonki ni chi wamba mwi nzwi lya muntu ni cha zimika vu bbulumuki vwa mupolofita. <sup>17</sup> Ava va kwame vakola zi sima zisena menzi. Va kola makope a yendiswa ihuho ikando. Kafifi kakolete kavikilwe avo. <sup>18</sup> Va wamba ni mukuli nyamuna kusena intuso. Va chengelela vantu cha kulakamina za muvili. Va chengelela vantu va lika ku zwa kwa vana va hala mu mafosisa. <sup>19</sup> Vava sepisa i ntukuluho, kono avo vene vahikana va vuchengeleli. mukuti muntu muhikana kuchonse chi mukoma. <sup>20</sup> Yense yo tiya vuvilala vve inkanda che nzivo ya Simwine ni muhazi Jeso Kirisite, ni ku volela ku zivilala hape, ma manimani avwikalo chava a ziyeze kuvali kuhita vwikalo vwa matangilo. <sup>21</sup> Nikuvavile hande kwavo havasete nivave zivi inzila yaku luka kuhita kuiziva ni ku futatila mwi ntaelo ya kuluka iva letwa kuvali. <sup>22</sup> Iyi inguli i niti kuvali: “Umbwa uvolela kuvulusi vwakwe. Chi guluve chi sambite chivolela mwi tope.”

## Inkauhanyo ya 3

<sup>1</sup> Hanu, Ni ñolela inwe, vasakiwa, ili iñolo lyo vuveli lye nkupuzo mu ku ndunga vuniti bwa muhupulo wenu, <sup>2</sup> nji kuti muzeze manzwi ava wambwiwa ku masule ni vapolofita va jolola ni intaelo ya Simwine wetu ni Muhazi ya vahewa cha va apositola. <sup>3</sup> Mwizive ichi intanzi,

kuti vasheununi kaveze mu mazuva a mamaninikizo. Ka vasheunune ni kuzwila havusu ku ya chentakazo zavo vene. <sup>4</sup> Kavati, “Inahi insepiso ya kuvola kwa kwe? Kuzwa vazazi vetu ha valala, zintu zonse zivekali muswana, ku zwa ku matangilo a ku vumbwa.” <sup>5</sup> Ka vazivale kavomu kuti mawulu ni hansi zi vezi kuva cha kuzwa mu menzi mi ni cha menzi, kuzwililila uko, che ntaelo ya Ireza, <sup>6</sup> mi ka chezi zintu, inkanda ye yina inako iva sinyiwa, cha ku miniswa ni menzi. <sup>7</sup> Kono hanu mawulu ni hansi zi vikilwe kwiza ku hiswa ni mulilo che ntaelo iswana. Zi vikilwe izuva lye nkatulo mi ni insinyeho kwa vantu va sena Ireza. <sup>8</sup> Kanzi mukangwa ku lemuha, vasakiwa, kuti izuva lyonke kwa Simwine likolovu lule lwa mwazuva, mi mazuva ena lule a kolovu izuva lyonke. <sup>9</sup> Simwine ka yendi cha kulyehi ku ya che sepiso zakwe, sina vamwi ha vaindinda cha kulyeha mukuva. Kono, inkulonde kwenu. Kalakazi ni heva zumwi kwenu ku sinyeha, kono kuyense ave ni chivaka cha kuvaka. <sup>10</sup> Nihakuvavulyo, izuva lya Simwine kalize uvu musa: mawulu ka zihite ni muhuwo we lata. Mi zintu kazi zihiswe ni mulilo, mi hansi ni mitendo zina mwateni ka zipatululwe. <sup>11</sup> Sina zonse izi zintu kazi sinyehe mweyi inzila, kamuve muvantu venavule? Mulukela kuhala vuhalo vu jolola ni mihalilo ya vu ireza. <sup>12</sup> Mu swanela ku lindila ni kuhwelisa kwiza kwe izuva lya Ireza. Helyo zuva, mawulu kasinyiwe cha mulilo, mi zivumbatu kazi wanjumuke mwi ijeje ikando. <sup>13</sup> Kono chakuya che insepiso yakwe, tulindile mawulu mahya ni hansi hahya, mwete kuve ni kuluka. <sup>14</sup> Kuzwaho, vasakiwa, sina hamulindile izi zintu, muchite mu muwolela muwanike ni musena kavala ku sanyazahala havusu vwake, mwinkozo. <sup>15</sup> Hape, muzeze inkulonde ya Simwine wetu cha kuhazwa, sina mwena mwetu Paulusi yosakahana ha va miñoleli, chakuya cha vutali vuvahewa kwali. <sup>16</sup> Paulusi uwamba chezi zintu muwonse mañolo akwe, muali mwina zintu zi kukutu ku kuzizuwisisa. Vakwame va sezi mi ni va sawondeki mwezi zintu, sina havapanga vulyo zimwi intimana, kwi insinyeho yavo. <sup>17</sup> Kuzwaho, vasakiwa, sina hamwizi izi zintu, mulivukeleze njikuti kanzi muzwiswa cha vuchengi bwa vantu vafokola mi muzovelwe ku sephala kwenu. <sup>18</sup> Kono mukule mu chishemo ni nzivo ya Simwine ni Muhazi wetu Jesu Kirisite. Mi ikanya ive kwali konse hanu ni kuya kuvusu uko. Kuvevulyo!

# 1 Johani

<sup>1</sup> China chivena kuma tangilo-chi tu vazuwi, chi tuva voni ni menso etu, chi tuva loli hateni, mi etu mayanza ava kwati- kuya kache nzwi lya vuhalo. <sup>2</sup> Hape, vuhalo vuve zi vankaniswa, mi tuva vu voni, mi twina vupaki vwaza teni. Twi zi vahaza kwenu za vuhalo vu ya kule, vu vena ni Tayo, mi vu ve zibahazwa kwe tu. <sup>3</sup> China chitu va voni ni ku zuwa tu chi wamba kwenu nanwe, nji kuti nanwe muve ni chilikani na swe. Chi likani chetu china ni Tayo ni mwana kwe, Jesu Kirisite. <sup>4</sup> Hape, tu miñolela izi zintu kwenu nji kuti kusanga kwetu ku izuzilizwe. <sup>5</sup> Uwu nji mulaezo utu va zuwi kwali mi wi ziviswa kwenu: Ireza i seli, mi mwali kakwina nanta chi nzime. <sup>6</sup> Heva ni tu wamba kuti twina chilikani na ye mi ni tu yenda mwi chi nzime, tu chenga mi ka tu likanyisi bu niti. <sup>7</sup> Kono haiva ni tu yenda mwi seli sina iye hena mwi seli, twina chilikani ni zumwi ni zumwi, mi malaha a Jesu Mwana kwe a tu joloza ku chivi chonse. <sup>8</sup> Heva tuwamba kuti katwina chivi, tu li chenga tuvene, mi vu niti ka vwina mwetu. <sup>9</sup> Kono ha tuli wamba zivi zetu, u sepahala ni kuluka kuku tu wondela zivi zetu mi ni ku tu joloza mu ku sa luka kwetu konse. <sup>10</sup> Heva nitu ta kuti ka twini ku chita chivi, tu mu panga kuti ave muchengi, mi inzwi lyakwe ka lina mwetu.

## Inkauhanyo ya 2

<sup>1</sup> Vahwile, ni mi ñolela izi zintu kwenu nji kuti kanji mu chiti chivi. Kono heva zumwi na chita zivi, twina mu zimanini ni Tayo, Jesu Kirisite, yenke yo lukite. <sup>2</sup> Mu sunguli wa zivi zetu, mi isiñi zetu bulyo, kono ze nkanda yonse. <sup>3</sup> Kechi twizi kuti tu mwizi: heva ni tu vika intaelo zakwe. <sup>4</sup> Zuna yo wamba,” Ni izi Ireza,” kono ka viki milao yakwe, u chenga, mi initi kaina mwali. <sup>5</sup> Kono yense yo vika inzwi lya kwe, cha vuniti vwi zwile, nji mo zuna muntu kuti i lato lya Ireza li va chitwa tota. Kechi twizi kuti twina mwali. <sup>6</sup> Iye yo wamba kuti u shala mwa Ireza u swanela naye ku yenda uvu Jesu Krisite mwa vayendeli. <sup>7</sup> Basakiwa, Kani ñoli mulao muhya kwenu, kono wa kale mulao umu vena nao ku matangilo. I ntaelo ya kale i nzwi i muva zuwi. <sup>8</sup> Imi ni ñola mulao muhya kwenu, ili initi mwa Kiresite ni mwenu, kakuti chinzime cha mana, mi iseli lye niti chili venyete kale. <sup>9</sup> Iye yo wamba kuti wina mwi seli mi kasaki mwakwe wina mu chi nzime ku sikila hanu. <sup>10</sup> Iye yo saka mwakwe u shala mwi seli mi kakwina chi mwi mwali chiwola kumu letela chunchula. <sup>11</sup> Kono Iye ya sasaki mwakwe wina mu chinzime mi uyenda mu chinzime; kezi kwa kaya, kakuti chinzime cha mu cita vuhofu ha menso akwe. <sup>12</sup> Ni mi ñolela, bahwile ba sakahala, kakuti zivi zenu zi kwatilwe che vaka lyezina lyakwe. <sup>13</sup> Ni ñola kwenu va zazi, kakuti mwizi iye ku zwa kuma tangilo. Ni ñola kwenu, mi lombwana, kakuti mu va komi mu vilala. Ni vami ñoleli va hwile va nini, kakuti mwizi Itayo. Ni va mi ñoleli va zazi, kakuti mwizi iye yo zwa kuma tangilo. <sup>14</sup> Ni va ñoli kwenu mu va lombwana, ka kuti mukolete, mi inzwi lya Ireza li shala mwenu, mi muva komi muvilala. <sup>15</sup> Kanji mu saki inkanda

kamba zintu zina mwi inkanda, heva kwina yo saka inkanda, i lato lya Itayo kalina mwali. <sup>16</sup> Linu zonse zina mwi inkanda -ku lakamina kwe nyama, ku la kamina kwa menso, ni ku li tundumwina vuhalo-ka ku zwi kwa Itayo kono kuzwa mwi inkanda. <sup>17</sup> Inkanda ni ntakazo yateni zi hita. Kono yense yo chita ku suna kwa Ireza mwaveko kuya ukoo. <sup>18</sup> Bahwile vanini, inako ya mamani mani. Sina mu mu va zuwili kuti vu kani vwa Kirisite u kezite, hanu vangi vakana Kerisite vavezi. Kechi twizi kuti cheli inako ya ma mani mani. <sup>19</sup> Vava yendi kuzwa kwetu, kono kena vavali kuzwa kwetu. Mukuti kambe vavali kuzwa kwetu ni vava shali naswe. Kono hava yenda kuzwa, ku va tondezi kena vavali kuzwa kwetu. <sup>20</sup> Kono wina i ntozo ku zwa kuyo Jolola, mi mwense mwizi vuniti. <sup>21</sup> Kena na ñola kwenu ka kuti ka mwizi vuniti, kono kakuti mu vwizi mi kakuti ka kwina mapa azwa mu vuniti. <sup>22</sup> Muchengi njeni kwande yo zuna yo sampula kuti Jesu nji ye Kirisite? Zuna muntu njo lwisa Kirisite, kakuti u sampula Itayo ni mwana. <sup>23</sup> Kakwina yo sampula mwana wina Itayo. Iye mwine ulemuha mwana naye wina Itayo. <sup>24</sup> Kuya chenu, musiye zi muva zuwi ku ma tangilo zi shale mwenu. Heva zimuva zuwi ku matangilo zi shala mwenu, ka mu shale nanwe mu Mwana ni mwe Tayo. <sup>25</sup> Mi iyi insepiso ya va hi kwetu: vuhalo vusa mani. <sup>26</sup> Nami ñolela izi zintu cha kuya chavo vete ni vavami zwisi mwi nzila. <sup>27</sup> Kuya chenu, i ntozo i muva tambuli kuzwa kwali i shala mwenu, mi kamu saki umwi ku mi luta. Kono sina intozo yakwe imi luta zintu zonse mi initi mi kahena kuchenga, mi sina ka mumu va ilutilwa, mushale mwali. <sup>28</sup> Mi linu, va hwile va sakahala, mu shale mwali, nji kuta kuti chavoneka, mutuve ni vundume mi kete tu swave havusu vwa kwiza kwakwe. <sup>29</sup> Heva mwizi kuti ulukite, mwizi kuti zumwi ni zumwi yo panga chi lukite ava zalwa kwali.

### Inkauchanyo ya 3

<sup>1</sup> Vone, mufutanzi we ilato Ishetu lya vahi kwetu, kuti tu sumpwe vana va Ireza, mi nji chona chi tuli. Cheli vaka, i nkanda ka itwizi, kakuti kana iva mwizi. <sup>2</sup> Vasakiwa, hanu cheli tu vana va Ireza, mi kakwini ku patululwa chese ni tuve kacho. Twizi kuti Kirisite cha voneka, katuve sina iye, kakuti ka tu muvone sina uvu mwe kalile. <sup>3</sup> Yense wina iyi insepiso kuya cha vuhalo vwa ku vusu vu lolete hali u lishanza mwine sina mwe kalile ku jololola. <sup>4</sup> Yense yo zwila havusu u chita chisena mulao, kakuti chivi ku vula mulao. <sup>5</sup> Mwizi kuti Kirisite ava patululwa ku pangila ku zwisa zivi. Mi mwali ka mwina chivi, ka kakwina yo shala mwali yo zwila havusu ni chivi. <sup>6</sup> Ka kwina yo zwila havusu muchivi ya va muvoni kapa ku mwi ziva. <sup>7</sup> Vana vasakiwa, kanzi mu siyi yense ku mi zwisa mu nzila. Iye yo panga zilukite u lukite, sina uvu Kirisite ha lukite. <sup>8</sup> Iye yo panga chivi uzwa kwa javulusi, kakuti javulusi ava fosi ku zwa ku matangilo. Cheli vaka Mwana wa Ireza ava patululwa, kuti za sinyenge misevezi ya javulusi. <sup>9</sup> Yense ya va zalwa kwa Ireza katendi chivi kakuti lutanga lwa Ireza lushala mwali. Kawoli ku zwila havusi na chita chivi kakuti uzelve cha Ireza. <sup>10</sup> Mwe chi vana va Ireza ni vana va javulusi va patululwile. Yense ya sa pangi chi lukite ka zwi kwa Ireza; kapa njozo ya sa saki mwakwe. <sup>11</sup> Ili njeli ifusa li muvazuwi ku matangilo: kuti tulisakane tuvonse. <sup>12</sup> Isiñi uvu Kaine, ya vali kuzwa ku muvilala ni kwi haya

mwa nchakwe. Mi chinzi ha va mwi hai? Kakuti misevezi ya kwe ivali mivilala, mi ya mwakwe iva lukite. <sup>13</sup> Kanzi mu komokiswa, va kwetu, haiva inkanda imi toya. <sup>14</sup> Twizi kuti tu va hitilili ku zwa mwifu ku ya mukuhala, kakuti tusaka vakwetu. Yense ya suni ushala mwifu. <sup>15</sup> Yense yo toyete mwakwe chi hayi. Mi mwizi kuti uvu vuhalo vusa mani ka vushali mu chihayi. <sup>16</sup> Kache chi mwizi kuti ilato, kakuti Kirisite ava la ziki vuhalo bwakwe hansi chetu. Na swe tuswanela ku lazika vuhalo vwetu cha va mwetu. <sup>17</sup> Kono yense yokwete zintu ze nkanda, na vona mwakwe yo vulite mi wi yala inkulo yense ku zwa kwali, linu ilato lye Ireza ka lishale vule mwali? <sup>18</sup> Vana vangu va sakahala, kanzi tu saki mwi inzwi kapa mu lulimi, kono mu zimpangaliko ni initi. <sup>19</sup> Nji ka chezi twizi kuti tuzwa ku niti, mi tulizuwi vuvi inkulo zetu ha li. <sup>20</sup> Mi haiva inkulo zetu zi tunyansa, Ireza mukando ku hita inkulo zetu, mi wizi zintu zonse. <sup>21</sup> Vasakiwa, haiva inkulo zetu ka zi tunyansi, twina insembo kwa Ireza. <sup>22</sup> Zonse zitu kumbila katuzi tambule kuzwa kwali, kakuti tu vika milao ya kwe mi tupanga zintu zi kondwa hali. <sup>23</sup> Uwu nji mulao wakwe: kuti tu zumine mwi zina lya Mwana Jesu Kirisite, mi ni kulisaka mu vonse, sina mwa vatuheli uwu mulao. <sup>24</sup> Iye uzo yo vika milao ya Ireza ushala mwali, mi Ireza ushala mwali. Che chi twizi kuti ushala mwetu, cha Luhuhu lu vahewa kwetu.

## Inkauhanyo ya 4

<sup>1</sup> Ba sunwa, sanzi muzumini ihuhu zonse. Mihe mulike ihuhu kuvona kapa zizwa kwe Ireza, kakuti vaporofita va mapa bangi vava yendi mwi nkanda. <sup>2</sup> Chechi ka mwizive luhuhu lwe Ireza—luhuhu lonse luzumina kuti Jesu avezi mwi nkanda che nyama uzwa kwe Ireza, <sup>3</sup> Mi luhuhu lonse lusa zumini kuti Jesu uzwa kwe Ireza kaluzwi kwe Ireza. Ulu nji luhuhu lwa bakani ba keresite, umu vazuzi kuti ukeza, mi hanu chiwina kale mwi nkanda. <sup>4</sup> Muzwa kwe Ireza, Vaana va lotu, mi muva zunda kakuti iye wina mwenu mukando kwali wina mwi nkanda. <sup>5</sup> Abo vazwa mwi nkanda, linu ziva wamba zizwa mwi nkanda, Mi ve nkanda va teka kuvali. <sup>6</sup> Tuzwa kwe Ireza. Yense yo zwa kwe Ireza utekeleza kwetu. Iye yasa zwi kwe Ireza ka tekelezi kwetu. Chechi twi ziva luhuhu lwe niti ni luhuhu lu fosahela. <sup>7</sup> Vasakwa, tulisake zumwi ku zumwi, mi ilato lizwa kwe Ireza, mi yense yo suna uzalwa kwe Ireza mi wizi Ireza. <sup>8</sup> Muntu yasa suni vamwi kezi Ireza, mukuti Ireza ilato. <sup>9</sup> Cheli ivaka ilato lye Ireza liva patulwilwa mukati ketu, Kuti Ireza ava tumi mwana kwe ye yena mwi nkanda kuti tu hale che vaka lya chakwe. <sup>10</sup> Mweli ilato, isinyi kuti tuva suni Ireza. kono kuti aba tusuni, mi cho kuti aba tumi mwaana kwe kuti ave chitavelo cha zivi zetu. <sup>11</sup> Basunwa, haiva Ireza ava tusuni, naswe vulyo tuli sune. <sup>12</sup> Kakwina ichaba bwene Ireza. Hatu lisuna, Ireza wi kala mwetu, Mi ilato lyakwe li kondete mwetu. <sup>13</sup> Chechi twizi kuti twina kwali mi wina kwetu, kakuti ava tuhi lumwi kulu huhu lwakwe. <sup>14</sup> Hape, tu vavoni mi twina vupaki bwa kuti Ishetu ava tumi mwana kwe we chiswisu kuti za ve muhazi we nkanda. <sup>15</sup> Yense yo lemaha kuti Jesu mwana Ireza, Ireza wina mwali mi naye mwe Ireza. <sup>16</sup> Hape, tuvezivi ni kuzumina ilato lye Ireza kwetu. Ireza ilato, mi yo shala mweli ilato wi kalilila kwe Ireza, mi ni Ireza wi kalilila kwali. <sup>17</sup> Cheli ivaka, Ili ilato liva chitililwa mukati ketu. Njokuti katuve

ni nsepo mwi zuva lye nkatulo, kakuti mwe kalile, vo vulyo mutwi kalile mwi nkanda. <sup>18</sup> Kakwina kutiya mwilato. Kono, ilato lishiyeme kutandila kutiya kunze. Kakuti kutiya kuleta inkatulo. Kono yo tiya keni kupetahala mwi lato. <sup>19</sup> Tusuna kakuti Ireza ava tusuni lwe ntazi, <sup>20</sup> Haiwa muntu nata kuti, “Nisuni Ireza” kono utoyete mwakwe, wina mapa. Mukuti yasa suni mwakwe, yava voni, ka woli kusuna Ireza, yaseni kuvona. <sup>21</sup> Hape, iyi nji ntaelo itukwete kuzwa kwali: Yense yosuna Ireza, uswanela kusuna mwakwe.

## Inkauhanyo ya 5

<sup>1</sup> Yense yozumina kuti Jesu nji Kiresite u pepwetwe ku zwilila kwa Ireeza. Mi yense yosaka isi muntu usaka mwana yo pepwetwe ku zwa kwali. <sup>2</sup> Chobuti twizi kuti tusaka bana ba Ireeza: hatu saka Ireeza niku panga intaelo zakwe. <sup>3</sup> Mokuti ili njilato lya Ireeza: kuti tubike intaelo zakwe. Mi intaelo zakwe kazilemi. <sup>4</sup> Mukuti yense yopepetwe kuzwilila kwa Ireeza u koma inkanda. Mi ichi njikuwina kukoma inkanda: intumelo yetu. <sup>5</sup> Njeni yozo yokoma inkanda? Iye yozumina kuti Jesu Mwana wa Ireeza. <sup>6</sup> Uzu njiyena yabakezi cha menzi ni malaha: Jesu Kiresite. Kanabezi bulyo chamenzi, kono chamenzi ni malaha. <sup>7</sup> Mukuti kwina botatwe bena bupaki: <sup>8</sup> Luhuhu, menzi, ni malaha. Izi zotatwe zina mwintumelelano. <sup>9</sup> Heva tuwana vupaki vwa vantu, vupaki vwa Ireeza vukando. Vushupi vwa Ireeza njovu, chava hi vupaki ku amana za mwana kwe. <sup>10</sup> Yense yo zumina mu Mwana Ireeza iye mwine wina vushupi mwali. Yense yasa zumini Ireeza chava mupangi kuti uchenga, kakuli ka zumine vupaki vwa hele Ireeza ku amana za Mwana kwe. <sup>11</sup> Mi vupaki njovu: Ireeza ava tuhi vuhalo vusa mani, mi vuhalo uvu nji Mwana kwe. <sup>12</sup> Iye yo wina Mwana wina vuhalo. Iye ya sena Mwana Ireeza kena vuhalo. <sup>13</sup> Niva miñoleli izi zintu ku chitila kuti mwi zive kuti mwina vuhalo vusa mani - kwenu inywe muzumina mwi zina lya Mwana a Ireeza. <sup>14</sup> Mi hape, iyi nji nkutwisiso itwina nayo ha vusu vwakwe, kuti hatu kumbila chonse kuya ke ntato yakwe, utu zuwa. <sup>15</sup> Mi hape, heva twizi kuti utu zuwa - chonse chi tumu kumbila - twizi kuti twina chonse chitu va kumbili kwali. <sup>16</sup> Heva yense uvona mwake na panga chivi chisa leteli ifu, u swanela ku lapela, Mi Ireeza mwa muhe vuhalo. Nita kwavo zivi zavo kazi leteli ifu. Kwina chivi chi leteza ifu; kani ti kuti uswanela ku lapelela zezo. <sup>17</sup> Vonse vufosi chivi, kono kwina zivi zisa leteli mafu. <sup>18</sup> Twizi kuti yense yo pepwetwe kuzwa kwa Ireeza kena chivi. Kono iye ya va pepwa kuzwa kwa Ireeza umu vuluka ke ntokomelo. Mi iye muvilala ka woli kumu tenda vuvi. <sup>19</sup> Twizi kuti tuzwa kwa Ireeza, Mi twizi kuti lyonse ifasi li wila kozo muvilala. <sup>20</sup> Kono twizi kuti Mwana we Ireeza avezi mi ava tuhi inkutwisiso nji kuti twizive uzo we niti. Mi hape, twina mozo wa vuniti, mu mwana kwe Jesu Kirisite. Njiye Ireeza we niti ni vuhalo vusa mani. <sup>21</sup> Bana, muli zwise kuzi swaniso.

## 2 Johani

<sup>1</sup> Kuzwa kumukulwana kuya kumwanakazi yoketetwe nivana vakwe, uzo unisaka mubuniti- mi isiñi fera ime, Linu nikwavo bonse vezi buniti- <sup>2</sup> Vakenyi chavuniti bwikalilile kwentu nintato iyenda kusamani. <sup>3</sup> Imi chisemu, kuluka, inkozo muive naswe niku nsuna kuzwa kwa Ireeza kuzwa kwe Shetu kuzwila kwa Jesu Kereste, mwana weshetu, muvuniti nirato. <sup>4</sup> Nisanga chavu kando kuti nivawani vamwi vanavenu bayenda mwiniti, sina mutuvatambwili iyi intayelo izwila kweshetu. <sup>5</sup> Imi hanu niku kumila, mwanakazi- isikuti niku ñolela intayelo ihya, kona itubazuwi kuzwa kutazi-mukuti tusakane, <sup>6</sup> Imi ilinji rato, Ilikuti tuyende chetaelo yakwe. Iyi nji ntayelo, sina hamubazuwi kumatangilo kuti muyenda muyili. <sup>7</sup> Mukuti vangi vachengi bachi vavayendi mwikanda, linu kavawambi kuti Jesu kereste avezi mwinyma, uzu njimuchengi mukuti kahena nji Jesu. <sup>8</sup> Mulilole inwe muvene, ilikuti kanji musinyehelwa icho chitu vasevelezi. kono Ilikuti tuka tambule mupuzo wizwile. <sup>9</sup> Yense yoyenda havunsu nasekali mwituto za Jesu kena Ireeza. imi wikala mwitunto, Linu uzu njiwina Ishentu ni mwanakwe, <sup>10</sup> linu iye wiza kwenu nasena yinu itunto, kanji mu mutambuli mwizuvo yenu kanji mu mulumeresa. <sup>11</sup> Mukuti iyemwine yo mutambula uwanika muchive cha mitendo yakwe. <sup>12</sup> Nikwete zintu zingi zinilukela kuminolela, nina zintu zingi kono kani nsuni kuzi nola hepapili ni inke. Nihakuvabulyo, nilakaza kwiza kwenu zeni wambole nitulilolete, Ilikuti kusanga kwentu. <sup>13</sup> Bana vamwachako wachikazana vakurumelesa.



## 3 Johana

<sup>1</sup> Mukulwana ku yosakwa Gayusi, uzo ye ni saka mwiniti. <sup>2</sup> Yosakwa, Ni rapela kuti u zwire havusu muzintu zonse mi uve ni bwiketo, sina luhuhu lwako halushiyeme. <sup>3</sup> Chobulyo ni vatavi hahulu mizwale ha vabakezi kuku niha vupaki bweiniti yako, sina hauyenda mwiniti. <sup>4</sup> Kanina intabo inkando kuhita iyi, kuzuwa kuti vana vangu bayenda mwiniti. <sup>5</sup> Yosakwa, upange cha vusepahali inako yonse yo tendela mizwale ni vantu vasezibenkani, <sup>6</sup> avo ba vazalwa ne vapaka ilato lyako havusu bwenkeleke. U chita hande ku vatumina mulwendo lwabo munzila zi swanela Ireeza, <sup>7</sup> chakuti i vali chevaka lye zina ha va bayendi kungi, ne kusena che va vahindi ku bechisi. <sup>8</sup> Iswe cwale nihakuva vulyo tuswanela kuamuhela zintu ziswana nezi. iri chakuti tu ve vaveleki ve chilile initi. <sup>9</sup> Ni va ñoleli chimwi kwi inkeleke, kono Diotrefi, usaka kuva kuvusu mukati kavo, ka tu tamburangi. <sup>10</sup> Nihakwinabulyo, haiva ni nikeza, kanihupule inkezo zakwe zava chita, mwa wambilanga zintu zivi zilwisa iswe cha manzwi e na lunya. Isinyi cha kutaviswa chekezo izo, iye mwine ka atambuli mizwale. U kanisa abo va ba kakulakaza kuchita bulyo ni kuvatanda ku vazwisa mwinkeleke. <sup>11</sup> Yosakwa, kanji u likanyisi kuchita bubi kono zilutu. I ye mwine u chita zilutu nji wa Ireeza; I ye mwine u chita bubi keni kuvona Ireeza. <sup>12</sup> Demetriusi a vapepwa na pakwa kuvantu vonse ni kwiniti iyo yine. Naswe bulyo tupaka, mi mwizi kuti vupaki bwetu bweniti. <sup>13</sup> Nivena zintu zingi zi ni wola kukuñolela, kono ka ni taveli kuziñola cha siñoliso ni inke. <sup>14</sup> Ni libelele ku kuvona lyahanu, mi katuwambe menso cha menso. <sup>15</sup> Mi inkozo ive nawe. Valikani va kurumelisa. U rumelise valikani che zina.

## Juda

<sup>1</sup> Juda, muhikana wa Jesu Chrisite, ni mwanche wa Jakobo, kwabo bansumpitwe, Basakiwa kwa Ireeza Fumwetu, mi babikilwe Jesu Chrisite: <sup>2</sup> Mi chisemo ni nkozo, lato zibe zingi kwenu. <sup>3</sup> Yosakiwa, niba kutabele kuku ñolela choku hazwa kutu kopanelwe, Ni swanela kuku ño kukolisa kwa ko kunyanda choku tundamena kulyila i ntumelo iba kenzi kuba lumeli bose. Bamwi bakwame bali kopenye mukati kenu. <sup>4</sup> Aba bakwame ba swaitwe kuya kuku nyaziwa. Aba bakwame basena Ireeza basinya chisemo cha Ireeza mubukata, mi bakana Muyendisi ni Simwine, Chrisite Jesu. <sup>5</sup> Hanu nimi lakaleza-niha kuba bulyo maba kuzizi hande-linu Simwine aba hazi batu mwi nkanda ya Egepita, mi kuma mani mani aba shinyi abo nsena baba kuzumina. <sup>6</sup> Ni mañiloi sena abo liwongozi mubunduna bwa mata awo, kono abo siiyi chibaka china hande chawo-Ireeza wa sumine ni mawenge akuya kusamani, mwi fifi luli, kulindila izuba lye nkatulo inkando. <sup>7</sup> Kuswana feela sina nji Sodoma ni Gomorrah ni mileneñi iva zimbulukite, Awo alikopene mumu hupulo obushahi nikuzwila habusu nimi hupulo ye chivi. Batondeza mutala wavo vanyanda ikoto yamulilo we kuya kusamani. <sup>8</sup> Ili mwinzila iswana, ava mwakulota kwavo va silafaza mibili ya bo. Ba lyisa mata, mi bawamba zintu zamapa zilwisa mubuso we nkanya. <sup>9</sup> Linu Mikaele induna ya mañiloi, haba ku kanana ni Diabulosi zomu bili wa mushe chamu kalimela, sazi uliki kuleta ikatulo ya mapa ku amana naye. Kono chowamba, “Linu Simwine aku kalimele!” <sup>10</sup> Linu abo bantu bawamba mapa kuzintu sonse zibasa zuwisisi. Niziba zuwisisa-chinzi zinyoloji zisa hupuli hande chezizi-izi njizona zi baba sinyi. <sup>11</sup> Bumai kubali! Linu baba yendi mwinzila ya Kaine, hape baba bikwa mwa Balaam ma fosisa kuwana. Baba fwili mwa kora musandukili. <sup>12</sup> Aba chibona balipatite beyalila mu mikiti yenu ye lato. Linu mukiti iswabisisa, balilela abo bene. Linu makope asena mezi, ahindiwa luhuhu. Linu zikuni zamaliha zisena zichalantu-zifwile tobele, zi zwile kumihisi. <sup>13</sup> Vaswana ili mandinda omwi wate akalihite, apanga ziswabisisa awo ene. Inkani zilyangene, linu kusiha kwe fifi kuba kubikilwe kuya kule. <sup>14</sup> Enoke, yokwana iyanza limwina kuzwilila kwa Adama, baba polofitwa ku amana nabo, Kuwamba, “Lole! Simwine ukeza ni zikiti kiti zabakwe zijolola. <sup>15</sup> Ukeza kukuntenda inkatulo kuzumwi ni zumwi. Ukeza kuku kalimela bantu bose basena Ireeza chamisebezi yose iba bapangi mwinzila isali ya Ireeza, nimazwi ose mabi ababa wambi bantu bavi basena Ireeza ku amana naye.” <sup>16</sup> Aba jiba kanana, batongoka, bechilila mihupulo yabo mibi. Bakuhuweleza chakuli tundubula, abo, balumba bantu kuti bawane, zibasaka. <sup>17</sup> Kono inwe, yosakwa, muhupule manzi abo wambiwa kale cha muapositola wa Simwine Chrisite Jesu watu. <sup>18</sup> Baba wambi kwako, “Mwinako zama mani mani mukube niba nyefuli be chilila intakazo zabo zisena Ireeza.” <sup>19</sup> bantu kabena luhuhu. Abo be fasi, mi kabena luhuhu. <sup>20</sup> Kono inwe, yosakwa, mulizake inwe mubene che ntumelo i jolola, mi mulapele cho luhuhu lujolola. <sup>21</sup> Mulibike mwi lato lya Ireeza, nikulindila i lato la Simwine Chrisite Jesu iku letela buhalo busamani. <sup>22</sup> Chisemo cheve kwabo basa zumini.

<sup>23</sup> Muhaze bamwi kakuba zwise mu mulilo. Mutoye nihaiba chizwato che nyama. <sup>24</sup> Linu kwali yenki yo wola kuti tusa kuku sawa, mi niku tuwolisa kuzimana habusu ye nkanya yakwe, nikusena kunyazahala nimwi ntabo, <sup>25</sup> Kwa Ireeza yenke ni muhazi kuya ka Chrisite Jesu Simwine wetu, kube ni kanya, bulena, kubusa, ni mata, inako yose yamamani mani, linu, ni kuya kuma mani mani. Amen.

## Insinulo

<sup>1-3</sup> iyi i nsinululo ya Jesu keresite iyo Ireeza aba muhi kubonisa ba hikana bakwe chiswanela ku tendahala nambwangu. aba i zibankanisi caku tuma ingeloi lwakwa kumuhikana wakwe Joani. Joani abahi bupaki ku amana ninzwi lya Ireeza mini cabu paki buba hewa kwa amana ni Jesu Kereste, zintu zonse za baboni. Ba tohonolofezwe abo ba bala ca kuhuwa, mi nabo ba teeka kwinzwi lyakwe lya cipolofita, ba kuteka ci! noletwe mwateri, mukuti inako ciyina hafuhi. <sup>4</sup> Joani, kwi keleke zikwana iyaza ni zobebe mwa Asia; Chishemo chibe nanwe ni nkozo izwa kozo winako, imi abenako, imi iye yosikeza, imi yozwa kwihuho zikwana iyaza nitobebe benakumasule achihuna chakwe, <sup>5</sup> imi kuzwa kwa Jesu Kereste, ipaki isepahala, Iye wetanzi kuzwa kuba fwile, iye mubusi uba simwine ba mwikanda. Kwali iye mwine yotusaka aba tulukululi kuzive kamalaha akwe— <sup>6</sup> aba tupangi busimwine, buprisita bwabuIreeza imi Shetu- kwali kube nikanya ni maata kuya kusamani. Amen. <sup>7</sup> Mubone, ukezite mu makope; meso wonse kamubone, kukopanya nabo baba muhwezoli. Imi yonse mishobo ya munkanda kayisilise chebaka lyakwe. Eni, Amen. <sup>8</sup> Njeme wetanzi ni mamanani,” kuwamba Simwine Ireeza, “iye wina ko, imi yabena koo, imi yosikeza, wina Inguzu.” <sup>9</sup> Ime Joani-mukwaluzubo wenu hape uli yabela nanwe mu manyando nimuso nikulo inde kubena kwa Jesu—nibena muchiwoli chisupwa Patmosi chebaka lyezwi lye Ireeza ni bupaki buamana niJesu. <sup>10</sup> Ni bena Muluhuho mwizuba lya Simwine. Ni bazuwi kumasule angu muhuwo mukando sina intolombita. <sup>11</sup> Nilyati, “ñole zobwene mumbuka, imi zutumine kwi kereke zikwana iyanza limwina ni tobele—kwa Maefese, kwa Simina, kwa Pegamumu, kwaTiyatira, kwa Sadisi, Kwa Filadefia, im ni kwa Laodisia.” <sup>12</sup> Ninachebuka kubona mwine wezwi liwamba kwangu, imi hani chebuka china bona malambi egaunda akwana iyaza nitobebe. <sup>13</sup> Hakati kamalambi kubena yoswana sina mwana muntu, nazwete chizabalo chile chisika kumatende, imi ni mbati lizimbulukite chizuva chakwe. <sup>14</sup> Mutwi ni suki zakwe zibali kutuba sina boza bwembebelele sina kabundu, hape meso akwe sina indimi ya mulilo. <sup>15</sup> Matende akwe aba kubenya sina ibronze, sina ibronze iba hiswa mu mulilo, hape izwi lyakwe liba kuzuweka sina mezi mangi atiya. <sup>16</sup> Abena ikani zikwana iyaza nitovere kwiyaza lyamalyo, ni chilinga chishengetwe kose chiba kuzwa mu mulomo wakwe. Chi fateho chakwe chiba kubenya sina izuva lihisite. <sup>17</sup> Linu hanimubona, chinawila habusu bwamatende akwe sina muntu ufwile. Chakambika iyaza lyabulyo imi nati, “Sanzi usuhi. Njeme wetazi ni wamamaninizo, <sup>18</sup> ime yohala. Nibafwile, kono bone, Nihala kuyakusamani! Hape nina chikulukulu chefu ni Hele. <sup>19</sup> Chobulyo ñole hanshi zobaboni, zinako hanu, ni zetenizihinde chibaka kuzwa kwezi. <sup>20</sup> Kwezina ziwungwilwe italuso kuamana nikani zikwana iyaza nizobebe zobaboni zina mwiya lyangu lyabulyo, ni malambi egaunda akwana iyaza ni wobebe. Ikani zikwana iyaza ni tovele nji mangiloi akwana iyaza ni zobebe ekereke, imi zikwana iyaza ni zobebe malambi akwana iyaza ni wobebe nji kereke zikwana iyaza ni zobebe,”

## Inkauhanyo ya 2

<sup>1</sup> Uñolele iñiloyi lye Kereke ya Sarde. Aya njimanzwi ozo yokwatilile inkani zitenda iyaza ni zobeke kwiyanza lyakwe lyabulyo imi yoyenda mukati kamalambi eganda akwana iyanza ni obele, <sup>2</sup> “Nizi zobapangi imi musebezi wako mukando ni inkulo inde yakulindila. Nizi kuti kowoli kulolelela bantu bachive. Nizi kuti ubaliki abo baliwamba kuti ba Apositola, kono nisali njibona, imi ubabawani kuti babuhata. <sup>3</sup> Nizi kuti wina inkulo inde yakulindila, imi ubanyandi maswe chebaka lyezina lyangu, imi kena ubakatali. <sup>4</sup> Kono nikubengelele kuchokuti ubasiyi kumasule ilato lyako lyetanzi. <sup>5</sup> Uzeze chobulyo kukazwilila hobakawili. Ubakele zive imi utatike kutende zintu zobatatiki kwitazi. Konji chiwabakela zive, Kanikeze kwako imi kanizwise mekalilo amalambi hazikalilo zateni. <sup>6</sup> Kono uzikwete izi: Utoyete bulyo za Filadelfia zabapangi, izo name nizitoyete. <sup>7</sup> Usiye abo bene matwi bazuwe chiluwamba Luhuhu kwi Kereke. Kwabo bakoma kanibahe inswanelo yakulya kwisamu lyabuhalo, uwanika mumubuso muhya wa Ireeza.” <sup>8</sup> Uñolele iñiloyi kwi Keleke ya Laudisea: Aya njimanzwi uzo we tanzi ni mamani mani, uzo habafwile imi chabukila kuhala hape. <sup>9</sup> Nizi masukuluka ako ni bunjebwe bwako, kono ufumite. Nizi kuti kwina baliwamba kuti Majuda, kono nisali njibona. Bezwile bulyo Buhedeni. <sup>10</sup> Sanzi mutiyi kuamana kuzete munyandiswe. Mubone! Jabulosi ukwete kulitukiseza kusohela bamwi mutolongo kutendela kuti mulikwe, imi munyandiswe chamazuba atenda ikumi. Musepahale bulyo kutwala ifu, imi kanimihe mushukwe wa buhalo. <sup>11</sup> Musiye bena matwi bazuwe Luhuhu chiluwamba kwi Keleke. Iyemwine yatakome kesenabone kusasama kwefu lyabubeli.” <sup>12</sup> Uñolele iñiloyi lye Keleke ya Pergamum: Aya njimanzwi ozo yokwete mukwale ucheka kobeke. Nizikale kumuhala, uko kuwanika mubuso wa Satani. Njokuti mukwatilile kwizina lyangu. <sup>13</sup> “Nizi kuti kene mukabani intumelo yenu yakwangu, nihakuba mumazuba aa Antipas muzimanini wangu, Basepahala bangu, njeni yabahayiwa mukati kenu, uko kwahala Satani. <sup>14</sup> Nina zintu zilikene zinisatabeli: Kwina bamwi mukatikenu bakwatilile kwi tuto za Balaamu, uzo yabaluti Balaki kuzinda zisitaliso pili kubana ba Masilaele, kuti bawole kulya zilyo za chitabelo cha maswaniso imi nikuba basangu. <sup>15</sup> Mwinzila iswana, musina bamwi bakwatilile kwituto za Nicolaitans. <sup>16</sup> Mubakele zive, chobulyo, Haiba nimusa tendi bulyo, imi munibutule indwa ya kusazumizana nabo chamukwale wamulomo wangu. <sup>17</sup> Musiye abo bene mantwi bazuwe Luhuhu chiluwamba kwi Keleke. Kwabo bakoma, kanihe bamwi kumanna apatitwe, imi kanihe inbwe lituba izina ihywa liñolitwe hebwe, izina ilyo kakwina nanga yenke wizi kono iye yolitambula.” <sup>18-19</sup> Uñolele Iñiloi be Keleke ya Thyatira. Aa njimanzwi azwa ku Mwan'a Ireeza, uzo wina menso amunika sina malimi amuliloimi matende abenya sina makatulo abasiszwe sinte. Nizi zimubapangi: Izwalo lyenu ni tumelo ni musebezi ni inkulo inde ilindila. Nizi kuti zintu zimubapangi linuhanu zihita zimubapangi kutanzi. <sup>20-21</sup> Kono ninazi zinilwisanisa namwe: Mubasilili uzo mwanakazi Jezebele, yolisumpa kuti mupolofita wamwana. Chituto zakwe abachengeleli bantu kutende buhule ni kulya zilyo zamatelo aziswaniso. Nibamuhi inako yakubakela chive, kono kasuni kubakela zive za muyendelo wakwe mubi. <sup>22-23</sup> Bone; Kani musohele hesasa

nikulwala, nabo batenda naye busangu muma sukuluka makando, konji chini ba baka muzipangatu zakwe, Kani kave bana bakwe bafwe, imi zose ikereke kazi zibe kuti njeme yosakisiza kuzeza nikulo. Kani he wumwi ni wumwi kuya kamitendo yakwe. <sup>24-25</sup> Kono bamwi kwenu mwa Tayatira. basa tendi kezi zirutwa, imi hape kabezi zintu zile za Satani muba zisupila - kwenu nimi wambila,' Kani mikulikisi kulemenwa kumwi; Niha kuba bulyo, mukwatilile kaku kola mbwiteli hese nini kabole. <sup>26</sup> Iye mwine yozunda hape natenda zinali kutenda kuka sika kuma maninizo, kani muhe itukelo hewulu lyechisi. <sup>27</sup> Mwa ba buse ke nkoli yesipi, Sina tuhambwe twelongo mwaba pwachole bufwafwali. ' <sup>28</sup> Sina muniba tambwili kwaTayo, Name muni muhe ikani ya lilungwe. <sup>29</sup> Musiye wina matwi atekeleze chilu wamba Luhuhu kwi kereke."'''

## Inkauhanyo ya 3

<sup>1</sup> Uñolele Iñiloi lye Keleke ya Sardis: Aa njimanzwi ozo yokwatilile inhuho za Ireeza zikwana iyaza ni zobebe ni inkazi zikwana iyanza ni zobebe. "Nizi zimubapangi. Mwina intohonolo kusihala, kono mufwile. <sup>2</sup> Mubuke imi mutondele chishalile, kono nangati chikufwile, chokuti kena nibawani misebelezo yenu ishiyeme mumenso ya Ireeza wangu. <sup>3</sup> Muzeze, chobulyo, izo zimubatambuli ni kuzuwa. Muzikuteke, ni kubaka, Kono haiba kamutondete, Kanikeze sina ubumusa, imi kese nimwizibe ni haiba ihola yete ninikeze kwenu nini misandukile. <sup>4</sup> Kono kwina mazina alikene abantu ba Sardis abo basena baba izuzi zizwato zabo masila. Kabaka buyenda name, nibazwete zituba, kakuti baswanela. <sup>5</sup> Uzo yokoma kazwatikwe muzizabalo zituba, imi kanikafwe kusinda izina lyakwe mwi Mbuka ya Buhalo, imi kanikawambe izina likwe habuzu bwa Tayo, ni habuzu mbwa mañiloi akwe. <sup>6</sup> Musiye abo bena matwi bazuwe chiwambwa Luhuhu Kwi Keleke. <sup>7</sup> Uñolele iñiloi lye Keleke ya Philadelphia: Aa njimanzwi ozo yo njolola ni buniti —ukwatilile inkiyi za Davida, wi yalwila imi kakwina wiyala, heyala imi kakusina wiyala. <sup>8</sup> "Nizi zimubapangi. Mubone, Nibabiki habusu bwene mulyango wiyalukite kutendela kuti kakwina yowola kuwiyala. Nizi kuti mwina intumelo zifokola, chokuti mubazumini manzwi imi kena mubakani izina lyangu. <sup>9</sup> Mubone! Abo bahala mumubuso wa Satani, ano bachokuti Majuda abo nibasali njimona, bachenga chobulyo. Kanibalete imi kabakubame habusu bwamatende enu, imi kabezibe kuti niba misuni. <sup>10</sup> Sina hamubawoli kubeka intaelo ya kulindila inako inde, kaniwole kumisileleza kwinko ya kulikiwa kukeza mwifasi. <sup>11</sup> Nikezite lyahahanu. Mukwatilile kuzi mukwete sanzi kuwaniki yohinda mishukwe yenu. <sup>12</sup> Munibike uzo chatakome kuba mushukwe mukeleke ya Ireeza, imi kakafwe kuzwa mwatani. Kaniwole kuñola hali izina lya Ireeza wangu, izina lya muleneñi wa Ireeza wangu(Jerusalem inhya, kuzwililila kwe Ireeza wangu), ni zina lyangu inhya. <sup>13</sup> Musiye abo bena matwi akuzuwa chiluwamba Luhuhu kwi Keleke."''' <sup>14</sup> Kumañiloi ekeleke ya Laodisea ñole: Aa njimanzwi a Amen, bupaki busepahala ni bweniti, buyendisza zibumbantu ze Ireeza. <sup>15</sup> Nizi zimubachiti, nikuti kamutotoli kapa kuhisa. Nilakaza kuti kambe mutotola kapa

kuhisa. <sup>16</sup> Imi linu, kakuli mutukuta —kapa kuhisa kapa kutotola — Chinina hafuhi kuti nimiluke kumuzwisa mukaholo kangu. <sup>17</sup> Mukuti muchokuti, 'Ni fumite, Nina bungi bwa masila amushobo shobo, imi kakwina zinisuna.' Kono kawizi kuti muziyelehethe, mufwisa inse, mubahumanehi, muzihofu imi mwina mapunu. <sup>18</sup> Tekeleze kukelezo yangu: Muwule kwangu Igauda ijolwezwe ni mulilo kokuti mube mubafumi, imi chizabalo chituba hahulu kutendela kuti mulubwike imi ketimutondeze kuswabisa kwamapunu enu, imi ulichuke musamu mumenso kuti ubone. <sup>19</sup> Ni bakanya zumwi ni zumwi unisuna, imi ni ruta umo mubaswanela kuhalila. Chobulyo, mube basepahala ni kubaka. <sup>20</sup> Mubone, Nizimene hamulyango imi nikwete kungongota. Haiba zumwi nazuwa inzwi lyangu imi neyalula mulyango, munize kwizubo yakwe imi munize nilye naye, imi naye mwalye name. <sup>21</sup> Uzo yokonka, munimuhe maata akwikala name hachipulo chabusimwine, sina name hanibawoli kukoma imi nikele ni ba Tayo hachipula chabo. <sup>22</sup> Musiye abo bene matwi bazuwe ziluwamba Luhuhu kwi Keleke.

## Inkauhanyo 5

<sup>1</sup> Hazimana izi zintu ni baloli, china bona mulyango wiyalukite mwiwulu. Inzwii lyentazi li ni bazuwi libali kuwamba kwangu ili intolombita, ni liti, “Wize kunu, mi kani kutondeze zete zipangahale chikwamana izi zintu.” <sup>2</sup> Inakozana bulyo ni bena muluhuhu, mi nibaboni kubena chipula cha chilena chibabikitwe mwiwulu, ni kwina muntu yabekele hateni. <sup>3</sup> Zumwi yabekele hateni abakuboneka ili nji Jaspe ni Sardiyo. Kubena simutalanzi yabazimbulukite chipula chachilena. simutalanzi ababoneki ili emralda. <sup>4</sup> kuzimbuluka chipula chechilena kubena zimwi zi pula zibena makumi obele ni zone, mi babekele hazipula aho ibali bakulwa baba kwina makumi obele ni bone, ni bazwete zizwato zituba, ni kuwani zachilena ze gauda kumitwi. <sup>5</sup> Kuzwilila hazipula za chilena kubezi kumunika kwa mumuni, milumo, ni kupalakata kwenvula. malambi akwana iyanza ni obele abali kumunikite habusu bwa chipula ch chilena, malambi abali kukwana iyanza ni obele ibali luhuhu lwa Ireeza. <sup>6</sup> Habusu bwa chipula cha chilena kubaboneka ili iwate lya chimponi, likola kristale. Hakati kachipula chachilena mi kuzimbuluka chipula ch chilena kubena zibumbantu zihala zone, zibezwile menso, kubusu ni kumasule. <sup>7</sup> Chibumbantu chentazi chiba kukola ili undavu, chobubeli chibumbantu chihala chibakukola ili kanamani, chobotatu chibumbatu chihala chibena chifateho chikola ili muntu, mi chobune chibumbantu chihala chibakukola ili imbande i wuluka. <sup>8</sup> Zibumbantu zihala zone chimwi ni chimwi chibena mabando akukwana iyanza ni lyonke, zibezwile menso hewule ni mwikonde. Masiku ni musihali kana babakusiya kuwamba, “Kujolola, kujolola, kujolola nji Simwine Ireeza Wina Maata Onse yabena ko, yo wina ko, ni yosikeza.” <sup>9</sup> Inako ihi ne ihi zibumbantu zihala zibahi ikanya, kulumba, ni kulitumela koozo yabakwikele muchipula chachilena, uzo yohala buhalo busamani, <sup>10</sup> bakulwana bena 24 babali bonahazi habusu bwayabekele muchipula chachilena. Babafukami kuyohala buhalo busamani, ni babasoheli inkuwani zabo habusu bwa chipula cha chilena, ni bawamba, <sup>11</sup> “U swanela, Simwine wetu ni Ireeza wetu,

kutambula ikanya ni kulumbekwa ni maata. Kakuli ubapangi zintu zonse, mi kakusaka kwako, kuzina mi zibapangwa.

## Inkauhanyo 5

<sup>1</sup> Linu nichinabona kwiyanza lya bulyo lyozo yabekele hachipula chachilena, mumbuka iñoletwe kumambali yakubusu ni kumbali yakumasule. Ibalamikitwe ni zilamatela zikwana iyanza ni zobe. <sup>2</sup> Chinabona iñiloi lina maata nilitabeleza chenzwi ikando, “Njeni yoswanela kwiyalula imbuka ni kulamutula chilamatela chateni?” <sup>3</sup> Kakwina nanga yenke mwiulu kapa hansu mwikonde lye inkanda ya ba kuwola kwiyalula imbuka kapa kuibala. <sup>4</sup> Ni balili chakuchiswa kakuti kakwina yenke ya bawaniki yo swanela kwi yalula imbuka kapa kwibala. <sup>5</sup> Kono zumwi wa bakulwana ni chawamba kwangu, “Kanji ulili. Lole! Undavu wamushobo wa Majuda, Muhisi wa Davida, abazundi. U wola kwiyalula imbuka ni zilamatela zateni zikwana iyanza ni obele. <sup>6</sup> Ni baboni Imbelele i zimene mukati kachipula chachilena ni zibumbantu zone zihala ni mukati ka bakulwana. A ba kuboneka sina ya behaitwe. a bena maziya a kwanisa iyanza ni obele ni menso a kwanisa iyanza ni obele; awo nji mahuhu a kwanisa iyanza a Ireeza a batumitwe mwinkanda yonse. <sup>7</sup> A bayendi mi ni kukaonda imbuka kuzwisa kwi yanza lyachilyo lyozo ya bekele hachipula chachilena. <sup>8</sup> Linu Imbelele chiyahinda imbuka, zibumbantu zone zihala ni bakulwana bamakumi obele ni bone ba balibonahazi abo bene habusu bwakwe. Zumwi ni zumwi wabo a bakukwete i harepa ni kasuba ke gauda kezwire isense, zibali intapelo za bazumine. <sup>9</sup> Ba bazimbi inzimbo ihya; “U swanela kuhinda imbuka ni kwiyalula zilamatela zateni. kakuti u be haiwa, mi chamalaha ako u baulili Ireeza bantu kwizwilila kumushobo ni mushobo, impuo, bantu, ni chisi chonse. <sup>10</sup> U ba bapangi ku ba muleneñi ni baprisita kusebelele Ireeza wetu, mi ka babuse inkanda.” <sup>11</sup> Linu ni nalola mi ni nazuwa mulumo wamañeloi mangi mangi azimbukite chipula chachilena mi zibumbantu zihala ni bakulwana. Inombolo yabo ibali kuchita makiti enaikumi yamakiti enaikumi ni makiti a makiti. <sup>12</sup> Ba bawambi chamuhu mukando, “Iswanela Imbelele i behaiwaya chakutambula ziho, chifumu, butali, maata, kutompwa, ikanya ni kulumbekwa. <sup>13</sup> Ni bazuwi chimwi ni chimwi chi babumbwa chibena kwiulu ni mwinkanda ni mwikonde lyenkanda ni chibena mwiwate\_ chimwi ni chimwi kuzili\_ chiwamba, “Kozo wikala hachipula chabulena ni kwimbelele, a lumbekwe, kutompwa, ikanya, ni maata a kubusa, kutwala ku samani.” <sup>14</sup> Zibumbantu zihala zone zi bawambi, “Amen” mi ni bakulwana ba balibonahazi ni kulapepa uzo yo hala buhalo busamani.

## Inkauhanyo ya 6

<sup>1</sup> Nibalotele imbelele hailamutula chimwina chazilamatela zimana iyaza ni zobe, imi nibazuwi chimwina chazibumbantu zihala zone hachiwamba chenzwi libalikukola sina mulumo wupalakata, “Wize!” <sup>2</sup> Ninalola mi kubena imbizi ituba. Mutanti wayo abakwete buta, mi abahelwe mushukwe wabubusi. Abezi nalimuhapi kwizila kuhapa. <sup>3</sup> Imbelele hailamutula chilamatela chabubeli, nibazuwi chibumbantu chihala chabubeli hachiti, “Wize!” <sup>4</sup> Linu imbizi yimwi ibazwi -



yabusubile bwamulilo. Mutanti wayo abahewa maata akulihindila imbali yimwi yachisi, kokuti bantu bayo nibalisandukile kulihaya chabubilala. Uzu mutanti abahelwe mupene mukando. <sup>5</sup> Imbelele hailamutula chilamatela chabutatu, nibazuwi chibumbantu chihala chabutatu hachiti, “Wize!” Nibaboni imbizi isiha, mutanti wayo abakwete zikala zobeke mwiya lyakwe. <sup>6</sup> Nibazuwi chibali kukola sina mulumo mukati kazibumbantu zone zihala haziti. “Ikilo yimwina yabuloto iwulwa itifo yamutendo wezuba limwina, imi makilo otatwe amahila awulwa itifo yamutendo wezuba limwina. <sup>7</sup> Imbelele hailamutula chilamatela chabune, nibazuwi chibumbantu chihala chabutatu hachiti, “Wize!” <sup>8</sup> Linu nichinaboni imbizi yeseta. Mutanti wina haili abali kusumpwa Ifu, mi Chibaka Chabafwile abamwichilille. Babahelwe maata hawulu lenkalulo imwina - yazone yenkanda, kwihaya ni mukwale, inzala ni butuku, ni kuselisa zinyoloji zenkanda. <sup>9</sup> Imbelele haiyalula chilamatela chimana iyanza, nichinabona mwikonde lakatala ihuhu zabana babahaiwa chebaka lalinzwi le Ireeza ni bupaki bubabakwete. <sup>10</sup> Babahuwi chenzwi ikando, Mubusi Yobusa zonse, yojolola ni weniti, kakuhinde inako ikuma hi kuti wize uatule abo bahala munkanda, ni kubozekeza bubi ibakeŋi chamalaha etu?” <sup>11</sup> Linu zumwi ni zumwi abahewa chiapalo chituba, mi nibawambilwa kuti bayelele kulindila kanini kufitela ipalo yabahikana kuninabo ni banakwabo ni bachizabo baswanela kwihaiwa chiyakwana, bobulyo fela sina mubabehailwa. <sup>12</sup> Imbelele haiyalula chilamatela chimana iyanza ni chimwina, nibalweli mi kubena izikinyho ikando yenkanda. Izuba libasanduki busihe bwe-saka lizwile boza bwepene, imi mwezi ubasanduki sina malaha. <sup>13</sup> Inaleli zakwiwuli nizawila munkanda, mane sina chisamu chefeige hachiwisa zihantu zacho zisenikubuzwa hachinyungwa liŋungwa. <sup>14</sup> Imbyumbyulu ibazwiko sina imbuka ikwete ibungelwa. Ilundu ni chinda chimwi ni chimwi chibasutiswa kuzwiswa hachibaka chateni. <sup>15</sup> Linu simwine wahansi ni bantu basepahala, ni bayezi bempi, bafumite, bena maata, ni zumwi ni zumwi bulyo, batanga ni tukuluho, babaliwungili mumahaha amabwe ni mumabwe amalundu. <sup>16</sup> Babawambi kumalundu ni mabwe, “Muwile hetu! Mutuwungule kuchifateho chawumwina wikele hachihuna chabusimwine ni kubukali bwembelele. <sup>17</sup> Mukuti izuba ikando labukali bwabo chilyasika. Njeni yowola kuzima?

## Inkauhanyo 7

<sup>1</sup> Kuzwa aho ninabona maŋeloi one azimene mutukokola tone twenkanda, chakukola nawondete mumasule inkalulo zone zenhuho lyenkanda ilikuti kakwina luhuhu luswanela kuhunga munkanda, mwiwate, kapa kulwisanisa Isamu limwi. <sup>2</sup> Ninabona iŋeloi limwi nilikeza kuzwila mubuzwe, libena ni chisupo che Ireeza yohala. nahuweleza chenzwi ikando kumaŋeloi wone, abahewa maata akushinya inkanda ni mawate: <sup>3</sup> “Kanzimusinyi inkanda, ni mawate kapa masamu kusikila chitwabika chisupo habulubi bwamuhikana we Ireeza wetu.” <sup>4</sup> Ni bazuwi inombolo yabo baba swaitwe bena: 144,000, baba swaitwe kuzwilila ku mishobo yonse ya Isilaele: <sup>5</sup> myanda ina 12 kuzwililila kulusika lwa judah baba swaitwe, myanda ina 12 yalusikalwa rubeni, myanda ina 12 kuzwililila mulusika lwa Gadi,

<sup>6</sup> myanda ina 12 kuzwila mulusika lwa Asheri, myanda ina 12 ya lusika lwa Naphitali, myanda ina 12 yalusika lwa Manasse. <sup>7</sup> Myanda ina 12 kuzwililila mulusika lwa Simone, myanda ina 12 kuzwililila mulusika lwa Levi, myanda ina 12 kuzwililila mulusika lwalwa Isaaka, <sup>8</sup> myanda ye 12 kuzwelelela mwa lusika lwa Zelubule, Myanda ye 12 kuzwelelela mu lusika lwa Josefa, ni myanda ina 12 izwila mulusika lwa Benjamini luba swaiwa. <sup>9</sup> Kuzwa henzo zintu zini baboni, imi ni kwaba chilundwamanje cha bantu abo kakwina yo swanela kubabala- kuzwililila munkanda, ni kumishobo yonse ya bantu, ni mpuo zabo- niba zimene abusu bwa chipula cha busimwine abusu bwe Ngunyana. Baba kuzabele zi zwato zituba ni bakwete mitabi yenzalu mumanza, <sup>10</sup> imi baba kusupwilila mumanzwi makando: “impuluso izwila kwe Ireeza wetu. wikele achihuna che Ngunyana!” <sup>11</sup> Mañeloi onse aba zimene na zimbulukite chihuna ni kuzimbuluka bakulwana nikuzimbuluka zibumbantu zihala imi baba libwikite kuzi fateho chibazimene abusu bwa chihuna cha Simwine. Baba kulapela Ireeza, <sup>12</sup> nibati “Amen! kulumbe, ikanya, butali, kuhabuitumelo, ikute, ziho, ni, zibe kwe Ireeza wetu kuya kusena mamanani! Amen!” <sup>13</sup> Linu umwina kubali ba kulwana chanibuza, “njibani aba, bazwete zizwato zituba, imi nibazwila kuhi?” <sup>14</sup> Ninati kwabali, “Ita, mwi zi,” imi nati kwangu, aba njabo bakazwi mumanyando makando. Babashanzi zizabalo niku zibika kutuba mumalaha engunyana. <sup>15-17</sup> Chenkezo izi, bena habusu bwa chihuna che Ireeza, Imi nibamulapela izuba ni masiku mwi tempele yakwe. Uzowikele hachihuna chabu Simwine mwa zale itente abali. Kete bafwe izala hape nikamuta, nanga kufwe inyotwa nikamuta linu Izuba kete libakabe hape kapa kuba hisa. Linu aho Ingunyana ikele mukati kabo achihuna chabu Simwine iye mwabe mulisanabo, imi mwaba twale ku mawelu-welu amenzi ahala. imi Ireeza ka sinde zinsozi kumenso abo.”

## Inkauhanyo 8

<sup>1</sup> Linu imbelele hayi yalula luswayo lukwana iyanza ni tobele, kuba tontozi mwe wulu inako ilikana ihola ha ihitwa hakati. <sup>2</sup> Linu china bona mangiloi ali kana iyanza ni tobele azimana habusu bwe Ireeza, mi intolombite zi kwana iyanza ni zobeke zi bahewa kwali. <sup>3</sup> Limwi ingiloi ni lyeza, ni likwete kasuba ke gauda ka insense, ni lizimene ha katala ke insense. Insense yingi iba hewa kulili njikuti liwole kuha ni intapelo ziba zumini bonse ha katala ke gauda ke insense habusu bwa lubona. <sup>4</sup> Busi bwe insense, hamwina ni ntapelo zaba zumini, ni za zima mwi wulu ha busu bwe Ireeza kuzwa mwi yanza lye giloi. <sup>5</sup> Ingiloi chi lya hinda ka suba ke insense ni kuke zuza mulilo uzwa ha katala. Linu chi lya ka sohela hansi mwi nkanda, mi ni kwaba ni lata inkando, kupwa choka, mimuni mane ni nzikinyeho. <sup>6</sup> Mangiloi a likana iyanza ni tobele aba kukwete intolombita zi likana iyanza in tobele aba li tukiseze kuliza. <sup>7</sup> Ingiloi lye ntanzi chi lya liza intolombita ya teni, mi ni kwaba ni invula ya mabwe ni mulilo ukopene ni malaha, Iba sohelwa hansi he nkanda mane kuti kusika he nkalulo ya imwina ye kalulo zo tatwe bwe nkanda bu bahi, kusika he nkalulo ya imwina kuzo tatwe bwa masamu bubahi, mi mane lyani iteke lyonse libahi. <sup>8</sup> Ingiloi lwa bubeli ni lya liza intolombite ya teni, mi chimwi chi ba kukola ubu ilundu ikando liba kuhya ni mulilo liba so helwa mwi wate.

Inkalulo ilikana imwina kuzo tatwe bwe wate bu ba sanduki malaha, <sup>9</sup> inkalulo ilikana imwina kuzo tatwe bwa zintu zihala ni za fwa mu menzi, mi inkalulo ilikana imwina kuzo tatwe bwe zi kepe bu ba sinywa. <sup>10</sup> Ingiloi lwa butatu ni lya liza intolombita ya teni, mi inkaani inkando chi yawa kwi wulu, kubenya ubu intachi, habu tatu bwa lwizi ni mu mawelu-welu a menzi. <sup>11</sup> Izina lye nkaani chi babiso. Kusikila he nkalulo ilikana iyonke ku zo tatwe bwa menzi chi bwa baba, mi buungi bwa bantu buba fwi ku menzi alula. <sup>12</sup> Ingiloi lwa bune chi lya liza intolombita lya teni, mi ku sikila he nkalulo ilikana ni zo tatwe bwe zuba chi bwa sinyeha, mane bulyo ni sikila he nkalulo ilikana ni to tatwe bwa mwezi ni nkalulo ilikana ni totatwe bwe nkaani. Linu ku sika he nkalulo ilikana ni iyonke kuzo tatwe bwaze niza sanduka kusiha; yonke ku zo tatwe bwa musihali ni yonke kuzo tatwe bwa masiku kana kubena iseli. <sup>13</sup> Ni baloli, mi china zuwa imbande iba ku uluka mukati ke bwu-bwulu, ku sumpa che nzwi ikando, “Bumai, bumai, bumai, kwa bo bahala hansi, kebaka lya milumo ye ntolombita i si shalile ina hafihhi ni kulizwa cha mangiloi otatwe.”

## Ikauhanyo 9

<sup>1</sup> chobulyo iñiloi litenda iyanza chilya liza intolombita yalyo. Nicha bona inkani izwa kwi wulu ku wila he hansi. Iyo inkani iba helwe inkiyi yo mutomo we lindi lisena mamanani. <sup>2</sup> A be yaluli mutomo we ilindi li sena mamanani. imi busi chi bwaya mwi wulu ni kuzwa hanze lya mutomo ubu busi buzwa muchibaka chikando cha mulilo. Linu izuba ni luhuhu ciza sanduka kusiha cha busi bube tilwa hanze lya mutomo. <sup>3</sup> Mubusi chikwazwa impanse zibezi hansi, imi ziba helwe ziho zi kola ubu tubanze hansi. <sup>4</sup> Ziba wambilwe kuti kanji zi sinyi lyani he hansi, kapa zimela zihya kapa zisamu, kono haisi abo bantu ba sena iswayo lya Ireeza ha zifateho. <sup>5</sup> Kana baba helwe chibaka cha kwihaya abo bantu, kono haisi kuba nyandisa mu myezi itenda iyanza. Butuku bwabo bu kola ubu musumino wa kabanze haka suma muntu, <sup>6</sup> Mwawo mazuba bantu kaba sake ifu, kono kete baliwane. Kaba tabele hahulu ku fwa, kono ifu kali batiye. <sup>7</sup> Impanse ziba ku bonahala ubu imbizi zi lukisezwe inkondo. Ha mitwi yazo habena zintu zikola ubu mishukwe ye gauda, imi zifateho zazo ziba kukola ubu zifateho za bantu. <sup>8</sup> Zibena insuki zikola ubu insuki za banakazi, imi meno azo aba kukola ubu meno wo ndavu, <sup>9</sup> Zibena zizabalo zi sileleza chizuba ziba ku kola insipi, imi mulumo wa mabando azo aba ku panga ilata ubu makoloi mangi. <sup>10</sup> Zibena michila isuma ubu tubanze; mumichila yazo kubena mata akuholofaza bantu mu myezi itenda iyanza. <sup>11</sup> zibena muyendisi wazo iñiloyi lye lindi lisena mamanani. Izina lyakwe muchi Heberu abali Abbadoni, imi muchi Gerike abena izina lya Applyoni. <sup>12</sup> Kutiza kwe ntanzi kuba mani, bone, chikwamana izi kusina bukabo bobele bu sikeza. <sup>13</sup> Iñiloyi litenda iyanza nikonke liba lizi intolombita, imi china zuwa inzwi lizwa mu manaka a katala ke gauda ka letwa habusu bwa Ireeza, <sup>14</sup> Inzwi chilya wamba kwi ñiloyi litenda iyanza nikonke ilyo libena intolombita, “Lukulule mañiloyi one awo a suminwe ha lwizi lukando lwa Euphrate.” <sup>15</sup> Mañiloyi one awo aba lukiswe cheyo inhola, chelyo izuba, chowo mwezi imi nechina chilimo, aba lukulwilwe kwi haya kwa butatu bwa bantu bonse. <sup>16</sup> Inombolo ya masole babena

he mbizi ibali kuma ha 200.000.000. Ni bazuwi ze nombolo yabo. <sup>17</sup> Umu njimona muniba boneni impono ye mbizi nabo ba tantite hazili: imi zizwato zensilelezo ziba kusubila tele, mubala bulu usiha imi ni mubala wa yelo. Mitwi ye mbizi iba kulikozete ubu mitwi iba ndavu, imi mutuholo twabo cikwazwa mulilo, busi ni surlpur. <sup>18</sup> Butatu bwa bantu babe haiwa che nkoto zo tatwe: mulilo, busi, ni salufa iba kuzwa mutuholo twazo, <sup>19</sup> Kakuti ziho ze mbizi zibena mutuholo ni ku michila yazo— mukuti michila yazo ibaku kolo ubu inzoka, imi zibakwina mitwi yezo ibali ku bika zilabi ku bantu. <sup>20</sup> Bantu bonse, abo basana babehaiwa kwezi inkoto, kana ba ba bakili mitendo ibaba tendi. kapa kusiya ku lumbeka madimona, ziswaniso ze gauda, silibela, brunze, mabwe ni zisamu— zintu izo zisa boni, niku zuwa, niku yenda, <sup>21</sup> Kapa baba bakeli kwi haya kwabo, za bulozi, za busangu kapa mitendo yabo ya busa.

## Inkauhanyo 10

<sup>1</sup> Linu chinabona limwi iñiloi likolette likeza hansi kuzwa kwi wulu. Aba libungelele mumakope, imi kubena simutalanzi heulu lya mutwi wakwe. Chi fateho chakwe chiba kukola ubu izuba imi matende akwe aba kukola ubu misumo ya mulilo. <sup>2</sup> Abakwete imbuka inini iyalukite mwi yanza lyakwe, Imi chabika itende lyakwe lya chilyo he wate imi itende lye nzohoto hansi. <sup>3</sup> Linu cha huweleza cha linzwi lizuweka ubu lyo ndavu yolila. Ha huweleza, chikwa zuwuka milumo ikwana iyanza nitobele iwamba hanze mu manzwi awo. <sup>4</sup> Iyo milumo ikwana iyanza ni tobele haiwamba hanze, Chi nibali kusaka kuñola, kono ni bazuwi linzwi lizwa kwiwulu liti, “bike inkunutu iya wamba milumo ikwa iyanza ni tobele. Sanzi uzi ñoli hansi”. <sup>5</sup> Linu iñiloi lini baboni ni lizimene he wate ni hansi, lizimikite iyanza lya chilyo mwi wulu. <sup>6</sup> nicha konka chozo yohala kuya kusamani. yaba bumbi iwulu ni zonse zina kwateni, inkanda ni zonse zina hateni, ni wate ni zonse zina mworteni, imi iñiloi nilya ti, “kete ni kube ni kulyeha hape. <sup>7</sup> Kono luzuba iñiloi likwanisa iyanza ni tobele chilyati chi liliza intolombita, linu milelo ye inkunutu za Ireeza njete imane, sina mwaba teli ku bahikana bakwe bapolofita.” <sup>8</sup> Inzwi lini ba zuwi kuzwa kwi wulu chi lyawamba kwangu hape: “Yende, kahinde imbuka i umbukite ina mwiyanza lye iñiloi lizimene he wate ni hansi.” <sup>9</sup> Linu china yenda kwi ñiloi, imi china li wambila kuti linihe imbuka inini i umbwilwe. Cha wamba kwangu, “Thinde iyo imbuka imi uilye. muipange ibumo lyako bubi, kono mukaholo kako mukube ni munati ukola buchi.” <sup>10</sup> China hinda imbuka inini mwiyanza lye iñiloi ni ku ilya. ibali kwina munati ubu buchi mukaholo kangu, kono hanimana kuilya, ibumo lyangu chilya biha. <sup>11</sup> Linu zumwi chawamba kwangu, “uswanela kutanikiza hape kuamana ni bantu bangi, inkanda, mishobo ni malena.”

## Inkauhanyo 11

<sup>1</sup> Luhe lubahelwe kwangu kutendisa sina kasamu kakupimisa. Ninatewa, “Zimane ukapime itempele ye Ireeza nika tala, imi nabo ba heintumbo mwili. <sup>2</sup> Kono kanzu pimi ilapa lyahanze ye tempele, kakuti libahewa ku Basikunze. Kabanyatole itolopo ijolola cha myezi ya makumi one ni yobe. <sup>3</sup> Kanihe impaki zangu zobele zabuyendisi kuti zihe chipolofita cha mazuba 1,260, nibazwete muzizwato zamasaka.”

4 Izimpaki nji masamu obele a olive ni hazimana malambi obele a bazimani habusu bwa Ireeza we inkanda. <sup>5</sup> Haiiba zumwi uliketela kuba holofaza, mulilo uzwa mukaholo kabo ni kumana zila zabo. Yense yo lakaleza ku bahofaza uswanezi kufwa mweyi inzila. <sup>6</sup> Inzi impaki zina buyendisi bo kwiyala invula mwi imbimbyulu kanzi iwihansi munako iba polofita. Zina ziho ziwola kusandula menzi mumalaha ni kushupa inkanda ni mifuta futa sina muzalakaeza. <sup>7</sup> Hazimana bupaki bwazo, chibatana kachizwe mwilindi lisena ma manimani chikuba lwisanise mukondo. Ka bakome imi niku behaya. <sup>8</sup> Mibilili yabo kailale mu migwagwa ye tolopo inkando(iyo che chisupo chisumpwa Sodoma ni Egepita) uko Simwine kwaba kankamizwa. <sup>9</sup> Mu mazuba otatwe ni chiyemba ku muntu ni muntu, isika, lulimi ni inkanda kazi lole ha mibili yabo. Kese ba bazuminine kubikwa mumakumbu. <sup>10</sup> Abo bahala hansi kaba sange hewulu lyabo ni intabo. Mane kaba litumine mipuzo kuzumwi ni zumwi kakuti aba mapolofita bobele ba banyandisi abo ba bali kuhala hansi. <sup>11</sup> Kono chikwahita mazuba otatwe ni chiyemba che zuba luhuhu lwakuhala luzwa kwa Ireeza kalubenjile, imi kabazime hamatende abo. Kutiya kukando kakwi njile habo ba babona. <sup>12</sup> Linu kabazuwe izwi chokuhuwa kuzwa mwiwulu liti kubali, “Mwize kunu!” Linu kaba yende mwiwulu mwikope, haho zila zabo ni zibalote. <sup>13</sup> Keyi inhola ka kube ni inzikinyeho inkando, imi chibakazana chimwi chetolopo kachiwe. Imi bantu balikana 7000 kabehaiwe mwi inzikinyeho, imi bese bahale kabatiye ni kuha ikanya kwa Ireeza wewulu. <sup>14</sup> Kutiza kwabubeli chi kwamana. Bone! Kutiza kwa butatu kukezite chakuhwela. <sup>15</sup> Linu iñilloi limana iyaza ni obele chi lyaliza intolombita yalyo, imi muhuwo wa milumo ya mazwi chikuwamba mwiwulu kuti, “Mubuso wahansi chiwaba mubuso wa Simwine wetu ni Kirisite wakwe. Kayendise kuya kusamani ni kusamani.” <sup>16</sup> Linu bakulwana bena makumi obele ni bone ba bekele hamabona abo habusu bwa Ireeza kuwa hansi cheimpata zabo. Chiba lumbeka Ireeza. <sup>17</sup> Chibati, tuha buitumelo kwako, Simwine Ireeza wa Zihozonse, iye yowina kwateni niya bena kwateni, ibaka lyakuti ubahindi ziho zako zikando imi ubatangi kuyendisa. <sup>18</sup> Inkanda ziba bengete, kono bukali bwako chibweza. Inako chiyasika kubafwile kuti ba atulwe nikwako kuhewa mipuzo ku bahikana ba polofita, abo bazumine, ni batiyi izina lyako bonse nabo basena mazimo ni bakolete. Inako chiyasika kwako kusinya abo bakwete kusinya inkanda.” <sup>19</sup> Imi itempele ya Ireeza mwiwulu ibe yalukite ni aleka ya kuzuminzana iba boneki mukati ketempele. Kubena mi muni yeseli, kutimba, kulidamona mulumo, ni inzikilyeho, ni invula inamabwe ni luhuhu.

## Inkauhanyo 12

<sup>1</sup> I mboniso inkando i ba boneki mwi wulu: mwanakazi yaba zwete izuba, mi ni mwezi mukunsi kama tende akwe, ni mushukwe we nkani zekumi nitotwatwe hamutwi wakwe. <sup>2</sup> Abe minsi, mi abali kulila chokuhuwa muku sasama kwa ku puluha, mubutuku bukando bwa kupuluha. <sup>3</sup> Linu imwi imboniso i baboneki mwi wulu: bone, kubena i dilagoni inkando isubila iba kwina mitwi ye yanza ni tobele ni maziya e kumi, mi kubakwina mishukwe ina iyanza ni to bele hamitwi wayo. <sup>4</sup> muchila wayo uba fiyeli zikiti zo tatwe ze nkani

mwi wulu ni kuzi kwitila hansi. I dilagoni chiya zimana habusi bwa mwanakazi yaba kwina ha fuhi ni kupuluha, nji kuti cha puluha, i yo ilye mwana. <sup>5</sup> Cha puluha mulombwana, mwana muswisu, yete ayendise chisi chonse ni nkoli ye nsimpi. mwanakwe aba zwabulwa ni kutwalwa kwa Ireeza ku lubona lwakwe, <sup>6</sup> mi mwanakazi cha tilila mwi halaupa, uko Ireeza aba mubakanyizi chibaka chakwe, njo kuti aka silelezwe muma zuba alikana lule ni myanda yo bele ni makumi eyanza ni kamwina (1,260) <sup>7</sup> Linu hanu kubena inkondo mwi wulu. Maikulu ni mangeloi akwe chi balwaa ni dilagoni; mi i dalagoni ni mangeloi ayo chi zalwa nabo cha kubozekeza. <sup>8</sup> Kono i dalagoni ka hena iba kolete ahulu kuti i kome. Nji kuti kana kubasina chibaka mwi wulu cha yo ni mangeloi ayo. <sup>9</sup> I dalagoni ikando — i nzoka ya kale i sumpwa diabulusi kapa Satani, yo chengelela inkanda yonse — aba sohelwa hansi mwi nkanda, ni mangeloi akwe aba sohelwa hamwina naye hansi. <sup>10</sup> Kuzwa aho china zuwa muhuwo mukando mwi wulu: “Linu chikwa sika kusungununwa, ziho, mubuso wa Ireeza wetu, ni buyendisi bwa Krisite wakwe. Mukuti iye munyansi wa ba kwetu aba sohelwa hansi, iye yaba banyansi habusu bwa Ireeza wetu musihali ni masiku. <sup>11</sup> Baba muwoli cha malaha e mbelele mi ni che inzwi lya bupaki bwabo, mukuti kahena baba saki buhalo bwabo mane kubambanywa ni ifu. <sup>12</sup> Kuzwaho, musange, inwe maulu, nabo bonse ba hala mwateni. Kono bumai kwi nkanda mi nikwi wate kakuli daiabulusi aba sezumukili hansi kwenu. Wizwile ni bukali bu tiiza, kakuti wizi kuti wina bulyo inako zana. <sup>13</sup> Kuzwa i dilagoni ha lizela kuti liba sohelwa hansi he nkanda, cha hindikisa mwanakazi yaba puluhi mwana wa mwanaswisu. <sup>14</sup> Kono mwanakazi aba helwe mabando o bele a kolete e mbande, njo kuti awole ku tilila kuchibaka cha lukisezwe mwi halaupa. Ichi nji chibaka uko kwa ba kuswanela ku babalelelwa, mwi nako zana, inako zingi, mi ninako infwihi- kuzwa mumenso e nzoka. <sup>15</sup> I nzoka nciyetila menzi azwa mukaholo kayo ubu lwizi, kuti ipange muunda uwola ku tanyela mwanakazi kumutwala kule. <sup>16</sup> Kono inkanda chiya tusa mwanakazi. Inkanda chi ye yalula kaholo ni ku mina lwizi ulu i dilagoni liba yubula kuzwa mukaholo kalyo. <sup>17</sup> kuzwa aho idilagoni ncilya nyelelwa mwanakazi mi chilya zwa hateni ni kuka leta inkondo ku luhasi lwakwe, kwabana be chilila intaelo za Ireeza mi niku kwatilila ku bupaki bwa Jesu. <sup>18</sup> Mi kuzwa aho i dilagoni chilya zimana halusekeseke lwa helizo lye wate.

## Inkauhanyo 13

<sup>1</sup> Linu china bona chibatana chibbukuka kuzwa mwi wate. Chibena maziya e kumi ni mitwi yina sebeni. he wulu lya maziya habena mishukwe itenda ikumi, mi hamutwi ni mutwi haba kwina izina lishubula. <sup>2</sup> Ichi chibatana chinibaboni chikola ubu ungewe. Matende acho abalikukola ubu matende ebere, mi kaholo kateni kabali ku kola ubu kaholo ko ndavu. I dalagoni libahi ziho zatani kuchili, ni mushukwe wa teni, ni buyendisi bu kolete bwa ku yendisya. <sup>3</sup> Umwi mutwi wa chibatana uba boneki kuti ube haiwa, kono chilabi chateni chi kando chibaholi. Bantu benkanda yonse baba komokwa nibe chilile chibatana. <sup>4</sup> Nabo mane baba lapeli i dilagoni, Kakuti ibahi ziho zayo ku chibatana. Baba lapeli chibatana, nacho, mi nibata kuti, “njeni yokola ubu chibatana?” mi “njeni yowola kulwa naco?” <sup>5</sup> Chibatana

chi bahewa kaholo ka wola kuwamba manzwi abuli kuhumusi ni ku nyansa. Chiba zumininwa ku bonisa ziho ka mulao mu myezi itenda makumi onee ni yobebe- 42. <sup>6</sup> Njikuti chibatana ni cheyalula kaholo kuwamba zi shubula Ireeza: ku shubula izina lyakwe, ku chibaka kwa hala, mane nabo bahala mwi wulu. <sup>7</sup> Chibatana chiba zumininwa kuleta inkondo ni ba lumeli mi ni kuba kooma. Hape, impuso iba hewa kuchili he wulu lya mishobo yonse, bantu, malimi, ni nkanda. <sup>8</sup> Bonse bahala hansi mubachi lapele, yense wezina lisa ñoletwe, kuzwa kumatangilo e mpupo ye nkanda, mwi Mbuka ya Buhalo, ili ye Mbelele, ibe haiwa. <sup>9</sup> Heba kwina wina kutwi, mumusiye azuwe. <sup>10</sup> haiba nikwina yo twalwa mubukoba, mubukoba mwaye mo. Haiba kwina wi haiwa ni sabule, che sabule mwe haiwe. kunu ku sumpwa kwa wi lindila inako inde mi nintumelo yabana ba jolola. <sup>11</sup> Hape chinabona chimwi chibatana chitumuka kuzwa mwi inkanda. Chi bena maziya obele ubu imbelele, mi chiba wambi ubu i dilagoni. <sup>12</sup> Chi babonisi zonse ziho za chibatana chamatangilo ha busa bwacho, mi chiba letisi kuti inkanda nabo bahala mwateni kulapela chibatana chamatangilo-icho chibena chilabi chikando chiba hozwa. <sup>13</sup> Chi ba tendi imboniso zikando. mane chiba bonisi ni mulilo uba soki hansi kuzwa kwi wulu habusu bwa bantu, <sup>14</sup> Che mboniso ichiba zumininwa kutenda, chiba chengeleli abo bahala hansi. chibaba wambili ku tenda chi bumbantu mukukuteka chibatana chibena chilabi che sabule kono chiba hali. <sup>15</sup> Chi ba zumininwa kuha luuho ku chibumbeho cha chibatana nji kuta kuti chibumbeho chi bakuwola kuwamba ni kuletela kuti bonse bakana ku lapela chibatana be hayiwe. <sup>16</sup> Chi ba hambilizi zumwi ni zumwi, basena intuso ni ba kolete, ba fumite ni ba shebete, ba lukuluhite ni bahikana, ku tambula lusalo heyanza lya bulyo kapa ha bulubi. <sup>17</sup> Ke na ku ba ku woleka kwa zumwi ni zumwi ku ula kapa ku uza, kwanda kuti wina lusalo lwa chibatana, nji kuti, nji nombolo izimanina izina lyacho. <sup>18</sup> Ichi chisumpa butali, haiba kwina wina inkutwisiso, akopanye i nombolo ya chibatana, inombolo yamuntu, iyi nombolo nji 666.

## Inkauhanyo 14

<sup>1</sup> Ni baloli mi china na bona imbelele izimene he lundu lya Zioni. Ba bena naye ba bena 144,000, ba bena izina lya kwe ni lyesi ni liñoletwe ha bulubi bwabo. <sup>2</sup> Ni bazuwe inzwi mwi wulu litutuma ubu menzi mangi ni muhuwo mukando wa mu muni. Muhuwo uni ba zuwi ukola ubu balizi ba maharepa baliza maharepa. <sup>3</sup> Baba zibi luzimbo luhya habusu bwa lubona ni habusu bwa zibatana zoone zihala ni bakulwana. Kakwina yaba kuwola kulituta luzimbo konji 144,000 baba ulwa ku zwa mu nkanda. <sup>4</sup> Abo nja bana basana baba lisilafazi ni banakazi, Mukuti baba libaba leli bena cha ku jolola ahulu kuzwa kubu buki. Njabo be chilila imbelele konse ku iya. Aba baba ulwa mukati ka bantu ka kuba zilyantu zentazi za Ireeza mi ni ze mbelele. <sup>5</sup> Ka kwina mapa aba waniki mutuholo twabo; ka bena ha ba nyanseha. <sup>6</sup> China bona ingiloi li uluka mubyulu-mbyulu, libena iñusa lisa mani lya buhalo lina ma ñusa malotu a ku wamba kwabo ba hala hansi—ku chisi chonse, mishobo, lulimi, mi ni bantu. <sup>7</sup> Aba sumpi cha muhuwo mukando, “Mutiya Ireeza mi mu muhe ikanya. Mukuti inako ye nkatulo cha ya sika. Mu mulumbeke, iye yaba bumbi iwulu,

inkanda, iwate ni ma welu-welu a menzi.”<sup>8</sup> Limwi ingiloi—ingiloi lya bubeli—chi le chi lila niliti, “U wile, u wile Babilona mukando, yaba ha mbilizi chisi chonse ku nnya iwaine ye ntakazo ya busahi bwa kwe.”<sup>9</sup> Ingiloi limwi - ingiloi lya butatu-chi ly be chi lila, liba li ku wamba ni nzwi ikando, “Haiba kwina yo lapela chibatana ni chibumbuho cha cho, mi ni ku tumbula liswayo ha bulubi lwa kwe kapa he yanza lyakwe,<sup>10</sup> naye mwa nywe imwi ye waine ya bukali bwa Ireeza, iwaine ibe tilwa ni sapeswilwe mu nkomoki ya bukali bwakwe. Muntu yo inywa mwa nyandiswe mu mulilo ni silufura ha busu bwa mangiloi e Ireeza a jolola ni habusu bwe mbelele.”<sup>11</sup> Busi buzwa mu masukuluka abo buya mwi wulu kuya kusa mani, mi kaba huzi musihali kapa masiku—abo ba lapeli be chibatana ni chi bumbantu cha cho, mi niyense yo tabmbula luswayo lwe zina lya cho.”<sup>12</sup> Iyi ipizo yabo bali tombwele kulindila kwabo ba jolwela, abo ba kuteka milao ya Ireeza ni ntumelo mwa Jesu.”<sup>13</sup> Niba zuwi inzwi lizwa kwi wulu liti, “Ñole ichi: Bafuyoletwe ba fwile baba fwili mwa Simwine.” “Eni” Ku wamba Luhoho, “njikuti ba huze ku mitendo yabo, mukuti mitendo yabo mwi be chilila.”<sup>14</sup> Ni baloli, mi kubena ikope li tuba. Ya bekele he kope aba kukola ubu mwana a muntu. Abena mushukwe we gauda ha mutwi wakwe mi ni jekisi li cheka mwi yanza lya kwe.”<sup>15</sup> Linu ingiloi limwi chi lya zwa mwi tempele mi ni lya sumpa che nzwi ikando kuya be kele he kope: “Hinde ijekisi lya ko mi utange ku siza. Mukuti inako ya ku siza chi ya sika, sina ku siza kwe nkanda ha chi kwa buzwa.”<sup>16</sup> Linu iye ya be kele he kope cha zi mbulusa i jekisi lya kwe he wulu lye nkanda, mi inkanda chi ya sinzwa.”<sup>17</sup> Ingiloi limwi chi lya zwa mwi tempele mwi wulu; Nalyo li bena ijekisi li cheka.”<sup>18</sup> Mi hape limwi ingiloi ni lya zwa mukatala ka insense, lina ziho he wulu lwa mulilo. Cha sumpa che nzwi ikando kozuna yaba kwete ijekisi licheka, “Hinde ijekisi lyako licheka mi uku nganye mu zikwata za zilyantu ze veine ye nkanda, mukuti zi lyantu ze veine chi za buzwa.”<sup>19</sup> Ingiloi chilya zimbulusa ijekisi lya teni ha nkanda ni kunganya zi lyantu ze veine ziba sinzwa ze kanda. Chi lya chi sohela mwi wiene ya bukali bwe Ireeza.”<sup>20</sup> Mi chi tendelo che waine chi baka lya tokelwa hanze wa muleneñi, mi malaha che tika mwa teni ku sikela ha bule bwe chi zwato cha ku mutwi we mbizi, kuli kana 1, 600 mubule.

## Inkauhanyo 15

<sup>1</sup> Linu china bona chisupo mwi wulu, chikando imi chikomokisa: Habena mañiloi akwana iyanza ni obele ena inkoto zikwana iyanza ni obele, izo inkoto zama mani mani, kazo bukali bwa Ireeza hete bumanine.”<sup>2</sup> Niba boni chiba boneki kuba iwate libelenga ubu i gilazi likopene ni mulilo, lizimene kumbali ni wate kubena abo ba babanduki kuchi batana ni chi swaniso chacho, imi heulu lye mpalo izimanina izina lyakwe, ba bakwete ma alepa aba bahewa kwa Ireeza.”<sup>3</sup> Ba bali kuzimba inzimbo za Mushe, muhikana wa Ireeza, inzimbo ye ngunyana: “zikando ni zikomokisa mitendo yako, Simwine Ireeza, wa ziho zonse. kushiya na ni niti inzila zako, Mubusi we nkanda.”<sup>4</sup> Njeni yasete akutiye, Simwine, ni kulumbeka izina lyako? mukuti iwe wenke njo jolola. inkanda zonse mubeze ni kufukama habusu bwako kakuti misebezi yako ishiyeme iba patuluki.”<sup>5</sup> Hakuma izi



zintu ni baloli, imi itente ya bupaki ibe yaluki mwi wulu. <sup>6</sup> umo muchibaka chijolola ahulu chi kweza ma ñiloi akwana iyanza ni obele akwete tuhambwe twe inkoto tukwana iyanza ni obele. Ba bazwete masila a jolola, abenya imi babikite tutaulo twe gauda kuzimbulusa zizuba zabo. <sup>7</sup> Chimwi ku zibumbatu zone zihala chi chaha kuma ñiloi akwana iyanza ni obele tuhambwe twe gauda tukwana iyanza ni tobele twizwile bukali bwa Ireeza, uhala kusa mani. <sup>8</sup> I tempele ibezwile busi buzwa kwi kanya ya Ireeza ni kukola kwakwe. Kakwina yabali kuwola kwinjila mo hesi tuhambwe twe inkoto tukwana iyanza ni tobele twa ma ñiloi akwana iyanza ni obele ha mana.

## Ikauhanyo 16

<sup>1</sup> Niba zuwi inzwi ikando li sumpa hanze ye tempele mi niliyati ku mañiloyi akwana iyanza ni wobele, “Mu yende mi muke tile hanze lye fasi tuhambwe tukwana iyanza nitobele twa bukali bwa Ireeza.” <sup>2</sup> Iñiloyi lye ntanzi libayendi mi nilye katila hanze kahambwe hans; bubi ni ku chisa kwa zilabi zibezi ku bantu babena luswayo lwa chibatana, abo baba lumbeki chiswaniso chakwe. <sup>3</sup> Iñiloyi lya lubeli chilye tila kahambwe kalyo mwi wate. Chilya ba malaha, ubu malaha o muntu yo fwile, imi zintu zonse zi hala mwi wate chiza fwa. <sup>4</sup> Iñiloyi lya butatu chilye tila kahambwe kalyo mulwizi, ni milonga ya menzi, imi chizaba malaha. <sup>5</sup> Niba zuwi iñiloyi lya menzi niliti—u lukite, iye yenke wina mi ya bena, iye Yenke yo Jolola— mukuti uba atuli izi zintu. <sup>6</sup> Mukuti babe tili malaha aba zumine niba polofita, ubabahi malaha akunywa; njizona ziba swanela.” <sup>7</sup> Niba zuwi katala ni ke taba, “Eee, Simwine Ireeza Yokolet, inkatulo zako ze niti ni ku luka.” <sup>8</sup> Iñiloyi lyabune libetili hanze kahambwe kalyo he zuba, imi libahewa chibaka chaku hisa bantu ni mulilo. <sup>9</sup> Baba hiswa cha ku hisa kutiza, imi chiba nyansa bubi izina lye Ireeza, iye wina ziho hewulu lye zi inkoto. Kana baba baki kapa ku muha ikanya. <sup>10</sup> Imi iñiloyi litenda iyanza libetili kahambwe kalyo halubona lwe chibatana, imi ififi chilya bwika mubuso walyo. Baba kulya indimi zabo chebaka lya ku sasama, <sup>11</sup> Mi baba nyansi ahulu Ireeza wewulu mukuti baba zuwile ku sasaminwa, kwe zilabi, imi baba kusi kanite kubaka kecho chiba ba tendi. <sup>12</sup> Iñiloyi litenda iyanza nikonke libetili kahambwe kalyo mulwizi lukando, lwa Euphrate. Imi menzi alyo aba hwiswa chebaka lya ku lukisa inzila ya bayendisi bete nibeze kuzwila kubu zwe izuba <sup>13</sup> Niba boni inhuho zotatwe zisa jolwele zi kolo ubu masesi kuzwa mukaholo ke dilagoni, ni muchibatana, ni mu mupolofita wa mapa. <sup>14</sup> Mukuti kwina inhuho imbi za ma dimona ziba ku tenda imakazo za zisupo. Baba kuyenda hanze kuba bayendisi bonse be ifasi chebaka lya kuba kunganya hamwina kache inkondo inkando yelyo izuba lye Ireeza mukando. <sup>15</sup> (“Bone! ni kezite ubu musa! Yo tohonofezwe njozo yo zwila habusu libelela, niyo bika zizabalo zakwe hafwihi ilikuti kanji na zwi hanze chintene ntene, miba bona ku swabiswa kwa mazimo akwe.”) <sup>16</sup> Baba letwa hamwina nabo muchi baka chi sumpwa Ammagidoni muchi Hebelu. <sup>17</sup> linu Iñiloyi litenda iyanza nitobele chilye tila kahambwe kalyo muluhuhu, linu inzwi ikando libazwi mwi itempele ni mulubona, niliwamba, “chikwa tendahala!” <sup>18</sup> kubena mimuni i munika, kupwacoka, kutimba ni zikinyeho itiza —inzikinyeho inkando kuhitiliza zonse ziba pangahali kuzwa muntu

haba bili hansi, njikuti inzikinyeho ibali inkando. <sup>19</sup> Itoplopo inkando iba kauhani muzi baka zo tatwe, mi masika ni ma tolopo aba wi. Linu Ireeza aba sumpi ku hupulisa Babilona mukando, imi abahi iyo itolopo inkomoki izwile iwaine ipangitwe ha bukali bwakwe. <sup>20</sup> Ziwoli zonse ziba mani, imi malundu wonse kana aba ku siwanika. <sup>21</sup> Bukando bo luhuhu lwe invula yamabwe a lema ahulu chieza hansi kuzwa kwi wulu kwiza ha bantu. Baba kuti Ireeza che nkoto zibezi mukuti inkoto ziba kutiza.

## Inkauhanyo 17

<sup>1</sup> Limwina iñiloi ku a kwana iyanza ni lyonke libakwete tuhambwe tukwana iyanza ni tobele imi nikuti kwangu, “Wize, Kani kutondenze kunyanseha kwa musangu mukando yo wikele ha menzi mangi. <sup>2</sup> Njikwali uko ba busi be inkanda ba bapangi busangu. Nji waine ya kwe ya busangu kuti bantu be inkanda bakolwa.” <sup>3</sup> Linu iñiloi chilya ni hinda Muluhuhu kwi halaupa, imi chinabona mwanakazi wikele ha chibatana chisubila chibe zwile mazina abulyansi. Chibatana chibena mitwi ikwana iyanza ni wonke ni maziya akwana ikumi. <sup>4</sup> Mwanakizi aba zwete mwa pepulu ni kusubila aba kabiswe nigauda, mabwe asepahala, ni bulungu. Aba kwete mwiyanza lyakwe inkomoki yegauda izwile zintu zisazuweki sinte ni kusajolola kwa busangu bwakwe. <sup>5</sup> He impata yakwe haba ñoletwe izina lina intoloko ye inkunutu: “Babilona mukando, nyina wa busangu ni zintu zisazuweki za hansi.” <sup>6</sup> China bona kuti mwanakazi aba koletwe cha malaha aba zumine imi ni malaha abo ba basukulukili Jesu. Hani mubona, nibakomokwa kukando. <sup>7</sup> Kono iñiloi chilyati kwatu, “Chinzi hokomokwa? Kani kutolekele intaluso ya mwanakazi ni chibatana chi muhindite, chibatana china mitwi ikwana iyaza ni yobele ni maziya e ikumi. <sup>8</sup> Chibatana cho baboni ku chibali kwina, hanu kachikwina, kono chihafuhi nikwiza kuzwililila mwilindi lisena manimani. Linu ka chizwile habusu ni kusinya. Abo bahala hansi, nabo mazina abo kana aba ñolwa Mwimbuka ya Buhalo kuzwa matangilo e inkanda-kabakomokwe chiba bona chibatana chibali kwinako, ka chikwina hanu, kono chi china hafuhi ni kwiza. <sup>9</sup> Iyi i sumpa munahano wina butali. Mitwi ikwana iyanza lyonke ni yobele ziwulu zikwana iyanza nizobehe hekele mwanaki. <sup>10</sup> Kwina hape ba babusi bakwana iyanza ni bobele. Ba busi bakwana iyanza ba bawi, yenke kwena, imi zumwi keni kwiza; chinasika, uwola kushala bulyo inako zana. <sup>11</sup> Chibatana chi balikwina kwateni, kono ka chikwina hanu, nacho bulyo chibusi chikwana iyanza ni zotatwe, kono nachocha zimwi zibusi zikwana iyanza ni zobehe, imi chikaya ku kusinyeha. <sup>12</sup> Maziya akwana ikumi obani ba busi baseni kutambula mubuso, kono ka batambule buyendisi cha bu busi che inhola hamwina ni chibatana. <sup>13</sup> Izi zina muzezo wonke, imi zitambika kukola ni buyendisi kuchibatana. <sup>14</sup> Kaba buse inkondo kulwisanisa Ingu, kono Ingu kazikome kakuti njiye Simwine uba simwine ni Mubusi wa babusi-imi iye wina niba sumpitwe, baketetwe, ni basepahala.” <sup>15</sup> Iñiloi chilyati kwangu, Menzi obaboni, aho hekele ihule, bantu, inkunga, inkanda, ni mishobo. <sup>16</sup> Maziya ene ikumi oba boni-izo ni chibatana kazi holofaze ihule, kazi mushubule ni mapunu, kaba sinye inyama yakwe, kaba muhise ni kumanisiliza cha mulilo. <sup>17</sup> Kakuti Ireeza aba zibiki muinkulo zabo

kuhinda mulelo wakwe cha kuzuminzana kuha ziho kuchibatana kuti manzwi a Ireeza ezuzilizwe. <sup>18</sup> Mwanaki yoba boni nji itolopo inkando iyendisa hewulu lya babusi bahansi.”

## Inkauhano 18

<sup>1</sup> Hakumana izo zintu chinabona ifiloi limwi ne lisuka kuzwa kwiwulu. Libena maata makando, mi inkanda ibaboniswa chekanya yakwe. <sup>2</sup> Li bahuwelezi chamata enzwi likolete, nilyati, “Abawi, Abawi, Babilona mukando! Abakezi ku bachibaka chamekalo amadimona, matiililo a mahuho onse asajolwele, ni matililo a zonse zisajololi ni zizuni zisaliwa. <sup>3</sup> Chokuti mishobo yonse ibanywi kwiwaine ya bubi bakwe. Malena beinkanda ba bapangi busangu bubi naye. Bauzi be inkanda bababi bafumi chamata abubi bwa ba kuhala.” <sup>4</sup> Kuzwaho ni chi nazuwa inzwi limwi lizwa kwiulu liti, “Mu zwe kwali, bantu bangu, ilikuti kanji muliabeli muzivi zakwe, mikuti kanji mutambuli imwi yenkozi zakwe. <sup>5</sup> zivi zakwe zibalindami kuya mwiulu sina iwulu, mi Ireeza abazezi inkezo zibilala zakwe. <sup>6</sup> Mu mulihe chaku mubozekeza sina mwabalihili bamwi kubabozekeza, mi mumulihe tobele kachabapangi; mwinkomoki ya bakopanyi, mukopanye tobele inteko yakwe. <sup>7</sup> Sina habali kulinyamuna nikuhala mubuhalo bulutu, mu muhe kusasaminwa chabungi ni kuchiswa. mukuti abaliwambili munkulo yakwe, 'Nikele cha bu Simwine wa mwanakazi; kahena ni mbelwa, mi kete ne ni bone chililo,' <sup>8</sup> Nihakwinabulyo lumwiluzuba inkoto zakwe mozize: ifu, chililo, niinanga. Mwahiswe chamulilo, Kakuti Simwine Ireeza wina maata, mi nji muatuli wakwe.” <sup>9</sup> Basimwie benkanda ba bapangi busangu buzwire munzila naye mobalile ni kuswaba chebaka lyakwe hete nibabone buusi bwa nahya. <sup>10</sup> Ka bazimane kule butabule naye, kutiya mwanyandisezwa nibawamba, “Mawe, mawe kumuleneŋi mukando, Babilona, muleneŋi u kolete! Mukuti mwihola yimwina inkoto yakwe chiyasika. <sup>11</sup> Bauzi bahansi babalili ni kumusilisa, sina hakusana kubasina bawula zintu zakwe hape-<sup>12</sup> Izo zintu ibali igauda, silivela, mabwe abutokwa, lipelala, masila eline indotu, pepulu, siluki, asubila, nimifuta yonse yazisamu zinunka bulotu, zintu zamanaka abanzovu, zintu zonse zipangitwe hazisamu zabutotwa, bronze, insipi, marabulu, <sup>13</sup> sinamoni, mununkiso, isense, mira, lisende, waine, oili, busu bunakitwe, buloto, ifombe, imbelele, imbizi ni inkoloi, ni bahikana, ninhuho zabantu. <sup>14</sup> Zichelantu zobanungitwe chamaata ako wonse chikwahita kule nawe. Zonse zachimbombo ni zakulifumisa chizamana, mikete ziwanike hape. <sup>15</sup> Bauzi bezi zintu babafumi chebaka lyakwe kabazimane kule naye butabule kakuti batiya manyando akwe, kilila ni kusilisa katata. <sup>16</sup> Kabawambe, “Mawe, mawe kumuleneŋi mukando ubazwatikitwe mwisila lyelineni, ni pepulu, ni asubila, mi abakabiswe ni gauda, inyanga zidula, ni liperela. <sup>17</sup> mwihola yimwina bufumu bonse bubashinyehi.” Muyendisi yense wachikepe, Bayembani bamwiwate vonse, bazuhi, mi nabana bonse bahala chazintu zipangwa mwiwate, babazimani butabule. <sup>18</sup> Babalili ahulu hababona busi bwakwe nahya. Nibati, “Muleneŋi nzi uswana ni muleneŋi mukando?” <sup>19</sup> Babasoheli itwe hamitwi yabo, ni kuhuwa, kulila ni kusilisa, “Mawe, mawe ku muleneŋi mukando uko bonse babena zikepe babafumi kubufumu bwakwe. Mwiwihola imwina chasinyiwa.” <sup>20</sup> Musange

chakwe, iwulu, inwe muzumina, baapositola, ni bapolofita, mukuti Ireeza abaleti inkatulo yenu kwali.”<sup>21</sup> Iñiloi lina maata nilya hinda ibwe likola insilwana inkando yakusilisa ni kuli sohela mwiwate, niliti, “Munzila inabulyo, Babilona, muleneñi mukando, kausohelwe hansi chakubenga mikete niwubonwe hape.”<sup>22</sup> Muhuwo we herepa, bazimbi, baliza impala ni baliza impeta kete niwuzuweke kwako ni kamuta. Kakwina mubezi wamufuta uhi nowuhi yete nawanike kwako. Kakwina milumu wachigayo wete niwuzuweke hape kwako.<sup>23</sup> Iseli lye lambi kete nilimunike kwako hape. Manzwii a munyali ni munyaliwa kete niazuweke kwako hape, mukuti wauzi bako ibali bamukwaye benkanda, mi chisi chibachengetwe chabulozi bwako.<sup>24</sup> Mumalaha akwe kubawaniki amupollofita ni abazumine, ni malaha abantu bonse babehahiwa hansi.”

## Inkauhanyo 19

<sup>1</sup> Kuzwa kwezi zintu Nibazuwi chintu chikola sina linzwi ikando lyabantu bangi bena kwiwulu nibati, “Haleluya, Impuluso, Ikanya, ni ziho zizwila kwe Ireeza wetu.”<sup>2</sup> Inkatulo, ni kuluka, linu cha atula Mahule bakando babali kusinyasinya inkanda chabusangu. Abahindite chakubozekeza cha malaha amuhikana wakwe, awo iye mwine abetikili kwali.<sup>3</sup> Linu babawambi tobele: “Haleluya! busi nibwazwilila kwali kuzwa kusena mamanani.”<sup>4</sup> Bakulwana bena makumi obele ni bone. Ni zibumbantu zone nibalibwikite kuzifateho ni balapela Ireeza yabekele achihuna. Bonse babakuta kuti, “Ameni. Haleluya!”<sup>5</sup> Linu linzwi nilyeza kuzwililila hachihuna, niliti, “Kulumbwe Ireeza wetu, mubonse bahikana bakwe, inwe bamutiya, mubonse, basali, babutokwa ni benaziho.”<sup>6</sup> Linu chinazuwa mulumo ubali kukola sina wabantu bangi bangi, sina kuchuma kwamenzi mangi, imi sina kupalakata kwe invula ilenga, bati “Hallelujah! Mukuti Simwine ubusa, Ireeza yobusa hewulu lyazonse.”<sup>7</sup> Twwende tusangalale ni kutaba hahulu imi mumuhe ikanya kakuli mukiti weseso lye Mbelele chiwasika, ni museswa chalibakanya.<sup>8</sup> Abazumininwa kuzwata zibenya ni boneka hande sina iline' (mukuti iline yakuluka izimanina bantu banjolola).<sup>9-10</sup> Iñiloi chilyati kangu, “Ñole: Imbuyoti njiyabo basumpitwe kumukiti we nyalo lye Mbelel.” Abawambi bulyo nikwangu, “Aa njimanzwi abuniti a Ireeza.” Nibali kokobezi habusu bwa matende akwe kumulapela, kono chati kwangu, “Sanzi utendibulyo! Nizumwi muhikana uswana nawe imi bamukulwako bakwete bupaki kuamana ni Jesu. Mulapele Ireeza, mukuti bupaki kuaman ni Jesu muluhuhu lwe chipolofita.”<sup>11</sup> Kuzwaho chinabona iwulu niliyaluka, imi chikwaboneka imbizi ituba. Yabakwichile hateni usumpwa yosepahala imi weniti. Kuluka kwakwe ni kuatulo kwakwe kushiyeme ni kulwa kwakwe.<sup>12</sup> Menso akwe aswana sina lulimi lwa mulilo, imi hamutwi wakwe henamishukwe mingi. Wina izina liñoletwe hali kuti nangati umwina yolizi kono lizibitwe iyemwine.<sup>13</sup> Uzwete imbati libenikwa mumalaha, imi izina lyakwe lisumpwa Inzwi lye Ireeza.<sup>14</sup> Chisole chakwiwulu chiba mwichilile hembizi zituba, nibazwete zizabalo zalineni inahande, zituba ni kunjolola.<sup>15</sup> Mukati kakaholo kakwe chikwazwa mukwale ushengete mumambali onse uwo ubawisi chisi chonse, imi mwababuse chekeli yesipi. Njeje chatalyatole chilubilo chewane yebeine yabukali bwe Ireeza wina

maata onse. <sup>16</sup> Wina izina liñoletwe hachapalo ni chilupi chakwe: “Mubusi wa babusi ni Simwine uba simwine. <sup>17</sup> Chinabona Iñiloi lizimene mukamwi. Chilahuweleza chamuhuvo mukando wakusupa zizuni ziwuluka mwimbimbiyulu, “Mwize, mukungane hamwina kamukiti mukando wa Ireeza. <sup>18</sup> Mwize zamulye mibili ibasimwine, mibili yabahitile chisole, mibili yendwalume, mibili ye mbizi ni batati bazo, imi ni mibili yabantu bonse, ni balukulwilwe ni bahikana, basena mubena ni bakotele. <sup>19</sup> Nibaboni chibatana ni basimwine benkanda ni masole babo. Babakungene nikulukisa inkondo naye yabakwichile hembelesa, ni masole bakwe. <sup>20</sup> Chibatana chibahapwa imi naye mupolofita wamapa yabakupanga imakazo habusu bwakwe. Chechi chisupo chachengelela abo babatambuli inombolo ya chibatana imi nikulapela chibumbantu. Bobele kubali nichibasohelwe nibahala mwiziba lyamulilo wasulufula. <sup>21</sup> Bungi bwabo babehayiwa chilumo libakuzwa mumulomo wozo abakabutiza indonki. Zizuni zonse zibali mibili yabo ibafwile.

## Inkauhanyo 20

<sup>1</sup> Kuzwa aho china bona iñiloi nilizwa kwi wulu liza hanshi, Libakwina i nki ye lindi lisena ma manimani, mi libakwete incheni inkando mwi yanza. <sup>2</sup> Chilya kwata i dilagoni, inzoka ya kale, isumpwa diabulusi, kamba Satani, mi ni kumusumina ka myaka ikwana wani sauzandi. <sup>3</sup> Cha musohela mwilindi lisena ma manimani, chali yala ni kuli lamika hewulu lya kwe. Ku babi bulyo kuti ka nji a chengi macaba hape kusikila myaka itenda wani sauzandi chiya mana. Kuzwa aho, uswanela ku lukululwa mwi nako zana. <sup>4</sup> Linu china bona mabona. Ba bekele hateni njabana baba hewa ziho zaku atula. Hape china bona myoyo ya bana baba kosolwa mitwi chebaka lya bupaki bwa Krisite mi ni inzwi lya Ireeza. Kena baba lumbeki chi batana kamba chi bumbeho cha cho mi baba kani kutambula luswayo lwa cho ha bulubi bwabo kamba he yanza. Baba bolelwa buhalo, mi baba busi ni Kriste myaka ina sauzandi. <sup>5</sup> Bungi bwa bantu kahena baba bolelwa buhalo konji ha kumana myaka itenda wani sauzandi. uku nji kubuka kwa matangilo. <sup>6</sup> U fuyoletwe ni ku jolola iye yo wanika mu kubuka kwa matangilo! he wulu lyechi ifu lya bubeli kalina ziho. Ka babe ma prista ba Ireeza ni Krisite mi kaba buse naye mu myaka itenda wani sauzandi. <sup>7</sup> Myaka ina wani sauzandi chiyeza kuma manimani, Satani mwa lukululwe kuzwa mwi ntolongo. <sup>8</sup> Mwa yende ni ku chengelela mishobo mu nkona zone ze fasi-Gogo ni Magogo-kuba leta hamwina mwi nkondo. Ka babe bangi ubu isekese lye wate. <sup>9</sup> Baba yendi he baala liyalukite lye fasi ni kuzimbuluka malapa aba lumeli, muleneñi usakahala. Kono mulilo uba soki kuzwa mwi wulu ni kuba hisa. <sup>10</sup> Diabulusi, ya baba chengeleli, aba sohelwa mwi wate lya mulilo wa silufula, umo mubasohelwa chibatana ni ba tanikizi ba mapa. muba nyandiswe musihali ni masiku ka kuya kusamani. <sup>11</sup> Kuzwa aho china bona lubona lukando lutuba mi ni ya bekeele hateni. Inkanda ni wulu ziba tiyi kuzwa mubusu bwa kwe, kono kahena kubena chibaka kuziwola kuya. <sup>12</sup> Ni ba boni bafwile—ba kolete ni basa sepahali—nibazimene habusu bwa lubona, mi imbuka zi be yalwilwe. Linu imwi imbuka chi ye yalulwa—Imbuka ya Buhalo. Bafwile baba atulwa kachi ba ñoletwe mwi mbuka, ka kuya cha mitendo yabo. <sup>13</sup> Iwate liba lekezi

bonse ba bena mwateni. Ifu ni makumbu ziba lukululi bafwile ba bena mwa teni, mi bafwile ba ba atulwa chakuya ka mitendo yabo. <sup>14</sup> Ifu ni makumbu zi ba sohelwa mwi wate lya mulilo. Ili ifu lya bubeli—i wate lya mulilo. <sup>15</sup> Izina lya zumwi ni zumwi haiba kali waniki ni liñoletwe mwi Mbuka ya Buhalo, aba kusohelwa mwi wate lya mulilo.

## Inkauhaunyo ya 21

<sup>1</sup> Linu chinabona iwulu ihya ni nikanda inhya, mukuti iwulu lyetanzi ni inkanda lyetanzi zibamani, imi kana kubasina iwate. <sup>2</sup> Chinabona muleneñi, Jerusalema muhya, kuti chilizwa mukati kewulu kuzwa kwe Ireeza, yolibakanya sina museswa yolilotuseza muhyabwe. <sup>3</sup> Nibazuwi inzwi inkando lizwa hachihuna licho, “Bone! Chibaka chabwikalo bwa Ireeza chinakubantu, imi mwahale nabo. Kababe bantu bakwe, imi Ireeza iyemwine kabenabo imi kabe Ireeza wabo. <sup>4</sup> Kasinde zisonzi zonse mumenso abo, imi kese nikube nifu, kapa kubilayela, kapa kulila, kapa kuchiswa. Zintu zakale zibahiti. <sup>5</sup> Yabakele hachihuna chati, “Bone! Nipanga zintu zonse buhya,” Nati, “Ñole izi hansi kakuli aa manzwi asakusima ni buniti.” <sup>6</sup> Chati kwangu, “Izi zintu chizamana! Njime wetanzi ni wamamani mani, wa matanginzo ni wa maminizo. Yofwile innyotwa kanimuhe chakunywa nikusena chaliha kuzwa muchisima chamenzi abuhalo. <sup>7</sup> Yetanazunde kayole izi zintu, imi Kanibe Ireeza wakwe, imi kabe mwan'a ngu. <sup>8</sup> Kono kumapyeha, betumelo inini, basenahabekele, behayi, basangu, balozi bachikwame, balapela maswaniso, imi nimasawana bonse, chibaka chabo kachibe chiziba chamulilo umbukuka wo bumbe. Njokuti njefu lyabubeli.” <sup>9</sup> Limwi kumañiloi atenda iyanza in obele chilyeza kwangu, limwi libakukwete tuhambwe twizwile inziyezi zikwana iyanza nitobele, imi chati, “Wize kunu. Munikutondeze museswa, mwihyabwe we Mbebele.” <sup>10</sup> Linu chanitwala Muluhuhu helundu inkando liwumbukite imi nikunitondeza muleneñi uchenete wa Jerusalema niukazwa kwiwulu kwe Ireeza kwiza hansi. <sup>11</sup> Jerusalema ibene ikanya ya Ireeza, imi iseli lyateni libenya sina ibwe lyabutokwa, sina ibwe lyajaspelibebele sina kristal. <sup>12</sup> Ubikitwe mulukwakwa lukando lule kwina milyango ikwana ikumi ni yobeke, ni mañiloi akwana ikumi niwobeke. Imi hamilwango habañoletwe mazina abana ba Isilaele akwana ikumi ni wobeke. <sup>13</sup> <sup>14</sup> Imota lya muleneñi libena mitomo, ina ikumi ni milyango yobeke, imi kwili kubena mazina ene ikumi ni obeke abalutwana bena ikumi ni bobele be Imbebele. <sup>15</sup> Yabawambi name abena inkoli yakupimisa ibatendwa chegauda kupimisa Muleneñi, milyango ni mamota ateni. <sup>16</sup> Muleneñi ubazalitwa chenkona zone; bule bwateni bubali kulikanelela ni mubufuhi bwateni, Abapimi muleneñi chenkoli yakupimisa, zikiti zina ikumi ni zobeke mubule (bule bwao, zibalikuswana). <sup>17</sup> Abapimi bulyo ni mota lyateni, bukima bwamakiyibbu ena 144 chamupimino wabuntu (Ili ichita chipimo cheñiloi hape). <sup>18</sup> Imota libazakwa chajaspelibebele ni muleneñi chegauda ineine, ni gilasi ibelele. <sup>19</sup> Mitomo yamamota abakabiswe chamabwe amifuta yonse. Chetanzi ibali jaspera, chabubeli ibali safiro, chabutatu ibali kaledo, chabune ibali emeralda, <sup>20</sup> Chikwana iyanza ibali sardlusi, chikwana iyanza ni chimwina ibali sardiyo, chikwana iyanza ni zobeke ibali krisolito, chikwana iyanza ni zotatwe ibali berilo,

chikwana iyanza ni zone ibali topazo, chikwana ikumi ibali krizoprazo, chikwana ikumi ni chimwina ibali jasinto, mi chikwana ikumi ni zobele ibali ametisto. <sup>21</sup> Ziyazo zamilyango zibena ikumi ni zobele zibali zalipelela; umwi ni umwi wamilyango ubapangiwa hepelela yonke. Mikwakwa yamuleneñi ibali yagauda yineyine, sina igilazi ibelela. <sup>22</sup> Kananibaboni itempele mumuleneñi, chokuti Simwine Ireeza wina Maata Wonse ni Mbelele bekele mwitempele. <sup>23</sup> Muleneñi kakubena intokwahalo yezuba kapa mwezi ili kutu kubenye mukuti ikanyaye Ireeza ibamuniki hateni, mi ilambi lyate imbelele. <sup>24</sup> Mishobo kayiwambe cheli iseli lyowuna muleneñi. Malena bahansi kabalete chifumu chabo muwuli. Mushobo wete upuluswe kawuwambe cheseli lyowuna muleneñi. <sup>25</sup> Minyango yatani keti niyiyale mukati kezuba, mi ketenikube masiku kwateni. <sup>26</sup> Kabalete mwateri chifumu chabo ni tompo yakumisho yabo, <sup>27</sup> mikakwina chisajololi cheti nichinjile mwateri. Kapa zumwi ni zumwi yotenda chintu chonse chiswabisa kapa chichenga yeti nenjile, kono haisi abo bamazina añoletwe muMbuka ye Mbelele ya Buhalo.

## Inkauhanyo 22

<sup>1</sup> Linu iñiloi chi lyanitondeza iwate lya menzi a buhalo, a chena ulu kristale. Ibali kububa kuzwa ku mushukwe wa Ireeza ni ku e Ngunyana <sup>2</sup> mukati ke tolopo. Ku mabbali onse o lwizi kubena isamu lya buhalo, libikite mifuta ya miselo itenda ikumi ni tobele, imi libika iyo miselo mwezi ni mwezi. Makoba e samu a kuhozisa inkanda. <sup>3</sup> Kete ni kube ni kukutwa hape. Lubona lwa Ireeza ni lwe ingunyana kalube mwi tolopo, imi bahikana bakwe muba musebeleze. <sup>4</sup> Mubabone chifateho chakwe, imi izina lyakwe muliñolwe he mpata zabo. <sup>5</sup> Kete ni kube ni masiku hape; kete nikube ni ntuso ye seli lye ngunyana kapa iseli lye zuba kakuti Simwine Ireeza mwa ba benyeze. Muba buse kuya kusa mani. <sup>6</sup> Iñiloi chinya wamba kwangu, “Aa manzwi asepahala imi e niti. Simwine, Ireeza we inhunho zama polofita, abatumi iñiloi lyakwe li kabonise ba hikana bakwe chiswanela ku pangahala hahanu.” <sup>7</sup> “Bone! Nikezite hahanu! yo fuyoletwe njozo yo kuteka manzwi atanikizwe mweyi imbuka. <sup>8</sup> Ime, Johani, njeme niba zuwi ni kubona izi zintu. hani zuwa ni kuzibona, china lala hanzi habusu bwa matende e iñiloi ku mulumbeka, iñiloi liba ni tondezi izi zintu. <sup>9</sup> Chi lyawamba kwangu, “Sanzi uchiti bulyo! name niwa bamwi bahikana nina nanwe niba kwenu ba polofita nabana bakuteka manzwi ena mweyi imbuka. lumbeke Ireeza!” <sup>10</sup> Cha wamba kwangu, “Sanzi upangi i nkunutu manzwi a atanikizwe mweyi imbuka, inako ina hafuhi. <sup>11</sup> Iye yasa shiyeme. mumusiye azwile habusu nikupanga zisa shiyeme. Iye yopanga busangu bubi, mumusiye azwile habusu ni busangu bubi. Iye yo shiyeme, mumu siye azwile habusu niku tenda zishiyeme. Iye yo jolola, mumu siye azwile habusu niku jolola.” <sup>12</sup> “Bone! Nikeza chakuhwela. Imi mupuzo wangu wina name, kuliha zumwi ni zumwi chakuya ba mwa batendeli. <sup>13</sup> Njime alfa ni omega, kubusu ni kumasule, intanzi ni ma manimani. <sup>14</sup> Bafuyoletwe njabo bashanza minganjo yabo ili kuti babe ni intukelo ya kulya kwi samu lyabuhalo imi ni kwi njila mwitolopo cha mulyango. <sup>15</sup> Hanze kwina bambwa, balozi, basangu, behayi, bamaswaniso, imi ni bonse basaka

niku tenda mitendo isena buniti. <sup>16</sup> Jesu, nibatumi iñiloi lyangu kuha bupaki kwenu kuamana izi zintu che inkeleke. Njime ni muhisi ni isika lya Dafita, inkani i benya ya kuseni.” <sup>17</sup> Luhuhu ni Musesiwa ziti, “Wize” Siye uzo yo zuwa ati, “Wize!” Yense yo fwile inyotwa, musiye eze, imi yense yo ilakaza, umusiye awane menzi abuhalo nikusena intifo. <sup>18</sup> Niha bupaki kubonse ba zuwa manzwi e chi polofita cheyi imbuka: Heiba zumwi mwawekeze kuali, Ireeza kawekeze kwali inkoto zi ñoletwe kuamana ni mweyi imbuka. <sup>19</sup> Heiba zumwi uzwisa mu manzwi amweyi imbuka ya chipolofita, Ireeza kazwise inkabelo yakwe mwisamu lya buhalo imi ni mwitolopo ijololwa ziñoletwe kuamana mweyi imbuka. <sup>20</sup> Iye yoha bupaki kwezi zintu uti, “Eee! Nikeza chokuhwela.” Amen! Wize, Simwine Jesu! <sup>21</sup> Imi musa wa Simwine Jesu ube ni zumwi ni zumwi. Amen.